


YAMÁRAM-CHICHAM

Nuevo Testamento



SUKÚ-WEÁ-NEKAPTAI - 2010

YAMÁRAM-CHICHAM

VICARÍA DE PASTORAL SHUAR Y ACHUAR.

WEA-NEKAPTAL.

Sucúa 2010.

1993-2007.

P.Siro M. Pellizzaro. S.D.B.
Gracia Martinez. M.N.
Nawir Rosario Tsere. M.N.
Masuink Teresa Juá. M.N.
Chapáik Carmen Juank. M.N.
Dc. Washíkiat Pedro Tsere,
Tuntiak Patricio Katan'.
Fausto Oswaldo Naweck.
Pedro Leonidas Entsakua.
Dmingo Vidal Tsapak Suámar.

Apach-chamnumiá shuar-chamjái yapajiwármiai,

2010.

P,Siro M. Pellizzaro. S.D.B.
P.Natale Pulici. S.D.B:
P.Carlos Zanutto. S.D:B.
P.Ernesto Ánkuash.
Dc.Washíkiat Pedro Tsere.

Emésramun iwiáratin iisármiai.

Autoriza la publicación:

✚ Mons. Néstor Montesdeoca Becerra.
Obispo Vicario Apostólico de Méndez.

WÁINTIAI.

Presentación.	4
Pénker.Chicham:	
Wáimiaku Matéu aárma(Mt.)	7
Wáimiaku Markus aárma (Mk.)	100
Wáimiaku Rukas aárma (Rk.)	158
Wáimiaku Juank aárma (Jn.)	252
Akátramun túramuri (Tur.)	319
Paprun papirí:	399
Ruman aátra (Rum.)	400
Éemka Kurintiun aátra (1 Kuri.)	438
Ataksha Kurintiun aátrta (2 Kuri.)	473
Karasian aátra (Kar.)	495
Episiún aátra (Epi.)	507
Jiripsun aátra (Jir.)	519
Kurusun aátra (Kuru.)	528
Jiremúnkan aátra (Jirm.)	536
Éemka Tesarúnikian aátra (1 Tes.)	538
Ataksha Tesarúnikian aátra (2 Tes.)	545
Éemka Timiutéun aátra (1 Tim.)	550
Ataksha Timiutéun aátra (2 Tim.)	560
Titun aátra (Ti.)	567
Israéran aátra (Isr.)	571
Sántiak aárma (San.)	595
Éemka Kaya aárma (1 Ka.)	605
Ataksha Kaya aárma 2 Ka.)	616
Jutas aárma (Jut,)	622
Éemka Juank aárma (1 Jn,)	626
Ataksha Juank aárma (2 Jn.)	636
Nuyá Juank aárma (3 Jn.)	637
Iwiáiniakma (Iw.)	639
Chicham(Glosario)	678
Mapas	682

PRESENTACIÓN.

Bendito sea el Dios, Padre de Cristo Jesús nuestro Señor, que nos ha bendecido en el cielo en Cristo con toda clase de bendiciones espirituales.... En él y por su sangre, fuimos rescatados y se nos dió el perdón de los pecados, fruto de su generosidad inmensa, que se derramó sobre nosotros. Ahora nos ha dado a conocer, mediante dones de sabiduría e inteligencia, este proyecto misterioso suyo, fruto de absoluta complacencia en Cristo. Pues Dios quiso reunir en él tanto los seres celestiales, como los terrenales...para que al fin sea alabada su gloria. (Ef. 1,1-13).

La vocación del hombre y de todos los pueblos es ser alabanza de la gloria de Dios. Y, por eso, Dios nos hizo conocer el Misterio de su Voluntad: hacer que todos los pueblos tengan su realización total en Cristo Jesús.

La tarea misionera consiste prioritariamente en llevar esta Buena Noticia y ayudar a hombres y mujeres, a jóvenes y ancianos, a niños y niñas a conocer este Misterio de Salvación e invitarlos a abrir las puertas de su vida a Jesús que viene a salvarnos.

Es tarea de la misión, anunciar que el Dios (Arútam) de nuestros padres es el Dios que Jesús nos revela y que nos da a conocer como Padre de todos.

Por eso los misioneros queremos que Jesús entre en todos los lugares y en todas las familias y haga llegar su Salvación, su perdón y la reconciliación. Y queremos que Jesús entre en las casas de los shuar, hablando su idioma, como habló en arameo entre los judíos de su tiempo

Jesús quiere entrar como un miembro de la familia, quiere hacerse conocer y permanecer en nuestros hogares con su Espíritu, con su Paz, con su Salvación y acompañar a cada uno en sus tareas diarias.

Las primeras comunidades cristianas de Jerusalén, de Corinto, de Éfeso no se contentaban con que los Apóstoles y los misioneros les anunciaran que Jesús nos liberó del pecado con su muerte y resurrección, que entregó su vida para nosotros y que nos llama a la conversión y nos propone una nueva manera de vivir en comunidad, Querían conocer su persona, su misión, su poder extraordinario, su enseñanza, algún episodio, o palabra memorable.

Por eso los que vivieron con Él, los Apóstoles y discípulos iban contando y relatando los hechos y las palabras de Jesús en las distintas circunstancias en que se encontraban. Todos los que entraban en las comunidades querían saber algo de Jesús.

Fueron escribiendo unos pocos hechos, hasta que los santos evangelistas Mateo, Marcos, Lucas y Juan los ordenaron y completaron en sus libros. Estos libros, llamados Evangelios (Pénker-Chicham), recogieron la predicación oral que las comunidades cristianas transmitían desde el día de Pentecostés, confirmada por los testigos oculares.

El Espíritu Santo hizo que los Evangelistas nos presentaran a Jesús como el Mesías (Utsumka) enviado por Dios para anunciar y realizar el Reino de Dios en medio de los hombres y nos dieran a conocer la nueva economía de Dios en cuanto al hombre y a su salvación. Él no viene a eliminar, sino a perfeccionar lo antiguo. No viene a abolir las formas de vida de los shuar, viene a darles cumplimiento y llevarlas a la plenitud.

¿ Quieres que tu vida llegue a alcanzar la plenitud ? Abre las puertas a Jesús que viene con su Evangelio. Entra en este nuevo plan de Salvación que nos propone Dios. Es una nueva manera de

organizar la casa, la vida, la familia, la sociedad y el mundo, haciendo que todo tenga


por Cabeza a Jesucristo, Con Jesús a la cabeza es más fácil hacer caer las barreras del odio y del rencor y encontrarnos como hermanos en la tarea de hacer más humano y cristiano nuestro centro, nuestro barrio, nuestra ciudad...nuestro mundo.

Agradezco de corazón el trabajo del equipo de los Papru-aents y de las Marí-nua que ha realizado la traducción del Nuevo Testamento (Yamáram-Chicham) y a quienes la han revisado a nombre mío, ya que nos brindan la posibilidad de que Jesús entre en todos los hogares de los shuar, hablando en su propio idioma.



+ Néstor Montesdeoca Becerra.
Obispo del Vicariato Apostólico de Méndez.

PÉNKER - CHICHAM WÁIMIAKU MATEU AÁRMA.



AKANKAMU 1.

Jesusan weátri.

Rk.3,23

- 1 Jesús, Tawitian uchirí, Apráamnasha uchirí asamtai, nii weátri ju ainiáwai.
- 2 Apráamka Isáakan yajutmarmia, tímiaja. Jakup, Isáakan uchirisha, Jután nii yachíniash yajutmarmia, tímiaja.
- 3 Jutá, Tamaran nuátak, Páresan Seransha yajutmarmia, tímiaja. Páressha Esrunan yajutmarmia tímiaja.
- 4 Aram, Esrunan uchirisha, Aminatapan yajutmarmia, tímiaja. Naasunk, Amínatapan uchirisha, Sarmunkan yajutmarmia, tímiaja.
- 5 Sarmunk Raapan nuátak, Púusan yajutmarmia, tímiaja. Púusash Rutan nuátak, Upetan, Jesén aparín, yajutmarmia, tímiaja.
- 6 Tawit, Jesén uchirí, Uríasan tarímtarin nuátak, Sarumunkan, Rupuáman aparín, yajutmarmia, tímiaja.
- 7 Rupuam, Apíasan, Asán aparín, yajutmarmia, tímiaja.
- 8 Jusapat, Asán uchirí, Juraman, Usíasan aparín, yajutmarmia, tímiaja.
Juatam, Usíasan uchirí, Akasan, Esekíasan aparín, yajutmarmia, tímiaja.
- 10 Manasés, Esekíasan uchirí, Amunkan, Jusíasan aparín, yajutmarmia, tímiaja.
- 11 Israéran aéntsrin Papirúnianam jukiármatai, Jusías nuí pujús, Jekuníasan nii yachíniash yajutmarmia, tímiaja.
- 12 Papirúnianmaya jjiinkí, Jekunías, Saratiéran, Surupaperan aparín, yajutmarmia, tímiaja.
- 13 Apiut, Surupaperan uchirí, Eriakimian, Asuran aparín, yajutmarmia, tímiaja.
- 14 Satunk, Asuran uchirí, Akimian, Eriútan aparín, yajutmarmia, tímiaja.

Mt. 1, 15.

- 15 Ereasar, Eriútan uchirí, Matanan Jakupan aparín, yajutmarmia, tímiaja..
- 16 Jakupan uchirí, Jusé, Marín nuatkamtai, Maríniam Jesús, Utsumka tama, akíniámia, tímiaja.
- 17 Tuma asamtai, Apraamnumia juárki, Tawítnium jeátin, nawe-áintiuk Jesusan weátri ainiáwai. Aíntsank, Tawitnumia juárki, Papirunia jukímiunam jeátin, nii weátri nawe-áintiuk ainiáwai. Tura, Papirunia jukímiúnmaya juárki, Utsumka Jesús akiniámia nuí jeátin, nawe-áintiuk ainiáwai.

Jesusan akiniámuri.

Rk. 1, 27

- 18 Utsumka Jesús juní akiniámia, tímiaja. Nii nukurí Marí, Jusé anajmármari asa, tsaníatsaink lwiáikratin ajaprumtikkiámia, tímiaja.
- 19 Nii anajmárruri Jusé, imítmachu asa, iwiáiniatsuk ajapátaj-sa wakerimia, tímiaja.
- 20 Tu enentámia pujái, Arutman Pasukri mesékranam tarí, chicháruk: - Juséa, Tawitian uchiriya, lwiáikratin ajaprúmtikkia asamtai, anajmármaram Marí páchitsuk nuatkatá.
- 21 Nii Uchirí, ashí nii aéntsrin tunanumia uwémtikin asamtai, Jesús anaikiatá - tímia, tímiaja.
- 22 Arútam waimiakúnmani tímia nu uminkiat' tusa, nuka turunamia, tímiaja.
- 23 Kame yaúnchu Arútam chicháak: - Antínkchamu nua ajápruk, uchín jurértatui. Nu uchi Arutmaitiat, íjai tuke pujú asamtai, "lijai-Arútam" tu anaikiártatui - tímia, tímiaja.
- 24 Jusesha mesékramar, shintiar, Arutman Pasukri timia núnisank, Marín nuatkamia, tímiaja.
- 25 Penke tsanítsuk, Marí uchín jurérmatai, Jesús anaikiámia, tímiaja.

AKANKAMU 2.

Úunt nékau tariáru.

- 1 Perénknum, Jutéa nunkánam, Jesús akinia aí, úunt ti nekau, tsawái-nantu tana aiyá, úunt Erutes pujámunam, Jerusarénknum, táarmia, tímiaja.
- 2 Nuí táar, aníntruiniak: - Jutíusan úuntri tuí akiniáit ? Nii yáari wáinkia asar', tekemrúrtaj-sar' winiáji - tu chicháarmia, tímiaja.
- 3 Nuna antuk, úunt Erutes nii aéntsrijai wake mesek, ekemsámia, tímiaja
- 4 Tura wean úuntrin, aents unuímiaru áinia aúnash untsúkar: - Utsumka-ashí-tujintcha , tuí akiniatniuit ? tu inintrusármia, tímiaja.
- 5 Tu tai, chicharáiniak: - Perénknum, Jutea nunkánam, akiniatniuíti.
- 6 Kame niiniyá Israéran úuntri jíinkitin asamtai: "*Perenk, Jutéa nunkánam ishitiupchiitiat, ti náatui*", tu yaúnchu wáimiaku Ujajmatáiniam aaruíti - tíarmia, tímiaja.
- 7 Nuna tuiniákui, Erúteska ti nékau aéntsun chicharáiniak: - Urutia yáasha jíinin wainkiamárum ? - tusa, úusank aniasarmia, tímiaja.
- 8 Nuyá Perénknum akupáiniak: - Nuí werum, pénger iníntrusrum. wainkiatárum. Wainkiárum, winiásha ujatkatárum. Wisha werín tekemtúrtatjai - tímia, tímiaja.
- 9 Tu tai, ti nekau aéntska weármia, tímiaja. Tura yáasha yajayá wainkiármia nu tuke éemka we, Uchi pujámunam ekemsamia, tímiaja.
- 10 Yaan íisar, ti warásar jeá wayáwar, Uchín nii nukurí Maríjaj wainkiármia, tímiaja.
- 11 Tura tekémturar, kurin, shiripkin, kunkuínniasha susaru, tímiaja.

Mt.2,12.

12 Nuyá mesékranam Arútam: - Erutesáini wérap - tu tai, chíkich jíntianmani waketkiármia, tímiaja.

Ejíptunam pisarma.

13 Ti nekau aéntska waketkiáru aí, Arútman Pasukri Jusén tarur, mesékranam chicháruk: - Nantaktiá ! Uchi nii nukuríjají jukim, Ejíptunam wetá. Erutes uchín máataj-sa éaa asamtai, nuí pujustá. Wakétkimnium tusan wi ujaktátjame - timia, tímiaja.

14 Tutai, Juseka nantakin, nu káshik Uchín nii nukuríjají jukí, Ejíptunam pisarmia, tímiaja.

15 Kame Arútmaka yaúnchu wáimiakúnmani chicháak: - *Ejíptúnmayá winia Uchirun untsúktatjai* - tiniu asamtai, Erutes jáamam nuí pujumia, tímiaja.

16 Erútessha anánkamu asa, ti nékau aents^u ujakármia nuna enentáimias, Perénknun, ayatrainiánash, ashí áishmankach' jimiará uwí jeáchu pujuármia nuna máawarat' tusa, ti kajek nankin-juun akupkamia, tímiaja.

17 Yaúnchu wáimiaku Jeremías chicháak:

18 - *Ramá nunkánam ti úutainiak, úur ajainiáwai. Kame nii uchirí jákarmatai, Raker atsankrachminiáiti* -. Tu etserkamia nuka aminkíamia, tímiaja.

Nasarétnum waketkímiu.

19 Erúteska jakamtai, Arutman Pasukri Ejíptunam ta, mesékranam Jusén chicháruk:

20 - Uchín máataj tíarmia nuka jakármatai, Uchi nii nukuríjají jukim, Israer nunkánam waketkitiá - tímia, tímiaja.

21 Jusé, Marín nii Uchiríjají jukí, Israer nunkánam waketkímia, tímiaja.

Mt.2,22.

- 22 Erútesan uchirí, Arkeráu, Jutean úuntri asamtai, nuna arántuk, mesékranam ujakma asa, Kariréa nunkánam wemia, tímiaja.
- 23 Tura, yaúnchu waimiaku tiniu áarmia núnisank, Nasarétnum pujumia, tímiaja.

AKANKAMU 3.

Imiákratin Juank.

Mk.1,1; Rk.3,1; Jn.1,19

- 1 Jutéa nunkánam, nunka itiárkanam, Juank tamia, tímiaja.
- 2 Nuka chicháak: - Arútam-irúnramu tatin asamtai, enentáimrarum, atumí anentái yapajiatárum - tusa, etserkí wemia, tímiaja.
- 3 Kame yaúnchu wáimiaku Isafás, Juankan enentáimtus chicháak: - Nunka itiárkanam chicham: "Atumí Úuntrin jintí iwiárum, naka awajsatárum", takui, anturkatárum - timia, tímiaja.
- 4 Juankka tankun nuapén entsar, nujáinkia emenmámamu, chinin yumirín, tsampútnasha yumia, tímiaja.
- 5 Jerusarenknumia, Jutéanmaya, Jurtán nunkánmayasha jutíu-aents niin ístaj-sar, werin áarmia, tímiaja.
- 6 Enentáimrar, nii tunarin etserkármatai, Juank Jurtán

entsánam imiáu áarmia, tímiaja.

- 7 Pariséu, Satuséusha imiatit' túsar winínian wáinkiar, chicháak: - Napia aniu tírmesha, uwemramniashítrum ?
- 8 Apráaman uchirintji tútsuk, nekás enentáimrarum, pénger ajastárum.
- 9 Kame, Arútam wakérakka, ju kayan Apráaman uchirí awajsarminiáiti.
- 10 Iis, kanamp kampuwan tsúpiatsuk ? Aínsank Arútam yamáikia ashí neréatsna nuna tsupik, jinium epéawai.

Mt.3,11.

- 11 Wíkia, aents^u anentaimrarat' tusan, aya entsájaink imiáajai. Antsu, winia ukúruí chíkich imiá kakáram winiáwai. Níijáinkia wikia ti peejcháitjai. Nuka, jiya áintsank, nii Arútmarijai imiatmíttiarme.
- 12 Atúmniasha nusea aínsank tishírmárum, nerén pénker ikiús, sáepenska tuke kajínkchatai-jinium, epéattawai- tímia, tímiaja, Juank.

Jesús imiáimiu.

Mk.1,9; Rk.3,21; Jn.1,29.

- 13 Nu tsawanttin Jesús Kariréa nunkánmaya winís, Juank imiatit' tusa, Jurtán entsánam tamia, tímiaja.
- 14 Antsu Juank chicháak: - Imiattíá turutkumnisha, wi utsuma asamtai, ame winia imiatiniáitme - tímia, tímiaja.
- 15 Tu tai: - Atsá, Arútam nuna wakera asamtai, turatniuítme - takui, Juank Jesusan imiáimia, tímiaja.
- 16 Jesús entsánmaya jínkimtai, lwiáikratin yapánkma áinin ajás, Nayáimpinmaya nii muukeén tarun wainkiámia, tímiaja.
- 17 Nuínk yakíya Arútam chicháak: - Juka wi ti anéamu Uchiruítí, winia atsánkrana nuítí - taman Juank antukmia, tímiaja.

AKANKAMU 4

Jesús emésakajai.

Rk.4,1; Mk.1,12

- 1 Emésak nekapsat' tusa, lwiáikratin Jesúsna nunka-itiárkanam jukimia, tímiaja.
- 2 Nuí, aintiuk-nawe tsawant, kashi tsawáisha tuke yurúmstuk pujús, tsukammia, tímiaja.

Mt.4,3.

- 3 Nuíkiá Írshimp' nekapsataj tusa, tarí, chicháruk: - Wátsek, Arutman uchirintkiúmka, ju kaya tepétar ajáinia ju: "yurúmak najanaktá", titiá - tímia, tímiaja.
- 4 Tu tai, Jesús chicháak: - Atsá, *"aéntska aya yurúmkajaj *iwiáku pujatsui; antsu iwiáku pujústaj-sa, Arutman chichamen antuktiniáiti"*, tu aarmáiti - tímia, tímiaja, Jesús.*
- 5 Nuyá, Emésak Jesusan Jerusarénknum jukí, úunt ayámtainiam yakí iwiáak,
- 6 chicháruk: - Arutman uchirintkiúmka, juyá tetérkasa kankékam, úukasa iniatá; *"kame nawem kayánam ajínraink túsar, Arutman Pasukri takurmiártatui"*, tu aarmáiti- tímia, tímiaja.
- 7 Tu tai: - Núnisank: *"Arútam amé Úuntrum nekapsataj tip"*, nusha aarmáiti- tímia, tímiaja, Jesús.
- 8 Nuyanka emésak náint yakí nankatkámunam jukí, ashí mash` nunkánam ana nuna iniáktus:
- 9 - listá, wáinmek ? Winia tekemrutkumninkia, juna mash' amástatjai - tímia, tímiaja.
- 10 Tu tai, Jesús chicháruk: - *"Aya Arútam tekémruram, tuke umírkatá"*, tu aárma asamtai, emeská, wárik werumtá - tímia, tímiaja.
- 11 Emésak wématai, Arutman Pasukri tariár, Jesúsna ayurawarmia, tímiaja.

Akátramu untsukma.

Mk. 1, 14; Rk. 4, 14; 5, 1

- 12 Juánkan achíkiar epeniarái, taman antuk, Jesús Kariréa nunkánam waketkimia, tímiaja.
- 13 Nasarenumiá jíinkí, Kaparnaunk írutkámunam, antumiank supíchik, Sapurúnkan Neptarínsha nankatkamuriín pujumia, tímiaja.
- 14 Kame yaúnchu wáimiaku Isaiás chicháak:

Mt. 4. 15.

- 15 - Sapurunk, Neptarisha nunkánam pujátírmesha; atumsha jutíuchu aents Kariréanam, antumiánknum, Jurtán amáini pujármena nusha, antuktárum:
- 16 "Aents kirítiniunam wekáin áarmia nu, Tsáapniun wainkiármiai. Jaka pujuiniámunam ti úunt Tsáapin tayi" -. Tímia nu aminkíamia, tímiaja
- 17 Nuí Jesús unuiniatan nánkamuk: - Arútam-Irúnramu tatin asamtai, enentáimrarum, atumí anentái yapajiatárum - tu chicháa wemia, tímiaja.
- 18 Tura, Kariréa antumiánkan kanmatkariín wesa, Simunk, Kaya tama, nii yachí Antresjaj nekán ajuntú wekáinian wainkiármia, tímiaja.
- 19 Untsúkar, chicharáiniak: - Yamáikia aents irurtin winia nemartustárum - takui,
- 20 nekan ikiúkiar, nu chichamáik niin nemariármia, tímiaja.
- 21 Nuyá, Sepetéusan uchirí, Santiak, Juanksha kanúnam nekán iwiáru pujuármia nuna wáinkiar, níinsha untsukármia, tímiaja.
- 22 Níisha kanun, nii aparíniash ikiúkiar, Jesusan nemariármia, tímiaja.
- 23 Ashí Kariréa nunkánam, mash' ayámtainmasha, Arútam-Irúnramun chichamen etserki wéak, ashí jaa áinia aúnnash tsuáu áarmia, tímiaja.
- 24 Siria nunkánmasha ti náatu ajás, sunkurjaj waitiainiána aun, waweámunnash, wáurunash, tampemárunash itianiákui, ashí mash' tsuáu áarmia, tímiaja.
- 25 Kariréanmayá, Tekapurisnumiá, Jerusarenknúmiasha, Jurtank amáini nunkánmayasha núkap aents kaútkar kaútkar ajá ajainiákua, ti núkap nemariármia, tímiaja.

AKANKAMU 5.

Jesús jintíntkiártuamu.

Rk.6,17

- 1 Jesús untsurí aents^u kaunkarun wáiniak, náintnium waka, nii aéntsrissha tantármatai, ekemsamia, tímiaja.
- 2 Tura unuíniniak, tu chichatan nankamamia, tímiaja.
- 3 - Kuítrintin ajátsuk, utsumáinian yáiniana au, Arútam-Irúnramu níiniu asamtai, warasartí.
- 4 Waitiainiána aúsha, atsánknartin ásar, warasartí.
- 5 Kajechu áinia au, ashí mash' takustin ásar, warasartí.
- 6 Aéntsun imítmachu, anankkártichu awajsátaj-sar wakeruiniána au, nii wakéramuri amínkiatin asamtai, warasartí.
- 7 Tsankúrkartin áinia au, tuke tsankúrnartin ásar, warasartí.
- 8 Pénker enentaimainiána au, Arútman wáinkiatin ásar, warasartí.
- 9 Aents nawamnaikiarat' túsar takakmainiána au, nekás Arutman uchirí atin ásar, warasartí.
- 10 Kajérkamu ainiayat, pénker pujuiniána au, Arútam-Irunramúnam jeátin ásar, warasartí.
- 11 Atumsha wijai irúnkuram, katsekramainiakrumnisha, kajertamainiakrumnisha, tsanumrutmainiakrumnisha, warastárum.
- 12 Turutmainiakrumnisha, Nayáimpiniam akínkiatin asárum, shíir enentáimsarum, warastárum. Kame Waimiákunash tuke turawármiai - timia, tímiaja Jesús.

Nunká tsáapniri.

Mk.4,21; 9,50; Rk.14,34; 8,16; 11,33

- 13 Jesús chicháak: - Juí nunkánam átum wéeya aniuítrume. Wee michu ajasmatáinkia, waríjaink ayakminiáitiaj' ? Penke

ayakchamniáitji. Tuma asamtai, aa najatai tepet' tusar', tsuátnum ajapashtinkiáitiaj' ? - tímia, tímiaja, Jesús.

- 14 - Atumsha tsáapniua nuniniáitrum. Wats irútkamu náintnium uukminkáitiaj' ? Atsá, uukchamniáitji.
- 15 Aíntsarik, shirípiik ekemakar', úuajik ? Atsá, páant sukuit' tusar', yakí ekéneaji.
- 16 Aíntsarmek, atumsha kéekrum, tsáapin najanki wetárum. Ashí aents atumí Aparí Arútam Nayáimpiniam pujana nuna naatmamtikkiarat' tusárum, pénker najánamu tuke iniakmastárum - timia, tímiaja, Jesús.

Yaúnchu awemamu iwiáramu.

- 17 Jesús chicháak: - Wikia yaúnchu Wáimiaku awemármia nu amíkiáirap títiaj-san tacháitjai. Antsu nuna iwiarátaj-san tawitjai.
- 18 Nekás tájarme: nayáimp', nunkasha amunatsáink, ashí mash' yaúnchu Arútam awemamu, ishitiupchiitiat, aminkiáttawai.
- 19 Nuíkia, ya chikíchkiniak, ishitiupchitkuísha umítsuk, tura "umíkiáirap" tana nuka, Arútam-Irunramúnam ti nunkach' pujústatui. Antsu ya ashí mash' umik, chíkích aéntsnasha umimtikiana nuka, Arútam-Irunramúnam ti yakí pujústatui.
- 20 Tuma asamtai, unuikiartiniá, Pariséuwa aínsarmek Arutman awemámuri nánkamsarum amiakrumka, Arútam-Irunramúnam jeashtátrume - timia, tímiaja, Jesús.
- 21 - Atumsha nekátsrumek ? "Mankartuawáirap; mankártana nuna makuartí" yaúnchu atumí úuntri tiniu áarmiayi.
- 22 Antsu wi chicháakun: "Yákesh aéntsun kajerainiána au tunamainiáwai. Katsekainiána aúnash Arútmaka makuiniáwai. Yuminkramuítme tuiniána aúsha Tunkurúanam akupkamu áartatui" tájarme.
- 23 Tuma asamtai, ayámtainiam wéakum, yatsumjai itíurchat takakumka,

Mt.5,24.

- 24 ayámtainiam wétsuk, yatsúmjaink pénker iwiáram, ayámtainiam wetá.
- 25 Numásrum makukrátniunam juramkuínka, makúrma enket-
tmawáink, jintiá wéakum níjaink iwiaratá.
- 26 Kame enkétmakuínka, ashí mash' akíkmachkumka jiin-
kíshtatme - timia, tímiaja, Jesús.
- 27 - "Tsanirmawáirap" yaúnchu atumí úntri tíaruitkuísha,
28 "tsanirmátaj-sar nuan iiniána aúsha, nii anentain
tsanirmainiáwai" yamáika wikia tájarme.
- 29 Tuma asamtai, amé jími tunartin awajtamkuínka, ukuínka,
yajá ajapatá.
- 30 Aíntsank, amé ewéjmesha, untsurmaitiat, yajáuch'
awajtamkuínka, tsupíkam, ajapatá. Kame ashí iniáshmijai
Tunkurúanam esawáij túsam, amé iniáshrum tsupiktin imiá
penkeráiti - timia, tímiaja, Jesús.
- 31 - "Aéntska nii tarímtarin ajapea nuka, papin najana, susati"
yaúnchu tiniu áarmiayi.
- 32 Antsu wi nuna tátsujrume. Wikia chicháakun: Aents, nii
nekás tarímtarin tsanirinchuitkuísha, ajápeakka, nuwan
tsanirmamtíkiawai. Aíntsarank ajapámujai nuatnánia aúsha,
tsanirmainiáwai - timia tímiaja, Jesús.

Nekás chicham.

- 33 - "Arútmaka áantra pachikiáirap; pachiakrumka
amiktiniáitrume" yaúnchu atumí úntri tíaruitkuísha,
34 "Arútmaka penke pachikchatniuítrume" wikia tájarme. Kame
Nayáimp' nii pujámuri asamtai,
35 nunkasha nii tarimtáiri asamtai, Jerusarenksha nii pujutáiri
asamtai,
36 atumí múukesha atúmniachu asamtai, penke
pachíkchatniuítrume.

37 Antsu, áyatic "ee" takúrmeka, tura "atsá" takúrmeka, wáitrutsuk aya nuke títiárum. Chíkich chícham aantráiti, emeskanuíti - timia, tímiaja, Jesús.

Anenáiyamu.

38 Atumsha nékatsrumek? "Tuke yapajkiatárum" yaúnchu tiniu áarmiayi. Antsu wikia chicháakun:

39 "Yajáuch' aéntsjaí maniawáirap; amé yapimin ijutmamtai, atú yapimsha tsankatkatá.

40 "Pushirmin atankítjame" takuínkia, mash' susatá.

41 "Warinchu ishíchik jurutkitiá" turamkuínkia, ámeká ti arant ejetitiá, tájarme.

42 Séatmana nu susatá; "ikiatsatá" takuínkia, páchitsuk ikiastá - timia, tímiaja, Jesús.

43 Atumsha nékatsrumek ? *"Aya ame shuáarak anéasam, numásrumka kajerkatá"* yaúnchu tiniu áarmiayi.

44 Antsu wikia chicháakun: "Atumí numásrisha aneásrum, kajertukáink' tusárum, Arútam anentruatárum", tájarme.

45 Túrakrum, Arutman uchirí asárum, atumí Apariya aínsarmek ajastátrume. Kame níisha aents pénkernum yajauchínmasha métek etsantmamtíkiawai. Aínsank aents imítmachu pujámunam, tunartin pujamúnmasha nútiksank yutumtíkiawai.

46 Aya átum shuáarak aneakrumka, akinkiashtátrume. Kame yajáuchisha nuna turin ainiáwai.

47 Aya aminiúrmek amikmakrumka, warí pénkera najánarum ? Arútmán nekainiátsna aúsha nuna turin ainiáwai.

48 Átumka, atumí Aparí Nayáimpiniam pujana aínsarmek, ti pénker ajastiniáitrume - timia, tímiaja, Jesús.

AKANKAMU 6.

Inchimruschatniúitji.

- 1 Jesús chicháak: - Aneartárum ! Aents iirsarat' tusárum, ashí iimiainiái pénker pujuírap. Turakrumnínkia atumí Apárí Arútam akirmakcháttarme.
- 2 Aya anankkártiniak naatmamtikrukarat' túsar, ashí iimiainiái utsumáinia aun yainiáwai. Nújainkia akikma ainiáwai. Ámeka yayákmeka, níya aínsamek ajasáip.
- 3 Antsu úusmek yáinktá.
- 4 Úukam susakmínkia, Arútam ame Apáram úukman wáinin asa, akirmáktatui - timia, tímiaja, Jesús.
- 5 - Anánkkartin, aéntska iirsarat' túsar, ashí iimiainiái ayámtainiam, irunramúnmasha anentrin ainiáwai. Nújaink akikma asármatai, amesha níya aínsamek ajasáip.
- 6 Antsu, ámeka aya Arútmajaink pujúsam, aya níjaink enentáimsam, anentruatá. Amek úukam anentrakminkia, Arútam amé Apáram úukman wáinin asa, akirmáktatui - timia, tímiaja, Jesús.

Jesusan anentri.

Rk.11,1.

- 7 Jesús chicháak: - Aents^u nékachu, Arútam anturtukat' túsar, ti núkap seainiáwai.
- 8 Arútam, atumí Apárí, ashí mash' utsumármena nuna neka asamtai, átumka núkap seawáirap.
- 9 Átum juní anentruatárum:
li Apárí, Nayáimpiniam pujá asakmin, amíniak mash' yuminkramsartí.
- 10 Amé shuar irunrartí. Nunkasha, Nayáimpinmasha ame wakéramna aínsank atí.
- 11 Yamái yurúmak sukartustá.

Mt.6,12.

- 12 li numasri tsankurainiájnia aínsamek, ii tunari tsankurkarturtá.
- 13 Eméskasha anankramawáij', ashí penkerchánunum ayamkartuktá.
- 14 Kame átum chíkich aents^u tsankureakrumninkia, atumí Aparí Arútmasha tsankurtamráttarme.
- 15 Antsu chíkich aents^u tsankureachkurminkia, atumí Aparisha tsankurtamrashtátrume - timia, tímiaja, Jesús.
- 16 - Anánkkartin ijiármainiak, aents^u iirsarat' túsar, wake mesékar pujuiniáwai. Átumka ainkiárap. Kame aitkiainiána au akikma ainiáwai.
- 17 Antsu átumka ijiarmaakrumka, nijiamárum, pénker temashmartárum.
- 18 Kame átum ijiarmáarmena nuna aents^u nekashtiniáiti. Aya Arútam nekatniuíti. Atumí Aparí Arútam úukman wáinin asa, akirmaktátrume - timia, tímiaja, Jesús.

Nayáimpi kuítri.

Rk.12,33

- 19 - Kania amuiniákui, kasa áinia aúsha kasamáinia asamtai, juí nunkánunum atumí kuítri irumrárap.
- 20 Antsu kánia amukaráink tusárum, kasa áinia aúsha kasamkaráink tusárum, Nayáimpiniam atumí kuítri ikiáunkatárum.
- 21 Kame, atumí kuítri pujana nuí, tuke enentáimiarme - timia, tímiaja, Jesús.

Jínia tsáapniri.

Rk.11,34

- 22 - Amé jími tsáapin awájtamui. Penkeraitkiúnka amin ti pénker awájtamui. Yajauchitkiúnka amin ti yajáuch' awájtamui.
- 23 Tura, tsáapnia nu kirit ajasmatáinkia, penke iischamniáitme - timia, tímiaja, Jesús.

Arútam kuítian nankáawai.

Rk.12,22; 16,13

- 24 Takákmau jimiará úuntrin takuschamniáiti, kame chikíchiniak amíreak, chíkichnaka nakítrattui. Tuma asamtai, atumsha Arútam ané, tura kuit ané ajachminiáitume.
- 25 Nuikia, warinia yuataj ? Warinia entsartaj ? tu enentaimírap. Atumí iwiákmarin amásmia nu, yurúmkanash amaschamniakáit ? Tura iniáshniasha najana nu, entsatáiniash amaschamniakáit ?
- 26 liskua: chínkish urukainiáwak ? Chínkikia yurúmkanash araachiat, juuachiat, yurumainiáwai. Ya ayura ? Atumí Aparaí Arútam áyurui. Atumsha chinki nankakátsrumek ?
- 27 Ya wátsek, nii iwiákmarin ekekminiáit ?
- 28 Tura, entsátaisha urukamtai enentáimtarum? Íiskua kampúntniunam kúkuj' kutámrrar, awantainiachiat, ti pénker iwiarnainiátsuk ?
- 29 Sarumunksha ti kuitrintniuitiat, kúkuj' shíirmana aun nankáak, entsarchámiajanta.
- 30 Íimiarcha ajasáirap ! Kúkujsha yamáti ti pénker waján, kashínia tsupíkia ajápatniun Arútam ti pénker aentséatsuk ? Aíntsank atúmniasha aentstamrashtátrumek ?
- 31 Warinia yuataj ? Warinia umartaj ? Warinia entsartaj ? tusárum, kúntuts enentaimírap.
- 32 Aya Arutman nekainiátsna au tu enentaimainiáwai. Kame atumí Aparaí Arútmash átum utsumármena nuna mash' nékawai.
- 33 Tuma asamtai, éemka Arútam-Irúnramu eákrum, nii awemámuri amiktárum. Kame utsumármena nuna Arútam áantar amastátrume.
- 34 Tuke tsawantin itiúrchat áakui, yamáti kuntútsrum awákkarum, kashín átatna nu enentáimtsuk pujustárum - tu chíchamia, tímiaja, Jesús.

AKANKAMU 7.

Jesús jintíntramji.

- 1 - "Makurmáij' " tusárum, atumsha makuírap.
- 2 Átum makuármena aínsarmek makumu átrume. Átum túrarmena aínsarank turutmáttarme.
- 3 Tuma asamtai, itiúrtsuk atumí jíin numi enketna nu íitskesha, atumí yachín jíin tsuátach' enketúsha wáinrum ?
- 4 Amé jíimiín numi enketáisha, itiúrtsuk amé yatsum: "Tsuátchin jurustajme" tame ?
- 5 Anánkkartin áip. Páant íistaj-sam, éemka amé jíimiín numi enketna nu júsam, amé yatsumin tsuátchiri jusatá - timia, tímiaja, Jesús.
- 6 - Arutman pénkeri yawá susáirap; atumí pénkerisha kuchi iniaktusáirap. Nuka nékachu ásar, aya najatrachártatuak ? Atúmniasha esatmishtármeash ? - tu chichamia, tímiaja, Jesús
- 7 - Arútam seakrumnínkia, suramsáttarme. Eáakrumka wainkiáttarme. Winiájai, takurmínkia awántiamáttarme.
- 8 Kame seána nuna súawai; eána nuna wáiniui; winiájai tana nuna awayawai.
- 9 Wátsek, ya aéntsua, nii uchirí apátuk seam, kayan sua?
- 10 Ya wátsek, namak séam, napin sua?
- 11 Átum yajáuch' asármesha, atumí uchirí pénker ana nu súarme. Aínsarmek atumí Aparí Nayáimpiniam pujana nu seakrumnínkia, níisha pénkernak surámsturmek ? - timia, tímiaja, Jesús.
- 12 - Ashí mash' Arutman awemámurin amíktaj takúrmeka: "winiásha aitkiarawáirmi" tusárum, atumsha ashí aents^u aitkiatárum.
- 13 Jintia wánkaram Tunkurúanam jeáawai. Nuka ti yúpichuch' asamtai, ti núkap aents^u nuní wenawai.

Mt.7,14.

14 Antsu jintia tsérerach' Nayáimpiniam jeáawai. Nuka itúrchat asamtai, ishíchik aénts^u nuní wenawai. Tuma asamtai, átum itiurchataitkuísha, tuke Nayáimpin jintí achiktárum - tu chichamia, tímiaja, Jesús.

Numín neré.

15 - Enentáimra wekasatárum. Anankkártinkia aéntsun emesrátaj-sar, pénkera aínsarank wininiáwai.

16 Atum nii túramuri íisrum, ya áinia nekamniáitrum. Kame inchinchi ínchia aínsank neréawak ?

Tuumpá, páantma aínsank neréawak ? Atsá.

17 Numi pénger ana nu tuke péngeran neréawai; antsu numi yajáuch' tuke yajáuchin neréawai.

18 Numi pénger yajáuchin neréatsui; aínsank numi yajáuch' péngeran neréatsui.

19 Tuma asamtai, numi urukuít tusárum, nii nere iistiniáitrum.

20 Numi, pénger neréatsna nu tsupikiar', jinium epashtinkíaitiaj' ? - timia, tímiaja, Jesús.

Jea kayánam ukurma.

Rk.6,47

21 - Ti núkap anentruiniána au, Nayáimpiniam jeachártatui. Antsu winia Ap̄ar Arútam wakéramun amirainiána au, Nayáimpiniam jeawártatui.

22 Wínia tsawántur jeámtai: "Uuntá, Uuntá, amé chichámrum etserkar', amé kakarmármijaink emésak jíiki akupkar', aents-tujíntiamu najanáitji" tuiniakuísha:

23 "Yatsukáitrum ? Anánkkartin asárum, werumtárum" wi tíartatjai.

24 Winia chichámrun antuk, amíreana nuka, aents^u neka kayánam jeámmia aínsankete.

Mt.7,25

- 25 Yumi yútakuish, nase umpúakuish, kayánam ukurma asa, pukukáchmia, tímiaja.
- 26 Antsu, winia chichamrun antuk, amíreatsna nuka, aents^u enentáimcha náikminiam jeámmia aintsankete.
- 27 Yumi yútakui, nasesha umpúakui, náikminiam ukurma asa, jea mash' sáanaki, iniámia, tímiaja -.
- 28 Tu chíchasúa amúkматаi, aéntska enentáimiam ekémsarmia, tímiaja.
- 29 - Jutíusan jintintniuriya aínsuk, Jesuska nekás ti neka aínsank chicháawai - tíarmia, tímiaja.

AKANKAMU 8.

Kuchápruku tsuárma.

Mk.1,40; Rk.5,12

- 1 Jesús naintniúmia támatai, untsurí aents^u nemariármia, tímiaja.
- 2 Aents^u kuchápruku Jesusan jearí, tikíshmatar: - Uuntá, wakerákmeka tsuaramniáitme - timia, tímiaja.
- 3 Tu tai, Jesús antink: - Ee, wakérajai: pénker ajastá - tákui, nu chichamáik kuchap menkatukmia, tímiaja.
- 4 Tura Jesús chicháruk: - Pai, aents^u ujátsuk, wea werim, nekát' túsam iniákmamsam, Muisés timia nu susatá - timia, tímiaja.

Nankí-juun takárniuri tsuárma.

Rk.7,1; Jn.4,46

- 5 Jesús Kaparnaunk irutkámunam támatai, nankí-juun úuntri tarimia, tímiaja.
- 6 Tura chicháruk: - Uuntá, winia takárniur eméar, ti waitiú tepawai -.
- 7 tu tai, Jesuska: - Ayu, winín tsuartajai - timia, tímiaja.

Mt.8,8.

- 8 Takuísha: - Ámeka ashí tujintcha asam, winia jeáruí enkemachminiáitme; antsu ame kakármaram akúpkam, winia uchir tsuarturtá.
- 9 Kame wisha nankí-júun akúpeakun: "Turatá" takuínkia, nuna túrawai. "Winitíá" takui, winiáwai. Winia takárniunsha: "Ju najanatá" takui, nájanui - timia, tímiaja.
- 10 Tu chicháram, Jesús nii nemárniurin íis: - Jutíunmanka íimiaru níiya ániun wainkiachuítjai.
- 11 Nekás tájarme: Ashí nunkánmaya jutíuchu aents^u kaúnkar, Arútam-Irunramúnam Apráámjaj, Isáakjaj, Jakúpjajsha yurumawártatui.
- 12 Antsu Israer aents^u yaúnchu untsukma ainiayat, aa ajápnawar, kirítiniunam tuke waitsártatui.
- 13 Nuna tuasúa amik, nankí-júun úuntrin chicháruk: - Pai, waketkitiá; ame wakéramna nu atí - takui, nu chichamáik nii takárniuri pénker ajasmia, tímiaja.

Jesús tsuákratu.

Mk.1,29; Rk.4,38

- 14 Jesuska Kayan jeen we, Kayan tsatsarí tsuemujaj tepán wainkiámia, tímiaja.
- 15 Tura, ewéjnum achik, tsuármia, tímiaja. Nu chichamáik nua pénker ajás, nantakin ashí ayurawarmia, tímiaja.
- 16 Kiáakui, untsurí waweámun itiaiiniákui, chikíchik chichámjaink wawekan jíiki akúpkar, ashí mash' jaa áarmia nuna tsuás tsuás akupiármia, tímiaja.
- 17 - *li pimpirmárinkia, ii sunkúríniash jurutramkímiaji* - yaúnchu wáimiaku Isaías tímia nu aminkiat' tusa, nuna Jesús turamia, tímiaja.

Mt.8,18.

Jesús nemársamu.

Rk.9,57.

- 18 Untsurí aénts^u kaunkármatai, Jesús nii aéntsrin chicharáiniak: - Antumiank amáini katinktiái - timia, tímiaja.
- 19 Tu tai, jutíun jintíntniuri: - Uuntá, wisha amin tuke nemarsátjam tusan, wakérajai - timia, tímiaja.
- 20 Takui, Jesús chicháruk: - Kujánchmaka nii wáarin tákakeawai; chínkisha nii pasúnkrin takakeainiáwai, antsu Arútam-aents-ajasú, nii pujutáirinkish tákakeatsui - timia, tímiaja.
- 21 Chíkich Jesusan aéntsrissha chicháak: - Uuntá, éemka winia aparún iwiársan ikiuútjai - takui:
- 22 - Jakáruka númtak ikiunaisartí. Ámeka winia nemartustá - timia, tímiaja, Jesús.

Nase mijiamtikiámu.

Mk.4,35; Rk.8,22

- 23 Nuyá Jesús nii aéntsrijaink kanúnam enkemamia, tímiaja.
- 24 Kanú tepái, nékachma nase ti kakáram úu ajatan nankámeakui, entsa tsákir-tsákir ajakín, tákunink, kanúnam mete ajátemsa, tímiaja.
- 25 Nii aéntsri Jesusan ishintiárar: - Uuntá, jakéaji, wárichik yainkratkatá ! - ajáarmia, tímiaja.
- 26 Tu chicháram, Jesús shintiar: - Urukamtai imiá íshamárum ? limiarchakáitrum ? - tusa, nantátakin: - Naseá, jasasatá; entsá, te ajastá - tu tai, nasesha, entsasha mítia patamsa, tímiaja.
- 27 Turamtai, nii aéntsri enentáimiam enentáimiam ajásar: - Maj, jush yáit ? Ya asamtai: entsasha, nasesha amiráinia ? - tíarmia, tímiaja.

Mt.8,28.

Emésak j̄ikmia.

Mk.5,1; Rk.8,26

- 28 Antumiank amáini, Játara nunkánam jeámtai, jímiar aents^u waweámu, iwiártainmaya j̄inkiar, Jesusan tariármia, tímiaja. Ti wáurin asármatai, nuínkia aents^u penké wekáichu áarmia, tímiaja.
- 29 Chará chará ajákiar: - Jesusá, Arutman Uchiríya, íisha amijáisha warí iistiniáitiaj' ? Tsawant jeáatsaink, wi amukátjarme tusámek taum ? Tu chichariármia, tímiaja.
- 30 Nuí arant untsurí kúuk shushúnmak yujainiákui:
- 31 - Kame, Jesusá, j̄iki akupkartákmeka: "Kúuknum enkematárum" túsam, tsankatkartuktá - tíarmia, tímiaja. Jesús: - Ayu wetárum! - takui,
- 32 Emésak aentsnúmia j̄inkiar, kúuk ti untsurí irúnmanum enkemawármatai, kúuk sapijmiakar, tsékenkiar, antumiánknum iniánkar, mash' jakerármia, tímiaja.
- 33 Kúukan wáinniusa pisárar, aents^u untsurí pujuiniámunam jeáwar, etserkarmia, tímiaja.
- 34 Nuna antúkar, ashí aents^u Jesusan inkiúnkar, nii nunkéya j̄inkít' túsar, seawarmia, tímiaja.

AKANKAMU 9.

Sumpenku tsuárma.

Mk.2,1; Rk.5,17

- 1 Jesuska kanúnam enkemá, antumiánknum katink, nii irutkamuriín jeámia, tímiaja.
- 2 Aents^u sumpenkun nii shuar yanákiar, niin itiariármia, tímiaja. Jesuska: - límiaru ainiáwai - tusa, sumpenkun chicháruk: - Uchirú, nekaratá: ame tunárminkia tsankúreajme - tau, tímiaja.

Mt.9,3.

- 3 Takui, Jutíun jintíntniuri: - Nush ya asa, imiá wáitra ? - tu enentaimsarmia, tímiaja.
- 4 Jesús neká: - Urukamtai tu enentáimrum ?
- 5 Wátsek, ju aéntsun tunarin tsankúratin, tumátskesha tsuártin, tuá imiá yupichuchit ?
- 6 Arútam-aents-ajasú juí nunkánam aéntsun tunarin tsankuramniáiti, ashí nekawarat' tusan: sumpénkua, nantaktiá; peákrum jukim wetá, tájame - timia, tímiaja.
- 7 Tu tai, sumpénkuka nantakí, nii jeén wemia, tímiaja.
- 8 Mash' aents^u pujuármia nu, nuna wáinkiar: - Arútam ashí tujintcha nii kakármarin aéntsun susaruíti - tu enentáimsar, Arutman yumínksármia, tímiaja.

Matéu untsukma.

Mk.2,13; Rk.5,27

- 9 Jesuska nuyá wesa, Matéu kuit-júutáinium puján wáiniak: - Nemartustá - tu tai, Matéu nuna ikiúak, Jesusan nemármia, tímiaja.
- 10 Jesús, Matéun jeén nii aéntsrijai yurúmuk pujái, chíkich aents^u kuítian-juu, tura ti tunartin áinia aúsha irunturarmia, tímiaja.
- 11 Pariséuka nuna wáinkiar, Jesusan aéntsrin chicharáiniak: - Urukamtai atumí úuntri kuítian-júujai, aents^u tunartinjáisha irúnar yurumea ? - tíarmia, tímiaja.
- 12 Jesús nuna antuk: - Nékatsumek ? Pénker áinia au tsuákratniun utsumainiátsui; antsu jainiána au tsuákratniun utsumainiáwai - tinia:
- 13 - Arútam Ujájmatáiniam warítuia ? *"Íikmakan máataj-san nakitiájai.. Antsu waitnénkartin ajástaj-san, wakérajai"* tíichamkia ? Kame wisha aya pénkernak jukítiaj-san tacháit-jai; antsu tunartin áinia aun eáktaj-san táwitjai - tu chichariármia, tímiaja, Jesús pariséun.

Mt.9,14.

Ijiármamu.

Mk.2, 18; Rk.5, 33

- 14 Nuink Juánkan aéntsriokia taríar: - Urukamtai ii, tura pariseutisha ijiármaakrin, amé aéntsrumka penke ijiarmainiátsu ? - tu aniasármia, tímiaja.
- 15 Jesús aímiuk: - Yama nuátu pujakui, ipiámuka kúntuts pujuiniáwak ? Atsá; antsu nii áishrin atankiármatai, ijiarmawártatui. Aintsarank, wi pujakui, winia aéntsruka ijiarmainiátsui.
- 16 Yákesh tarach' mamurúnam yamáрман anujtichuíti; kame yamáram sumpéak, mamurun jaáwai.
- 17 Aíntsank nijiamanch' yama nawamu punu arútnum uwashtáinti; kame yama nawamu kariak, punun ijiákeawai. Tuma asamtai, yama nawamu punu yamáрманum uwatniuíti - timia, tímiaja, Jesús.

Úuntan nawantri aneántu.

Mk.5,21; Rk.8,40

- 18 Jesús chicháa pujái, jutíun úuntri tarí, tikíshmatar, chicháruk: - Winia nawántur yama jarutka asamtai, ame winim, aneantat' túsam, ewejem awantrutsatá - timia, tímiaja.
- 19 Tu tai, Jesús wajakin, nii aéntsrijai nemarmia, tímiaja.
- 20 Jintiá weái, nua numpá pujak, nawe-jímiar uwí jaa pujú, ukúnmani jearín, aya pushíri nankatsámunam antintkiámia, tímiaja.
- 21 - Aya nii pushirín antinkiun tsuamártatjai - tu enentáimsa asamtai,
- 22 Jesús ayántar, nuan íis: - Kakartá nawántru, íimiaru asam pénker ajasume - timia, tímiaja. Tákui, nu chichamáik numpá pujak ajamurinkia pénker ajatásmia, tímiaja.
- 23 Nuyá Jesús úuntan jeén jeá, aents^u ti charátum ajáinian, tura jakan iwarsatái túsar, tuntuín tuntuiniánsha wáiniak,

Mt.9,24.

- 24 chicharáiniak: - Jjinki wetárum, kame nawántach' jakachái; áyatik kanú tepawai - takui, wishikrarmia, tímiaja.
- 25 Aa jjiki akúpkar, mash' ajasármatai, Jesús wayá, nuáchin ewéjnum tapit achíkmatai, nekás jakaitiat, aneant, nantátakmia, tímiaja.
- 26 Nu irutkámunam ashí aents^u nuna nekawarmia, tímiaja.

Jj kusurú tsuárma.

- 27 Nuyá Jesús jjiniakui, jímiar jj kusurú nemáriar: - Tawítian Uchiriyá, wáit anentrustá ! - tukin weármia, tímiaja.
- 28 Jesús jeánam enkemamtai, jj kusurú taríaram: - Ame tsuaramniáitme, nekás turútrumek ? - tu aníasarmia, tímiaja. - Ee, Uuntá - tuiniákui,
- 29 Jesuska jjin antíinkiar: - Átum wakerármena nu atí - tu tai, páant wainmakarmia, tímiaja.
- 30 Nuí: - Jutikiájrugna ju penke etserkáirap - Jesús tamaitiat,
- 31 áa jjinkiar, ashí mash' etserkarmia, tímiaja.

Waweámu chichachu.

- 32 Jj kusurú wenái, waweámun chichachun Jesusan ititariármia, tímiaja.
- 33 Jesuska wawekan jjiki akupkamtai, nu aents^u chichakmia tímiaja. Ashí aents^u nuna wáinkiar: - li nunkeén tímiau aents^u wainchatáinti - tíarmia, tímiaja.
- 34 Antsu pariséuka: - Juka emeskan úuntrin kakarmarijai wawekan jjiki akúpeawai - tu chicháarmia, tímiaja.

Jesús waitnéntramji.

- 35 Jesús ashí irutkámunam jeá, ayámtainiam Arútam-Irúnramun chichamen étserki wéak, ashí aéntsun tsuárma, tímiaja.

Mt.9,36.

- 36 Aents^u pimpíkiar, tanku nii pamukrin tákakcha aínsarank pujúinian wáinkiar, waitnentrarmia, tímiaja.
- 37 Tura nii aéntsrin chicharániak: - Takat ti nukapete, antsu takákmainia au ti ishíchik ainiáwai.
Tuma asamtai, Arútam ii Úuntri, núkap takákmainian akupkat' tusárum, seatárum - timia, tímiaja, Jesús.

AKANKAMU 10.

Jesusan Akatráhuri.

Mk.3,13; Rk.6,12

- 1 Jesús chicharsúa iniáis, nawe-jímiar Akátramun untsúkar, ashí emesan, wawéknasha jíiki akúpkar, mash' jaa áinia aunash tsuararat' tusa, nii kakármarin susarmia, tímiaja.
- 2 Nawe-jímiar akatráhuri ju ainiáwai:
Éemka Semunk, Kaya tama; nuyá_u nii yachi Antrés; nuyá_u Sepetéun uchirí Sántiak, Juánksha ainiáwai.
- 3 Nuyá_u Jirip', Parturumé, Tumás, kuítian-juu Matéu, Sántiak Arpéun uchirí, Tatéu,
- 4 Kaná nunkánmaya_u Simunk, nuyá_u Jesusan surukmia Kiriutnúmia_u Jutas, nusha ainiáwai.

Akatramu akupkamu.

Mk.6,7; Rk.9,1

- 5 Jesuska ju nawe-jímiar aéntsun akatániak: - jutíuchunam, Samarí_u aentsnumsha wérap - tu akupkarmia, tímiaja.
- 6 - Éemka Jutiu-aents^u ankant ankant wekáinia eaktárum.
- 7 Wérum: "Arútam-Irúnramu jeástatuk ajasái" tu chicharkatárum.
- 8 Jainiána au tsuartárum, jákaru iniantkítiárum, kuchaprukú tsuartárum, wáweksha jíiki akupkatárum. Winia kakármar

Mt. 10,9.

sumakcha asárum, penke súrutsuk, áantrarmek tsuakratratárum.

- 9 Uyúntnum kuri, kuitsha jukí wérap.
- 10 Yurúmak kayámstsuk, nawénam ewétaish, payánksha júutsuk, aya atumí entsarmaríjaink wetárum. Kame takákmainia au akikma aartiniáiti.
- 11 Irukámunam jeárum, aents^u pénker wainkiárum, nii jeén wayárum, nuink tuke pujustárum.
- 12 Enkémkuram: "Arútam atumjai pujusti" tu usukruatárum.
- 13 Pénker áinia aúnka, tarímtanam waimiakarat' tusa, Arútam nii kakármari susártatui. Antsu yajáuchiniam nii kakármari enkémstsuk, atúminink waketskíttiawai.
- 14 Kame: "Werumtárum; atumjai chichastin nakítiáji" turamkurminkia, aa jíinkírum, nii páuskari jurumakíj' tusárum, nijjá nijjáma wetárum.
- 15 Nekás tájarme, winia tsawántur jeámtai, Sutúman, Kumúrانشa iniánkas yumínkramu áartatui - timia, tímiaja, Jesús.

Jesusan aéntsri kajérkamu.

- 16 - Nekatárum: Tankua aítkiasnak úunt-yawá pujámunam akupeájrum. Yápankma aínsarmek yupichuchitiátrum, napia aínsarmek ti aneárum wekasatniuítrume.
- 17 Aents^u turamkurminsha: "nekasapitia" tírap. Kame makukrátniunam juramkíttiarme, ayámtainmasha asutiamráttarme.
- 18 Wi shuar asákrumin, úuntnum juramkíttiarme. Aitkiarmákrumin, jutíuchu atumini winia nekarawártatui.
- 19 Makurmainiakrumnisha: "Waríniak títiáj ?" tu enentaimírap. Kame títinian Arútam jintinramáttarme.
- 20 Aya atumek chichascháttarme. Antsu atumí Aparín Arútmari atumini chichástatui.

Mt.10,21.

- 21 Nuí jusha átatui: Aents^u nii yachín makúttawai. Uchírtinsha nii uchirín maawártatui. Aíntsarank uchisha nii aparín maawártatui.
- 22 Wi shuar asárum, ti kajérkamu átatrume. Kame ya kajeramuiat, winia tuke ayamrúteana nuka, Arútmanam jeáttawai.
- 23 "Mantamataj" turamkurminkia, chíkich irutkámunam wetárum. Nekás tájarme: átumka ashí Israéran irutkamuriín jeátsruminink, Arútam-aents-ajasú ataksha páant tátatui - timia, tímiaja, Jesús.

Kajerkamun yáinri.

Rk.12,2

- 24 - Unuímiauka nii unuíkiartinrin nankáatsui. Aíntsank takárniusha nii úuntrin nankáatsui.
- 25 Unuímiauka unuíkiartinjai métek ajaska, nuink mákete. Aíntsank takárniusha nii úuntrijai métek ajaska, nuink mákete. Kame atumí úuntrin: "Emeskáiti" tíarmia núwash, nii shuárnash timiá tícharát' ?
- 26 Túramkurminsha ishankáirap, ashí mash' úukma ana nu, páant nekánatin asamtai.
- 27 Wi ishíshmasan kirítiniunam ujáajrumna nu, tsawái kakantra etserkatárum.
- 28 Atumí iniashín máawarsha, atumí wakanín máatniun tu-jíntiainia au ishankáirap. Antsu atumí wakanín, atumí iyashinsha Tunkuruánam akupkamnia nu ishankatárum.
- 29 Iis, chinki jímiarash ti ishíchkiniam surushtainkiáit ? Tumaitiat, Arútam Apa táchamka nunká iniarcháttawai.
- 30 Atumí intiashísha nekápmarma asamtai, atumsha ishankáirap.
- 31 Kame átumka chinkisha nankáarme - timia, tímiaja, Jesús.

Natsámin nakitiámu.

Rk.12.8.

- 32 - Ya, ashí aents^u imiainiái, winia ayamrútaina aun, wisha yakí Nayáimpiniam winia Apar pujana nuí, ayamrúktatjai.
- 33 Antsu, ya ashí aents^u imiainiái, winia natsántruinia aun, wisha yakí Nayáimpiniam winia Apar pujana nuí, natsantráttajai - timia, tímiaja, Jesús.

Jesús-shuar mániamu.

Rk.12,51; 14,26

- 34 - Aents^u juí nunkánam titiú pujusarat' tusan, tacháitjai. Antsu manikiarat' tusan, tawitjai.
- 35 Nekás wi shuar ajastin, uchi nii aparíjajai maniktiniáiti. Nawant nii nukuríjajai maniktiniáiti. Najatisha nii tsatsarijajai maniktiniáiti;
- 36 Kame nii shuar ainiayat, nii numasri ajasártatui.
- 37 Tuma asamtai, ya nii aparín, nii nukurín imiá anea nuka, wíniachu átatui. Aíntsank nii uchirín, nii nawantrin imiá anea nusha, wíniachu átatui.
- 38 Tura ya waitsáij tusa, winia nemártatsna nusha, wíniachu átatui.
- 39 Ya mantuawaráink tusar, wi shuar ajainiátsna au, tuke jákartatui. Antsu ya wi shuar ajástaj-sar, jainiána au, tuke iwiáku pujusártatui - . Tu chichamia, tímiaja, Jesús.

Aentsnúmani Jesús aítkiamu.

- 40 - Ya atumín pénker awajtámrumna nuka, winia aít-kiarainiáwai.
Tura winia aítkiarainia nuka, winia akuptúkma nunasha aítkiainiáwai.
Ya: "Ju aents^u waimiakuíti" túsar, pénker awajáinia auka, wáimiakua aínsarank akikma áartatui.

Mt.10,41.

- 41 Ya: "Ju aents^u penkerapítia !" túsar, pénker awajáinia auka, pénkera aínsarank akikma áartatui.
- 42 Nekás tájarme: Ya, "Jesús-shuaráiti" túsar, shuar kitiaman entsan sua nusha, akikma átatui - timia, tímiaja, Jesú

AKANKAMU 11.

Juánkan najanátniuri.

Rk.7,18

- 1 Jesús nii nawe-jímiar akatrámurin unuinasúa amik, ashí aéntsun jintintiátaj-sa, jutíun irutkamuriín wémia, tímiaja.
- 2 Juank Imiákratin epénmia pujús: - Utsumka Jesús túrawai - taman antuk, nii aéntsrin chicharáiniak:
- 3 - "Utsumka tatin tiniu áarmia nu, amekáitiam ? Antsu chikíchash nakastiniáitiaj' " tu inintrutárum - tusa, akupkarmia, tímiaja.
- 4 Tu aníntram, Jesús chicharáiniak: - Werum, ántarmena nu, wáinrumna nusha Juank ujaktárum.
- 5 Kame, jji kusurusha wainmainiáwai. Shutuápsha wekainiáwai. Mushurkasha tsuamainiáwai. Empekárusa antuiniáwai. Jákarusha aneantainiáwai. Tura utsúmainia aúsha pénker chichaman antuiniáwai.
- 6 Winia wáitiainiak, anturtuiniána nuka, warasartí - timia, tímiaja.
- 7 Tu chicharsúa akúpkar, Juánknan aújmatuk: - Itiárkanam, warí iistáj-srumea werimiárum ? Pintiu nase umpuam muchitmia nu, iistáj-srumek werimiárum ?
- 8 Nuikia, warí werimiárum ? Aénts^u pénker iwiármamar wajáak iistaj-srum wemiárum ? Atsá. Pénker iwiarmámraa aya jea úntnum pujuiniáwai.
- 9 Nuikia, warí werimiárum ? Wáimiakuk werimiárum ? Ee, wi tinkás tájarme: Juank yaúchu wáimiakun ti nankakáiti.

Mt. 11, 10.

- 10 "Iis, amé jintimin iwiarat' tusan, éemka wáimiakun akúpeajai" yaúnchu Arútam tímia nu Juankáiti.
- 11 Ti nekás tájarme: Juank ashí mash' yaúnchu wáimiakun nankakáiti. Tumaitkuísha Arútam-Irúnramúnam ti ishitiúpach' ana nu, Juánkan nankáawai.
- 12 Juank tamanumiá Arútam-Irúnramu ti kajérkamú asamtai, aya aents^u kakáram niín enkemainiáawai.
- 13 Wáimiaku, yaúnchu etserin áarmia nuka, Juankái aminkiaíti.
- 14 Wats jush nekatárum: Erías tatiniúya nuka Juankáiti.
- 15 Nekátaj-sa wakera nu, nuna nekatí.
- 16 Átumka uchi kajérnainia aniuítrume.
- 17 Kame uchisha nakúruiniak: "Ii tuntuiyákrinsha jantsemachúrme; ii kúntuts nampeákrinsha uutcháreme" túsar, kajernainiátsuk ?
- 18 Aíntsarmek atumsha, Juank yurúm��tsuk, nijámchiniash úmutsuk pujákui: "Emésak enkemtuamuíti" timiárme.
- 19 Aíntsank Arútam-aents-ajasú ta, yurúmeakui, úmaakui, chichárkuram: "Ushu, nampén asa, tunartin aéntsjaí wekáawai" tárume.
Tumaitkuísha, Arutman Nekámuri asa, aénts-tujíntiamun iniákmaawai - timia, tímiaja, Jesús.

Aénts^u jiákma.

(Rk. 10, 13).

- 20 Jesuska, ti núkap aents-tujíntiamun najanaitiat, aents^u enentaimracháru asamtai, jiákar, chicharáiniak:
- 21 - Aniuírmesha, Kurasáink, Petsáitia irutkamutíram, aneartárum. Wi aénts-tujíntiamun atumiín najanámiájna nuna
Tiru Sitiunk irutkámunam najanaitkiuínkia, nii aéntsri enentáimrar, nekás ijíarmawar, pénker ajasaráyí.
- 22 Tuma asamtai, winia tsawántur jeámtai, Tiru, Sitiunk nankámasrum, yumínkramu átatrume.

Mt. 11,23.

- 23 Amesha Kaparnaúnka, ti nankámaku ajástaj-sam wakera asam, natsáram, Tunkurúanam wétatme.
Kame aents-tujíntiamun amiín najanámiaina nuna, Sutuma irutkámunam najanaítkiuíkia, mesétsuk yamáisha pénger pjuáyi.
- 24 Nekás tájame: Winia tsawántur jeámtai, Sutuma nankámasam, yumínkramu átatme - timia, tímiaja.

Itiúrchat katsúntratin.

(Rk. 10,21).

- 25 Atak Jesús chicháak: - Winia Aparú, nayáimpin nunkánash úuntri asam, tuke yumínksamu atá..
Unuimiararu, nékau áinia aúsha amé túramuram úurkaram, péejchach' enentaimainiána au páant awajtusuítme. Ame, Aparú, tu wakéruku asakmin, mákete.
- 26 Winia Apar ashí mash' surusuíti.
- 27 Aya Apa nii Uchirín nékawai. Aíntsank, aya Uchi nii Aparín nékawai. Tuma asamtai, aya Uchi nii Aparín nekamtikiamniáiti.
- 28 Nuíkia, átum pimpíkniutíram, atumsha itiúrchatnum pujutírmesha, winín winitíárum. Turakrumníkia ayamtikrattájrum.
- 29 Nekás shíir pujustin, kajechu, péejchach' wiya aíntsarmek ajásrum, winia umirtuktárum.
- 30 Kame winia takátur yupichuíti - tu chichamia, tímiaja, Jesús.

AKANKAMU 12.

Saké tsawant.

Mk.2,23; Rk.6,1.

- 1 Yaúnchu, Saké tsawanttin, Jesús nii aéntsrijai ajánmani nankámainiak, tsukamáa ásar, nuse arakman júukar, pakárar, yukí weármia, tímiaja.
- 2 Pariséu nuna wáinkiar: - listá, amé aéntsrum Saketin túrachminian najanainiáwa ! - Jesusan tíarmia, tímiaja.
- 3 Tuiniákui, Jesús chicharáiniak: - Átumka aujchakáitrum ? Tawit ti tsukámak, nii aéntsrijai itiurkamia ?
- 4 Ayámtainiam wayáwar, yurúmak umpuntrámun, aya wea yútain achíkiar, yuáchmin ainiayat, yuacharmakía ?
- 5 Ujajmatáiniam aujchakáitrum ? Wea tuke Saketin ayámtainiam takakmainiayat, penke tunamainiátsui.
- 6 Nekás tájarme Ayámtain nankaka nu, yamá juí pujawai.
- 7 "*likmak máatsuk, waitnénkartin ajastárum*" tama nekaitkiúrmeka, imítmachu makucháintrume.
- 8 Nekatárum: Arútam-aents-ajasú, nekás Úunt asa, Saké tsawátnash nerentniurínti - timia, tímiaja, Jesús.

Sumpenku tsuárma.

(Mk.3,1; Rk.6,6).

- 9 Jesús we, ayámtainiam enkemamia, tímiaja.
- 10 Nuí aents^u ewejé káaru pujákui, Pariséu Jesusan makútaj-sar, aníiniak: - Wátsek, Saketin aéntsrum tsuarminkíait ? -
- 11 Tuiniákui, Jesús chicharáiniak: - Atumsha Saké tsawantin tanku wáanam iniámtai, jusatái tusárum, wecháintrupash ?
- 12 Kame aents^u tankun nankáatsuak ? Tuma asamtai, tuke Saketin pénker najanamniáiti, tájarme -.
- 13 Tinia iniáís, jáan chicháruk: - Wátsek, ewéjrum umuchkiatá - tu tai, ewejé ti pénker ajátasmia, tímiaja.

Mt. 12, 14.

14 Tu tsuármatai, Pariséu ikiukí wéar, irúnrar, Jesús maatái túsar, chichaman najatawarmia, tímiaja.

Jesús Uwemtikkiártin.

15 Jesús nii mantámnatniun nekama asa, j̄inkí we, untsurí aents^u nemariármia nuna, ashí mash' tsuararmia, tímiaja.

16 Tura, tsuárar: - Wi yáitiaj nu etserkáirap - tinia, akupiármia, tímiaja.

17 Kame Isaías tímia nu aminkíát' tusa, Arútam níinini chicháak:

18 - Wi akupkamu winiáwai. Wi ti anéa asán, níij̄aink warasan, ashí aéntsun nekás chichaman ujakat' tusan, wínia Iwiaikrátniurun susáttajai.

19 Mánitsuk, jíatsuk, untsurí aents^u matsatmanumsha penke kakantráshtatui.

20 Tunirun kupítsuk, pimpirun amútsuk, wáitrutsuk ashí mash' iwiaráttawai.

21 Ashí aents^u uwemratái túsar, níin nakasártatui - timia, tímiaja.

Tuná tsankúrachmin.

(Mk. 3, 19; Rk. 11, 14).

22 Aents^u waweámu, j̄i kusurú, chichachu ajásun Jesusan itiariármia, tímiaja. Tura, Jesús tsuáram, páant wáinmak, chichatan nankamáma, tímiaja.

23 Túramtai, ashí aents^u enentáimsar: - Juka Tawitian uchirinchukáit ? - tíarmia, tímiaja.

24 Tuiniákui, Pariséu chicharáiniak: - Atsá, emeskan úntrin kakarmaríj̄ai, wawekan j̄iki akúpeawai - tíarmia, tímiaja.

25 Jesús nekama, chicharáiniak: - Númtak shuáarak maniniána au amunaikiártatui. Nuatnaikiárusha kajernainiákka

26 Aíntsank, emésak wawekan j̄iki akupainiákka, wárichik níinki amunaikiártatui.

Mt.12,27.

- 27 Kame wi emeskan úuntrin kakarmarijají wawekan jíiki akupeakuínkia, atumí uwishniurísha, yana kakarmarijají jíiki akupena ? Níisha: "Jesús tsanumrarme" túsar, makurmáttarme.
- 28 Antsu nekamatárum: lwiáikratniun kakarmarijajíink wi emeskan jíiki akupeakuínkia, Arútam-Irúnramu atumiín tayi, - tímia, tímiaja.
- 29 - Wats, ya kakarman jinkiátsuk, nii jeén wayá, kasarkamniáit ? Kasarkataj takunka, éemka jinkiatniuíti.
- 30 Wijají pujuiniátsna au, winia numásur ainiáwai. Wíjajínchu takakmainiána au, áantar takakmainiáwai,
- 31 Nekatárum: ashí aéntsun tunarin tsankuramniáíti. Antsu lwiáikratniun antúrtsuk nakitiainiána au, penké tsankurnarchamniáíti.
- 32 Ya Arútam-aents-ajasun kajérea nuka, tsankurnarminiáíti. Antsu lwiáikratniun kajérea nuka, nunkánmasha nayáimpinmasha penke tsankurnarchamniáíti - timia, tímiaja, Jesús.

Aents^u pénker.

(Rk.6,43).

- 33 Numi arakma penkeraitkiúnka, tuke pénkeran neréawai. Antsu numi arakma yajauchitkiúnka, tuke yajáuchin neréawai. Kame, numi urukuit tusárum, nii nere iistiniáitrome.
- 34 Atumsha, makanchia ánin yajáuch' asárum, itiúrak pénkersha chichastárum ? Kame, aents^u nii anentáin takakeana nuna chicháawai.
- 35 Pénker anentáin takakainiána au, pénker chichainiáwai. Antsu yajáuch' anentáin takakainiána au, yajáuch' chichainiáwai.
- 36 Nekás tájarme: winia tsawántur jeámtai, ashí chícham áantrarum chichakmiármena nu, iwiaiiniaktiniáitrome.

Mt.12,37.

37 Pénker chichainiána au, imítmachu áartatui. Antsu yajáuch' chichainiána au, makumu áartatui - timia, tímiaja, Jesús.

Jesús nankamakuíti.

(Mk.8,12; Rk.11,29).

38 Israéran jintíntniuri, pariséusha Jesusan chicharáiniak: - Uuntá, aents-tujíntiamu najanató; kame nu íistaj-sar' wakérají - tífarmia, tímiaja.

39 Tu tuiniái: - Aents-tujíntiamun íistaj-sa wakerakrumsha, anánkkartin, yajáuch' asárum, aya wáimiaku Junás iniakmásmia nu wainkiáttarme.

40 Junás namak úuntnum menáint tsawant kanarú asamtai, núnisank Arútam-aents-ajasú menáint tsawant kaya wáanam kanártatui.

41 Niniwínmayá aénts^u, Junás chichárkam, enentáimrar, pénger ajasarmia, tímiaja. Wi Junasan nankaakuísha, átum antúrtukcha asákrumin, winia tsawántur jeámtai, Níniwi aents^u makurmáttarme.

42 Yaúnchu nua, Sapan úuntri, Sarumunk ti neka asamtai, anturkátaj-sa yajánmayá tamia, tímiaja. Wi Sarumunkan nankaakuísha, átum antuktin nakitia asákrumin, winia tsawántur jeámtai, Sapan úuntri makurmáttarme - timia, tímiaja, Jesús.

Emésak jīinkiyat, ataksha wakéteawai.

(Rk.11,24).

43 - Emésak aentsnumiá jīinkí, entsánmasha kam-puntniúnmasha wekayat, ayámratniun tujíntiawai.

44 "Ataksha aéntsnum waketkítjai" tusa, waketkí, aéntsun anentái ankant, ti pénger iwiáramun wáiniak,

Mt. 12,45.

- 45 Tsenken ti yajáuch' emésak nii nankakáinian untsuk, itiá, níinin enkémeawai. Tuma asamtai, nu aents^u núrant yajáuch' ajástatui.
Atumsha, yajáuch' wakera asárum, núrant ajastátrume - timia, tímiaja, Jesús.

Jesús shuar.

(Mk.3,31; Rk.8,19).

- 46 Jesús tu chicháa pujái, nii Nukurí, nii yachisha aa wajásar, níijaink chichástaj-sar wakeriármia, tímiaja.
47 Aents^u Jesusan ujáak: - Nuku yatsumjají aa wajásar, untsurmainiáwai -.
48 Tu tai: - Yáit winia nukursha ? Winia yatsursha ya áinia ? - Nuna tinia iniáis, Jesús nii aéntsrin iniáktuiniak: - Winia nukúrka, winia yatsursha ju ainiáwai.
49 Kame, ashí mash' aents^u winia Apar Nayáimpiniam puján amírainia nuka, nekás winia yatsur, winia umar, winia nukursha ainiáwai - timia, tímiaja.

AKANKAMU 13.

Atsámin aujmátsamu.

(Mk.4,1; Rk.8,4).

- 1 Nu tsawantin Jesús jeáyá jjiinkí, antumiánkan kanmatkariín pujumia, tímiaja.
- 2 Ti untsurí aents^u kaunkármatai, kanúnam enkemá, nuí ekemsamia, tímiaja.
- 3 Kanmátkanam aents^u irunrármatai, Jesús ti núkap auj-matsámujají jintintiáwar, chicháak: - Yaúnchu aents^u shana atsamrátaj-sa wemia, tímiaja.
- 4 Atsámram, jintiá iniármatai, chinki yuawarmia, tímiaja.
- 5 Chíkich kayánam iniárar, nunka ishíchik asamtai, wárichik tsapainiármia, tímiaja.

Mt. 13,6.

- 6 Pénker kankaprurcharu asa, etsa etsantramtai, kaararmia, tímiaja.
- 7 Chíkichkia janki núkap irúnmanum kákekar, tsakarariat, janki ti wari amúam, jakarmia, tímiaja.
- 8 Chíkichsha nunka pénkernum iniaráruka, ti pénker tsakárar, ti núkap nerekaromia, tímiaja. Chíkich washim neren, chíkichkia ujuke-nawe neren, chíkichsha menáint-nawe neren nerekaromia, tímiaja.
- 9 Ya nekátaj-sa wakera nu, nekatí - tímia, tímiaja.

Aujmátsamun úukmari.

(Mk.4, 10; Rk.8,9).

- 10 Jesusan aéntsri taríar, aníniak: - Urukamtai aya aujmatsámujaink aénts^u jintintiam ? - tíarmia, tímiaja.
- 11 Tuiniákui - Arútam-Irúnramun úukmarin aya atumín nekámtikian, chíkichkia nekawaráink tusan, tu aújmateajai.
- 12 Kame, pénker takákmana nuka, ataksha achik, núkap takústatui. Antsu takákmtsna nuka, penke achítsuk, mash' atantnáktiatui.
- 13 liniayat wainkiaráink tusan, antuiniayat nekawaráink tusan, tu aújmateajai.
- 14 Kame Wáimiaku Isaías aak:
*"Antuiniayat, nekachártatui.
 liniayat, wainkiachártatui.*
- 15 *Kame, ju aents^u nii anentáin
 kátsuram awájsar, enentaimainiátsui.
 Mitsumá ásar, penke wainmainiátsui.
 Nii kuíshin epénkar, penke antuiniátsui.
 Wi ewemtikrártaj-san takuísha,
 nakitia ásar, penke enentaimainiátsui".*
 Aármia nu aminkiat' tusan, nuna aújmateajai.
- 16 Antsu, átum antúkrum, wáinia asárum, warastárum.

Mt.13,17.

17 Kame, átum ántarmena nuna, átum wáinrumna nunasha yaúnchu untsurí wáimiaku wáinkiatniun ti wakerukariat, penke wainkiachármiai - timia, tímiaja, Jesús.

Atsamin aújmatámsamu jintiámu.

(Mk.4,13; Rk.8,11).

18 Yamáikia atsamín aújmatámsamu unuítiamjinia nu nekatárum.

19 Sha jintiá iniararmia nuka, Arutman chichame aéntsun anentaíin enkemamtáisha, nekawaráink tusa, emésak wárichik jurana nuíti.

20 Sha kayánam iniararmia nuka, aents^u Arutman chichamen antúkar, warásar amirainiyat,

21 nii anentaíin kankaprurcharu asamtai, itiúrchatnum wárichik ikiúinia nuíti.

22 Sha janki írunmanum iniararmia nuka, aents^u Arutman chichamen antukariat, aya nii takátrijaink, nii kuítrijaink enentáimsar, kajínmatki wena nuíti.

23 Antsu, sha nunka pékernum iniararmia nuka, aents^u Arutman chichamen antúkar, nekás amírkar, ti pénger nerena nuíti.

Aents^u Arutman chichamen tuke amírainia au, nekás washim, ujuke-nawe, menáint-nawe nerénawai - timia, tímiaja, Jesús.

Inchi aújmatámsamu.

24 Jesús ataksha aújmatuk: - Arútam-Irúnramu aents^u ajánam inchin arakmia nuniniáiti.

25 Kanú pujái, kashi nii numasri ta, inchi arákmanum inchini aráatak, ikiúkma, tímiaja.

26 Arakma kukujrúkmatai, aéntsun takárniuri nekama ásar,

Mt.13,27.

- 27 nii úuntrin chicharáiniak: "Uuntá, ámeka ajánam inchi arakchamkiám ? Urukamtai nuínkia inchínchisha tsapai-niara ?".
- 28 Tu chichainiákui, nii úuntri chicháak: "Kashi winia numásur ta, aitkiáchiawash?" timia, tímiaja. "Ukuinrat' túsam, wakéramek?" tuiniákui:
- 29 "Atsá, iniaisatárum. Inchínchin ukuíniaj tukamárum, inchisha uwenírum.
- 30 Máimtek tsakarat' tusárum, iniaisatárum. Yukuámunam métek uwérum, inchínchisha irumrárum, ekemaktárum. Nuyá íchikia winia jeáruí irumratárum", timia, tímiaja. - Nuna ujmatsumia, tímiaja, Jesús.

Uwí ujmatsumu.

(Mk.4,30; Rk.13,18).

- 31 Jesús ataksha aújmatuk: - Arútam-Irunrámuka aents^u uwí jinkiáchirin nunká arakmia nuniniáiti.
- 32 Jinkiaichirinkia ishitiupchitiat, tsapáinkia, ashí mash' ajan arakrin nankaruíti. Úunt ajásmatai, chinki pasunkmatáinti - timia, tímiaja.

Karín ujmatsumu.

(Rk.13,20).

- 33 Ataksha Jesús aújmatuk: - Arútam-Irunrámuka karínia aintsankete. Ashí mash' wakapruntikiat' tusa, nua naúmnum enkéawai -.
- 34 Jesuska áyatik ujmatsumujáink aéntsun jintíntiawar, tu ujmatsumia, tímiaja.
- 35 Kame yaúnchu wáimiaku chicháak: - Yáma nankamánmaya nekáshtain nekawarat' tusan, aya ujmatsumujáink aéntsun jintintiawártatjai - tiniu asamtai, aminkiamia, tímiaja.

Inchi aujmátsamu jintiámu.

- 36 Jesús aéntsun ikiúkiar, nii aéntsrijai jeá waketkimia, tímiaja.
- Inchi aujmátsamu warinia unuítiamañ? - túsar, Jesusan anintruiniákui,
- 37 Jesús chicharáiniak: - Inchín aráana nuka, Arútam-aents-ajasúa nuíti.
- 38 Ájaka, ju nunkáiti. Inchi, aents^u Arútam-Irunramúnam enkemáinia nuíti. Inchínchikia, emeskan aéntsri áinia nuíti.
- 39 Numaska, emeskáiti. Yukuámuka, winia tsawantruíti. Takárniuka, Arutman Pasukri ainiáwai.
- 40 Winia tsawántur jeámtai, tsuátan irúmrrar ekemainiána aínsarank, yajáuchin ekemakártatui.
- 41 Arútam-aents-ajasú ashí yajáuch' aents^u tunánnum utsuiniána núnaka, nii irunramuriya jíiki akupkarat' tusa, nii Pasukrin akupkártatui.
- 42 Ashí mash' tunártinian irúrur, ti núkap waitsarat' tusar, jiniúm epeawártatui.
- 43 Antsu, tunártincha áinia au, etsaya aínsarank nii Aparín irunramuriín tsaapnirártatui. Mash' antúiniána au, nekáwarti - timia, tímiaja.

Kuri aujmátsamu.

- 44 - Arútam-Irunrámuka kuri nunká úukma aniuíti. Aents^u nu kurin wáiniak, ataksha úuk, nu nunkan sumáktaj-sa, wara warat ashí tákakman súrawai - timia, tímiaja, Jesús.

Sháuk aujmátsamu.

- 45 - Arútam-Irunrámuka aents^u sháuk ti pénkeran eána aniuíti.
- 46 Nu sháukan wáiniak, ti kuitiáiti tuiniakuish, nuna sumáktaj-sa, ashí tákakman súrawai - timia, tímiaja, Jesús.

Neka aujmátsamu.

- 47 - Arútam-Irunrámuka neka entsá ajúnkam, niishá namakan enkéana nuniskete.
- 48 Aéntska nekan kanmátkanam j̄ikiar, namak yútai ainiánka chankínnium chumpiáwar, yúchatáinkia ajápchak áinia ?
- 49 Aíntsank, winia tsawántur jeámtai, Arutman Pasukri tárar, aents^u yajáuchin akántrar,
- 50 ti núkap waitsarat' túsar, j̄inium epeawártatui -.
- 51 Jesús tinia iniáis, aníniak: - Yamái tájana ju nekármek ? -
- Ee - tuiniákui:
- 52 - Ashí unuúkiartin Arútam-Irunramúnam pujúinia au, uchírtinia áintsarank, yaúnchu chichamj̄ai, yamarmaj̄aisha pénker j̄intintiainiáwai - timia, tímiaja.

Jesús Nasarétnum nakítramu.

(Mk.6,1; Rk.4,16).

- 53 Nuna tuasúa amik, Jesús wemia, tímiaja.
- 54 Nasarétnum jeá, nii nunké asamtai, ayámtainiam aujmatú pujumia, tímiaja. Jesús nii shuáran chicharainiákui: - Jush, tuyana imiá neka ? Itiúra aents-tujíntiamun najanamniáit ?
- 55 Juka, Jusé numij̄ai takákmaun uchirinchukáit ? Ni nukurisha, Maríchukáit ? Nii kaná-yachisha Sántiak, Semunk, tura Jútaschak áinia ?
- 56 Nii kaná-umáisha íj̄aj̄i irúnrar, pujuiniátsuk ? Túma aísha, tuyana jusha imiá unuimiaruít ? - Aents^u íimiarcha ásar, pachímrar, tu chichariármia, tímiaja.
- 57 Tuiniákui, Jesús chicháak: - Aents^u wáimiakun ashí nunkánam pénker anturainiakuísha, aya nii nunkeén nii shuar penke antúrtsuk, wishíkiainiáwai - timia, tímiaja.
- 58 Tura, nu aents^u íimiarcha asármatai, Jesús nii kakármarin núkap iniakmaschamia, tímiaja.

AKANKAMU 14.

Imiákratin Juank máamu.

(Mk.6, 14; Rk.9, 7).

- 1 Tura úunt Erutes: - Jesús ti náatui - taman antuk,
- 2 nii aéntsrin chicharáiniak: - Imiákratin Juank ataksha aneántu asa, aénts-tujíntiamun túrawai - timia, tímiaja.
- 3 Kame Erutes nii yachí Jiripin tarímtarin, Erutíasan, atankí pujumia, tímiaja.
- 4 Túmakui, Juank: - Turashtiniáitme - tau asamtai, Erutes nuna achik, jírujai jinkiá, epénmia, tímiaja.
- 5 Ashí mash': - Juank waimiakuíti - tau asármatai, máatniun wakérayat, aéntsun ishammia, tímiaja.
- 6 Nii namperi jeámtai, Erutíasan nawantri ashí ipiámu pujuiniámunam ti shíir jantsemkui, Erutes nekás warás, chicháruk:
- 7 - Ame wakéramna nu seattiá. Arútam íirui: páchitsuk amástatjai - timia, tímiaja.
- 8 Tu tai, nii nukurí akátramasa, nu nuáchkia chicháruk: - Juank imiákratniun múuke, umámkunam enkéram, surustá - tímia, tímiaja.
- 9 Úunt Erutes: - Arútmasha íirui, nekás amástatjai - ipiámu antúiniái tau asa, wake mesek, nankí-júun akupáiniak, chicháruk:
- 10 - Juánkan múuke tsupíkrum, itiatárum - timia, tímiaja.
- 11 Tu tai, wárichik umámkunam itiármatai, nuach' achik, nii nukurín susamia, tímiaja.
- 12 Turawármatai, Juánkan aéntsri weríar, nii iniashín júkiar, pénker iwiársar, Jesusan ujauwarmia, tímiaja.

Mt.14,13.

Yurúmak ikiaunkámu.

(Mk.6,30; Rk.9,10 Jn.6,1).

- 13 Jesús níinki pujústaj-sa, nunca itiárkanam kanujai weái, aéntssha nekáwar, antúmiank tsukíntiak téntatkiar, amáini nákauwarmia, tímiaja.
- 14 Jesuska katinkín, iimsataj tukamá, ti núkap aéntsun wáinkiar, wáit anéntrar, jaa pujuármia nuna tsuararmia, tímiaja.
- 15 Kiáakui, nii aéntsri taríar, chicharáiniak: - Jesúsá, kiáawai; juí yurúmak atsá asamtai, nii yurúmkarin sumarmakarat' túsam, wárichik akupkartá - tíarmia, tímiaja.
- 16 Nuna antuk, Jesús chicháak: - Atsá, wearáink tusárum, átum ayuratárum - timia, tímiaja.
- 17 Tu tai: - Tse, apátuk ewéjchik, tura namaksha jímiarchik tákakeaji - tíarmia, tímiaja.
- 18 Tuiniákui: - Juí itiatárum - tinia,
- 19 ashí aéntsun nupánam apújsármatai, apatkun, namáknasha achik, nayáimpin íimias, usukruá, kakut púuk: - Pai, aents^u ayuratárum - tusa, nii aéntsrin susarmia, tímiaja.
- 20 Ashí aents^u yurumáwar, mash' ejemarmatáisha, nawe-jímiar chankín tíarmia, tímiaja.
- 21 Yurumawarmia nu, nuwa uchisha nekápmatsuk, aya áishmankak ewej-nupanti áarmia, tímiaja.

Entsá wáitsuk wekamu.

(Mk.6,45; Jn.6,16).

- 22 Nuyá Jesuska nii aéntsrin chicharáiniak: - Átumka kanujai entsá eemú ajatárum - tía, akúpkar, ashí aéntsnasha awainkiármia, tímiaja.
- 23 Mash' akúpkar, níinki anentruátaj-sa, náintnium wemia, tímiaja. Kíáakui, níichik pujumia, tímiaja.
- 24 Yajá antumiánknum kanu nanátunka nase túput túput ajakin, tura entsa úrua ánik ukáit'-sa, péper péper amajmia, tímiaja.

Mt. 14,25.

- 25 Tura, káshik kirítiak, Jesús entsá wáitsuk wekáakui,
26 nii aéntsri wáinkiar: - Iwianchíti - túsar, ti sapíjmiakar,
charátum ajáarmia, tímiaja.
27 Chará chará ajainiákui, Jesús nuntumtus, chicharáiniak: -
Kakáram ajastárum ! Wiyáitjai. Ishamrukáirap - tíarmia,
tímiaja.
28 Jesús takui, Kaya chicháruk: - Uuntá, ametkumka: "Entsá
wekásam, wáitsuk inkiuntaitiá !" turuttiá - timia, tímiaja.
29 - Ayu, winitiá ! - Jesús tu tai, Káyaka kanúnmayá akáikin,
entsá wáitsuk wekáratak, Jesusan inkiúntaj-sa werimia,
tímiaja.
30 Weayat, nase umpuim, entsa tsuka tsuka ajáakui, ishámak,
wáitian nankamámia, tímiaja. Chará ajáak: - Jesúsá,
uwemtikrurtá - ajáakui,
31 Jesús wárichik ewéjnum tapit achik: - Urukamtai ímiarcha
ajasum ? - tusa, jusamia, tímiaja.
32 Kanúnam enkemamtai, náseka menkakamia, tímiaja.
33 Nii aéntsri ímiaru ajásar: - Ámeke nekás Arutman
Uchiríntme - túsar, tikishmatrarmia, tímiaja.

Jenesaret irutkámunam tsuárma.

(Mk.6,53).

- 34 Tura amáini katíinkiar, Jenesaret nunkánam jeawarmia,
tímiaja.
35 Jesusan nekáwar, ashí aéntska ujanáikiar,
36 jáa áinia aun itiáriar, aya nii pushirínkiash antinkiarat' túsar,
seawarmia, tímiaja. Ashí mash' Jesusan antinkiármia nuka,
ti pénker tsuamararmia, tímiaja.

AKANKAMU 15.

Arútam awemamu, aéntsun chichámesha.

(Mk. 7, 1).

- 1 Nuyá Jerusarenknumiá pariseu, unuíkiartinsha Jesusan taríar, chicharáiniak:
- 2 - Urukamtai ii úuntrin awemámurin umítsuk, amé aéntsrumka ikijmiátskesha yurumáinia ? -
- 3 Tuiniákui: - Atumsha: "Il úuntri awemamu amirkatniúítji" tayátrumsha, urukamtai Arútam awemamu umíatsrum ?
- 4 Arútam warítuia ? "Apasha nukusha umirkárum, pénger yainkiartárum" tía: "Nii aparín, nii nukuríniash kajérainia au, maatárum" turámtsujik ?
- 5 Antsu átumka: "Ayámtainiam nii kuítrin súana nuka, nii aparín, nii nukuríniash yainkchatniúíti" tárume.
- 6 Túrarum, atumí úuntri awemamu umíktin, apasha nukusha yáitsuk, Arútam awemamu umíatsrume.
- 7 Nekás anankartiniáitrum. Kame wáimiaku Isaías yaúnchu páant chichartámkuram:
- 8 "*Ju aents^u pujúinia ju, enentáimtsuk chichásar,*
- 9 *áantar anentrutainiáwai. Aya nii wakeramuríjaink aéntsun jintintiainiáwai*" timia - tímiaja.

Aéntsun anentái.

Mk. 7, 14; Rk. 6, 39.

- 10 Jesús nuna tinia iniáis, aents^u nuí pujúinian irúrar, chicharáiniak: - Titiatjármena nu antúkrum, nekatárum:
- 11 Wenénam enkemna nuka, aéntsun yajáuch' awájeatsui. Antsu wenénmayá jíinia nuka, aéntsun yajáuch' awájeawai - timia, tímiaja.
- 12 Nuyá nii aéntsri taríar: - Pariséuka amé chichamen antúkar, yajáuch' enentaimainiáwai - tuiniákui:

Mt. 15,13.

- 13 - Winia Apar aráchmaka ukuínkiamu átatui.
- 14 Kusurú asármatai ikiuktiárum. Wainmachuitat chíkich wáinmachun jintíntiakka, mai wáanam iniawártatui - timia, tímiaja.
- 15 Káyasha: - Jesusá, páant jintintkiartuatá - takui,
- 16 Jesús chicháreak: - Atumsha urukamtai enentáimtsuram ?
- 17 Nekáatsrumek ? Wenénmani enkemna nu, wakénam jeámtai, saashtainkiáit ?
- 18 Antsu wenénmani jíinnia nu, enentáinmaya winiá asa, aéntsun yajáuch' awájeawai.
- 19 Kame, aents^u nii anentaiín yajáuch' pujústaj-sa wakératsuk ? Mankártatsuk ? Tsanírmatsuk ? Akráteatsuk ? Kasámeatsuk ? Wáitratsuk ? Tsanúmeatsuk ?
- 20 Tuma asamtai, nii anentáiya jíinia nujai, aents^u yajáuch' ajáawai. Antsu aya ikíjmatsuk yúana nuka, yajáuch' ajaschamniáiti - timia, tímiaja, Jesús.

Kanánmaya nua tsuárma.

(Mk. 7,24).

- 21 Jesús Tiru, Sitúnk nunkánmani weái,
- 22 Kanánmaya nua nuyá jíinki, Jesusan tarí, chará chará ajatki: - Úuntá, Tawitian uchiriya, wáwek winia nawantrun wáitkia asamtai, wáit-nentrustá - timia, tímiaja.
- 23 Jesús ántachu ajás wéakui, nii aéntsri chicharáiniak: - Chará chará ajaki winiána au antúrkam, akúpkakia - tíarmia, tímiaja.
- 24 Jesuska chicháak: - "Aya Israer aents^u eákai" tusa, Arútam akupkamuítjai - tu táisha,
- 25 núwaka amayank, tikíshmatar, chicháruk: - Uuntá, yaintkiatá ! - tau tímiaja.
- 26 Jesús chicháruk: - li uchirí yurúm kari yawá susashtiniáitji - takui,

Mt.15,27.

- 27 núasha: - Nekás tame, Uuntá ! Tumaitkuísha yurúmak púunak kákena nuna, yawasha yu ainiáwai - timia, tímiaja.
- 28 Jesús nuna antuk, chicháruk: - Umachí, nekás ímiaru asam, ame wakéramna nu atí - tu tai, nu chichámaik nii nawantri pénker ajasmia, tímiaja.

Ataksha yurúmak ikiaukamu.

(Mk.7,31).

- 29 Nuyá Jesús Kariréa antumiánknum waketki, náintnium waka, nuí pujusmia, tímiaja.
- 30 Nuí untsurí aénts^u taríar, shutuápnash, tsupirkámunash, kusurúnash, chicháchunash, chíkich sunkurjají jáana aúnash itíármatai, tsuararmia, tímiaja.
- 31 Chichachu chichainiákui, shutuápsha pénker wekainiákui, kusurusha wainmainiákui, ashí mash' nuna wáinkiar, ti warásar Arutman naatmamtikkiármia, tímiaja.
- 32 Jesuska nii aéntsrin irúrar, chicharániak: - Ju aéntsun wáitnentáiniajai. Menáint tsawant yurúmtsuk wíjaink pujúinia asamtai, nii jeén akupkárnakka, tsukái jintiá ajakrachártatjash?
- 33 Tu tai, nii aéntsri chicharániak: - Ju aénts^u ayurataj takursha, yurúmak atsámunmash itíur wainkiamniáitaj' ? -
- 34 Tuiniakuísha: - Yurúmak tákakrumek ? - tu tai: - Tsenken apátuk, ishíchik namákchijaink tákakeaji - tíarmia, tímiaja.
- 35 Nuíkia Jesuska: - Ashí mash' aénts^u pujusartí - tía, nia,
- 36 tsénken apátkun namákchijai achík, Arutman yumínkias, kakut púuk: - Aents^u ayuratárum - tusa, nii aéntsrin susarmia, tímiaja.
- 37 Ashí aents^u yurumáwar, mash' ejemararmatáisha, tsenken chankín tíarmia, tímiaja.
- 38 Yurumawarmia nu, núwasha uchisha nekápmatsuk, aya áishmank aintiuk-nupánti áarmia, tímiaja.

Mt. 15,39.

39 Nuyá Jesús, aéntsun awáinkiar, kanúnam enkemá, Makatank nunkánam wemia, tímiaja.

AKANKAMU 16.

Arútam iniáknamu.

Rk.8,11.

- 1 Pariséu, Satuséusha: - Jesús nekapsatái - túsar, taríar, Arútmaka aénts-tujíntiamun iniakmasat' túsar, seawarmia, tímiaja.
- 2 Jesús chicharáiniak: - Kiáakui, nayáimp' kapaku wainkiárum: "Kashín esatrúrtatui" tίνiuítrome.
- 3 Antsu tsawáakui, nayáimp' kapaku íisrum: "Yutúktatui" tίνiuítrome. Nayáimp' íisrum nekayátrumsha, urukamtai aéntsun túramuri íisrum, nékatsrum ?
- 4 Kame, anánkkartin, yajáuch' asárum, aya wáimiaku Junás iniakmasmia nu wainkiáttarme - tίνia ikiúak, wemia, tímiaja.

Pariséun karinri.

Mk.8,14.

- 5 Jesusan aéntsrinkia apatkun kajínmatkiar, entsa amáini katinkíarmia, tímiaja.
- 6 Jesús chicháak: - Aneartárum, pariséun satuséunsha karinri jukírap - takui,
- 7 nii aéntsri: - Apátuk itíáchu asakrin túramji - túsar, tunainiármia, tímiaja.
- 8 Jesús neká, chicharáiniak: - limiarcháitromea ! Áantrarmek: "Apátuk itíáchji" tunáiniarme.
- 9 Nekátsrumek ? Ewéj apátkujáink ewej-nupanti áishmank ayurárum, urutma ampirma juukmárum, kajinmatkinrúmek ?
- 10 Aíntsarmek, tsenken apátkujáink aíntiuk-nupanti áishmank ayurárum, ampirma urutma chankín aimkiamárum ? - tίνia:

Mt.16,11.

- 11 - Maj nekátsrumek ? "Pariséun, Satuséunsha karinri jukírap" tájana nu, apatkuchuíti - takui,
12 nii aéntsrissha: - "Pariséun, Satuséunsha chichame antukáirap" túramji - túsar, nekawarmia, tímiaja.

Jesús-Irúnramun tarimtáiri.

Mk.8,27; Rk.9,18.

- 13 Jesús Sesaréa ,Jiripu táma nunkánam jeá, nii aéntsrin chicharáiniak: - Wi Arútam-aents-ajasú asámtaisha, aents^u "Yáiti" turutáinia ? -
14 Takui: - Chíkich chicháiniak: "Imiákratin Juankcháashit ? Eriascháashit ? Jeremiascháashit ? Túrutskesha yaúnychu wáimiaku aneántmia nucháashit ?" Turamainiáwai - tíarmia, tímiaja.
15 Nuna antuk: - Atumsha: "Yáiti" túrutrum ? - Jesús tu tai,
16 Semunk chicháruk: - Ámeke nekás ashí tujintcha Utsumkáitmea ! Nekás tuke pujú Arutman Uchirintme - timia, tímiaja.
17 Takui: - Warastá Semunká, Junasan uchiriya ! Támena nu aminiuchuítí. Antsu winia Ap_{ar} túramna nu tíniu asakmin,
18 wikia tájame: "Ámeke Kayáitme. Amiín káyanma aínsanak wínia jeárun jeámtatjai. Nuka winia Irúnramur asa, ashí mash' yajáuch' ana nuna nupetkátawai.
19 Ámeke Arútam-Irúnramun jéentniuri átatme. Ame "Atsá" takuminkia, Arútmasha "Atsá" títiatui. Ame "Ayú" takuminkia, Arútmasha "Ayú" títiatui -.
20 Tinia iniáis, nii aéntsrin chicharáiniak: - "Ashí tujintcha Utsumkáiti" tusárum, penke ujakáirap - timia, tímiaja, Jesús.

Jesusan jákatniuri.

Mk.8,31; Rk.9,22.

- 21 Jesús nii aéntsrin chicharáiniak: - Jutíun úuntri, wean úuntrisha, unuikiártiniash waitkiarsarat' rusan,

Mt. 16,22.

- Jerusarénknum wetiniáitjai - tía: - Nekás mantuawártatui. Jakan, jimiará kanaran, aneántatjai - tu chichatan nankamamia, tímiaja.
- 22 Nuikia Káyaka, Jesusan akankí, chicháruk: - Ame waitsáim tusa, Arútam yaintmaktí. Kame nuka penke achatniuíti -.
- 23 Tu tai, Jesús ayantáar, chicháruk: - Emeská, werumtá. Ámeka Arútam wakéramu nékachu asam, aéntsua aínsamek enentáimsam, íirshimp' ajasume - timia, tímiaja.
- 24 Tura, nii aéntsrin chicharáiniak: - Ya nemarsátjame túruta nuka, nii wakéramurin iniáis, waitsatniúnmasha nemartustí.
- 25 Kame, ya mantuawaráink tusar, wi shuar ajainiátsna aúka, tuke jakártatui. Antsu, ya wi shuar ajástaj-sar jainiána aúka, tuke iwiáku pujusártatui.
- 26 Aéntska nii iwiákmarin emenkakka, mash' nunkán sumáksha, penke nánkamin sumáawai. Kame nii iwiákmarin sumakminkiáit ?
- 27 Nekatárum: Arútam-aénts-ajasú nii Aparín kakármarin achik, nii pasúkrijai ta, aéntsun takakmásmarin íiras, ankant ankant akíktatui.
- 28 Nekás tájarme: Yákesh pujármena ju játsuk, Arútam-aents-ajasú nakámaku winiá, páant wainkiáttarme - tímia, tímiaja, Jesús.

AKANKAMU 17.

Jesús yapajniámu.

Mk.9,2; Rk.9,28.

- 1 Nuyá, ujuk tsawant nankamásmatai, Jesuska Kayan, Santiákun, nii yachísha Juánkan júkiar, níijaink yakí náintnium wakamia, tímiaja.
- 2 Nuí yapajniámtai, nii pushirí ti tsáapin ajás, nii yapisha wincha etsaya aínsank ajasmia, tímiaja.

Mt.17,3.

- 3 Nu chichamáik Muisés, Isaíassha wantíntiukar, Jesusjaj chichaármia, tímiaja.
- 4 Kaya nuna wáiniak: - Uuntá, juí pujustin ti penkeráiti. Wakérakmíntia menáint áakan aakmaktajai. Áminiuñ najanan, Muisesnan, tura Eríasnansha najanáttajai - timia, tímiaja.
- 5 Tu tai, yuráñkim ti puju amuámtai, nuíñk Arútam chicháak: - Juka wi ti anéamu Uchiruítí; Wi akupkamu asamtai, tuke anturkatárum - timia, tímiaja.
- 6 Jesusan aéñtsrinkia nuna antúkar, ti ishámkar, tikíshmar tsuntsumrurarmia, tímiaja.
- 7 Jesús tarí, antíñkiar: - Ishamkáirap; wajaktiárum - takui,
- 8 nii aéñtsri iimsataj tukamá, aya Jesusan wainkiármia, tímiaja.
- 9 Jesús waketki winís: - Arútam-aents-ajasú jaka aneánttsaink, yamá wainkiárumna nu penke etserkáirap - tíarmia, tímiaja.
- 10 Tu tai, nii aéñtsri aníñiak: - Unuikiártinkia: "Ashí tujintcha Utsumka táatsaink, Erías tatiniáiti" tuiniátsuk ? Amesha waritmea, Jesúsá ? -
- 11 Tuiniákui, Jesús chicharáñiak: - Mash' iwiarátaj-sa Erías tatiniáiti.
- 12 Antsu Erías támiayi. Támatáisha, aents^u nékachu ásar, kajeriármiai. Aíñsarank Arútam-aents-ajásunash waitkiasár-tatui - timia, tímiaja
- 13 Nii aéñtsri nuna antúkar: - Imiákratin Juánkan aújmatui - túsar, nekawarmia, tímiaja.

Namperú tsuárma.

Mk.9,14; Rk.9,37.

- 14 Jesús aents^u matsátmanum winiái, áishmank tarí, tikíshmatar:
- 15 - Uuntá, winia uchir wewérkasa ajáki, jiniñm iniar, entsánmasha iniank, ti wáitiakui, wáit-néntrusam iirtustá - tinia:

Mt. 17,16.

- 16 - amé aéntsrumsha tsuártaj tukamá, tujintkiárai - tímia, tímiaja.
- 17 Tu tai: - Maj ! Nékachu, ímiarcha aéntsnum, urútmak pujústataj ? Urútmak katsuntratniuítiaj ? - tusa: - Wats, uchi juí itiarititiárum - timia, tímiaja.
- 18 Itiárim, Jesús wawekan jíiki akupkamtai, nu chichamáik uchi pénker ajasmia, tímiaja.
- 19 Tura nii aéntsri aya Jesúsajink pujúsar, anínrusar, chicharáiniak: -Urúkamtai íikia nu wáwek jíiktin tujíntkiamaj' ?
- 20 Tu tuiniái: - Ímiarcha asárum tujintkiárme. limiaruitkiúrmeka: "Naintiá, uránakam antumiánknum menkakatá" tákurmin, menkakáinti. Kame ashí tujíntcha aíntrume - tíaia iniáis:
- 21 - Ju eméskaka nekás ijiarmasar', ti anentruar', awakamniáitji - timia, tímiaja, Jesús.

Jákatniuri ataksha étserma.

Mk.9,29; Rk.9,44.

- 22 Chíkich tsawantin Jesús Kariréanam nii aéntsrijink pujús, chicharáiniak: - Arútam-aents-ajasún achíkiar, maawártatui.
- 23 Turawarmatáisha, jimiará kanar, aneánttatui - timia, tímiaja. Nii aéntsri nuna antúkar, ti kúntuts enentaimrarmia, tímiaja.

Ayámtainiu akikma.

- 24 Jesús Kaparnaunk irutkámunam waketkimtai, ayámtainiu kuítian júuniána au, Kayan taríar, chicharáiniak: - Atumí úuntrisha, Jesússha, akikmachukáit ? -
- 25 Tu tuiniái: - Ee, akíkmaawai - tíaia ikiúak, nii jeén wemia, tímiaja. Nii jeén wayá, chicháatsaink Jesús chicháruk: - Semunká, warítmea: nunká úuntri áiniána au, yana kuítian seáu áinia ? Nii uchiríniak seáu áinia ? - tu aniásmia, tímiaja.
- 26 - Atsá, nii uchirinkia seáchu ainiáwai - Kaya tu tai, Jesús chicháak: - Nuíka nii uchirí akikmakchatniuíti.

Mt.17,27.

27 Tumaitkuísha, aents^u áantrar aujmatrusaráink túsam, entsá weme, namak japíkim, wené iwiánkam, kuit wainkiáttamna nu júsam, winiásha aminiúsha akikmaktá - timia, tímiaja.

AKANKAMU 18.

Nekás nankámaku.

Mk.9,33; Rk.9,46.

- 1 Nu tsawanttin nii aéntsri taríar, Jesusan chicharáiniak: - Yaki Nayáimpiniam imiá nankamakuít ? -
- 2 Tuiniákui, Jesús uchin untsuk, ajapen apujas,
- 3 chicháak: - Nekás tájarme: atumí anentái yapajíarum, uchichia ainiachkúrmeka, Nayáimpiniam jeashtátrome.
- 4 Ya ju uchia áinis péejchach' ajana nuka, Nayáimpiniam imiá nankámaku átatui - timia, tímiaja.

Tunamtíkkiartin.

Mk.9,42; Rk.17,1.

- 5 Jesús ataksha chicháak: - Ya winia anéntak uchin wáinia nuka, winia wáitiui - timia, tímiaja.
- 6 - Antsu, ya nii iniakmamuríjaj, uchi winia anentáinian tunámtikia nuka, uchin yajáuch' unuiniaráink, kayan kuntújnum netuáwar, kunánam ajuiniákka, pénker aaráinti.
- 7 Tunamtikniutíram aneartárum. Tunámtikin tuke atiniáiti, tumaitkuísha tunamtikiáinia au nekás yumínkramu áartatui.
- 8 Amé ewejem, nawemsha tunamtikramkuínkia, tsupíkiám, yajá ajapatá. Kame mash' iniashim jinium tuke esawáink, Nayáimpiniam jeátin aya ewejémek, nawémsha tsupíakmeka, pénker aíntme.
- 9 Ame jímisha tunamtikramkuínkia, ukuínkiam ajapatá. Kame mash' iniashim Tunkuruánam esawáink, Nayáimpiniam jeátin aya jímik ukuínkiúmka, pénker aíntme.

Mt. 18,10.

- 10 Anéartárum; uchi wishikráirap. Kame nii Pasukri Nayáimpiniam pujúsar, winia Aparún yapín tuke irainiáwai - timia, tímiaja, Jesús.

Tanku menkaka.

Rk. 15,3.

- 11 Jesús chicháak: - Arútam-aents-ajasú menkakárun eáktaj-sa tawiti.
- 12 Enentáimsakua: wátsek, ya núkap tankun takakiat, chikíchik menkátukam, mash' ikiúkiar, nuna chikíchiniak eáktaj-sa wéatsu ?
- 13 Tura wániak: "Wainkiájai" tusa, menkakachárujai nampermachuitiat, menkakajai nampérmawai.
- 14 Núnisank atumí Aparí Nayáimpiniam pujana nu, uchi penke menkakaráink tusa, nakítiawai - timia, tímiaja, Jesús.

Jesús-Irúnramu.

Rk. 17,3.

- 15 Amé yatsum yajáuch' awajtamkuínkia, nii werim, amek níijaink chichásam, nawamkatá.
- 16 Anturtamchakuínkia, jimiará aents^u jukim, ataksha werim, iwiaratá.
- 17 Iwiáratin tujintkiámka, Irunramúnam iwiainiaktá. Penke antachkuínkia: "tunartiniáiti" túsam, iniáisatá.
- 18 Nekás tájarme: Juí nunkánam tsankureátsumna nuka, Nayáimpinmasha tsankurachmáiti. Tura juí nunkánam tsankureárumna nuka, Nayáimpinmasha tsakuramuíti.
- 19 Núnisnak tájarme: Ju nunkánam jímiarchik tsanínkrum, warínkish seakrumnínkia, winia Apar Nayáimpiniam pujana nu, núnaka suramsáttarme.

Mt. 18,20.

20 Kame, jímiarkesh. menáintiukesh winia enentáimtusar irúnrar pujuiniakuínkia, wisha nuí níijaink pujústatjai -. Tu chichariármia, tímiaja, Jesús nii aéntsrin.

Tsankúrkartin.

21 Nuyá Káyaka Jesusan tarí, chicháruk: - Uuntá, winia yatsur yajáuch' awájtakui, urutma tsankuratniuítiaj ? Tsénkenkek tsankuratniuítiaj ?

22 Takui: - Núnichik tsankuratá wikia tátsujai. Antsu tuke tankúkratin atá, tájame - timia, tímiaja, Jesús.

23 - Arútam-Irúnramu, úunt: "Urutma tumashítrum" tusa, nii takárniurin untsukarmia nuniniáiti.

24 Úunt nii takárniurin irúrar, chikíchiniak chicháruk: "Ameja, urutma tumashítiam ?" Tu tai: "Ti núkap tumashítjame" tímia tímiaja.

25 Akikmáktinian tákakchakui, úunt nii aéntsrin chicharáiniak: "Akikmakat' tusárum, nuwéntuk, uchírtiuk, nunkártiuk suruktárum - timia, tímiaja.

26 Tu tai, takárniuri tikíshmatar, seáak: "Ishíchik nákarsatá; wajasaktá, mash' akiktajme -.

27 Tu chicháakui, nii úntri wáit-néntar: "Ankant pujustí" tusa, tumáshniaka mash' tsankuramia, tímiaja.

28 Tura nu takárniuri jíinsank, wéaj tukamá, aents^u níin ishíchichik tumashiya nuna inkiunk, kuntújnum ininia pujuras: "Tumashítmena nu wari akirkatá" tusa, maankiásmia, tímiaja.

29 Túram, nii aínkia taket tikíshmatar: "Ishíchik nákarsatá; wajasaktá, mash' akiktátjame" takuísha,

30 ti kajek, tsankúrtsuk, mash' akirkat' tusa, epenmia, tímiaja.

31 Nuna wainkiáruka, kúntuts enentáimsar, nii úntrin ujauwarmia, tímiaja.

32 Tu ujákam, úunt nii takárniurin untsuk: "Yajauchitmea ! Winia: wait-nentrustá, túrutkumin, tsankuráchmakjam ?

Mt. 18,33.

- 33 Amesha wi tsankurájmena aínsamek, urukamtai aim tsankúrachmam ? -
- 34 Tu chicháarak, kajérak, ashí mash' akikmakat' tusa, surukmia, tímiaja.
- 35 Jesús tíaia iniáis: - Atumsha aents^u tsankureachkurminkia, winia Ap̄ar Nayáimpiniam pujana nu, atumjai núnisank aítkiattui - timia, tímiaja.

AKANKAMU 19.

Tarímiat kanákchamu.

Mt. 5,31; Mk. 10, 1; Rk. 16, 18.

- 1 Unuiniasúa amik, Jesús Kariréa nunkánmaya j̄iinki, Jurtán amáini, Jutéa nunkánam jeámia, tímiaja.
- 2 Untsurí aents^u nemárainiam, jaa pujuármia nuna tsuararmia, tímiaja.
- 3 Turú pujái, pariséu taríar, nekapsatái túsar, aníniak: - Itiúrchat ákui, áishmank nii tarímtarin ajapamniakáit ? –
- 4 Tuiniákui: - Yama nankámtaik íin Najátma áishmankan chíkích nuáj̄ink najana,
- 5 chicháak: "Áishmank nii aparín, nii nukurínsha ikiukí, nii tarímtaríj̄ink tsanínk, chíkíchik ajastiniáiti" tímia nu Ujajmatáiniam aujsachukáitrum ?
- 6 Kame nuatnaikiámunam chíkíchik ajasaru asa, jímiarcha ainiáwai. Tuma asamtai, Arútam atsankiármia nuna, aents^u akankashtiniáiti - timia, tímiaja, Jesús.
- 7 Pariséusha chicharáiniak: - "Entá, urukámtaiya Muiseska chicháak: "Papí najánarum, atumí tarímtari ajapamniáitrum" timia ? -
- 8 Tuiniákui: - Atumí enentái kátsuram asamtai, Muisés tsankatkámiayi. Tumaitkuísha, Arútam yaúnchu juní ticha asamtai, turashtiniáitrum.

Mt. 19,9.

- 9 Nekás tájarme: Áishmank nii nekás tarímtarin ajapa, chikichan nuatkunka, tsanírmawai. Antsu chikíchan tarímtarin nuáteana nuka, tsanirmawáij tusa, ajapatniuíti - timia, tímiaja.
- 10 Nuna antúkar, nii aéntsrissha chicharáiniak: - li tarímtari ikiukchamniaitkiúrkia, nuátkashtin pénker ainti -.
- 11 Tuiniákui: - Aya Arutman kakármarin achiana nuke, nuátsuk pujusminiáiti.
- 12 Kame, chíkich nuátkachmin akiniawaruíti; chikichsha nuátkachmin awájsamu ainiáwai; antsu chíkichkia Arútam-Irúnramun iniakmástaj-sar, nuátkachmin ajainiáwai. Ya neka, nu nekati - timia, tímiaja, Jesús.

Uchi anéamu.

Mk. 10, 13; Rk. 18, 15.

- 13 Aénts^u nii uchirín Jesús usukruawarat' túsar, itiwármatai, Jesusan aéntsrinkia jíakar, surítiármia, tímiaja.
- 14 Turuiniákui, Jesús chicharáiniak: - Suritkiáirap; antsu uchi winí winiarat' tusa iniaisatárum. Kame uchía aínsarank péejchach' ajáiniana au, Nayáimpiniam jeawártatui - timia, tímiaja.
- 15 Tínia, uchin usukruá, wemia, tímiaja.

Kuírintin untukma.

Mk. 19, 17; Rk. 18, 18.

- 16 Aénts^u natsa Jesusan tarí: - Uuntá, tuke iwiáku pujústaj-san, warí pénkerna najanatniuítiaj ? - tu aníasmia, tímiaja.
- 17 Tu tai, Jesús chicháreak: - Yáit nekás pénkera takumka, nuka aya chikichkiti (aya Arutmakete). Antsu, tuke iwiáku pujustaj takumka, Arútam awemamu amirkatá - timia, tímiaja.
- 18 - Tuít Arútam awemámusha ? - aents^u natsa tu aníam: - Mankartuawáip, tsanirmawáip, kasamkáip, tsanumráip,

Mt. 19, 19.

- 19 úuntrum amírkam, ame anémamna aínsamek ashí aents^u anetá -.
- 20 Jesús tu chicháram, aents^u natsa chicháruk: - Núnaka tuke uminiáitjai. Yamáisha warí taátrusa ? -
- 21 Tu tai: - Nekás ti pénker ajastaj takumka, ashí mash' tákakeamna nu Nayáimpiniam irumrátaj-sam, utsumáinia au susáram, winia nemartustá - timia, tímiaja, Jesús.
- 22 Nuna antuk, nu aents^u ti kuítrintin asa, kúntuts enentáimiar, Jesusan ikiúkmia, tímiaja.
- 23 Turamtai, Jesús nii aéntsrin chicharáiniak: - Kuítrintin Nayáimpiniam jeátin nekás ti itiurchatáiti.
- 24 Wats, pamá tupun jíini nankámaktin yupichukáit ? Atsá. Aínsank kuítrintin Nayáimpiniam jeátin itiurchatáiti, nekás tájarne - timia, tímiaja.
- 25 Nuna antúkar, nekás enentáimsar, nii aéntsri chicháiniak: - Nuíkia, yaki Nayáimpiniam jeamniáit ? -
- 26 Tuiniákui, Jesús íi awájsar: - Aénts tujintiainiakuísha, Arútam ashí tujintcháiti - timia, tímiaja.

Nemárin akíkma.

Mk. 10,28; Rk. 18,28.

- 27 Kaya wajátakin chicháak: - Uuntá, íikia amin nemarsátaj-sar', ashí mash' ikiukiáru asar', warí takústataj' ? -
- 28 Tu tai, Jesús chicháruk: - Arútam-aents-ajasú ju nunkan iwiar, ashí úuntri, ti náatu ajásmatai, atumsha nii akatrámuri asárum, níijaink aents^u makutin chimpínium ekemsáttarme.
- 29 Aínsank ashí mash' aents^u winia anentáiniak, nii jéen, umáin, aparín, nukurín, uchirín, nunkénash ikiúinia au, juí nunkánam ti núkap takúsar, tuke iwiáku pujusártatui.
- 30 Kame, yamáí nankámaku áinia au, péejchach' áartatui. Antsu péejchach' áinia au, ti nankámaku áartatui - tu chichamia, tímiaja, Jesús.

AKANKAMU 20.

- 1 Jesús chicháak: - Arútam-Irunrámuka úunt nii nunkén takakmasarat' tusa, káshik aéntsun eaúmia aintsankete.
- 2 Nérentniuka: "Chikíchik kuítian amastájrum" takui, aents^u: "Ayu" tuiniákui: "Takartustárum" tusa, akupkarmia, tímiaja.
- 3 Nantu takúntaisha ataksha jíinkí, aents^u yuján wáiniak:
- 4 "Atumsha winia nunkarui takautárum, kame wi akiktájrum" tu tai: "Ayu" túsar, weármia, tímiaja.
- 5 Nantu tutupin ajásmatai, aínsank nantu pukúntaisha ataksha jíinki wesa, aéntsun wáiniak, akupkarmia, tímiaja.
- 6 Kíarai ataksha jíinki, aents^u takákmatsuk pujúinian wáinkiar: "Urukamtai takakmátskesha áinis pujárum ?" -
- 7 Takui: - Íikia untsúkchamu asar', tuínk takautaj' ?" tíarmia, tímiaja. Tu chichainiákui: "Atumsha winia nunkarui takautárum" tinia, akupkaru, tímiaja.
- 8 Tura kirit ajakí wéakui, úunt nii yáinrin chicháruk: "Takakmau yama táarainia nuyá juárkim akíkiam, káshik táarainia nú amuktá" tusa, akupkamia, tímiaja.
- 9 Kíarai takakmasárua táarmatai, chikíchik kuítian akíkiármia, tímiaja.
- 10 Tura káshik takatan nankamawáruka: "Nu núkap achirmakchátjash ?" tu enentaimainiakuísha, níinsha aya chikíchkiniak akíkiármia, tímiaja.
- 11 Nuna achíkiar, áantrar chichásar:
- 12 "Íikia ti núkap takakmasú árinink, ishíchichik takakmasárainia aínsank akírmaku asar', kasartamkaji" túsar, nii úuntrin kajeriármia, tímiaja.
- 13 Tuiniakuísha, nérentin chikíchkiniak chicháreak: "Umpá, káshik chicháakun: aya chikíchkiniak akíktájme, tiniu asán, penke kasarkáchjame.
- 14 Tuma asamtai, áminiu achíkiam, wetá. Kame ukúnam táarua aúdash núnisnak susátaj-san wakera asán,
- 15 aitkiachminkáitij ? Wi tsanka aísha, urukamtai kajértam ?

Mt.20,16.

16 Kame éemka pujuiniána au, ukúnam juakártatui. Antsu ukúnam pujúinia au, éemka weártatui - timia, tímiaja, Jesús.

Jakátniuri ataksha étserma.

Mk.10,32; Rk.18,31.

17 Jesús jintiá wesa, nii akatrámurin akankí, júkiar:

18 - Nekatárum: Jerusarénknúm wéaji. Nuí wean úuntri, unuikiártiniash, Arútam-aents-ajasun achíkiar, makuártatui.

19 Nuí wishíkrar, awátiar, paúnam ajjintiawarat' túsar, tunártinian susártatui. Turawarmatáisha, jimiará kanar, aneánttatui - timia, tímiaja.

Nekás nankámaku.

Rk.10,35.

20 Santiákun Juánknasha nukurí nii uchirín iniakí we, Jesusan jearí, taket tikíshmatram,

21 Jesús chicháruk: - Warí wakéram ? - tu tai: - Jesúsá, Arútam-Irunramúnám winia uchir ámijink tsanínkiar, nia niá nankámakar pujusarat' tusan seáajme - tímia, tímiaja.

22 Tákui, Jesús nii uchirín chicharániak: - Átumka nekachiátrum seátrume. Átumka wi wáitsan jaakuish, wáitsa jakamniakáitrum ? - Tu tai: - Ee, turamniáitji - tíarmia, tímiaja.

23 Tuiniakuísha: - Ayu, wi wáitsan jakáttajna áini jakáttarme. Tumaitkuísha, ya nankámaku atiniáit, nuna wi iischatniúitjai. Aya winia Apar iistiniáiti - timia, tímiaja, Jesús.

24 Chíkich nawe Akatrámuka nuna antúkar, jimieran kajerainiákui,

25 Jesús antuk, chicharániak: - Atumsha nékarme: úunt áinia aúka aéntsun neréntniuri ajásar, nankámakua aínsarank akúpkar, waitkiainiáwai.

26 Átum aitkiashtiniáitrum. Antsu nekás nankámaku ajastaj takúrmeka, ashí yáinkratin atiniáitrum.

Mt.20,27.

- 27 Kame, nekás úunt ajastaj tuínia, nii aéntsrin takárniurí aartiniáiti.
- 28 Aíntsank Arútam-aents-ajasúsha yaintkiarat' tusa tacháiti. Antsu ashí aéntsun yáinkiar, nii waitsamurijaji uwemtikrátaj-sa tawiti - timia, tímiaja Jesús.

Ji kusurú tsuárma.

Mk. 10,46; Rk. 18,35.

- 29 Jesús nii aéntsrijaji Jerikiú irutkamúnmaya jíinki wénakui, untsurí aents^u niin nemariármia, tímiaja.
- 30 Nuí, jintiá yantámach', jímiar jí kusurú: - Jesús nankámawai - taman antúkar, chará chará ajáiniak: - Uuntá, Tawitian uchiriya, wát-nentkartustá - ajáarmia, tímiaja.
- 31 Aéntska: - Takamatrumsatárum ! - tuiniakuísha: - Uuntá, Tawitian uchiriya, wáit-nentkartustá - ti kakántar tíarmia, tímiaja.
- 32 Jesús wajás, núnaka untsúiniak: - Warí itiurtukat' tusárum, wakérum ? -
- 33 Tu tai: - Uuntá, íimtiaj-sar' wakéraj*i* - tíarmia, tímiaja.
- 34 Jesús wáit-néntrar, jíin antinkíáram, nu chichamáik pénker íimrar, níisha Jesusan nemariármia, tímiaja.

AKANKAMU 21.

Jesús nankámaku.

- 1 Jerusarénknum jeástatuk ajásar, Petpajé irutkámunam jeáwar, Kunchái náintnium pujúsar,
- 2 Jesús jímiar aéntsrin akúpeak, chicháak: - Amáinia aí, irutkámunam, kawái nii uchirijaji jinkíámu wajana nu atárum, itíartitíárum.
- 3 "Urukamtai júarum ?" turamkurminkia: "li úuntri utsúmakui júaji; túrasha wárichik awainkítiaji" titíárum - timia, tímiaja.

- 4 Kame, yaúnchu wáimiaku chicháak:
5 - "Úntrumsha kawái nii uchirín tákakeana nuí ekémak, péejchachia aínsank winítramui" Israer aentstíram tu etserkatárum - nuna tíniu asamtai, nu aminkiat' tusa, Jesús akupkarmia, tímiaja.
6 Nii aéntsri wéar, Jesús tímia núnisarank turawarmia, tímiaja.
7 Kawáin nii uchiríjink itiar, nii awankemrin apújtusar, Jesús ekemkamtai,
8 núkap aents^u nii awankemrin jíntiá aítkiar, núkanash tsupíkiar, kawái najaki wetí túsar, aeprarmia, tímiaja.
9 Ti untsurí aents^u irúnrar, chará chará ajaki wénak: - Juka Tawitian uchirí asamtai, ashí mash' naatmamtikkiatái. Arútam akupkamu asamtai, ashí mash' yuminksatái. Ashí nankámaku asamtai, Nayáimpinmash nunkánmasha ashí mash' warasartí - túsar, nii úntri awajsarmia, tímiaja.
10 Jerusarénknum jeámtai, ashí aents^u: - Jusha yáit ? - túsar, charátum ajáarmia, tímiaja.
11 Tuiniákui, Jesusan nemariármia nu: - Juka wáimiaku Jesús, Kariréa nunkánmaya, Nasaretnumia tamia nuíti - tíarmia, tímiaja.

Arutman jée.

Mk. 11, 15; Rk. 19, 45; Jn. 2, 13.

- 12 Jesuska úunt ayámtainiam enkemá, aents^u surú pujúinian jíiki akupkarmia, tímiaja. Tura patasa surámurin shitiáta ajuntáwar; yampitsan suruiniánsha ajápruawar, chicháak:
13 - "Ayamtai, Arutman jee asamtai, nuí áyatik anentruatniuítrume" tu aárma awai. Antsu átumka kasan pujutáiri awajsarme - timia, tímiaja.
14 Tura, jí kusurúsha, shutuápsha, ayámtainiam tariáram, tsuararmia, tímiaja.

Mt.21,15.

- 15 Jesús ayámtainiam aents-tujíntiamun najankui, uchisha: - Tawitian uchirí ashí mash' naatmamtikkiatárum - túsar, chará chará ajainiákui,
- 16 wean úuntri, unuikiártiniash kajérkar: - Ju uchi túinia nu ántamek ? - tíarmia, tímiaja. Tuiniákui: - Ee, ántajai. "Uchich' muntsuiniámúnmani Arútam chicháawai" atumsha aujsachukáitrum ? -
- 17 Nuna tíaia iniáis, Jesús jíinki, we, Petania irutkámunam juákmiá, tímiaja.

Íimiarun kakármari.

Rk.11,20.

- 18 Kashín tsawár, Jerusarénknun wesa, tsukamá asa,
- 19 nuí jintiá yáas^u wajáan wáiniak, nérekcha asamtai, chicháruk: - Tuke nerékchatin atá - tu táink, wentsa ajasmia, tímiaja.
- 20 Nii aéntsri nuna íisar: - Itiúra wéntsasha ajasá ? - tu tuiniákui.
- 21 Jesús chicharáiniak: - Nekás íimiaru ajáakrumka, áyatik wi yasún jútikiajna aitkiacháintrume; antsu náintsha chichárkuram:
- 22 "Uránakam antumiánknun menkakatá" takurminkia, menkakáinti. Kame aents^u íimiaru seána nuna Arútmaka mash' suwiti, nekás tájarme - timia, tímiaja, Jesús.

Arútam akupkamu.

Mk.11,27; Rk.20,1.

- 23 Jesús úunt ayámtainiam unuikiartu puján, wean úuntri, jutíun úuntrisha taríar, chicharáiniak: - Amesh ya asamea jusha aítkiám ? Ya ju turatniunsha akuptamkáit ? -
- 24 Tuiniákui, Jesús chicháak: - Wisha aniaístátjarme; ju titiatjármena ju turutkurminkia, wisha ya akuptukmia nuna ujaktátjarme.

Mt.21,26.

- 25 Wats, ya Imiákratin Juánkan akupkamia ? Arútmak ? Tumátskesha aéntsuk akupkamia ? - Jesús tu tai: - Kame, "Arútam akupkamiayi" takurninkia, "Urukamtai umírkachmiárum" turámtatji.
- 26 Antsu, "Aents^u akupkáiti" takurninkia, ashí aents^u "Juank nekás waimiakuíti" túsar, mantamawártatji - tu enentáimsar:
- 27 - Íikia nékatsji - tíarmia, tímiaja. Tuiniákui, Jesús chicháak: - Wisha núnisnak, ya akuptukmia nuna ujakchattájrome - timia, tímiaja.

Nekás umín.

- 28 Jesuska ataksha chicháak: - Jusha warítrumea ! Aents^u jímiar uchirín takakuya, tímiaja. Iwiáin chicháruk: "Uchirú, aja takautá" tu tai:
- 29 "Atsá, nakítiájai" tayat, arum enentáimiar, takaúmia, tímiaja.
- 30 Nuyá aparí patáichin chicháruk: "Uchirú, aja takautá" tu tai: "Ee, aparú, páchitsuk wetajai" tayat, takaúchmia, tímiaja.
- 31 Wátsek, yaki nii aparín umirkamia ? - takui: - Entá, éemka timia nua ! - tíarmia, tímiaja. Tuiniákui, Jesús chicháak: - Nekás tájarme: Tunartin, tsanirmau áinia au Nayáimpiniam atúmniaka nankatámrum.
- 32 Kame Imiákratin Juank: "Pénker ajastárum" tusa, chichaakuísha, anturkachmiárme. Antsu aents^u tunartin, tsanirmau áinia au antúkar, enentaimrármiai. Átumka wainkiayátrum, íimiaru ajascha asárum, atumí anentáisha yapajiachmiárme - timia, tímiaja.

Arutman aéntsri kajérkamu.

Mk.12,1; Rk.20,9.

- 33 Jesús chicháak: - Jusha antuktárum: Nérentniuka nii nunkén arak, jean ti pénker jeam', wenútak, nuna waitrukarat' tusa, nii takárniurin apujas, ikiúak, yajá nunkánam wemia, tímiaja.

Mt.21,34.

- 34 Tura, júuktin tsawant jeámtai: "Júukar, nakak, winiásha akupturkartí " tusa, nii aéntsrin akupkarmia, tímiaja.
- 35 Nii takarniurinkia akupkamun achíkiar, chíkichniaka asútrar, chíkichniaka máawar, tura chíkichniasha kayajai tukúrar, akupkarmia, tímiaja.
- 36 Nútiksank ataksha nérentniuka ti núkap aéntsun akupkarmatáisha, turawarmia, tímiaja.
- 37 Turawarmatáisha: "Winia uchírnaka umirkartatuápi" tusa, nérentniuka nii uchirín akupkamia, tímiaja
- 38 Takárniuka nuna wáinkiar: "Juchakáit nérentniun uchiriya ? Nunké atankitiáiya !" túsar,
- 39 achíkiar, tsuátnum maawármiai - timia, tímiaja.
- 40 Nuna tía iniáis, Jesús chicháak: - Nérentin ta, itiúrkatin takarniurijáiya ! -
- 41 Tu tai: - Yajáuch' takárniurin wáit-néntsuk máawar, pénger akíkmainia nuna apujsáttawai - ashí aents^u tíarmia, tímiaja.
- 42 Nuí Jesús chicháak: - "*Jeá jeamín numín ajapawarmia núnaka, Arútam achik, pau atí tusa apujsámiayi. Nu íisar': Nekás péngeráiti, taji*". Nu aárma aujsachukáitrum ?
- 43 Kame Arútam-Irunrámuka atantramkírum, amirainiána aun susamu átatui.
- 44 Ya Paun tukúmainia nuka, kupiniainiáwai. Aíntsank Pau iniáakka, aéntsun nekéawai - timia, tímiaja.
- 45 Wean úntri, pariséusha nuna antúkar: - Íiniapi túramjia ! - túsar,
- 46 - Jesús achiktái - tíarmia, tímiaja. Antsu ashí aents^u: - Jesús nekás waimiakuí - tuiniákui, ishamkarmia, tímiaja.

AKANKAMU 22.

Ipiámu ujmatámsamu.

Rk.14,15.

- 1 Ataksha Jesús juna aújmatuk:

Mt.22,2.

- 2 - Arútam-Irunrámuka úunt nii uchirí nuáteakui, nampermamia nuniniáiti - timia, tímiaja.
- 3 - Úuntka: "Ipiamautárum" tusa, nii aéntsrin akupkarmatáisha, ipiámuka nakítrarmia, tímiaja.
- 4 Turawarmatáisha: "Ataksha werum: mash' iwiarnarái tawai, titiárum. Kuntínniasha eamkajai tawai, titiárum" tíaia, chíkich aéntsún akupkarmia, tímiaja.
- 5 Tu ujakarmaitiat, chíkichkia takakmáutaj-sar weármia, tímiaja. Tura chíkichkia warinchun surúktaj-sar weármia, tímiaja.
- 6 Antsu chíkichkia akupkamun kajérkar, maawarmia, tímiaja.
- 7 Turawármatai, úunt ti kajek: "Nii jeen ekemaktárum, mash' kajentkárúm" tusa, nankí-júun akupkarmia, tímiaja.
- 8 Ipiawármaka winimáinchu asármatai, ataksha nii aéntsrin akupániak, chicháak: "Mash' iwiaramuíti, tusárum,
- 9 jintiá werum, aents^u inkiúnkrum: Atumsha nampérnum winítiárum tírum, akupkatárum" timia, tímiaja..
- 10 Tu tai, nii aéntsrinkia wéar, ashí mash', pénkernash, yajáuchiniash irurármatai, jéanka kaki piákmia, tímiaja.
- 11 Úuntsha enkemá, íimiata ajaj tukamá, chikíchik aents^u iwiarmámrchu puján wáiniak,
- 12 chicháreak: "Umpá, urukantai iwiarmámtsuksha nampérnum enkemam ?" Takuísha, chichátsuk ekémia, tímiaja.
- 13 Nuíkaa úunt nii aéntsrin chicharáiniak: "Kirítniunam ti wáitias, úutu tepermat' tusárum, nawénam ewéjnumsha jinkiárum, aa nankimiátarum" tímia, tímiaja -.
- 14 Jesús tíaia iniáis, chicháak: - Atumsha nekatárum: ipiámu untsurí ainiakuísha, yaruákma ishíchik ainiáwai - timia, tímiaja.

Sésar akíkma.

Mk.12,13; Rk.20,20.

- 15 Pariséuka: - Jesús itiúra anankawáj' ? - túsar, chicháman najatawarmia, tímiaja.

Mt.22,16.

- 16 Nii aéntsri, Erútesan aéntsrijai akupkáram, Jesusan chicharáiniak: - Uuntá, ámeke nekás waitrichuíme. Kame ishámstusuk, natsámstusuk Arutman chichame páant étseereame.
- 17 Amesha warítiam ? Úunt Sésar akiktiniashítiaj' ? - tíarmia, tímiaja.
- 18 Jesuska: - Anankrakuápi turutainiáwa ! - tu enentáimias: - Anankkartiniá, urukamtai nekaprústaj-sa wakérum ? - tíaia:
- 19 - Wátsek, kuít iniaktúrsakua ! - timia, tímiaja.
- 20 Kuit iniáktusam chicháak: - Ju kuítium, yana wakaní péeta ? Yana náari péeta ? - tu tai: - Úunt Sesarnáiti - tíarmia, tímiaja.
- 21 Tuiniákui: - Sesarnaitkiuínkia, Sésarak susatárum. Tura, Arutmanuitkiuínkia, Arútam susatárum -. Jesús tu chichákматаi:
- 22 - Ti nékawai - tu enentáimsar, Jesusan ikiúkiar, weármia, tímiaja.

Jákaru anéantma.

Mk.12,18; Rk.20-27.

- 23 Nu tsawánttinink satuséuka: - Jákaru aneantchártatui - tuiniáksha, Jesusan aníastaj-sar weriármia, tímiaja.
- 24 - Uuntá, Muisés chicháak: "Áishmank uchin yajútmsuk jakámtaikia, nii yachí, waje uchin takusat' tusa, nuatkatniuíti" tímiayi.
- 25 Kame, aents^u núkap yachin tákaku nuátka asa, uchin yajútmsuk jakamtai, nii yachí wajén nuatkamia, tímiaja.
- 26 Níisha jakamtai, ashí mash' nii yachisha wajen nuátkar, yajútmsuk jakarmia, tímiaja.
- 27 Nuyá núasha jakamia, tímiaja.
- 28 Nuíka, jákaru aneántmanum, núasha untsurí nuátkamu asa, yana nuwe ati ? -
- 29 Tuiniákui, Jesús chicharáiniak: - Átumka aármasha, Arutmá kakarmarisha nékachu asárum, unúwarne.

Mt.22,30.

- 30 Kame, aneántmanum áishmank núasha nuátnaitsuk, Pásuk Nayáimpiniam pujúinia aínsarank pujusártatui.
- 31 Jakáruka nekás aneantártatui.
- 32 Wátsek, Arútam Muisesan waritmia, nekátsrumek ? *"Wiyáitjai Apráaman, Isáakan, Jakúpasha Úuntri"* tichamkía ? Jákarun Uuntrichuíti. Antsu, aents^u iwiákun Úuntri asa, nuna tímiayi.
- 33 Jesús tu chicháakui, ashí aents^u: - Ti nékawai - túsar, enentáimiam- ajáarmia, tímiaja.

Arútam awemamu.

Mk.12,28.

- 34 - Satuséun itiatmamtikkiámai - taman antúkar, pariséusha Jesusan taríarmia, tímiaja.
- 35 Chikíchik unuíkiartin, nekapsataj tusa, chicháruk:
- 36 - Uuntá, Arútam akupkamu imiá nankámaku turuttiá -.
- 37 Tu tai: - *"Arútam, amé Úuntrum asamtai, amé anentáimjai, amé wakánmijai, amé kakarmarmijáisha tuke anetá"*.
- 38 *Juíti Arútam awemamu imiá nankámaku.*
- 39 *Núnisank jusha awai: "Ashí aents^u ame anemámmena aínsamek anetá"*.
- 40 *Ju jímiarchik awemamu amireákmeka, ashí mash' Arútam akupkamu, tura ashí mash' wáimiaku unuitiamramiájnia nusha amíreama - timia, tímiaja, Jesús.*

Utsumka-ashí-tujintcha.

Mk.12,35; Rk.20,41.

- 41 Pariséu irúnar pujuiniákui,
- 42 Jesús chicharániak: - Atumsha warítrum ? Utsumka-ashí-tujintcha, yana uchirí atiniáit ? - takui: - Tawítian uchirí atiniáiti - tíarmia, tímiaja.

Mt.22,43.

- 43 - Nuíkia, urukamtai Tawit, nekás iimiaru ajás: "Utsumka-ashí-tujintcha wínia Uuntruíti" ta ?
- 44 Kame Tawit ujájmak: "Úunt (Arútam) winia Úuntrun chicháruk: Amé numásrum tekemrutmarat' túsan, winia untsuruíni ekémsam nákarsatá, tájame" tímia, tímiaja.
- 45 Tawit: "Winia Úuntur" tiniu asamtai, Utsumka-ashí-tujintcha nii uchirinchuítí - timia, tímiaja, Jesús. Pariséusha nuna antúkar, penké chichátsuk,
- 46 atakka nekápsatniun tujintiármia, tímiaja.

AKANKAMU 23.

Nankámaku ajasma.

Mk. 12,38; Rk.20,45.

- 1 Jesús nii aéntsrin, tura mash' aents^u pujuármia nunasha, chicharáiniak:
- 2 - Unuíkiartin, pariséusha Muisés akupkamun unuínia asármatai,
- 3 nii chichame antúkrum, amirkatárum. Túrasha níiya aínsarmek ajasáirap. Kame, jintíniáksha, tuiniána nuna aminiátsui.
- 4 Ti itiúrchat ana nuna akupainiyat, níinkia penke amítsuk, aya ashí mash' amikiarat' túsar, ti kajerainiáwai.
- 5 lirsarat' túsar, Arútam awemamun séentanam aárar, sháukjai nii awankémrin ti shíir iwiarainiáwai.
- 6 Nampérnum, ayamtáinmasha, nankámaku ajásar, aya chimpínium ekémsar, chikich aéntsja*í* kutánknum pujústinian nakitiainiáwai.
- 7 Ashí aents^u tekémrutrar, uuntrú turutiarat' túsar, wakeruiniáwai -.
- 8 Jesús nuna tía iniáis: - Atumín, "Úuntru" turamkurmínkia, "ii Úuntri aya chikichiki (aya Jesuskete)" tusárum, yachiya núnisrumek pujustárum.

Mt.23,9.

- 9 Aíntsank: "Aparú" turamkurmínkia, "li Aparí aya chikichkiti, Nayáimpiniam pujana nuítí" títiárum.
- 10 Aya Utsúmka Jesús nekás nekau asamtai, "Nekau" turutiarat' tusárum, penké wakerukáirap.
- 11 Antsu, imiá úunt ana nuka, ashí yáinri ajastí.
- 12 Kame, nankámaku ajáana nuna, Arútam péejchach' awájeawai. Aíntsank péejchach' ajáana nuna, Arútam nankámaku awájeawai - timia, tímiaja, Jesús.

Pariséu yumínkramu.

Rk.11,39.

- 13 Átum unuikiartintíram, atumsha pariseutírmesha, anánkkartin asárum, yumínkramuítrume. Kame, átumka Nayáimpiniam enkémstsuk, chíkich aents^u enkemawaráink, Nayáimpin jintí akírtarme.
- 14 Unuikiartintíram, Pariseutírmesha, anánkkartin asárum, nekás yumínkramuítrume.
- 15 Kame, átumka aents^u nemartusarat' tusárum, ashí nunkánam wekainiáitrum. Túrarum, nemartámrumna nu, ti yajáuch' awájsarum, emeskan uchirí awájearme.
- 16 Átumka chicháakrum: "Ayamtai pachiakrumka, tárúmna nu amikchamniáitrum. Antsu ayámtain kuíttri pachiakrumka, nekás amiktiniáitrum". Nékachu asárum, tu aents^u jintíntiarme.
- 17 Kame, ayamtai ii kuíttri Arútmanu awajea asamtai, enentáimcha aínsarmek chichárearme.
- 18 Nékachu asárum, aents^u chichárkuram: "Íikmatai pachiakrumka, tárúmna nu amikchamniáitrum. Antsu iikmatáiniam suárumna nu pachiakrumka, nekás amiktiniáitrum" tárume.
- 19 Nekátsrumek ? Íikmatainkia ii suájnia nuna Arútmanu awájeawai.
- 20 Tuma asamtai, íikmatain páchia nuka, mash' iikmatáiniam pujuiniána nunasha páchiawai.

Mt.23,21.

- 21 Aíntsank ayámtain páchiana nusha, Arútam nuí pujana nuna páchiawai.
- 22 Nayáimpin páchiana au, Arútam nuí pujana nunasha páchiawai.
- 23 Nuíkia, unuikiartintíram, atumsha pariseutírmesha, anánkkartin asárum, nekás yuminkramuítrume. Átumka suámunam atumí kuítri, atumí takák mari suayátrum, Arútam akupturmákjinia aínsarmek imítmachu, wáit-néntkartin, nekás amirín ajastin nakitia asárum, yuminkramuítrume. Aitkiawáirap. Arútam umirkárum, suámunam páchitsuk susatárum, tájarme.
- 24 Kame, j̄i kusurú asárum, tétech' wainiyátrum, pamá wáintsurme.
- 25 Unuikiartintíram, atumsha pariseutírmesha, anánkkartin asárum, nekás yuminkramuítrume. Kame, atumí anentaiín kasa, kajerniuitiátrum, pátatkeka ti pénkera nuniskétrume.
- 26 Nékachu ajasáirap. Init ana nusha nijiarum, pátatkesha nijiarum.
- 27 Unuikiartintíram, atumsha pariseutírmesha, anánkkartin asárum, yuminkramuítrume. Kame, iwiársamua núnisrumek asárum, aáni penkeraitiátrum, initkia kauruítrume.
- 28 Aéntska: "Pénker ainiáwai" turamkurminsha, nekás anánkkartin ti yajauchítrume.
- 29 Unuikiartintíram, atumsha pariseutírmesha anánkkartin asárum, yuminkramuítrume. Kame wáimiakun iwiarsámuri ti shíir iwiarniuitiátrum;
- 30 "yaúnchu ii úuntri maawarmia aínsarik, wáimiaku maacháji" takúrmesha,
- 31 "wáimiaku maawarmia nuna uchiríntji" étsearme.
- 32 Nuíkia, atumí únuntriya núnisrumek aitkiawáirap.
- 33 Makanchia aniutírmesh, itiúr emeskánmayá ewemramniáitrum ?
- 34 Wi aents^u wáimiakun, nekás nékaun, pénker jin-tíntkiártínniasha akupkátajna nusha, átumka tsupíkrum,

Mt.23,35.

numíniam ajintiárum, ayámtainiam awátrum, ashí irutkámunam kajerkáttarme.

- 35 Turawákrumin, ashí mash' imítmachu máamu, Apernumia, Sakaríasan, Perekíasan uchirín, ayámtainiam máarmena nuí, atumín makurmartátrume.
- 36 Nekás tájarme: Atumí úuntri turawaru asamtai, átum yamáí pujármena ju makumu átatrume.
- 37 Jerusarenká, Jerusarenká, wi atash' nii shiámpchirin íruana núnisnak, amin irúrtaj-san ti wakerakuísha, ame nakítia asam, aents^u wáimiaku máawaram, Arútam akupkámusha tuke kayajají tukuíniame.
- 38 Túram, nekás itiráak juáktatme.
- 39 Kame amé aentsrumsha: "Arútam Akupkamu winiána au yuminksatái" turutainiachkuínkia, wi ataksha tacháttajai - timia, tímiaja, Jesús.

AKANKAMU 24.

Úunt-ayamtain yumpunrátniuri.

Mk.13,1; Rk.21,5.

- 1 Jesús úunt-ayamtáinmaya jíinki weái, nii aentsri taríar: - Ílisiana. Kaya imiá úuntjají ju ayamtai ti shíir jeammíaiti - túsar, nuna iniaktusarmia, tímiaja.
- 2 Tuiniákui, Jesús chicharáiniak: - Ju ayamtai ti nankámaku wainiármena juka mash' tsainiártatui. Kaya chikíchkisha juakcháttawai - timia, tímiaja.

Itiúrchat tatin.

Mk.13,15; Rk.21,8.

- 3 Tura, Kunchái náintnium pujái, nii aentsri aníniak: - Jesúsá, ame támeha nusha, urútáink turonat' ? Amé tátinrum, tura ju nunka amukátniusha, itiúrak nekáttaj' ?
- 4 Jesús chicháak: - Anankramawáij' tusárum aneartárum.

Mt.24,5.

- 5 Kame, núkap aents^u: "Wiyáitjai nekás Utsumka-Ashí-Tu-jíntcha" túsar, untsurí aéntsun anankawártatui.
- 6 Aents^u kajérnaikiar, mesétnum maniniakuísha, núnkaka amukáshtatui. "Nuka tuke turunatniuíti" tusárum, titiú pujustárum.
- 7 Nankin júkiar, ashí nunkánam ti manikiártatui. Nunkasha uurkáttawai. Tsukasha ti núkap átatui.
- 8 Nujáinkia aéntsun waitsátniuri yama nankamawártatui.

Jesús-shuáran waitsátniuri.

- 9 - Nuíkia wi shuar asárum, kajérkamu átratume. Kame atumín achírmak, juramkírum, wáitkiarmas maantamáttarme.
- 10 Nu tsawánttin untsurí aents^u anankmámawar, nekás tunámkar, wi shuáran tsanúmrar, nii numasri ajasártatui.
- 11 Áantar: "Waimiakuítjai" túsar, núkap aéntsun anankawártatui.
- 12 Ti yajáuch' ajasármatai, pénker áinia nusha anénaitsuk pujusártatui.
- 13 Antsu tuke katsúntrar, tunámstsuk pujusártatna nuka, nekás ewemrártatui.
- 14 Ashí aents^u Arútam-Irunramúnam enkemawarat' túsar, ashí nunkánam Pénker-Chichaman etserkármatai, ju nunka amukáttawai - timia, tímiaja, Jesús.

Jerusarenkan amukátniuri.

Mk. 13,14; Rk.21,20.

- 15 - Ya juna nekamniait nekati. Wáimiaku Tanier tímia aínsa-rank, ii numasri úunt-ayámtainiam áantar-arútman apujársármatai,
- 16 Jutéanam pujakrumka, muránam pisartárum.
- 17 Aách' pujakrumka, jeá enkémstsuk, wárichik pisartárum.
- 18 Ajánam pujakrumka, atumí awankémri jukítiaj-sa waketkírap.

Mt.24,19.

- 19 Iraru, uchin takústatuk pujúinia aúka, ti waitsártatui.
20 Saketin, tura michánmasha pisártin áink tusárum, Arútam seatárum - timia, tímiaja, Jesús.

Anankkártinian tátinri.

Mk.13,21; Rk.21,25.

- 21 - Nu tsawánttin, aents^u ti núkap waitsarmia, nunasha nankámas, ti waitsártatui.
22 Núkap tsawant ainiakuínkia, aéntska nuna katsúnttsuk, penké ewemrcharáinti. Arútam, nii aéntsri ewemrarat' tusa, nu tsawantan wárichik amumtikkiáttawai.
23 Nu tsawánttin: "Utsumka-Ashí-Tujíntcha juí pujáwai" turamkurmínish: "Wáitrawai" tusárum, anturkáirap.
24 Kame, atumín anankátaj-sar, wáimiakua aínsarank, Utsumka-Ashí-Tujíntcha aínsarank, aents-tujíntiamun najanawártatui.
25 Anankramawáirum tusan, yamáikia ujá ujá amájrume.
26 Nuíkia: "Utsumka-Ashí-Tujíntcha itiárkanam pujawai turamkurminsha: "Wáitrawai" tusárum, iyútaj-sa wérap.
27 Kame, Arútam-aents-ajasú winiak, cháarpia aínsank, wárichik ashí nunkánam páant wantinkíáttawai.
28 Nuka, jákarunam chuank táinia aínsank, tátatui - timia, tímiaja, Jesús.

Arútam-aents-ajasú tátinri.

Mk.13,24; Rk.21-27.

- 29 Nuí tsawant kúntuts aka ákawa; tsawái-nantu kirit ajásmatai, kashi-nántusha te ajástatui. Yáasha kákenak, mai inkiunái ajáiniak, teterkasá menkáa ajáartatui.
30 Nuíkia, Nayáimpiniam, Jesús-ajjintiámu-nakumkámuri wantínkíámtai, ashí aents^u enentáimrar, Arútam-aents-ajasú nii kakarmarijaj, nii nankamakmarijáisha yuránkminiam newa winián wainkiártatui.

Mt.24,31.

- 31 Arutman pasukri, akupkamu ásar, ashí nunkánam kachun umpuárar, ashí aents^u pénkeran níjaink irurártatui.
- 32 Atumsha, nase ti nasentkui: "Uwí winiáwai" tátsurmek ?
- 33 Aíntsarmek wi tájarmena nu wainkiárum: "Nunka amunástatak ajasái" titiárum.
- 34 Nekás tájarme: Yamái aents^u pujuiniána ju amúnatsaink, nuka mash' aminkíártatui.
- 35 Kame, nayáimpi nunkasha amunainiakuísha, winia chichámruka penké amukáshtatui - tímia, tímiaja, Jesús.

Nii tátinri nékachma.

Mk. 13,32.

- 36 - Urutái Arútam-aents-ajasú tatiniáit, nu penke nékatsji. Arutman pasukri, tura Arutmá Uchirisha penké nekainiátsui. Aya Arútam Apá nékawai.
- 37 Nué pujámunam aents^u urukiármia, aniamunam Arútam-aents-ajasú tátatui.
- 38 Nué úunt kanúnam enkémstsaink, entsasha amáartsaink, ashí aents^u umutan, yurumtan, nuatnátian pujuriármia, tímiaja.
- 39 Nu aents^u penke nekámatsuk pujuiniái, entsa amáarak, mash' amukchármakía ? Aíntsank Arútam-aents-ajasú támatai, turunáttawai.
- 40 Nu tsawantai jimiara áishmank takátnum pujuiniakuísha, aya chikíchik junáktiatui.
- 41 Núnisank, Jimiara nuwa shána nekéak pujuiniakuísha, aya chikíchik junáktiatui - timia, tímiaja, Jesús.

Iwiárnara pujústin.

Mk. 13,33; Rk.21,34.

- 42 - Atumí Úuntrin tátinri nékachu asárum, iwiárnarum pujústárum.

Mt.24,43.

- 43 Kame, jéentin kasa tátinian nékakka, nekás kánutsuk, aneár pujucháintiuash ?.
- 44 Atumsha, Arútam-aents-ajasú nékachma tatin asamtai, iwiárnarum pujustárum.
- 45 Aents^u apújsamu nekás enentáimniuka, nii úntrin takárniurin wáinkiar, pénker ayurainiáwai.
- 46 Nuka, nii úntri támatai, warástatui.
- 47 Kame, nii úntrinkia, ashí mash' nii takámarin pénker wainkiat' tusa, susattui.
- 48 Antsu, aents^u apújsamu enentáimchana nu: "Winia úuntur winiátsui" tusa,
- 49 nii úntrin takárniurin kajérkar, nii aíríjaink nampéak, ti yajáuch' ajástatui.
- 50 Turú pujái, nii úntri nékachma ta:
- 51 "Anankkartiniáiti" tusa, ashí mash' atankí: "Ti wáitias úutu tepermat" tusa, akupkátawai - timia, tímiaja, Jesús.

AKANKAMU 25.

Anájmaru nákasma.

- 1 Arútam-Irúnramu nawe anájmarma shiripkin achíkiar, anájmarun inkiuwarmia nuniniáiti.
- 2 Ewej enentáimcha ainiakuísha, ewej ti enentáimin áarmia, tímiaja.
- 3 Enentáimchaka shiripkin ishíchik juiniákui,
- 4 enentáimniuka núkap jukiármia, tímiaja.
- 5 Anájmaru wari táachkui, naka pujúsar, karí pujakui kanarármia, tímiaja.
- 6 Kanú pujuiniái, kashi ajámpek: "Anájmaru winiáwai: wari inkiuutárum - aents^u tu chará chará ajáakui,
- 7 wárik kurat shintiárar, shiripkin tsaurármia, tímiaja.
- 8 Nua enentáimcha shiripkin amútekar: "Winiásha amé shirípkiram ishíchik surustá; kame iiniuka kajíniawai".

Mt.25,9.

- 9 Tuiniákui: "Atsá, íniusha wárik amukáshtimpiash ? Antsu wakétsarmek, shirípik írumna nu itítiárum" nua enentáimin tíarmia, tímiaja.
- 10 Enentáimchaka wakétrar, shirípkín eá wekainiái, shirípkín takakáiniaka anajmárujái nampérnum enkemawármatai, wáitinkia epé epé nu awájas iniaisarmia, tímiaja.
- 11 Nu ukúnám shirípkín eauwaru táar, wáitin shitiáiniak, táatar táatar ewekamáiniak: "Uuntá, uratritiá" ajainiakuísha,
- 12 úunt chicharáiniak: "Yatsukáitrum ? Tinkás wi nekátsjarne" timia, tímiaja -.
- 13 Jesús juna aújmatuk: - "Urutái jakataj" tusárum, nékachu asárum, tuke iwiárnara pujustárum - timia, tímiaja.

Kuít kawénkamu.

Rk. 19, 12.

- 14 - Arútam-Irúnramu úunt chíkích nunkánám wéak, nii takárniuri takakmasarat' tusa, nii kuítrin akának, susarmia nuniyáiti, timia tímiaja Jesús.
- 15 Nii takárniuri métekcha asármatai, chikíchkiniak ewej-nupantín, chikíchnasha Jímiar-nupantín, chikíchnasha aya nupántín kuítian súsar, ikiúkiar, yajá nunkánám wémia, tímiaja.
- 16 Ewej-nupantín achímia nu, pénker takakmas, nawe-nupántín ikiaunkamia, tímiaja.
- 17 Aíntsank jímiar-nupantín achíkiúka, aíntiuk-nupantín ikiaunkamia, tímiaja.
- 18 Antsu aya nupantín achikmia nu, penké takámatsuk, nii kuítrin ikiúsmia, tímiaja.
- 19 Nii úuntri waketki: "Kuítjái itíurkarmakít ?" tusa, nii takárniurin untsukarmia, tímiaja.
- 20 Ewej-nupantín achikmia nuka, nawe-nupantín itiamtai:

Mt.25,21.

- 21 "Mámete. Pénker takákmásam, anankkártichu asakmin, ashí mash' takakeajna nu aminiuíti" tusa: "Wijáinkia tuke warastá" timia, tímiaja.
- 22 Aíntsank Jímiar-nupantin achikmia nusha, aintiuk-nupantin itiaí asamtai,
- 23 nii úuntri chicháreak: "Mámete. Pénker takákmásam, anankkártichu asakmin, ashí mash' wi takakeajna nu aminiuíti" tusa: "Wijáinkia tuke warastá" timia, tímiaja.
- 24 Ukúnam aya nupantin achikmia nu tarí: "Uuntá, ti jíakratin asam, araachuitiatam: Nusha juurtuktárum, tiniu asakmin,
- 25 sapíjmiakun, kuítrumín ikiúsmiájna nu áminiu asamtai, núnak itiarjame" timia, tímiaja.
- 26 Tu tai, nii úuntri chicháruk: "Ámeke yajauchitme. Nekás nakitme. Wi araachuitiatan: juurtuktárum, tiniuitkiuínkia,
- 27 urukamtai kuítiur kawenkat' túsam, apujsachmiam ?"
- 28 Nuna tinia iniáis, nii aéntsrin chicharáiniak: "Nii kuítri atankírum, nawe-nupantin ikiaunkamia nu susatárum.
- 29 Kame, ya takakmainiána au, níiniun ikiáunkar, núkap takusártatui. Antsu ya takakmainiátsna au, nii takakmaríniash emenkakártatui.
- 30 Tuma asamtai, ju aents^u naki júkírum, tuke waitsat' tusárum, aá kirítiniunam ajapatárum" timia, tímiaja.

Ashí makúkratin.

- 31 - Nuí Arútam-aents-ajasú ti nankámaku ajás, nii pasúkrijai winiak, aéntsun makuártaj-sa chimpínium ekemsáttawai.
- 32 Nuí ashí mash' aéntsun irurártatui. Tankujai yajásam akankar', apujchakáitiaj' ? Núnisank Arútam aéntsjai turáttawai.
- 33 Pénkeran untsuríni apújsar, yajáuchin menarini apujsártatui.
- 34 Tura, Úunt untsurnúmani pujúinian chicharáiniak: "Winia Ap̄ar ti anéamu asárum, Arútam-Irúnramu atúmnia ju nunka nankamnamia tuke iwiáramu pujana nuí enkematárum.

Mt.25,35.

- 35 Kame, wi tsuká wekái, ayurtuamiárme; kitiamakui, nijiamanch' surusmiárme; irá wekasan, atumí jeén kanármiajai;
- 36 pushír atsáisha, átumka surusmiárme; jaa tepáisha, waitkiamiarne; epenmia pujáisha, átum iiraimiárme" tíartatui.
- 37 Tu chicháakui, aents^u pénkerka aníniak: "Uuntá, urutiá tsukamámnisha, ayúrammiaj' ? Urutiá kitiamámnisha, nijiamchisha amásmiaj' ?
- 38 Tuí irá wekámnisha: "Winia jeáruí kanartá" tímiaj' ? Urutiá misumarákminsha, entsatáish amásmiaj' ?
- 39 Jáakminsha, tura epenmia pujákminsha, urutiá íimiamiaj' ?" tíartatui.
- 40 Tu tuiniái, Úunt chicharáiniak: "Nekás tájarme: Átum péejchach' aitkiamiármena nu, wi shuar asármatai, winia aitkiaramiárme" tíartatui.
- 41 Tura, menánmani pujúinian chicharáiniak: "Atumsha yumínkramu asárum, jinium, emésak nii aéntsrijaink tuke waitiainiána nuí werumtárum.
- 42 Kame, wi tsukamáí, ayurtuachmiárme; kitiamái, nijiamanch' suruschamiárme.
- 43 Irá wekái,: Juí kanartá, turutchamiárme; misúmaran pujái, pushí suruschamiárme; jaakuísha, epenmia pujakuísha, iiraichmiárme" tíartatui.
- 44 Takui, aents^u yajáuchkia chicharáiniak: "Uuntá, urutiá tsukamákmnisha, kitiamákminsha, misumákminsha, íráakminsha, jáakminsha, enketáiniam pujákminsha, íisha yainkchámiáj' ?" tíartatui.
- 45 Tu tuiniái, Úunt chicharáiniak: "Nekás tájarme: Átum péejchach' aitkiachmármena nu, wi shuar asármatai, winia aitkiarachmiárme" tíar,
- 46 tuke waitsátniunam akúpkar, pénker áinia nuna tuke iwiáku pujusarat' tusa, jukiártatui.

AKANKAMU 26.

Jesusan jakátniurin étserma.

Mk.14,1; Rk.22,1.

- 1 Jesús tuasúa amík, nii aéntsrin chicharáiniak:
- 2 - Úunt-nampérnum jeátin, aya jímiarchik tsawant ajasái. Nuí Arútam-aents-ajasún surúkar, paúnam ajjintiwártatui - timia, tímiaja.
- 3 Kame, nu tsawántaik wean úuntri, jutíun uunrijáisha, úunt-wea Kaipasan jeén irúnrar:
- 4 - Jesús achikiar', maatái - túsar, chichaman najatawarmia, tímiaja.
- 5 - Turatái - tuiniayat: - Aents^u ii kajertamkaráij', úunt-nampérnum turashtiniáitji - tu enentaimsarmia, tímiaja.

Jesús kunkuínjai ukáteamu.

Mk.14,3; Jn.12,1.

- 6 Jesús Petania irutkámunam, kuchaprukú Semunkan jeén pujái,
- 7 Nua kunkuín mete aímkiemun itia, Jesusan tarí, nii muukeén nuna ukatramia, tímiaja.
- 8 Nii aéntsri nuna wáinkiar, kajénak: - Nu kunkuín ti kuitiáiti: aantrar' wasurkashtiniáitji.
- 9 Antsu surukar', utsúmainia au yainkminiáitji - tíarmia, tímiaja.
- 10 Tuiniákui, Jesús chicharáiniak: - Ju nua wijáinkia ti pénger asamtai, urukamtai kajérearum ?
- 11 Kame, utsumáinia au atumjai tuke pujuiniakuísha, wikia atumjai tuke pujuscháttajai.
- 12 Winia iwiartusarmí tusa, winia iniáshrui kunkuínjai ukaturuí.
- 13 Nekás tájarme: Ashí nunkánam Arutman chichamen etserainiána au, yamáí ju nua aítkiara núnasha ujmatársáttatui - timia, tímiaja.

Mt.26,14.

Jutas anánkkartin.

Mk.14,10; Rk.22,3.

- 14 Jesús tu chicháakui, nii akatrámuri Kiriutnumia Jútaska wean úuntrin tarín,
- 15 Chicharáiniak: - Jesusan achikian amáakui, urutma akirkáintrum ? - timia, tímiaja.
- 16 - Menáint-nawe kuit amástatji - tuiniákui, Jutas: - ltiúrkanak Jesusan inkiúnkan, wárik suruktaj ? - tu enentáimiak wekáimia, tímiaja.

Jesús yurúmak ajasú.

Mk.14,12; Rk.22,7; Jn.13,1.

- 17 Úunt-namper wakáprichu yurúmmanum jeámtai, nii aéntsri Jesusan taríar, aníiniak: - Tuí íikmak iwiamniáitiaj' ? - tíarmia, tímiaja.
- 18 Tuiniákui, Jesús chicharáiniak: - Jerusarénknun, jeánam wyárum, jéentin chichárkuram: "Winia tsawántur jeástatuk ajásmatai, ju jeánam wisha, winia aéntsrujaink, íikmakan yuátaj-san wakérajai, Unuíkiartin túramui" titiárum - tía, akupkarmia, tímiaja.
- 19 Nii aéntsri wéar, Jesús timia núnisarank íikmakan iwiararmia, tímiaja.
- 20 Kíarai, nawe-jímiar akatramuríjaink yurumá pujús,
- 21 Jesús chicháak: - Nekás tájarme: atumiya chikíchik winia surutkáttawai - timia, tímiaja.
- 22 Ashí mash' kúntuts enentáimsar: - Uuntá, wiashítiaj ? - tu aniam,
- 23 Jesús chicháak: - Pinínknun wíjaink apatkun achikiáinia nu, surutkáttawai.
- 24 Kame, aárma núnisank Arútam-aents-ajasú jakatniuíti. Tumaitkuísha aents^u súrana nuka, yumínkramu ajás, akínmanchu ajakuíti - timia, tímiaja.

Mt,26,25.

- 25 Jútassha surúktatiat: - Uuntrú, wiashítaj ? - takui: Nekás ametme - timia, tímiaja, Jesús.
- 26 Yurúmuk pujús, apatkun achik, usukruá, púuk, nii aéntsrin súiniak: - Achíkrum, mash' yuatárum, juka wínia iniashruíti - timia, tímiaja.
- 27 Núnisank, yurumá amúiniak, sawen achik, usukruá, nii aéntsrin súiniak: - Achíkrum, mash' umartárum:
- 28 Juka winia numparuíti. Untsurí aéntsun yamáram irunramúnam irur, nii tunarin japírtaj-sa puártatna nuíti.
- 29 Nekás tájarme: Yamái juna umaran, atumjají áyatik winia Ap̄ar Irunramúnam atakka sawe yamáрман umártatjai - timia, tímiaja.

Aents^u kakármachu.

Mk.14,26; Rk.22,31.

- 30 Mash' ujájmawar, Kunchái-náintnium wenái,
- 31 Jesús chicharáiniak: - *"Pámukan ijiún, nii tankurín ipisrártatjai" aárma asamtai, atumsha ju kashi sapíjmiakrum pisartátrume.*
- 32 *Tumaitkuísha, nantakin, Kariréa nunkánam nakastátjarme - timia, tímiaja.*
- 33 Kaya nuna antuk: - Chíkich sapíjmiainiak pisainiakuísha, wikia ayamruktátjame -
- 34 Takui: - Nekás tájame: ju kashi atash' shiniátsaink, ámeke sapíjmiakum, menáint^{iu} "Jesúsnaka nékatsjai" títiatme - timia, tímiaja, Jesús.
- 35 Takuísha: - Nekás sapíjmiatsuk, ámiijaink jakamniáitjai - túsar, Kaya nii aírrijají atsanmármia, tímiaja.

Arutman Kakármari seámu.

Mk.14,32; Rk.22,39.

- 36 Jesús aja Jetsemaní náartinnium ta, nii aéntsri
chicharáiniak: - Juí pujustárum. Wikia aranta aí Arútman
anentruátaj-san wéajai - timia, tímiaja.
- 37 Nuí Kayan, Sepetéun uchiríjaink júkiar, kúntuts enentáimias,
chicháak:
- 38 - Wínia wakaniur ti kúntuts pujawai. Juí pujúsrum, wijai iwiá
pujutárum -
- 39 Tinia ikiúkiar, arantchi aí ékensank, tikíshmar, múuken
nunkánam atsuntsá, anéntrak: - Aparú, ti waitkiarsáip. Wi
tákuísha, aya ame wakéramna nu atí - timia, tímiaja.
- 40 Nuna tinia amik, nii aéntsri kanú tepénan jéariar, Kayan
chicháreak: - Átumka ishíchkisha wíjainkia iwiá
pujuchminkiaíttrum ?
- 41 lírshimp' anankramawáij' tusárum, kánutsuk anentruatárum.
Kame wakankia ti kakarmáiti; antsu iniáshkia kakarmachuíti -
- 42 Nuna tinia ikiukín, ataksha nii Aparín anéntrak: - Aparú, wi
waitsatniuitkiúísha, ame wakéramna nu atí - timia, tímiaja.
- 43 Tura nii aéntsri werí, karí pujákui, kanú tepenan wáinkiar,
44 nuna ikiúkiar, níinki ataksha tu anentruátaj-sa waketkimia,
tímiaja.
- 45 Anentrasúa amik, nii aéntsri chicharáiniak: - Yamáikia
ayanmatárum, kanartárum. Kame aents^u tunartin ainiána au,
Arútam-aents-ajasún achíktaj-sar wininiáwai.
- 46 Antsu, surutna nu winiá asamtai, nantaktiárum - timia,
tímiaja, Jesús.

Jesús surúmakma.

Mk.14,43; Rk.22,47; Jn.18,2.

- 47 Jesús nuna chicháa wajaínk, Jutas, Jesusan akatramurintiat,
wean úuntri, jutíun úuntrisha akupkamu ása, ti núkap

Mt.26,48.

- aéntsja*í*, machítja*í*, nankijáisha tarímia, tímiaja.
- 48 - Wi mejeástatjana nu achiktárum - tiniu asa,
- 49 Jesusan tarí: - Pujámek ? - tusa, yapíniam mejeásmia, tímiaja.
- 50 - Umpá, warí winítiam ? - Jesús tu tai, aentska achíkiar, jukiármia, tímiaja.
- 51 Turuiniákui, Jesusan aéntsri machitian achik, weá-úuntrin takárniurin ijiú, nii kuíshin tsupirkamia, tímiaja.
- 52 Túrakui, Jesús chicháreak: - machítrum enkeatá. Kame, ya machítja*í* máana nuka, machítja*í* ijiúmu jakatniuíti.
- 53 Winia Ap*ar* wakérakka, winia yaintkiar*at'* tusa, nii pasukrin untsurí akupturkaráinti, nu nékatsmek ?
- 54 Turámtaikia, itiúrak chícham aárma nu jeat' ? - timia, tímiaja.
- 55 Nuna tía*a*, aents^u kaúnkarun chicharániak: - Wíki*a* úunt-ayámtainiam tuke tsawantin unuínia pujú*maj*. Nuísha achírtsuksha, urukamtai yamá*i* machítja*í*, numijáisha: "Kasan achíktaj" tawa nútiksarum tarutniúram ?
- 56 Kame yaúnchu wáimiaku aármia nu aminkiat' tusárum, jutikrarme - timia, tímiaja. Jesús nuna takui, nii aéntsriakia ikiúkiar, pisararmia, tímiaja.

Jesús makumu.

Mk.14,53; Rk.22,54; Jn.18,12.

- 57 Wean úuntri Kaipás, nii jeén unuikiártin*jaí*, jutíun uuntri*jaí*sha pujá asamtai, Jesusan nú*i* jukiármia, tímiaja.
- 58 Káyasha Jesusan arant patáatuk, wean úuntrin jeén enkemá, itiúrkartin tusa pujumia, tímiaja.
- 59 Ashí úunt nú*i* irúnrar: - Jesús maatái - túsar, tsanumáinia aun untsukarmia, tímiaja.
- 60 Untsurí aents^u tsanumruiniakuísha, aya jímiarchik métekrak chichániak:
- 61 - Ju aents^u chicháak: "Wíki*a* úunt-ayamtain upúkukan, menáintiuchik tsawántnum jeamíntja*i*" tímiayi - tíarmia, tímiaja.

Mt.26,62.

- 62 Tuiniákui, wean úuntri wajátki: - Turamainiána nu, amēja waritmea ? -
- 63 Takuísha, Jesús penké chichakchamia, tímiaja. Nuí wean úuntri chicháak: - Wátsek, Arútam antái, nekás turuttiá: "Ashí- Tujintcha-Utsumkakáitiam ? Nekás Arutman Uchirinkíaitiam? -
- 64 Tu tai, Jesús chicháak: - Ee, wiyáitjai. Nekás tájame: Arútam-aents-ajasú Arútmajaj tsanink yuránkminiam winiái, atak wainkiáttarme - tímia, tímiaja.
- 65 Nuna antuk, wean úuntri nii pushirín tséut jáak: - Tse, waitruáyi. Atúmsha uuntíram, makúkratin utsumcháitume. Kame wáit chícham antukú asárum, warítrum ? -
- 66 Tu chicháakui, úunt charátum ajákiar: - Maatái - tíarmia, tímiaja. (kame, aents^u Arútam ajáinia au, maatárum, aarmachukáit ?).
- 67 Nuna tíar, yapíniám usúkiawar, awátíar:
- 68 - Wátsek nekámakia: Ya aitkiárma ? - túsar, wishikiármia, tímiaja.

Kaya waitriniáiti.

Mk.14,66; Rk.22,56; Jn.18,15.

- 69 Kaya aá pujái, nua tarí: - Amesha Jesusan nemarniurichukáitiam ? -
- 70 Aents^u antuiniámunam tu tai: - Warítiam ? Támena nuna wi nékatsjai - timia, tímiaja.
- 71 Jíinki weái, chíkich nua aéntsun chicharáiniak: - Jusha Jesusjaj wekainiuíti -.
- 72 Tu tai, Káyaka: - Atsá, wíkiá Jesúsna nékatsjai - timia, tímiaja.
- 73 Takuísha, aents^u pujuármia nuí taríar: - Jesusan nunkeén chicháinia aíntsamek chicháa asam, nekás Jesusan aentsriniáitme -.

Mt.26,74.

- 74 Tuiniákui, Kaya kajek: - Atsá, wáitratsjai, nu áishmankan penké nékatsjai - tu tai, atash' shiniúkma, tímiaja.
- 75 - Atash' shiniatsaink: "Jesúsna nékatsjai" menáintiu títiatme - Jesús nuík tímia nuna enentáimias: - Jesusan anankajapi - tusa, aá j̄inki, úutmia, tímiaja.

AKANKAMU 27.

Jutas kajémramu.

- 1 Káshik tsawármatai, wean úuntri, Jutíun úuntrijai: - Jesús máatin chícham najanatái - túsar, irunrarmia, tímiaja.
- 2 Túrawar, Jesusan jinkiáwar, úunt Piratu pujámunam jukiármia, tímiaja.
- 3 Nuí Jutas: - Jesusan makuárai - taman antuk, anankkartiniaiat nekás enentáimiar, menáint-nawe kuítian achikmia nuna, jutíun úuntrin awántak:
- 4 - Imítmachun surukú asán, tunamkajai - takui: - Íncha itiurtámajia ! Amek iirmastá - tíarmia, tímiaja.
- 5 Jútaska kuítniasha úunt-ayámtainiam ajapa, we, chapíkjai kajemramia, tímiaja.
- 6 Wea kuít ajápamun achíkiar: - Juka maatái tusar' susa asar', Arutman kuítjai pachimrashtiniáitji - túsar,
- 7 Nuwé-takákmaun nunkén, apach' iwiársatniun sumakarmia, tímiaja.
- 8 Yamáisha nu núnkanka: - Numpá-nunka - tuiniáwai.
- 9 Kame wáimiaku Jeremías chicháak: - Israer aents^u, menáint-nawe Jesusna akíkiármia nújaink,
- 10 Arútam tímia núnisarank, nuwe-takákmaun nunkén sumakarmia - tímia, tímiaja.

Piratu Jesusan makúawai.

Mk.15,2; RK.23,2; Jn.18,29.

- 11 Rúmanmaya úunt, Piratu náartinnium, Jesús jeámtai: - Amekáitiam jutíun úuntriya ? - tu tai: - Ee, wiyáitjai - timia, tímiaja.
- 12 Wean úuntri, jutíun úunrijai makuiniámsha, Jesús penkesha aikchamia, tímiaja.
- 13 - Tuiniána au ántatsmek ? - Piratu takuísha,
- 14 Jesús chichátsuk pujumia, tímiaja.
Túmakui: - ltiurkátjak ? - tusa, úuntsha nekachmia, tímiaja.
- 15 Piratu aents^u seáiniam, tuke úunt-nampérnum aents^u epenmian jíiki, ankant akupniúya, tímiaja.
- 16 Nuí ti yajáuch' aents^u, Parapás náartin epenmia pujákui,
- 17 aents^u irúnmanum Piratu chicháak: - Parapás, tumátskesha Jesús, Ashí-Tujíntcha-Utsumka tama, ankant akupkái tusárum, ya wakérum ? -
- 18 - Jesusan kajeráiniak surukaruíti - tusa, tu aniasarmia, tímiaja.
- 19 Tu chicháa eketai, nii nuweshá chichaman akúptak: - Ju aents^u imítmachu asamtai, makuíp; kame mesékranam níijai ti wáitsan, tsawarjai - timia, tímiaja.
- 20 Antsu jutíun úuntri ti núkap aents^u irúnar pujúinian chicharáiniak: - Piratu chichárkuram: "Parapás jíikim, Jesuska maatá" títiárum - tíarmia, tímiaja.
- 21 Ataksha Piratu: - Yana akupkat' tusárum, wakérum ? - Takui, ashí aents^u: - Parapás akupkatá - tíarmia, tímiaja.
- 22 - Jesús nasha, Ashí-Tujíntcha-Utsumka túinia nunasha itíurkátaja ? - tu tai: - Paúnam ajíntiam, maatá - tíarmia, tímiaja.
- 23 - Kame, warí yajáuchinia najanáit ? - tu chicháakui, ashí aents^u chará chará ajákiar, ti kakántar: - Paúnam ajíntiatá - tíarmia, tímiaja.

Mt.27,24.

- 24 Ti kakántar charátum ajainiákui, Pirátusha penké tujíntiak, mash' íimiam ajámunam, entsajají nii ewején nijíáak: - Wíkiá jujají iischatniuíjtjai. Atumek íistárum - tu tai,
- 25 ashí aents^u: - Nii numpé iinín, ii uchiríniash kakekatí - tíarmia, tímiaja.
- 26 Tuiniákui, Pirátuka Parapasan jíiki, Jesúsnaak asú asuti amajas: - Átum paúnam ajjintiatárum - tusa, nankí-juun akupkarmia, tímiaja.

Jesús íikmak.

Mk. 15,16; Rk.23,26; Jn. 19,17.

- 27 Piratun jeén, rumánmayá nankí-juu matsátmanum Jesusan júkiar,
- 28 misú aítkiar, pushí kapakun aéntsrar,
- 29 tura jankín múuknum etsémtikiar, untsurini payankun ushumamtiksarmia, tímiaja. Túrawar, tikishmatáiniak: - Amíkmajme jutíun úuntriya ! - túsar, tu wishikiármia, tímiaja.
- 30 Tura usúkiawar, payankun júrukiar, múuknum awatiármia, tímiaja.
- 31 Tura, wishí wishíkiakua, ataksha pushí kapakun áikiar, nii pushirín aéntsrar: - Paúnam ajjintiatái - túsar, júkiármia, tímiaja.
- 32 Jesusan júkí wésar, jintiá Sirénumayá Semunkan wáinkiar: - Pau júkitin Jesús yainktá - túsar, achikiármia, tímiaja.
- 33 Kúrkuta, ukunch' náint támanum jeáwar,
- 34 sawe tsankejají pachímramun umarat' túsar súamsha, Jesús apás íis, umarchamia, tímiaja.
- 35 Nuí paúnam Jesusan ajjintiawar: - Nii pushirín ya júkít ? - túsar nakurusarmia, tímiaja.
- 36 Túrawar: - Wainkiatái - túsar, pujuriármia, tímiaja.
- 37 Urukamtai makuaruit ? Nuna ashí mash' nekawarat' túsar: - **Nasarenumiá Jesús Jutíun Uuntrinti** - tu aárman yakí paúnam peerkarmia, tímiaja.

Mt.27,38.

- 38 Núnisarank jimiará kasan, chikíchiniak untsurínini, chikíchnasha menaríni numíniam ajjintiawarmia, tímiaja.
- 39 Nuí aents^u wekáiniaka katsékkar,
- 40 chicharáiniak: - Arutman Uchirintkiúmka; úunt-ayamtai upúkukam, menáintiu tsawántnum ataksha jeamminiaitkiúmka; yamáikia akáikim, ewemratá - tíarmia, tímiaja.
- 41 Wean úuntri, jutíun úuntrisha, unuíkíartiniash katsékkar:
- 42 - Chikíchnaka ewemtikraitiat, níinkikia ewemrachminiáiti. Ju Israéran úuntri paúnmayá akaakuínkia, íisha íimiaru ajasaráintji.
- 43 Wátsek, "Arutman Uchirintjai" tímia núnaka Arútam anéakka, ewemtikratí - túsar, wishíkiármia, tímiaja.
- 44 Núnisarank kásasha níijají ajjintiámu katsekkarmia, tímiaja.
- 45 Nantu tutupin ajánmayá patámsattuk ajasú aí, ashí nunkánam kákirit te ajasmia, tímiaja.
- 46 Nuí Jesús kakántar chicháak: - Erí Erí ramá sapatkaní (Shuár-chamjají: Arutmá, Arutmá, urukamtai kajinmatrúknium ?) - timia, tímiaja.
- 47 Nuí antú pujúniaka: - Eríasan untsúawai - túsar,
- 48 chikíchik churuínian urúchnium ajámpar, numíniam péeras, Jesusan áapamia, tímiaja.
- 49 Chíkíchkia chicháiniak: - Iniaisatá. Wátsek, Eríaska ewemtikrátaj-sa tátimpiash ? - tu tuiniái,
- 50 Jesús ataksha chará ajaki, nii wakanín Arútman susamia, tímiaja.

Jesús nekás Arutmáiti.

- 51 Nu chichamáik úunt-ayámtainiam ejátak puj jaanakmia, tímiaja.
- 52 Núnkash uurkámiai, kayasha nakararmia, tímiaja. Núnisank iwíársamusha uranármatai, núkap wáimiaku yaúnchu jakarmia nusha aneántar,

Mt.27,53.

- 53 nuyá , Jesussha aneántmatai, níisha iwiarsámurin ikiúkiar, Jerusarénknun núkap aéntsun wantintiukarmia, tímiaja.
- 54 Uurkamtai, nankí-júu Jesusan wainiármia nuka, nii úuntrisha, nuna wáinkiar, sapíjmiakar: - Ju aents^u nekás Arutman Uchirinti - tíarmia, tímiaja.
- 55 Aíntsank arántchich' nuí, nua Kariréanmaya Jesusan patatukarmia nusha, íimia wajáarmia, tímiaja.
- 56 Nujájisha Maktaránmaya Marí, chíkich Marísha (Santiákuñ Jusénash nukurí), tura Sepetéun uchirí nukurisha, nuí wajáarmia, tímiaja.

Jesús iwiársamu.

Mk.15,42; Rk.23,50; Jn.19,38.

- 57 Kiárai, aents^u ti kuítrintin Arimatéa irutkamúnmaya, José náartin, Jesusan aéntsri asa, ta,
- 58 Jesusan iniashín seámtai, Piratu susamia, tímiaja.
- 59 Juseka Jesusan iniashín taráchjijai penuar,
- 60 kaya wáanam, nii iwiarsátniuri yama taumtikrámunam, iwiáras, wáitiniam kaya úuntan akankétak, ikiukí wemia, tímiaja.
- 61 Nuí Maktaránmaya Marí, chíkich Maríjaink íi pujuármia, tímiaja.

Jesusan iwiarsámurin wáinin.

- 62 Kashín tsawár, úunt-námper nuntuntuámu asamtai, wean úuntri, pariséusha Piratun weríar, chicharáiniak:
- 63 - Uuntá, nu anánkkartin iwiáku pujús: "Jimiarán kanaran, aneánttatjai" tíniu asamtai,
- 64 nii aéntsri júkiar: "Aneanttái" áantrar tíaráink túsam, Jesusan ikiúsmarin wáinkiatin, nankí-juu akuptukartá. Kame anankmainiakuínia, nu arant yajáuch' átatui - tíarmia, tímiaja.

5Mt.27,66.

- 65 Tuiniákui, Piratu chicharáiniak: - Páchitsuk, nankí-juu pénker wainkiarat' tusárum, jukitiárum - tíarmia, tímiaja.
- 66 Nuí, Jesús ikiúsmanum wéar, wáitin pénker asákawar, nankí-juun awajtusármia, tímiaja.

AKANKAMU 28.

Jesús aneántu.

Mk.16,1; Rk.24,1; Jn.20,1.

- 1 Saké tsawant nankamásmatai, Ayamtai tsawant yama tsawái, kirítiak, Mataránmayaá Marí, chíkich Maríjaink: - Jesusan ikiúsmaryi íyutái - túsar, weármia, tímiaja.
- 2 Nu chichamáik nunka ti uurkamtai, Arutman pasukri Nayáimpinmayaá iwiarsámunam tara, kaya úuntjai nukukma aúya nuna akankek, nú ekemsamia, tímiaja.
- 3 Pásuk cháarpia aínsank wíncháuyayi. Nii pushirisha yuránkmiá núnisank pújuya, tímiaja.
- 4 Nankí-juu nuna wáinkiar, ti ishámkar, janinksarmia, tímiaja.
- 5 Pásuk nua winínian chicharáiniak: - Ishamrukáirap. Jesús ajjintiámu jaka eármia nu,
- 6 juí pujatsui; kame yaúnchu tiniúya núnisank aneántai. Wátsek, atumsha nii ikiúsmaryi ítiárum.
- 7 Pai, yamáikia wárik waketkítiárum. Nii aéntsri: "Jesús aneántai" tírum: "Kariréanam éemka wéawai; nú wainkiáttarme" titiárum - timia, tímiaja.
- 8 Núwaka iwiarsamúnmayaá wárik jjiinkiar, sapíjmiashim ajainiyat: - Nii aéntsri ujaktái - túsar, tseke wará warat waketkiármia, tímiaja.
- 9 Jintiá tseke wenái, Jesús nékachma jjiintiukar, chicharáiniak: - Atumsha tarímtanam waimiaktárum - tímia, tímiaja. Tu tai, núwaka weríar, nawén winiákrugar, tekemrurarmia, tímiaja.

Mt.28,10.

- 10 Túram, Jesús chicháak: - Ishamrukáirap. Antsu werum, winia yatsur Kariréanam waitkiarat' tusan, mash' ujaktárum - tíaia, akupkarmia, tímiaja.


Nankí-juu wáitruamu.

- 11 Nua waketainiái, nankí-juu, Jesusan ikiúsmarin wainkiármia nuka, Jerusarénknum wéar, wean úuntrin mash' ujakarmia, tímiaja.
- 12 Nuí ashí mash' jutíun úuntri irúnrar, chichásar, nankí-juun ti núkap akíkiar:
- 13 - "Kashi, íikia kanú teparin, nii aéntsri taríar, Jesusan iniashín jukiárai" titiárum.
- 14 Piratu nekámtaisha, yajáuch' awajtamsáirum tusar', níijajink ii iwiaráttaji - tíarmia, tímiaja.
- 15 Nuka waitruawarmatáisha, jutíu yamáisha: - Nekás kasamkaruíti - tuiniáwai.

Akatramu akupkamu.

- 16 Nawe-chikíchik Jesusan akatrámuri Kariréanam wéar, náintnium, Jesús tímia nuí jeawarmia, tímiaja.
- 17 Jesusan wáinkiar, chíkichkia: - Jesúsáshit ? tuiniayat, ashí mash' tikíshmatrar, tekemrurarmia, tímiaja.
- 18 Jesús weántuk, chicharáiniak: - Nayáimpinmash nunkánmasha Arútam ashí mash' nii kakármarin surusuíti.
- 19 Tuma asamtai, ashí nunkánam werum, ashí aents^u wi shuar awájsarum, Arútmanam Apajai, Uchijai, nii Iwiaikrátniurijáisha imiakrattiárum.
- 20 Ashí wi atumín akatramájrurna nuna tuke amikiarat' tusárum, jintintiatárum. Wi atumjai tuke pujúttajai - timia, tímiaja, Jesús.

PÉNKER - CHICHAM WÁIMIAKU MARKUS AÁRMA.



AKANKAMU 1.

Juank unuíniamu.

(Mt.3,1; Nk.3,1).

- 1 Juka Utsumka Jesús, Arutman Uchirí, nii Pénker-Chichaman juarmarinti.
- 2 Wáimiaku Isaías chicháak: - *Yamáí amé jintimin iwíarat' tusan, éemka winia Akatrámurun akúpeajai.*
- 3 " *Úuntan jintí iwíárarum, naka awajsatárum* " *nunka itíárkanam chicham tana nu anturkatárum* – tu aármia, tímiaja.
- 4 Tímia núnisank nunka itíárkanam Imiákratin Juank ta, ashí aents^u enentáimrar, imiáimiunam nii tunarin japírat' tusa, etsermia, tímiaja.
- 5 Nuna nekáwar, Jutéa nunkánmaya, Jerusarenknúmiasha ashí mash' irutkamúnmaya aents^u táar, nii tunarin etserkármatai, Jurtán entsánam Juank imiaúya, tímiaja.
- 6 Juánkka tankun nuapén entsaúyayi. Tsampuntan, chinin yumirijaink yúuya, tímiaja.
- 7 Juank páant chicháak: - Ukurui wiya ju nankámaku winiáwai. Wi péejchach' asán, páchitsuk tekemrurtiniáitjai.
- 8 Kame wikia aya entsánam imiáimjarme. Antsu níinkia lwiáikrátiniunam imiatmíttiarme - timia, tímiaja.

Jesús imiáimiu.

(Mt.3,13; 4,11; Nk.4,1).

- 9 Nu tsawanttin Kariréa nunkánmaya, írutkamu Nasaretnumiá Jesús támatai, Jurtán entsánam Juank imiáimia, tímiaja.
- 10 Entsayá jíiníai, nékachma nayáimp' uránmianum lwiáikratin, yapankma anin, muukeén taramia, tímiaja.
- 11 Nuí nayáimpinmaya chícham chicháak: - Ámetme wi anéamu Uchir, winia atsankrin - tímia, tímiaja.

MK. 1, 12.

- 12 Nuyá Iwiaikrátniuka wárichik Jesúsnaka nunka itiárkanam jukimia, tímiaja.
- 13 Tura áintiuk-nawe tsawant, yajasma kajén matsátmanum pujái, íirshimp' anankataj tukamá tujintkiámtai, Pásuk pénker wainkiármia, tímiaja.

Aents^u untsukma.

(Mt. 4, 12; Nk. 4, 14).

- 14 Juánkan achíkiar epeniáru aí, Kariréa nunkánam Jesús jeá, Pénker-Chichaman etsermia, tímiaja.
- 15 Nuí chicháak: - Tsawant jeá asamtai, Arútam-Irúnramu nuntumsayi. Nuíkiá, enentáimrarum, Pénker-Chíchámnum iimiartárum - tau, tímiaja.
- 16 Kariréa antumiánkan kanmatkariín wesa, Semunk nii yachí Antresjái namakan achín ásar, nekan ajuntáinian wainkiármia, tímiaja.
- 17 Tura chicharáiniak: - Namak achiármia aínsarmek, aents^u irurtin winia nemartustárum -
- 18 Takui, nu 'chámtaik nekanka ikiúiniak, nemarsarmia, tímiaja.
- 19 Nuyá wésarank, Sepetéun uchirí, Sántiak Juánkjai, nísha kanúnam nekan iwaráiniak pujúinian wainkiármia, tímiaja.
- 20 Nu 'chámtaik Jesús untsúkam, aparinkia nii yáinrijai kanúnam ikiúiniak, nemarsarmia, tímiaja.

Waweámu tsuárma.

(Nk. 4, 31; Mt. 7, 28).

- 21 Kaparnaún Irutkámunam Jeáwar, Jesús Saké tsawanttin aents^u ayámtainiam matsatáinian nii chichámejai jintintiawarmia, tímiaja.
- 22 Israer unuikiártinia aínsuk, ti pénker jintiákui, aéntska chicháiniak: - Ti nékawai - tíarmia, tímiaja.

Mk. 1,23.

- 23 Tura aents^u wáweamu ayámtainiam pujumia nu, chará chará ajáak, chicháak:
- 24 - Nasaretnumiau Jesusá, warí wakéram ? Wikia nékajme. Ámeka Arutman Uchiríntme. lin amúktasa tawítiam ? -
- 25 Ajáakui, Jesús kakántar chicháruk:
- 26 - Takamatrumsatá, emeská ! Wárik ju aentsnumiau jíinkim, werumtá - tu tai, nu'chámtaik aéntsun ajár, chará tinia, jíinkimia, tímiaja.
- 27 Nuna turamtai, nuí matsatáiniaka ishámkar, númtak chicháiniak: - Jusha ya asampa ! Yamarman akúpeakui, eméskasha umírainiáwa ! - túmam ajáarmia, tímiaja.
- 28 Nu turámunam, ashí Kariréa nunkánam, Jesús ti naatkamia, tímiaja.

Jesús tsuákratin.

(Mt.8,14; Nk.4,38).

- 29 Ayámtainmaya jíinkí, Jesús Juánkjai, Santiákjai, Semunkan Antrésnasha jéen wemia, tímiaja.
- 30 Kayan tsatsarí tsuemujai tepakui, Jesusan ujakarmia, tímiaja.
- 31 Nuíkia Jesús werí, ewéjnum achik, tsuármia, tímiaja. Nu chichámaik nua micháatar, pénker ajás, nantátakin ashí ayurawarmia, tímiaja.
- 32 Kiáakui, etsa patamsa aí, aéntska ashí mash' jáinian, waweámunash itiáriar,
- 33 wáitiniam Jesusan nákau áarmia, tímiaja.
- 34 Jesuska untsurí jáinian tsuar, wawéknasha jíiki akupkarmia, tímiaja. Nusha, nii yáit nuna neka asármataisha, etserkaráink tusa, suritkiármia, tímiaja.

Mk. 1,35.

Jesús irasma.

(Nk.4,42).

- 35 Jesús tsawana aí, kirítiak nantakí, níichik itiárkanam we, anentrú pujumia, tímiaja.
- 36 Tura Semunk ni aǰǰai: - Jesús eaktái - túsar, weármia, tímiaja.
- 37 Wáinkiar, chicharáiniak: - Jesusá, ashí eatmainiáwai - tu tuiniái:
- 38 - Tíjjuch irútkámunam wetái. Aéntsun jintintiwártaj-san tau asán, nuí etserkataj - timia, tímiaja.
- 39 Nuyanka Jesús we, ashí ayámtainiam irás, mash' Kariréa nunkánam étseruk wekás, eméskanash jíiki akupkarmia, tímiaja.

Kuchápruku tsuárma.

(Mt.8,2; Nk.5,12).

- 40 Kuchápruku Jesusan weántuk, tikíshmatar, chicháruk: - Wakérakmeka, tsuaramniáitme - timia, tímiaja.
- 41 Jesús wáit-anéntar, ewején awantas, antink, chicháruk: - Wi wakera asamtai, pénker ajastá -
- 42 Takui, nu chichámaik kucháprinkia menkátukam, pénker ajasmia, tímiaja.
- 43 Jesús kakántar chicháruk:
- 44 - Étsertsuk, ame pénker ajasman nekat' túsam, wea werim, Muisés timia nu susatá - timia, tímiaja.
Takuísha, wésank, mash' nii tsuamármarin wará warat etseramia, tímiaja.
- 45 Tuma asamtai, Jesuska írutkamunam enkémstuk, arant wekakuísha, ashí nunkánmayá núkap aents^u jearín áarmia, tímiaja.

AKANKAMU 2.

Sumpenku tsuárma.

(Mt.9.1; Nk.5,17).

- 1 Nuyá, Jesús Kaparnaunk irutkámunam waketki, nii jeén puján nekawarmia, tímiaja.
- 2 Untsurí aents^u kaunkármatai, wáitinmasha wayachmin ajasmia, tímiaja.
- 3 Jesuska Arutmá chichamen etserú pujái, áintiuk aents^u peáknum sumpenkun itiármia, tímiaja.
- 4 Enkemáchmin ásar, jean teriín chinkiáiniak, Jesús pujámunam peákrintiuk sumpénkunka itiariármia, tímiaja.
- 5 Íimiaru asármatai, Jesuska jaan chicháruk: - Uchirú, amé tunárminkia tsankúreajme -
- 6 Takui, unuúkiartin pujuármiania nu níinki enentáimainiak:
- 7 - Aya Arútmak ii tunarin tsankurchakáit ? Tuma asamtai, ju aents^u Arutman katsékeawai - tíarmia, tímiaja.
- 8 Nu 'chamáik Jesús nii enentáimmarin nekárawar, chicharáiniak: - Urukamtai tu enentáimrum ?
- 9 Wátsek, ju aéntsun tunarin japirtin, tumátskesha tsuártin, tuá imiá yupichuchit ?
- 10 Arútam-aents-ajasú juí nunkánam aentsun tunarin tsankuramniáiti, ashí nekawarat' tusan:
- 11 Sumpenkuá, nantákim, peákrum jukim, wetá - timia, tímiaja. Tu tai, mash' íimiam ajainiámunam, nantakín, peákrin jukín wemia, tímiaja.
- 12 Mash' aents^u pujuármia nu, nuna wáinkiar: - Juka penké wainkiachuítji - túsar, wará warat Arutman naatmamtikiármia, tímiaja.

Mk.2,13.

Matéu untsukma.

(Mt.9,9; Nk.5,27).

- 13 Jesús entsá kanmatkariín wekás, aents^u kaunkármatai, jintintiawarmia, tímiaja.
- 14 Nuyá wesa, kuítian-juu, Arpéun uchirí, Rewí náartin, kuít-jútainiam eketun wáiniak: - Nemartustá - tu tai, wajakín niin nemarsamia, tímiaja.
- 15 Tura untsurí aents^u nemársam, Jesús Rewí jeén nii aéntsrijai, kuítian-júujai, tunartinjáisha yurúmuk pujumia, tímiaja.
- 16 Pariséu, unuíkiartin nuna wáinkiar, Jesusan aéntsrin chicharáiniak: - Urukámtaiya atumí úuntri kuítian-júujai, tunartinjáisha irúnar yurumea ? - tíarmia, tímiaja.
- 17 Jesús nuna antuk: - Nekátsrumek ? Pénker áinia au tsuákratniun utsumainiátsui. Antsu jainiána au tsuákratniun utsumainiáwai. Kame wikia aya pénkernak untsúktaj-san tacháitjai. Antsu tunártiniash untsúktaj-san tawitjai - tu chichamia, tímiaja, Jesús.

Ijiármamu.

(Mt.9,14; Nk.5,33).

- 18 Chíkich tsawanttin, Juánkan aéntsri, Pariséusha ijiarmainiákui: - Urukamtai, Jesúsá, amé aéntsrumsha íiya aínsarank ijiarmainiátsu ? - tu aniasarmia, tímiaja.
- 19 Tuiniákui, Jesús chicháak: - Nuatnáiya pujakui, ipiámuka ijiarmainiáwak ? Atsá, nuatnáiya pujakui, ijiármachmin ainiá-wai.
- 20 Antsu, nuatnáiya atantnákmiatai, ijiarmawártatui.
- 21 Kame, tarach' mamurúnam yamáram anujtukchamniáiti. Anujtúkmake, tarach' arutan usúmpear, núrnt jáaktatui.
- 22 Aínsank nijiamanch' yamáram punu arútnum uwashminiáitji. Kame nijiamanch' kariak, punun ijiakráttawai. Tuma asamtai, nijiamanch' yamáram, punu yamármanum uwatniuítji - timia, tímiaja, Jesús.

Arutman tsawantri.

(Mt. 12, 1; Nk. 6, 1).

- 23 Saké-tsawanttin sha arakmánmani Jesús nii aéntsrijai nankámainiak, nuna júuki weármia, tímiaja.
- 24 Pariséu nuna wáinkiar: - Íisia ! Amé aéntsrum Saké-tsawanttin turáshtinian najanainiáwai - tíarmia, tímiaja.
- 25 Tuiniákui, Jesús chicharáiniak: - Aujsachukáitrum ? Tawit ti tsukámak, nii aéntsrijai itiurkamia ?
- 26 Úunt-wea Awiatar pujái, Ayámtainiam wayá, wea yútain yuá, nii aéntsriinash susarmia, tímiaja.
- 27 Kame aénska Saké-tsawántna achatniuíti. Antsu Saké-tsawant aéntsna atiniáiti.
- 28 Jusha nekatárum: Arútam-aents-ajásuka Saké-tsawantan nerentniurínti - timia, tímiaja, Jesús.

AKANKAMU 3.

Ewejé káaru tsuárma.

(Mt. 12, 9; Nk. 6, 6).

- 1 Chíkich tsawanttin Jesús ayámtainiam enkemá, aents^u ewejé káarun wainkiámia, tímiaja.
- 2 Aents^u pujúiniaka: - Saké-tsawanttin tsuarmatáinkia, makutái - túsar, ii pujuriármia, tímiaja.
- 3 Jesús ewejé káarun chicháruk: - Wajákim, ajapén wajastá - tinia: - Saketin yajáuchik, túmatskesha pénkerak najanatniuit ? "Aents^u jáan tsuátsuk, jakatí", titinkíait ? - Tu aníasaram, chichátsuk juakarmia, tímiaja.
- 5 Turunawármatai, Jesús kajek íisar, kúntuts enentáimiar, jaan chicháruk: - Wátsek, ewejem umuchkiatá - tu tai, ewejenka ti pénker ajatsamia, tímiaja.
- 6 Tu tsuármatai, Pariséu ikiukí wéar, Erútesan aéntsrijai irúnar, Jesús maatái túsar, chichaman najatawarmia, tímiaja.

Jesús nemársamu.

(Mt. 12, 15; Nk.6, 17).

- 7 Jesús nii aéntsrijai entsá kanmatkariín weármatai, untsurí Kariréanmaya^u aents^u nemariármia, tímiaja.
- 8 Tura Jutéa nunkánmaya^u, Jerusarenknunia^u, Itiuméanmaya^u, Jurtán entsa amáiniya^u, tura Tiru, Sitiúnk nunkanmayasha, untsurí aents^u Jesús túramun antúkar, kautiármia, tímiaja.
- 9 Jesuska, aents^u tukumruraráink tusa, kanu itiatniun nii aéntsrin akupkarmia, tímiaja.
- 10 Kame, ti núkap jáinian tsuáakui, tunamáruka antíntaj-sar wakéruiniak, ti chanuármia, tímiaja.
- 11 Aínsarank waweámusha tikíshmatrar: - Ámetme Arutmá Uchirim ! - tuiniákui,
- 12 Nii yait, nuna etserkaráink tusa, kakántrar, suritkiármia, tímiaja.

Nawe-jímiar Akatramu.

(Mt. 10, 1; Nk.6, 12).

- 13 Jesús náintniun waka, nii wakerukmia nuna untsukarmia, tímiaja.
- 14 Nawe-jímiar untsukma táarmatai, níijaink pujús, nii chichamen etserkarat' tusa, nii Akatrámuri awajsarmia, tímiaja.
- 15 Eméskanash jíikiar akupkarat' tusa, nii kakármarin susarmia, tímiaja.
- 16 Nawe-jímiar Akatrámuri ju ainiáwai: éemka Semunk, Kaya anáikiamu, awai.
- 17 Nuyá Sepetéun uchirí, Sántiak Juánkjai, ipiámtan uchirí anaikiárma, ainiáwai.
- 18 Nuyá Antrés, Jirip, Parturumé, Matéu, Tumassha; Sántiak, Arpéun uchirisha; nuyá Tatéu, Kanánmaya^u Simunksha ainiáwai.
- 19 Nuyá Kiriutnumia^u Jutas, Jesusan surukmia nusha áwai.

Iwiáikratin umírkachma.

(Mt. 12,24-37).

- 20 Jesús nii jeén waketkimtai, untsurí aents^u taríar, yurumáchmin awajíarmia, tímiaja.
- 21 - Wáurka ajasái - tuiniákui, nii shuar nekáwar: - Jukitiái - túsar, tariármia, tímiaja.
- 22 Juiniatsáink, Israer unuíkiantin Jerusarenknumiá táarmia nu: chicháiniak: - Waweámu asa, emeskan úuntrin kakarmarijaj wawekan jíiki akúpeawai - tíarmia, tímiaja.
- 23 Jesús nuna untsúkar, aujmatsámujaj jintintiániak:
- 22 - Itiúrak emésak wawekan jíikminiáit ?
- 23 Kame matsatkámusha númtak maníniakka amukattui.
- 25 Núnisank nuatnaikiámunam maníniakka, ajapnaiyawártatui.
- 26 Aíntsank, númtak wawek maníniakka, amunaikiártatui.
- 27 Antsu, aents^u kakarman kasarkátaj-sar wakeruiniána au, éemka jinkiarartiniáiti.
- 28 Nekás tájarme: Ashí mash' tunamainiána au, Arutman kajerainiakúisha, tsankúramu áartatui.
- 29 Antsu Iwiáikratniun antúrtsuk, tunamainiána au, penke tsankurachma áartatui - timia, tímiaja, Jesús.
- 30 Iwiáikratniun kakarmarijaj wawekan jíikuísha: - Wawekratniuíti - tuiniákui, tu jintintiwarmia, tímiaja.

Nekás Jesús-shuar.

(Mt. 12,46; Nk.8,19).

- 31 Nuínia Jesusan Nukurí, yachisha táar, aa wajásar, untsukat' túsar, akupkarmia, tímiaja.
- 32 Untsurí aents^u Jesusan téntakar pujúinia ásar: - Jesusá, amé nuku, yatsum, umáimsha aa wajásar, untsurmainiáwai - tíarmia, tímiaja.
- 33 Tu tuiniái, chicharáiniak: - Yáit winia nukursha ? Winia yatsursha ya áinia ? -

Mk.3,34.

- 34 Tinia, mash' nuí pjuármia nuna iis: - Winia nukurka, winia yatsurka ju ainiáwai.
- 35 Kame, ashí mash' Arutman chichamen amirainiána au, nekás winia yatsur, winia umar, winia nukur ainiáwai - timia, tímiaja.

AKANKAMU 4.

Atsamín aujmátsamu.

- 1 Ataksha ti untsurí aents^u entsá kanmatkariín kaunkármatai, Jesús kanúnam enkemá, jintintiwarmia, tímiaja.
- 2 Ti núkap aujmátsámujai jintintiániak:
- 3 Ju antuktárum. Atsamín shana atsamrátaj-sa wemia, tímiaja.
- 4 Atsámmanum, sha jintiá iniarárunka chinki mash' yuawarmia, tímiaja.
- 5 Chíkich kayánam iniárar, nunca ishíchik asantai, wárichik tsapainariat,
- 6 pénger kankaprurcha ásar, etsa etsantramtai, kaarmia, tímiaja.
- 7 Aíntsank jankíniam kakekáruka tsakakariat, wárichik janki amúam, nerétsuk jakarmia, tímiaja.
- 8 Antsu, nunca péngernum iniaráruka, ti pénger tsakákar, ti núkap nerearmia, tímiaja. Chíkich menáint-nawe, chíkichujuk-nawe, chikichsha washím neren nerearmia, tímiaja.
- 9 Ya antúktaj ta, nu antuktí - tu chicharkarmia, tímiaja.

Aujmátsamu jintiámu.

(Mt. 13, 10; Nk. 8, 9).

- 10 Aents^u waketkiármatai, niin nemariármia nu, nawe-jímiar Akatrámusha: - Nu aujmátsámusha, warinia unuítiamaj' ? - tu inintrusarmia, tímiaja.

Mk.4,11.

- 11 Tuiniákui: - Atumín Arútam-irúnramun páant nekámtikian, chíkich aéntsnaka aya aujmatsámujai jintintiainíajai.
- 12 Kame aujmátsamun antuiniáksha nekachártatui. Líniayat, wainkiachártatui. Tuma ásar, enentáimrachar, tsankurachma áartatui.
- 13 Atumsha ju aujmátsamu nekachkúrmeka, itiúrak chíkich aujmatsámusha neka atárum ?
- 14 Atsamín Arutman chichamen atsámeawai.
- 15 Sha jintiá iniármia nuka, Arutmá chichame aéntsun enentaíin enkemamtáisha, emésak wárichik jurana nuíti.
- 16 Sha kayánam iniármia nuka, aents^u Arutman chichamen antúkar, warásar umirainiyat,
- 17 nii enentaíin kankáprurcha asamtai, itiúrchatnum wárichik ikiúinia nuíti.
- 18 Sha jankíniam iniármia nuka, aents^u Arutman chichamen antuiniayat,
- 19 aya nii takatrin enentáimainiak, kuítrintin ajástaj-sar wakéruiniak, tura nii iniashí wakéramu najánainiak, kajínmatki wena nuiti.
- 20 Antsu, sha nunca pénkernum iniármia nuka, aents^u Arutman chichamen antúkar, nekás umírkiar, ti pénker neréa nuíti. Nuka menáint-nawe nere, ujuk-nawe nere, tura washim nere nereáwai - timia, tímiaja, Jesús.

Arútam-Irúnramun tsáapniri.

(Mt. 10,26; Nk.8,16).

- 21 Ataksha Jesús chicháak: - Shiríkip úuktaj-srik ekematáint ? Antsu ashí mash' pujúinian sukuítin ekemashtainkiáit ?
- 22 Kame, warin chu úukma áakusha, wainniáktatui. Núnisank nekáchmasha nekánattui.
- 23 Ya antuktaj ta, nu antuktí - timia, tímiaja.

Yáiniaikma.

(Mt.7,1; Nk.6,37).

- 24 Ataksha Jesús chicháak: - Tájarmena nu pénger antuktárum. Atum suármena nunash iniankas, atúmniaka amástatrume.
- 25 Kame, ya takakma nuka núkap sunástatui. Antsu, ya takákmatu nuka, nii tákakmarisha atankimiu átatui - timia, tímiaja.

Jinkiái níinki tsapá.

- 26 Jesús ataksha chicháak: Arútam-Irúnramuka jinkiái aents^u arakma aintsankete.
- 27 Nu aents^u kanar, shintiar, nii nekachkuísha, jinkiái tsapái, kashi tsawáisha níinki tsakáawai.
- 28 Núnkaka arakman níinki tsapámtiki, ti núkap neremtíkiawai.
- 29 Júuktin tsawant jeámtai, nérentin nii aéntsri júukarat' tusa, akúpeawai - timia, tímiaja.

Uwí jinkiái.

(Mt.13,31; Nk.13,18).

- 30 Jesús ataksha chicháak: - Arútam-Irúnramu wariya aniuít ? Waríjaiya apatkar' íisminiáitiaj' ?
- 31 Ishitiúpach' uwí jinkiáichiri aramua aniuíti.
- 32 Nu tsapái, ajánmaya numin nankar, nukerkamtai, chinki nuí ayamin ainiáawai -.
- 33 Aents^u pénger nekawarat' tusa, untsurí aujmatsámujaink unuiniararmia, tímiaja.
- 34 Aujmatsámujaink jintiayat, aujmátsamu unuítiamjiniá nunasha nii aéntsrin ujakarmia, tímiaja.

Nase mijamtikiámu.

(Mt.8,23; Nk.8,22).

- 35 Nu tsawant kiái, Jesús nii aéntsrin chicharáiniak: - Antumiank amáini katinktiái – timia, tímiaja.
- 36 Aénstnaka ikiúiniak, Jesúsna kanúnam enker juiniákui,, chíkich kanusha nemariármia, tímiaja.
- 37 Nuí wenái, nékachma nase téter ajatan nankámeakui, entsa takunin, tsákir tsákir ajakin, kanúnam mete ajatempa, tímiaja.
- 38 Tumai, Jesús kanun senkariín kanú tepán ishintiárar, chicharáiniak: - Uuntá, jakekarat' tusámek iniáikiartam ? -
- 39 Tuiniákui, Jesús shintiar, nasen kakántar, entsánash chicháruk: - Naseá, jasam asatá; entsá, te ajastá - tu tai, nase mitia ajásmatai, entsasha miaku juákmi, tímiaja.
- 40 Arúm nii aéntsrin chicharáiniak: - Urukámtaiya imiá sapijmiárum ? limiarchakáitrum ? - timia, tímiaja.
- 41 Jesús túramtai, ishámkar, númtak chicháiniak: - Maj, jush yáit ? Ya asamtai, nasesha, entsasha umírainiáwa ! - túmam ajáarmia, tímiaja.

AKANKAMU 5.

Jerásanmaya waweámu.

(Mt.8,28; Nk.8,26).

- 1 Antumiank amáini, Jerasa nunkánam jeawarmia, tímiaja.
- 2 Jesús kanúnmaya jíiniái, jákaru ikiutáinmaya aents^u waweámu tamia, tímiaja.
- 3 Tuke jákaru ikiutáiniam pujú asamtai, jirújaish penke jinkiarchamniáuya, tímiaja.
- 4 Jirujai jinkiármasha, putit putit ewekámuk, nupétkachmin ajamia, tímiaja.

- 5 Kashi tsawáisha iwíarsámunam, náintniumsha wekás, kayajai kesámar, chará chará ajaúya, tímiaja.
- 6 Jesusan wáiniak, tseke tarí, tikishmatar,
- 7 kakántar chicháruk: - Jesusá, ashí tujincha Arutman Uchiriya, wijáisha warí iistiniáitiam ? Waitsatá turutip tusan, séaaajme - tímia, tímiaja.
- 8 Kame: - Yajáuch' emeská, ju aentsnumia_a jíintiumkítiá – Jesús tiniu asamtai, waweámu timia, tímiaja.
- 9 - Ame yáitiam ? – Jesús tu tai: - Núkap asán, "Untsurí" naartiniáitjai - timia, tímiaja.
- 10 Tura: - jíirkim, yajá akuptukáim - tusa, Jesusan ti núkap seámia, tímiaja.
- 11 Nuí náintnium untsurí kúuk shushúnmak yujainiákui, wáwek chicharáiniak:
- 12 - Jesusá, kúuknum enkemawarat' túsam, tsankatkartuktá - tuiniákui, tsankatkarmia, tímiaja.
- 13 Túram, yajáuch' emesak aentsnumia_a jíinkiar, kúuknum chumpimiawármatai, nu chichamáik kúuk naintniúmia_a nankímnarar, antumiánknun iniánkar, jakekarmia, tímiaja.
- 14 Kúukan wáinniusha pisárar, matsatkámunam, irutkamúnmasha etserkármatai, aents^u nuna nekátaj-sar, kaunkarmia, tímiaja.
- 15 Jesús pujámunam táar, aents^u waweámu pénker ajás, iwíármamar puján wáinkiar, ishankarmia, tímiaja.
- 16 Waweámu, tura kúukash urukawarmia nuna wainkiáruka, aujmatáiniak:
- 17 - li nunkeya_a wetá - túsar, Jesusan seawarmia, tímiaja.
- 18 Jesuska kanúnam enkemamtai, waweámu tsuamarmia nu, níijai wétaj-sa seámia, tímiaja.
- 19 Jesús surítiak, chicháruk: - Amé shuarmiín wakétkim, Arútam wáit-anéntramak aitkiárma nu ujakartá - tu tai,
- 20 waketki, Tekápuris nunkánam ashí mash' Jesús turamia nuna etsérkamtai, enentáimiam ajáarmia, tímiaja.

Jáirun nawantri aneántma.

(Mt.9,18; Nk.8,40).

- 21 Jesús kanujai antumiank amáini katínkmatai, ataksha ti untsurí aents^u irunturarmia, tímiaja.
- 22 Ayámtain úuntri, wea Jáiru náartin, ta, Jesusan wáiniak, ti-kíshmatar, chicháruk:
- 23 - Winia nawántur penké jáana nu, tsuamarat' túsam, ame winim, ewejem awantrutsatá - timia, tímiaja.
- 24 Jesuska aents^u eteam, Jáirujai jintiá wéai,
- 25 núasha nawe-jímiar uwí numpá pujak tuke jaa pujú, núí wemia, tímiaja.
- 26 Tsuámaksha, ashí tsuákratin ainiána aúsha tujintkiármatai, núrانت ajasmia, tímiaja. Tuma asa, kuítrinsha mash' amuk, waríjaink tsuamarat' ?
- 27 Nu núwasha Jesusan túramurin antukú asa:
- 28 - Aya pushirín antínkian, tsuamártatjai - tusa, nii ukúrini amaniank, Jesusan pushirín antínkmia, tímiaja.
- 29 Tura, nu chichamáik numpá pujak jamurinkia pénker ajatasmia, tímiaja.
- 30 Jesús níiniya_a nii kakármari jíinkimtai neka, iyantaar: - Ya pushírun antíntruca ? - takui,
- 31 nii aéntsri chicharáiniak: - Núkap aents^u aténtma juramainiáisha, urukamtai: "ya antintkia" tame ?
- 32 Támasha, Jesuska, yaki antintkia tusa, mai íim ajamia, tímiaja.
- 33 Núaka, turunamu neka asa, sapijmiayat, Jesusan tikíshmatar, ashí mash' ujakmia, tímiaja.
- 34 Jesús chicháruk: - Nawantrú, íimiaru asam uwémrame. Yamai jatáiram tsuámaru asam, pénker wetá - timia, tímiaja.
- 35 Nuna chicháa pujái, Jáiru jéeya_a táar: - Amé nawántrumka jakayi. Úunt itit awajsáip - tíarmia, tímiaja.
- 36 Tuiniákui, Jesús antukiat, Jáirun chicháruk: - Ishamkáip, antsu iimiartá - tinia,

Mk.5,37.

- 37 Aya Kayan, Santiáku, nii yachí Juánknasha nemartusarat' tusa, jukiármia, tímiaja.
- 38 Wean jéen, charátum, úur ajainiámunam jeawarmia, tímiaja.
- 39 Jesús wayá, chicháruk: - Urukamtai úur ajárum ? Ju nuach' jakachái, antsu kanarái - timia, tímiaja.
- 40 Aents^u wishiiniákui, ashí mash' aa jíirar, nuach' tepámunam nii aparijai, nii nukurijai, nuyá nii aéntsrin jukiármia nujáisha jeariármia, tímiaja
- 41 Jesús, nuáchin ewéjnum achik: - Tarita kumi (shuar 'chamjai: nawantrú, nantaktiá, tájame) - takui,
- 42 nu nuach', nawe-jímiar uwí tákaku, nantátakin, wekarakut ajáakui, mash' íimiam ajáarmia, tímiaja.
- 43 Jesús: - Nuach' ayuratárum - tinia: - Wi túrajna nu penke etserkáirap - timia, tímiaja.

AKANKAMU 6.

Jesús nii nunkeén.

(Mt. 13,54; Nk.4,16).

- 1 Nuyá we, Jesús nii aéntsrijai nii nunkeén waketkimia, tímiaja.
- 2 Saké-tsawant jeámtai, ayámtainiam jintí pujái, ti núkap aents^u antúkar, aya enentáimsar chicháiniak: - Jush tuyana imiá neka ? Ya unuinaruit ? Itiúrampa aents-tujíntiamun najanamniáit ?
- 3 Marí uchirí numijai takakmaúya nuchakáit ? Nii kanáyachisha Sántiak, Jusé, Jutas, Semunksha ainiátsuk ? Tura nii kaná-umáisha íjijai irúnrar pujuiniátsuk ? Túsar, íimiarcha ásar, áantar chicháarmia, tímiaja.
- 4 Tuiniákui, Jesús chicháak: - Aents^u wáimiakun ashí ti pénker antuiniakuísha, nii nunkeén, nii jeénsha nii shuar pénke antúrtsuk, wishikiainiáwai - timia, tímiaja.
- 5 Nuí aents-tujíntiamun penke najántsuk, nii ewején awantas, aya ishíchik jáinian tsuármia, tímiaja.

Mk.6,6.

6 Aents^u iimiarcha asármatai, Jesús kúntuts enentaimsamia, tímiaja.

Akátramú akupkamu.

(Mt. 10, 1; Nk. 9, 1; 10, 1).

7 Jesuska ashí irutkámunam Arutman chichamen etserki wesa, nawe-jímiar Akátramun irur, wawekan j̄ikiarat' tusa, nii kakármarin súsar, jímiar jímiar apátak, akupkarmia, tímiaja.

8 Tura chicharáiniak: - Wéakrum, kuit, kukái, pitiáksha jútsuk, aya páyank^u jukírum,

9 aya entsármaj̄ink wetárum.

10 Jeá wáyáttarmena, chíkich irutkámunam wémam, nuí pujustárum.

11 Chíkich irutkámunam nakítramak, anturtamchakrumninkia, kusuí usukiárum, ikiuktiárum - timia, tímiaja.

12 Takui, wéar, aents^u enentaimrarat' túsar, chichariármia, tímiaja.

13 Jainiána aun kuntut̄jai kuéar, ti untsurí wawekan j̄iki akupiármia, tímiaja.

Jesús yáit tama.

(Mt. 14, 1; Nk. 9, 7).

14 Úunt Erutes: - Jesús ti náatui - taman antukmia, tímiaja. Tura chíkichsha chicháiniak: - Imiákratin Juank ataksha aneántu asa, aents-tujíntiamun nájanui - tíarmia, tímiaja.

15 Chíkich: - Iríasáiti -; chikichsha: - Yaúnchu wáimiakua aintsankete - tíarmia, tímiaja.

16 Erúteska: - Wi Imiákratin Juánkan muukén tsupirkarat' tusan, akupkámaj nu aneántchias? - tu enentaimsamia, tímiaja.

Imiákratin Juank máamu.

(Mt. 14,3; Nk.3,19).

- 17 Kame Erúteska, nii yachi Jiripin tarímtarin, Erutíasan, atankin asamtai, Juank nuna nakitiákui, achik, júrujai jinkiá, epenmia, tímiaja.
- 18 Kame Juank chicháak: - Ame yatsumin nuwé atankishtiniáitme - tau asamtai,
- 19 Erutíaska kajérak, máataj-sa wakéraksha, tujintmia, tímiaja.
- 20 Wakerakuísha, Erúteska Juánkan arántuk: - Imítmachu, waimiakuíti - tusa, surímiak, ashí mash' nii chichamen nakitiayat, tuke anturniúya, tímiaja.
- 21 Nii akiniámuri tsawant jeámtai, mash' nii aéntsrin, kuítrintin áinia aun, tura Kariréan úuntriniash nampérnum ipiawármatai, Erutíaska: - Juank yamáí nekaprustí – timia,.tímiaja.
- 22 Ashí ipiámu pujuiniámunam Erutíasan nawantri ti shíir jantsemamtai, Erutes warás chicháruk: - Ame wakéramna nu seatkumninkia, páchitsuk amástatjai.
- 23 Arútam íirui, mash' takákmanash nakakan, amástatjai - timia, tímiaja.
- 24 Takui, nuáchikia nii nukurín weántuk: - Warinia seataj - tu tai: - Juankan múuke seatá - tímia, tímiaja.
- 25 Nu chichámaik Erútesan weántuk, chicháruk: - Juánkan muuké umámkunam enkéram, yamáik surustá - takui,
- 26 Kúntuts enentaimrayat, ashí mash' antúiniámunam: - Arútam íirui - tiniu asa, suritkiáchmia, tímiaja.
- 27 Nu chichámaik nankí-juun akúpeak: - Juánkan muuké tsupíkiám, itiatá - tu tai, we, tsupirkamia, tímiaja.
- 28 Tura, umámkunam itiamtai, nuach' achik, nii nukurín susamia, tímiaja.
- 29 Nuyá Juankan aéntsri nekáwar, nii iniashín júkiar, iwiarsarmia, tímiaja.

Jesús Pámuk.

(Nk.9,10).

- 30 Akatrámuka Jesusái wakétkiar, nii túramurin, nii unuiniarmariniash ujakarmia, tímiaja.
- 31 Ti untsurí aents^u kaúnainiak, yurumachmin awájeam, Jesús nii Akatrámurin chicharáiniak: - Arant mitia ámanum ayamratái - takui,
- 32 níichik kanúnam enkémrar, nunka itiárkanam weármia, tímiaja.
- 33 Wenan wáinkiar, ashí irutkamúnmayá aents^u kukáarak wéar, Jesús jeátniunam niá niá jeáwar, nákarmia, tímiaja.
- 34 Jesuska kanúnmayá jíiniuk, aents^u nii pamukrin tákakcha aínsarank pujuiniákui, wáit-anéntrar, ti núkap jintí pujumia, tímiaja.

Apátuk ikaunkamu.

(Mt. 14, 13; Nk.9,10; Jn.6,1).

- 35 Kiáakui, nii aéntsri taríar, chicharáiniak: - Jesusá, kiáawai.
- 36 Juí yurúmak atsá asamtai, nii yurúmkarin sumarmakarat' túsam, irútkamu tíjiuch ana nuí akupkartá - tíarmia, tímiaja.
- 37 - Átum ayuratárum - Jesús takui: - Ju aents^u ayurkámatin ti núkap yurumkan sumakarat' túsam, wakéramek ? - tíarmia, tímiaja.
- 38 Jesús chicháak: - Urutma apátuk tákakrum iyutárum - takui, íisar: - Ewej apátuk, tura jímiarchik namak tákakeaji - tíarmia, tímiaja.
- 39 Tura: - Ashí aents^u ankant ankant irúnra pujusarat', akupkatárum - takui,
- 40 númtak ewej-nawe, tura númtak washim aéntsun irurarmia, tímiaja.
- 41 Jesús apatkun namáknasha achik, nayáimpiniam íimias, usukruá, kakut púuk: - Pai, aents^u ayuratárum - tusa, nii aéntsrin susarmía, tímiaja.

- 42 Ashí aents^u yurumáwar, mash' ejemarármatai,
43 nawe-jímiar chankín tiármia, tímiaja.
44 Äishmank nuí yurumawarmia nuka, ewej-nupanti áarmia,
tímiaja.

Jesús entsá wáitsuk wekáamu.

(Mt 14,22; Jn.6,16).

- 45 Nuyá Jesuska: - Wi aéntsun awakenái, átumka kanúnam
enkemrárum, amáini werum, Petsáitia irutkámunam
nakartiárum - timia, tímiaja.
46 Aéntsuka awákear iniáis, náintnium anentruátaj-sa wemia,
tímiaja.
47 Kiáakui, kanu antumiank ajapén nanamtai, Jesús náintnium
pujús,
48 nii aéntsunkia mayai tukúmeam wianmáktinian jeainiáchun
wáinkiar, tsawana aí entsá wáitsuk wekáraktak,
nankamáktiaj-sa wakerukmia, tímiaja.
49 Nii aéntsunkia nuna wáinkiar: - lwianchiti - túsar, charáatum
ajáarmia, tímiaja.
50 Ti sapijmiainiakui, Jesús chicharáiniak: - Kakartárum.
Wiyáitjai, ishamrukáirap - timia, tímiaja.
51 Kanúnam enkémeakui, nu chichámaik nase menkakamtai,
íimiam ajáarmia, tímiaja.
52 Kame, enentáimcha ásar, Jesús apatkun ikaunkamia
nunasha nekacharmia, tímiaja.
53 Tura, antumiánkan katíinkiar, Jenesaret irutkámunam kanun
ushushkármatai,
54 aents^u wáinkiar, nekawarmia, tímiaja.
55 Ashí aéntsnum etserármatai, Jesús pujámunam jaa ainiána
aun peáknum awánkar, ikiatiármia, tímiaja.
56 Tura irutkámunam, matsatkámunam, kampuntniúnmasha
wéakui, jáan ikiátkar, nii pushirín antinkiarat' túsar, seármia
tímiaja. Tura nuna antinkiaruka tsuamarmia, tímiaja.

AKANKAMU 7.

Aéntsun anentái iwiáramu.

(Mt. 15, 1).

- 1 Nu tsawantin Pariséu, tura unuikiártin Jerusarenknumiá táarmia nusha, Jesusan weantukarmia, tímiaja.
- 2 Jesusan aéntsri ikijmiatsuk yurumáinian wáinkiar:
- Páuskartin ainiáwai - tíarmia, tímiaja.
- 3 Kame Pariséu, tura ashí mash' jutíu aéntssha, nii úuntriya aínsarank, ikijmiatsuk yurumcha áarmia, tímiaja.
- 4 Sumar wakétkiar, yurúmtsuk nijíamarar, nii úuntri tiniúya aínsarank, tsapan, umámkun, pinínknasha, mash' nijíáu áarmia, tímiaja.
- 5 Tuma ásar, Pariséu, unuikiártiniash chicháiniak: - Jesúsá, urukamtai amé aéntsrum ii úuntri turutáirin arántutsuk, páuskartiuk yurumáinia ? -
- 6 Tuiniákui, Jesús chicharáiniak: - Nekás anankartiniáitume. Tuma asákrumin Isaías chichártamuk: "*Ju aents^u nii wenejai pénker chichartayat, winín enentaimiainiátsui.*
- 7 *Nii jintiamurisha aya aents^u wakéramu asamtai, áantrar anentruiniáwai, Arútam túramrume*" tusa, tu aármia, tímiaja.
- 8 Átumka, atumí úuntri chichame amírkátasa Arutman awemámuri ajápearne - timia, tímiaja, Jesús.
- 9 Tura júnash chicháak: - Átumka atumí úuntri wakéramu najanátsa, Arutman awemámuri amireátsrume.
- 10 Kame Arútam Muisesnúmani chicháak: " Apasha nukusha yainkiartá " tinia: "Nii aparín, nii nukuríniash kajerainiána au, jakatniuíti" tichamkia ?
- 11 Antsu átum: " Ya, mash' táakeana nuna Arutman jeén susátaj-sa wakera nuka, nii aparín, nii nukuríniash yainkchamniáiti" tákurmin,
- 12 aents^u nii aparín, nii nukuríniash yainiátsui.

Mk.7,13.

- 13 Túrakrum, átum wakéramu najanátasa, Arutman awemámuri ajápearme. Aínsarmek chikichsha juníntiaku ti núkap najánearme - timia, tímiaja.
- 14 Ataksha Jesús, aéntsun untsúkar, chicharániak: - Tájarmena ju antúkrum, pénker nekatárum:
- 15 " Warínkish aéntsnum enkémea nuka, yajáuch' awájeatsui. Antsu aentsnumiá jíinia nu, yajáuch' awájeawai".
- 16 Ya antuktaj tana, nu antuktí - timia, tímiaja.
- 17 Jesús aéntsun ikiúkiar, jeá wayamtai, tímia nuna nekátaj-sar, nii aéntsri anintrusarmia, tímiaja.
- 18 Jesús jintíntiainiak: - Atumsha nekátsrumek ? Warínkish aéntsnum enkemea nuka, páuskartin awájeatsui.
- 19 Kame anentáiniam jeátsuk, aya wakénam enkemá, sáawai.
- 20 Tuma asamtai, ashí mash' yurúmak pénker ainiáwai. Antsu aentsnúmiá jíinia nu, páuskartin awájeawai.
- 21 Kame, anentáinmaya ashí mash' yajáuch': áakratkatin, kasámkatin, mankártuatin,
- 22 tsanírmatin, mash' irúmratin, yajáuch' wakérúktin, ushu ajastin, akásmatkatin, katsékmaktin, inchímrustin, nánkamsa pujustin, jíiniatsuk ?
- 23 Ju, ashí mash', aéntsnumiá jíinkiar, páuskartin awajainiáwai - timia, tímiaja, Jesús.

Kanannumiá núa tsuárma.

(Mt. 15,21).

- 24 Jesús, Tiru nunkánam we, waitkiaráink tusa, jeánam wayamia, tímiaja.
- 25 Tumaitkuísha, nua, nii nawantri waweámu asamtai, Jesusan wáiniak, weántuk tikíshmatra, tímiaja.
- 26 Siru-pinisiánmaya asa, jutiuchuitiat, nii nawántriyá wawekan jíiki akupkat' tusa, Jesusan seámia, tímiaja.
- 27 - Jéentin yawán ayúrtsuk, éemka nii uchirín ayurchakáit ? - Jesús takuísha,

Mk.7,28.

- 28 - Yawáchisha wakénam pujús, uchi yurúmak akákeamun yuchakáit ? - timia, tímiaja, nua.
- 29 Takui, Jesús chicháruk: - Wetá, nu tiniu asakmin, nawantrumiya wáwek j̄iinkiyi - timia, tímiaja.
- 30 Takui, nua nii jeén waketki, nawántrinkia wáwek j̄intiukim, pénker ajás, tepán wainkiámia, tímiaja.

Empekú tsuarma.

- 31 Tirúnmaya j̄iinki, Sitiunknúmani nankámarkutak, Tekápuris nunkánash nankáiki, Kariréa antumiánknum jeámia, tímiaja.
- 32 Nuí, Jesús ewején awantsat' túsar, empekú chicháktinian tujintian itiaríarmia, tímiaja.
- 33 Jesuska, nuna aents^u matsatmanumia akankí, kuíshnum antink, usukíjiaj iniáin takaras,
- 34 nayáimpiniam íimias, mayáiruk chicháak: - Épeta (shuar 'chamjai: urantiá) - tímia, tímiaja.
- 35 Takui, nu chichámaik antuk, ti pénker chichatan nankamamia, tímiaja.
- 36 Tura Jesús aéntsun chicharániak: - Etserkáirap - takuísha, ántutsuk, ashí mash' etseramia, tímiaja.
- 37 - Aniwá, ti pénker najáneawa ! Empekúnash antúmtikiar, chicháchunash chichamtikiainiáwai - wará warát tíarmia, tímiaja.

AKANKAMU 8.

Ataksha apátuk ikaunkamu.

(Mt. 15,32).

- 1 Chíkich tsawanttin ataksha ti untsurí aents^u yurúmtsuk níjiaj irúnrar pujuiniákui, Jesús nii aéntsrin untsúkar, chicharániak:
- 2 - Ju aéntsun wáit-amentáiniajai. Kame menáint tsawant yurúmtsuk wíjaink pujúinia asármatai,

- 3 nii jeén akupainiáknaka, yajáyasha asármatai, jintiá tsukái ajakrachártatjash ? -
- 4 Takui, nii aéntsri chicharáiniak: - Ju aents^u ayurataj tákurish, yurúmak atsámunmash itiur wainkiamniáitiaj' ? -
- 5 Tuiniakuísha: - Apátuk urutma tákakrum ? - tu tai: - Tsenken - tíarmia, tímiaja.
- 6 Jesuska: - Ashí aents^u pujusartí - tinia, tsenken apatkun achik, Arutman yuminkias, kakut púuk: - Ashí aents^u ayuratárum - tusa, nii aéntsrin susáram, ayurkamawarmia, tímiaja.
- 7 Namákchisha tákakman achik, usukruá: - Jusha susatárum - timia, tímiaja.
- 8 Ashí aents^u yurumáwar, ejemararmatáisha, tsenken chankín tíarmia, tímiaja.
- 9 Aíntiuk-nupanti yurumawarmia nuna akúpkar,
- 10 Jesuska nii aéntsrijajink kanúnam enkemá, Tarmánuta nunkánam wemia, tímiaja.

Aents-tujíntiamu seámma.

(Mt. 16, 1; Nk. 12, 54).

- 11 Pariséuka: - Jesús nekapsatái - túsar, taríar, tunáiniar: - Aents-tujíntiamu iniakmastá - tíarmia, tímiaja.
- 12 Jesuska mayáiruk chicháak: - Ju aents^u penké nánkamin aents-tujíntiamun seamáinia asamtai, penke sunaschártatui - tinia,
- 13 ikiúiniak, kanúnam enkemá, antumiank amáini katinkmia, tímiaja.

Pariséujai aneárma.

- 14 Jesusan aéntsrinkia apatkun kajínmatkiar, aya chikíchiniak kanúnam takuármia, tímiaja.

Mk.8,15.

- 15 Jesús anéachma chicháak: - Aneartárum ! Pariséun,
Erútesnash karíntri jukírap - takui,
16 númtak ishishmáiniak: - Apátuk juáchkurin turámtsujash ? -
tíarmia, tímiaja.
17 Jesús neká,chicharáiniak:-Urukamtai,apátuk
takáksuji,tárum? Warí urukamtai imiá nékatsrum ? Atumí
mutsuké atsáwak ?
18 Jì takakiátrum wáintsurmek? Kuish takakiátrum
ántatsrumek?
19 Wi ewej apátkujai ewej-nupanti aéntsun ayuramajna nuka,
kajinmatkiniúrmek ? Ampirma, urutma chankín juukmárum ?
- takui: - Nawe-jímiar - tíarmia, tímiaja.
20 Tura wi tsenken apátkujai, aintiuk-nupantin ayúramaj nuísha,
ampirma urutma chankín juukmárum ? - takui: - Tsenken -
tíarmia, tímiaja.
21 (Wikia apatkúnunka chichátsuk, Pariséu anentái jukírap
tusan) tájarmena nu nekachúrmek ? - tu chicharkarmia,
tímiaja, Jesús.

Petsaitiánmaya kusurú.

- 22 Jesús Petsáitia irutkámunam támatai, jì kusurún antinkiat'
túsar, itiaríarmia, tímiaja.
23 Jesuska kusurún ewéjnum achik, irutkamúnmaya jìiki,
usukijjai jìinim enketá, ewején awantas: - Wáinmamek ? -
tímia, tímiaja.
24 Jì kusurú yama wáinma asa: - Numia aínsarank aents^u
wekáinian wáinjai - takui,
25 ataksha jìin antínkiam, pénker ajás, ashí mash' arántianash ti
páant wáinmia, tímiaja.
26 Jesús aéntsun akúpeak: - Irutkamunam wétsuk, jéemin wetá
- timia, tímiaja.

Kaya íimiarma.

(Mt. 16, 13; Nk.9, 18).

- 27 Jesús nii aéntsrijají Jiripiun-Sesaréa nunkánmani wesa, jintiá chicháak: - Aents^u, yáiti turutáinia ? - takui,
28 - Chíkich Imiákratin Juankáiti; chíkich Eriasáiti; chíkich yaúnchu waimiakuíti, turamáinia janta ! - tíarmia, tímiaja.
29 Tuiniákui, Jesús aníntruiniak: - Atumsha, yáiti túrutrum ? -
- Ámeka nekás ashí tujintcha Utsumkáitme - Kaya takui,
30 Jesús nii aéntsrin kakántrar: - Penke etserkáirap - timia, tímiaja.

Jesusan jakátniuri étserma.

(Mt. 16,21; Nk.9,22).

- 31 Jesuska nii aéntsrin jintintiáiniak: - Jutíusan Úuntri, Wean Úuntrisha, Unuikiártiniash Arútam-aénts-ajasun kajérkar, wáitkiasar, maawarmatáisha, menáintiu tsawant kanar, aneántatui - tímia, tímiaja.
32 Ti páant takui, Kaya akankí, jukí: - Táména nu turunashtí - timia, tímiaja.
33 Jesuska nii aéntsrin íis, Kayan jíáak: - Emeská werumtá ! Ámeka Arútam wakéramu nékachu asam, aéntsua aínsamek enentáimrame - timia, tímiaja.

Jesús nemarma.

(Mt. 16,24; Nk.9,23).

- 34 Nuyá Jesús nii aéntsrin, mash' aéntsnash untsúkar, chicharáiniak: - Ya "amin nemarsátjame" turuta nuka, nii wakéramun iniáis, itiurchatnumsha nemartustí.
35 Kame, ya mantuawaráink tusa, wi shuar ajátsuk, Pénker-chichaman ayamrúteatsna au, tuke jakáttawai. Antsu ya wi shuar ajás, Pénker-Chichaman ayamrúktaj-sa jáana nuka, tuke iwiáku pujústatui.

Mk.8,36.

- 36 Wats, aents^u mash' nunkan sumáaksha, nii iwiákmari menkakamtai, itiurkamniáit ?
- 37 Nii iwiákmarin sumakminkiáit ?
- 38 Nekatárum: ya winia natsántrur, chichámrunash aénts^u tunártinnium ayamrúteatsna aun, Arútam-aents-ajasú ti náatu ajás, nii Aparí, nii Pasúkriша irúnmanum, natsantráttawai.

AKANKAMU 9.

Jesús yapájniamu.

(Mt.17,7; Nk.9,28).

- 1 Ataksha Jesús chicháak: - Yákes^h juí pujárumna ju, Arútam-Irúnramu nii kakarmarij^{ai} ju nunkánam tár^{un} wáinkiar, jakártatui, nekás tájar^{me} - timia, tímiaja.
- 2 Nuyá^uujuk tsawant nankamásmatai, Jesús Kayan, Santiákun, Juánknash náintnium ti yakí júkiar, yapajniámia, tímiaja.
- 3 Nii pushirisha wincharpá^{tin}, ti puju métek ajáschamnia ajasmia, tímiaja.
- 4 Nu chichamáik Muisés, Iríasj^{ai} wantínkiar, Jesúsjaink chichainiákui,
- 5 Kaya chicháak: - Uuntrú, juí pujustin ti pénker asamtai, áminiun, Muisésnan, Iríasnasha menáint áak najanatái -
- 6 Sapijmia asa, nekachiat, áantar timia, tímiaja.
- 7 Tu tai, yuránkim amuámtai, chícham chicháak: - Juka wi ti anéamu Uchiruítⁱ: Tuke anturkatárum - timia, tímiaja.
- 8 Tura, nii aéntsri iimsataj tukamá, aya Jesusan wainkiármia, tímiaja.
- 9 Jesús waketki winís: - Arútam-aents-ajasú jaka aneánttsaink, yamáⁱ wainkiárumna nu, penké etserkáirap - nii aénts^{rin} timia, tímiaja.

Mk.9,10.

10 Niisha nuna penke etserainiáchkusha, "jakamúnmayá nantáktiniash" warinkit túsar, númtak inintrunainiármia, tímiaja.

Erías tama.

(Mt.17,10-13).

- 11 Nuyá Jesusan aníntruiniak: - "Erías éemka tatiniáiti", unúkiartin ticharmakía ? -
- 12 Tuiniákui: - Iríaska éemka ta, iwiar ikiuktiniáiti. Tuma aísha, urukamtai Ujajmatáiniam, "*Arútam-aénts-ajasú ti wáitias, wishíkramu atiniáiti*", tu aármait ?
- 13 Wikia nekás tájarme: Irías nekás támiayi. Tamatáisha, aénts^u nii wakéramun najanátaj-sar, aárma tama aínsank kajeriármia - tímiaja.

Namperú tsuarma.

(Mt. 17,14; Nk.9,37).

- 14 Jesuska nii aéntsri pujuármia núí waketki, ti untsurí aents^u irunrámunam unúkiártinjai tunáinian wainkiármia, tímiaja.
- 15 Aéntska Jesús winián wáinkiar, wará warat tsékentkiar, amíkmawarmia, tímiaja.
- 16 - Warí tunaiyáitrum? - Jesús tákui,
- 17 Chikíchik chicháak: - Uuntá, winia uchir chichachu emeskan tákaku asamtai, itiárjame.
- 18 Emésak nékachma enkemtuá, tut ajiar, nain táket aésin, saún kaput apámtik, chichí chichi^uptu aépeawai. Túmakui, amé aéntsrumin " Jíirturkitiárum " takuísha, tujintkiárai - timia, tímiaja.
- 19 Tákui: - Íimiarcha aéntsnum urútmak pujústataj ? Urútmak katsúntrataj ? - tinia: - Wátsek, uchi júí itiartitiárum - timia, tímiaja.
- 20 Itiainiákui, emésak Jesusan wáiniak, uchín kurámtik, tut ajiar,

- péper péper ewekámuk, saún kaput apámtik awajkui,
21 Jesús nii aparín aníntrak: - Uru^tmá tsawantá áinik pujá ? -
22 Tu tai: - Uchich' asám^taik emésak jinium epeá, entsasha
ajunk, máataj-sa wakeriniúyayi. Tuma asamtai, jeákmeka,
wáit-anéntrusam, yaintruktá - timia, tímiaja.
23 Jesús chicháruk: - Urukam^tai, "Jeákmeka" turútam ?
limiáruka ashí tujintcháiti -
24 Takui, uchin aparí chará tinia: - limiaruitkuísha, núkap
íimiartin yaintkiatá - timia, tímiaja.
25 Aents^u tuákar wenakui, Jesús emeskan chicháruk: -
Empekú, chichachu emeská, juyá j̄inkim werumtá; atakka
enkemawáip-
26 Takui, emésak chará tinia, uchin tut ajar, j̄iniuk ajákar,
ikiúkmatai: - Jakayi - mash' tíarmia, tímiaja.
27 Antsu Jesús ewéjnum achíkiam, úchikia nantatákmia,
tímiaja.
28 Jeá pujúsar, nii aéntsri aníntruiniak: - Urukam^tai, Jesusá,
íikia j̄iktin tujintkiámaj' ? -
29 Tuiniákui: - Ti anentruar', ju emeskaka j̄iktiniáitji - tímia,
tímiaja, Jesús.

Jesusan jakátniuri ataksha étserma.

(Mt. 17,22; Nk.9,43).

- 30 Nuyá j̄inkí, Jesús Kariréanam wekás, chíkich aents^u
nekawaráink tusa,
31 aya nii aéntsrin, chicharáiniak: - Arútam-aents-ajasun
achíkiar,surukármatai, maawártatui. Turawarmatáisha,
menaintiú kanar, aneánttatui - timia, tímiaja.
32 Nii aéntsri nuna antúkar, nekachariat, anintrústinian
ishamkarmia, tímiaja.

Ya nankamakuit, tama.

(Mt. 18, 1; Nk.9,46).

- 33 Jesuska Kaparnaunk irutkámunam ta, jeá pujús, nii aéntsrin aníntruiniak: - Jintíá warí chicháitrum ? -
- 34 Tamaitiat: - Yaki imiá nankamakuít ? - tu aújmatza ásar, aítsuk pujuármia, tímiaja.
- 35 Nuínkia Jesús pujús, nawe-jímiar akatramun untsúkar, chicharáiniak: - Ya nankáma ku ajástaj-sa wakera nuka, péej-chach' ajás, ashí aéntsun yáinri ajastí - tinia, uchin itiá, ajapen apujas, miniákas, chicharáiniak:
- 37 - Ya winia enentáimturas, uchín yáinia nuka, winia yáintiui. Antsu, winia yáintia nuka, winia yáintsuk, winia akuptukmia nuna yayáwai - timia, tímiaja.

Jesusna aents^u.

(Nk.9,49).

- 38 Juank Jesusan chicháruk: - Uuntá, aents^u íj_{ai} wekáichu, amé náarmin pachís, wawekan jíiki akupea asamtai, surítkiamji -
- 39 Tu tai: - Antsu suritkiáirap. Kame winia kakármaj_{ai} aénts-tujíntiamun najáneá nuka, winia kajértatsui.
- 40 lin kajertamainiátsjinia au, íj_{ai} pujuiniáwai.
- 41 Yákesha winia asákrumin entsan amáarmena nuka, nekás akikma átatui - timia, tímiaja, Jesús.

Tunámtikma.

(Mt. 18,6; 5,29; Nk. 17,1).

- 42 Ya nii iniakmamurij_{ai} uchi winia anentáinian tunamtikiáinia nuka, kuntújnum chapik_{ai} kayan netuáwar, kunánam ajuniákka, pénker ainti.

Mk.9,43.

- 43 Aíntsank amé ewéjmesha tunamtikramkuínkia, tsupiktá. Kame mai ewéjmijai jinium jeátsuk, aya chikíchkijaink Arútmanam jeátin, imiá penkeráiti.
- 44 Nawemsha tunamtikramkuínkia, nusha tsupiktá.
- 45 Kame, mai nawejai jinium jeátsuk, aya chikíchkijaink Arútmanam jeátin, imiá penkeráiti.
- 46 Ame jíimisha tunamtikramkuínkia, ukuinkiatá.
- 47 Kame, mai jíimijai jinium wétsuk, aya chikíchkijaink Arútmanam jeátin, imiá penkeráiti.
- 48 Nuí jinium epemawaru tuke iwiáku esá pujuártatui. Kame, ji penké ajakrachártatui.
- 50 Wéesha penkeraitiat, michu ajásmatai waríjaink ejeakataj' ? Atumsha wee takúsrum, mai tsankurnai ajá pujutárum – timia tímiaja, Jesús.

AKANKAMU 10.

Nuatnáikiaru kanákchamnia.

(Mt.5,31; 19,1; Nk.16,18).

- 1 Nu nunkan ikiukí, Jurtán amáini, Jutéa nunkánam jeá, tímiaja. Ataksha untsurí aents^u kaunkármatai, tuke unuiniaúya aíntsank, jintintiawarmia, tímiaja.
- 2 Pariséuka, Jesús nekapsatái túsar, aníniak: - Aishmank nii tarímtarin ajapamniakáit ? -
- 3 Tuiniákui: - Muiseska warí turammiárum ? -
- 4 Tu tai: - Papí najánarum, atumí tarímtari ajapamniáitrum, turámmiaji - tíarmia, tímiaja.
- 5 Tuiniákui: - Atumí anentái kátsuram asamtai, Muisés tsankatkámiayi.
- 6 Antsu Arútam yama nankámtaik áishmankan nuájaink najanámiayi.
- 7 Tuma asamtai, áishmank nii aparín, nii nukuríniash ikiukí, nii tarímtárijaink tsanink, chikíchik ajastiniáiti.

Mk. 10,8.

- 8 Kame nuatnaikiámunam chikíchik ajasú ásar, jímiarcha ainiáwai.
- 9 Tuma asamtai, Arútam atsankiamúnka, aents^u akankashtiniáiti - timia, tímiaja, Jesús.
- 10 Tura, jeá pujúsar, nii aéntsri ataksha nunak anintruiniákui,
- 11 Jesús chicháak: - Áishmank nii tarímtarin ajapa, chikichan nuatkunka, tsanírmawai.
- 12 Aíntsank, nuásha nii áishrin ikiuk, chikichan iniúmkunka, tsanírmawai - timia, tímiaja.

Uchi anéamu.

(Mt. 19, 13; Nk. 18, 15).

- 13 Jesús usukruawarat' túsar, aents^u nii uchirín itiármatai, Jesusan aéntsri jíákar, suritiármia, tímiaja.
- 14 Turuiniákui, Jesús kajek chicharáiniak: - Suritkiáirap, antsu uchi winí winiarat' tusárum, iniaisatárum. Kame, péejchach' uchia aínsarank ajainiána au, Arútam Irunramúnam enkemawártatui.
- 15 Nekás tájarme: Ya uchia aínsarank ajainiátsu nuka, Arútam-Irunramúnam jeachártatui - timia, tímiaja.
- 16 Tura, uchin miniáksar, ewején awántsar, usukruawarmia, tímiaja.

Warírtin untsukma.

(Mt. 19, 16; Nk. 18, 18).

- 17 Jesús wesátuk ajasái, aents^u tarí, tikíshmatar: - Uuntá, tuke iwiáku pujústaj-san, itiuurkatniuítiaj ? Ame pénker asam, nu turuttiá - timia, tímiaja.
- 18 Tu tai, Jesús chicháreak: - Urukamtai "Penkeráitme" turútam ? Kame nekás Pénker aya Arutmáiti.
- 19 Arútam awemamu warítia? Mankartuawáip, tsanirmawáip, kasamkáip, tsanumawáip, imitmakáip, amé úuntrum aran-tuktá, tátsuk ?

Mk. 10,20.

- 20 Jesús tu chicháream: - Uuntá, uchínmayak núnaka tuke uminiáitjai. -
- 21 Takui, ti anéas íís, chicháreak: - Túrash taátrameawai. Weme, ashí mash' tákakeamna nu Nayáimpiniam irumrátaj-sam, utsumainiána au súsaram, winia nemartustá - timia, tímiaja.
- 22 Nuna antuk, nu aents^u ti warirtin asa, Jesús taman nakítar, kúntuts enentáimiar, Jesusan ikiúkmia, tímiaja.

Kuítrintin ewémrachmin.

(Mt. 19,23-26; Nk. 18,24-27).

- 23 Nuíkia Jesús nii aéntsrin íisar, chicharáiniak: - Warírtinkia Arútam-Irunramúnam enkematin ti itiurchatáiti, tájarme - timia, tímiaja.
- 24 Nii aéntsrinkia, nuna antúkar, enentáimiam ajainiákui, ataksha chicháak: - Uchiruá, warirtin Arútmanam jeátin, nekás ti itiurchatáiti.
- 25 Tupú jjin pamá nankámaktin imiá yupichuítí - timia, tímiaja.
- 26 Takui, nii aéntsri nu arant enentáimsar, númtak tunáiniak: - Nuinkia yaki Arútmanam jeamniáit ? -
- 27 Tuiniákui, Jesús nín íisar, chicharáiniak: - Aents^u tujintiainiakuísha, Arútam ashí tujintcháiti - timia, tímiaja.

Jesusan nemárniuri akikma.

(Mt. 19,27; Nk. 18,28).

- 28 Nuyá Kaya chicháak: - Kame íikia amin nemártiaj-sar', ashí mash' ikiukniúitji - .
- 29 Tu tai, Jesús chicháak: - Nekás tájarme: Ya winia anéntak, Pénker-Chichaman etserkátaj-sa, nii jeen, nii umáiniash, nii aparíniash, nii nukuríniash, nii uchiríniash, nii nunkénash ikiúa nuka akikma átatui.

Mk. 10,30.

- 30 Kame, ju nunkánam ti núkap jean, umáin, uchirín, nunkénash takús, kajerkamuitiat, Arútmanam tuke iwiáku pujústatui.
- 31 Nuíkiá, yamáí nankámaku ainiána au, pééjchach' áartatui. Antsu yamáí pééjchach' ainiána au, ti nankámaku áartatui - tu chichamia, tímiaja.

Jesusan jakátniuri ataksha étserma.

(Mt.20,17; Nk.18,31).

- 32 Jerusarenk jintiá wésar, Jesús éemka wéakui, nii aéntsrinkia patátukiar, enentáimki winíniái, chíkich aéntska sapíjmiainiak, ukúnam winiármia, tímiaja. Tura Jesuska nii nawe-jímiar akatrámurin irur, nii turunátniurin ujakarmia, tímiaja.
- 33 - Jerusarénknun jeáaji. Nuí Arútam-aénts-ajasú wean uuntriín, unuikiartinniúmsha surukma átatui. Nuyá makúar, maawarat' túsar, apachín susártatui.
- 34 Nuka wishíkrar, usukiáwar, awátrar, maawarmatáisha, menaintiú kanár, aneántatui - timia, tímiaja.

Nankámaku ajastaj tama.

(Mt.20,20; Nk.22,24).

- 35 Sepetéun uchirí, Sántiak Juánkjaí, Jesusan weántukar: - li seámjiniá nu tsankatkartukái túsar', wakérají - tíarmia, tímiaja.
- 36 - Warí wakérum ? -
- 37 Tu tai: - Ame irunramurmiín íia íia nankamakar' pujustin tsankatkartuktá -
- 38 Tuiniákui, Jesús chicharáiniak: - Átum seátrumna nu nékaatsrume. Kame wi wáitsan imiantiatjana, tura umámkujai umartátjana nunikminkíáitrum ? -
- 39 - Ee, turamniáitjai - tu tuiniakui: - Nekás, atumsha wiya aínsarmek imiánrum, umarminiáitrum.

Mk. 10,40.

- 40 Túmaitkuísha ya níia níia nankámaku ajás, ekemsáttana nuna wi iischatniuíťjai, yaúnchu enétkamu asamtai - timia, tímiaja.
- 41 Nuna antúkar, chíkich akatrámuka Santiákun Juánknasha kajerkármatai,
- 42 Jesús untsúkar, chicharáiniak: - Atumsha nékarme: : aéntsun úuntri, nii neréntniuri ajásar, nankámakua aínsarank akúpkar, aéntsun waitkiainiáwai.
- 43 Átum aitkiashtiniáitrumé. Antsu nekás nankámaku ajastaj takúrmeka, ashí yáinkratin atiniáitrumé.
- 44 Ya éemka nakamáktaj-sa wakera nuka, aéntsun takárniuri ajastí.
- 45 Kame Arútam-aents-ajasúsha yaintkiarat' tusa, tacháiti; antsu ashí aéntsun yáinkiar, nii waitsamurijai uwemtikrátasa, tawiti - timia, tímiaja.

Jerikiúnmaya Kusurú.

(Mt.20,29; Nk.18,35).

- 46 Jerikiú irutkámunam jeáwar, nuyá Jesús nii aéntsrijai, untsurí aentsjáisha winiái, j̄j̄ kusurú, Timiun uchirí, jintiá kuítian seámu pujumia, tímiaja.
- 47 - Jesús nankámawai - taman antuk, chará chará ajáak: - Tawitian uchiriyá, wáit-anentrustá - ajámia, tímiaja.
- 48 Aéntska: - Takamatrumsatá ! - tuiniakuísha, nú kakántar: - Tawitian uchiriyá, wáit-anentrustá - ajamia, tímiaja.
- 49 Jesús wajás: - Untsuktárum - tu tai, chicharáiniak: - Untsúrmawai; wajaktiá - tíarmia, tímiaja.
- 50 Wajátakin esekmatáirin ajapa ikiúak, tsekeárkutak, Jesús pujámunam jeámia, tímiaja.
- 51 - Warí wakéram ? - tu tai: - Uuntá, wainmáktaj-san wakérajai - tímia, tímiaja.
- 52 Nuíkia: - Ímiaru asam, tsuamarúme; pénker wetá - Jesús takui, nu chichámaik pénker wáinmak, Jesusan nemarsamia, tímiaja.

AKANKAMU 11.

Jesús naatmamtikkiámu.

(Mt.21, 1; Nk. 19,28; Jn. 12, 12).

- 1 Jerusarénknum jeástatuk ajásar, Petpajé, Petániasha irútkamu arántchia aí, Kunchái-náintnium pujúsar, Jesús jímiar aéntsrin akúpeak, chicharáiniak:
- 2 - Amáinia aí, irútkamu ámanum, kawái ekemtúkchamu jinkiámu wajáana nu atiárum, itiertitiárum.
- 3 "Urúkamtai juárum ?" turamkurminkia: "li úuntri utsúmakui, júaji; túrasha wárik awainkíttiaji" titiárum - timia, tímiaja.
- 4 Wéar, kawái jintiá yantam, wáitiniam jinkiámun wáinkiar, atiwarmia, tímiaja.
- 5 Nuí pujuármia nu, chicharáiniak: - Urukamtai atiárum ? - tuiniákui,
- 6 Jesús tímia aínsarank aimkiármatai, súsar, akupkarmia, tímiaja.
- 7 Kawáin itiar, nii awankemrin apujtusármatai, Jesús ekemkamia, tímiaja.
- 8 Untsurí aents^u Jesús weamúnmani nii awankemrin aítkiar aíniainiákui, chíkichkia nukan kupírar, aepriármia, tímiaja.
- 9 Ashí mash' irunrarmia nu charátum ajáiniak: Arutmánmayá winiána au nankámaku asamtai, naatmamtikkiatái.
- 10 Tawit Irúnramu winiána au yuminksatái ! Pai, yakisha naatmamtikkiartí ! - tíarmia, tímiaja.
- 11 Tu Jerusarénknum jeá, úunt ayámtainiam enkemá, téntak íis, kíáakui, nawe jímiar akatramuríjaink Petania irutkámunam wemia, tímiaja.

Yaas^u yumínkramu.

(Mt.21,18; Nk.13,6).

- 12 Kashín tsawar, Petánianmayá wesa, Jesús tsukamá asa,

Mk. 11, 13.

- 13 nuí arant yáas^u waján wáiniak: - Nerekuáshit ? - tusa, iyumia, tímiaja. Neretai nántuchu asamtai, aya nukénak wainkiámia, tímiaja.
- 14 Tura yúminkiak chicháruk: - Amé yurankmin yúashtin aarat' tusan, penke nerékchatin atá - tu chicháan nii aéntsrissha anturkarmia, tímiaja.

Ayámtainiam súruinia jjíirma.

(Mt.21, 12; Nk. 19,45; Jn.2, 14).

- 15 Jesuska Jerusarénknum jeá, Uunt-Ayámtainiam enkemá, aents^u surú pujúinian, sumainiána aúnash jjíiki akupkarmia, tímiaja. Tura patasá surámurin shitiáta, ajuntáwar, yampitsan suruiniána aúnash ajápruawar,
- 16 warinchun itiawaráink tusa, suritkiármia, tímiaja.
- 17 Tura, chicharáiniak: - "Ayamtai, Arutman jee asamtai, niinín áyatik anentruatniuítrome" tu aárma awai. Antsu átumka kasan matsamtáiri najanáitrome.
- 18 Wean úuntri, unuúkiártiniash nuna nekáwar: - Itiúrak maawáintiaj' ? - tuiniáksha, aents^u: - Jesusan chichame penkeráiti - tuiniákui, ishamkarmia, tímiaja.
- 19 Kiáakui, Jerusarenknúmiá jjíinkí wemia, tímiaja.

Íimiarun kakármari.

(Mt.21,20).

- 20 Kashín tsawármatai wésar, yáas^u káar waján wainkiármia, tímiaja.
- 21 Kaya enentáimiar, Jesusan chicháruk: - Íisia, ame yáas^u yumínkramam nu káar wajaja ! -
- 22 Tu tai: - Arútmanam iimiartárum.
- 23 Kame, ya íimiaru ajás, nekás turunáttawai tusa: "Naintiá, urá-nakam antumiánknum menkakatá !" takuínkia, menkakáinti.

Mk.11,24.

- 24 Tuma asamtai, átum íimiaru ajásrum, nekás surústatui takurminkia, seármena nuna Arútam nekás amastátrume - tímia, tímiaja.
- 25 - Arútam anéntrakrum, atumí numasri tsankuratárum.
- 26 Turakruminkia, atumí Aparí Nayáimpiniam pujana nusha, nuna antuk, tsankurtámrrattarme.

Jesús Arútam akupkamu.

(Mt.21,23; Nk.20,1).

- 27 Ataksha Jerusarénknum waketki, úunt-ayámtainiam wekáí, wean úuntri, unuíkiartin, jutíun úuntrisha taríar,
- 28 chicharáiniak: - Ju aitkiamniakáitiam ? Ya ju túratniun akuptamkáit ? -
- 29 Tuiniákui, Jesús chicháak: - Wi iníastajrumna nu turutkurminkia, wisha ya akuptukmia nuna ujaktátjarme.
- 30 Wátsek, ya imiákratniun Juánkan akupkamia ? Arútmak, tumátskesha aéntsuk akupkamia ? -
- 31 Jesús takui: - Kame, "Arútam akupkámiai" takurninkia, "Urukamtai amirkachmiárum" turámchatjash ?
- 32 Antsu, ashí aénts^u Juank nekás waimiakuíti túinia asamtai, "aents^u akupkáiti" tíchamniáitji. -
- 33 Tu enentáimsar: - li nékaatsji - tuiniákui: - Wisha núnisnak, ya akuptukmia nuna ujakchatájrume - timia, tímiaja, Jesús.

AKANKAMU 12.

Arútam akupkarma máamu.

(Mt.21,33; Nk.20,9).

- 1 Jesús aujmatsámujai tu jintintiawarmia, tímiaja: - Nunká nérentniuri shana arak, mash' wenuí, pumputan najának, jeánash jeámmia, tímiaja. Tura wainkiarat' tusa, nii takárniurin apújsar, yajá nunkánam wemia, tímiaja.

- 2 Júuktin tsawant jeámtai: "Júuk, nakak akupturkartí" tusa, nii aéntsrin akupkarmia, tímiaja.
- 3 Túramu, nii takárniuri akupkarman achíkiar, awátrar, shana sútsuk, júnisank akupkarmia, tímiaja.
- 4 Núnisank nérentniuka ataksha nii aéntsrin akupkamtai, katsékkar, kayajají múuknum tukúrar, awainkiármia, tímiaja.
- 5 Úunt ataksha akupkamtai, núnaka maawarmia, tímiaja. Tura untsurí akupkarmatáisha, chikíchnaka awátrar, chikíchnasha maawarmia, tímiaja.
- 6 Turawarmatáisha: "Winia uchírnaka amirkartatuápi" tusa, nérentin nii uchirí ti enéamun akupkamia, tímiaja.
- 7 Takárniuri nuna wáinkiar: "Juchakáit nunkan nérentniuri átatna nua ! Maar', nunké atankitiáiya !" túsar,
- 8 achíkiar, máawar, tsuátnum ajapawarmia, tímiaja. -
- 9 Jesús nuna tinia iniáis, chicháak: - Nérentin ta, itiúrkatin takarniurijáiya ! Yajáuch' takárniurin wáit-anénttsuk máawar, nii ajarinkia chikichan susáttawai.
- 10 Kame: Jean jeamín: "Ju numi yajauchiti" túsar, ajapawarmatáisha, nuka jean paurí ajásmiayi.
- 11 Arútam turamtai, ii jjiar iisar', ti penkeráiti taji. Ujajmatáiniam nu aujsachukáitrum ? - timia, tímiaja, Jesús.
- 12 Jutíun úuntri nuna antúkar: - liniápi túramjia ! - túsar, achíktaj' tuiniáksha, aéntsun ishámainiak, ikiúkiar, weármia, tímiaja.

Ya akíktiniáit, tama.

(Mt.22,15; Nk.20,20).

- 13 - Jesús anankatái - túsar, pariséun, Erútesan nemárniujají akupkarmia, tímiaja
- 14 Jeáriar, chicharáiniak: - Uuntá, ámeká nekás waitrichuítme. Aénts wakéramu íitsuk, Arutman chichame páant étserame. Ame warítiam ? Úunt Sésar akiktinkiaítiaj' ? Túrutskesch akikchatniukáitaj' ? - tíarmia, tímiaja.

Mk. 12, 15.

- 15 Jesús: - Anankruiniawapi - tusa: - Urukamtai anankatái tusárum, turútrum ? Wátskea, kuit iniatúrsakua ! - timia, tímiaja.
- 16 Kuítian iniakmainiákui: - Juí kuítmium, yana yapí, yana náari péeta ? - Tu tai: - Úunt Sesarnáiti - tíarmia, tímiaja.
- 17 Tuiniákui: - Sesarnaitkiuínkia, Sésarak susatárum. Tura Arutmanuitkiuínkia, Arútam susatárum - Jesús tu chichákmtai: - Ti nékawai - tu enentaimsarmia, tímiaja.

Jákarun aneántmari.

(Mt.22,23; Nk.20,27).

- 18 Chíkich tsawanttin satuséusha: - Jákaru aneantchártatui - tiniu ásar, Jesusan aníniak:
- 19 - Uuntá, Muisés chichártamkur': "Áishmank uchín yajútmtsuk jakámtainkia, jaka, uchirín takusat' tusa, nii yachí wajen nuatkatniuíti" túramji.
- 20 Kame, tsenken yachintin ásar, iwiáiri nuátak, yajútmtsuk jakámiayi.
- 21 Patáisha wajen nuátak, níisha yajútmtsuk jakamtai, nuna yachisha wajen nuatkamia, tímiaja.
- 22 Níisha jakamtai, nutíksarank ashí nii yachisha wajen nuátkar, yajútmtsuk jakármatai, ukúnam nuášha jakamia, tímiaja.
- 23 Nuíkia, aneánttin tsawántnum, aneantainiakuínkia, nuwa ashí iniúnka asa, yana nuwé ati ? -
- 24 Tuiniákui: - Arutman chichame, nii kakarmarisha nekachkúrmeka, awajircháttarmek ?
- 25 Kame jaka aneántainiak, áishmank nuášha nuatnáitsuk, Arutman Pasúkriya aínsarank pujusártatui.
- 26 Jakáruka nekás aneantártatui. Wátsek, Muisés aármanum ajsachukáitrum? Arútam numi keámunam waritmia ?
"Wiyáitjai Apráaman, Isáakan, Jakúpnasha Úuntri" tichamkía?

Mk. 12,27.

27 Átum unúwarme: kame Arútmaka aents^u jákarun Uuntrichuíti. Antsu aents^u iwiákun Uuntrínti - tu chicharkarmia, tímiaja, Jesús.

Arútam awemamu imiá nankámaku.

(Mt.22,34; Nk.10,25).

- 28 Jesús ti pénker chichasúa amíkmatai, unuíkiartin nuna antuk, weántuk, chicháruk: - Uuntá, tuít Arútam awemamu imiá nankamakusha ?
- 29 Takui, Jesús chicháak: - *Israerá nekatá: "Arútam ii Úuntrinkia aya chikichkíti. Aya níichik ii nerentniurínti.*
- 30 *Nuíkia, Arútam amé Úuntrum anetá. Amé enentáimjai, amé wakánmijai, amé kakarmármijai anetá".* Juíti Arútam awemamu imiá nankámaku.
- 31 Núnisank jusha awai: *"Ashí aents^u ame anémamna aínsamek anetá".* Ju jímiarchik akupkamu imiá nankámaku ainiáwai.
- 32 Tu tai, unuíkiartin chicháak: - Mákete, Uuntá ! Nékasmeke tame: *"Arútam nekás chikichkíti; chíkich Arútam atsawai".*
- 33 Kame Arútam ii anentáijai, ii wakanijai, ii kakarmarijáisha anétin, tura, ashí aents^u ii anémajnia aínsarik anétniusha, ashí mash' íikmakan, waimiatáinsha nankáawai - timia, tímiaja.
- 34 Ti pénker aimkiámtai, Jesús chicháruk: - Arútam Irunrámunam enkematin, tíjiuch pujame - timia, tímiaja. Tu chicháakui, atakka penke aniascharmia, tímiaja.

Arutman Uchirí.

(Mt.22,41; Nk.20,41).

- 35 Jesuska Úunt-ayámtainiam unuíniak pujús, aníniak: - Urukamtai unuíkiartin: *"Ashí-Tujintcha-Utsumka Tawitian Uchirí atiniáiti"* tuínia ?

Mk. 12,36.

- 36 Kame Tawitkia wáimiak, chicháak: "Úunt Arútam winia Úunrun chicháruk: Amé numásrum tekemrutmarat' tusan, winia untsuruíni pujúsam, nakastá, tájame" tímia, tímiaja.
- 37 Nuíkia, Tawit "Winia Úuntru" táisha, itiúrkank nii uchirish aminiáit ? - tímia, tímiaja.
Ti pénker jintiákui, untsurí aents^u Jesusan ti shíir anturiármia, tímiaja.

Israer unuikiartin.

(Mt.23,1; Nk.20,45)

- 38 Jesús unuíniak chicháak: - Atumsha unuikiartin íisrum, aneartárum.
- 39 Kame, pénker iwiármamrar wekáiniak, "Jintiásha amikmatawarat" túsar, ayámtainiam, nampérnumsha chimpínium pujústaj-sar wakeruiniáwai.
- 40 "Atumnia ti núkap anéntrajai" tíar, wajen waririn amutainiáwai. Turuiniána nu imiá makumu áartatui.

Waje suámuri.

(Nk.21,1)

- 41 Jesús Uunt-ayámtainiam aents^u kuit enketáiniam apujáinian ii pujumia, tímiaja. Kuítrintniuka ti núkap apujiármia, tímiaja.
- 42 Antsu nua waje ta, kuitrintchaitiat, ishíchichik apujsamia, tímiaja.
- 43 Jesús nuna íis, nii aéntsrin untsúkar, chicharáiniak: - Nekás tájarme: ju nua imiá apujsayi.
- 44 Kame chíkichkia ampírmarin apujainiái, ju núaka mash' nii takámarin, mash' nii utsúmmia nuna apujsayi - tímia, tímiaja.

AKANKAMU 13.

Úunt-ayamtai yumpúnramu.

(Mt.24, 1; Nk.21,5).

- 1 Jesús Úunt-ayámtainmaya j̄jinkí weái, nii aéntsri chicháruk: - Íisiana ! Kaya ti úuntj̄ai shíir jeammáiti - tusa, Úunt-ayamtain iniatusmia, tímiaja.
- 2 Tákui, Jesús chicháruk: - Ju ayamtai tímiau ju, wainkiámna ju, mash' tsainiártatui. Kaya chikíchkish penke juakcháttawai - timia, tímiaja.
- 3 Tura, Kunchái náintnium, Úunt-ayamtai naka íirkanum pujái, Kaya, Sántiak, Juank, Antressha Jesusan níishá júkiar, chicharániak:
- 4 - Jesusá, ame támerna nusha urutáink túrunat' ? Amukatniurisha itiur nekátjik ? - tíarmia, tímiaja.

Wáitsatin nánkamma.

(Mt.24,4; Nk.21,8).

- 5 Jesús chicháak: - "Anankramawáij" " tusárum, aneartárum.
- 6 Kame, núkap anánkkartin: "Wiyáitjai nekás Ashí-Tujintcha-Utsumka" túsar, untsurí aéntsun anankawártatui.
- 7 Aents^u kajérnaikiar, mesétnum maniniakuísha, núnkaka amukáshtatui. "Nuka tuke turunatniuíti" tusárum, titiú pujustárum.
- 8 Nankin júkiar, ashí nunkánam manikiártatui. Núnkasha uurkáttawai; tsukasha ti núkap átatui. Nujáinkia, nua jatema aínsank, aéntsun waitsátniuri yama nankámnattui - timia, tímiaja.

Mk. 13,9.

Jesusan aéntsri kajérkamu.

(Mt.24,9; Nk.21,12).

- 9 Átumka atumek iimiastárum; kame atumín achírmak, makurmáttarme. Ayámtainmasha awattamráttarme. Wi shuar asárum, aéntsun úuntri jukimiuitiátrum, winia etserkáttarme.
- 10 Kame, nunka amunatsáink, ashí nunkánam Arutman chichame etsernaktiniáiti.
- 11 Tuma asamtai, achírmak, makukrátniunam juramkiakruminsha, lwiáikratin atumínini chichaktin asamtai: "Warittiajak ?" tu enentaimsáirap, antsu nii tana nu titiárum.
- 12 Nuí, aents^u nii yachín máattui; apa_u uchirín máattui; uchisha nii aparín maawártatui.
- 13 Atumsha, wi shuar asárum, kajerkamu átatrume. Tumaitkuísha, ya tuke katsuntea nuka, ewemráttawai.

Jerusarenkan amukátniuri.

(Mt.24,15; Nk.21,20).

- 14 Aántar-arutman nakumkámuri Úunt-ayámtainiam wainkiárum, Jutéanam pujatírmeka, náintnium pisartárum.
- 15 Ach' pujatírmeka, warincho jeánmaya_u jútsuk, wárichik pisartárum.
- 16 Takátnum pujákrumka, entsatái jukítiaj-srum, waketkírap.
- 17 Iraru, uchín umuntsainiásha ti waitsártatui.
- 18 Yumitin nu turunawáink tusárum, ti anentruatárum.

Aéntsun waitsátniuri.

(Mt.24,21).

- 19 Nu tsawanttín, aents^u yaúnchu ti waitsármiania nunash nankamas, atak waitsáshtinian ti núkap waitsártatui.

Mk. 13,20.

20 Núkap tsawant tumakuínia, aéntska nuna katsúntsuk, penke uwemrucharáinti. Antsu Arútam, nii aéntsri uwemrarat' tusa, nu tsawantan wárichik emenkáktatui.

Anankártinian tátinri.

(Mt.24,23).

21 Nu tsawántaik: "Ashí-Tujintcha-Utsumka juí pujawai, aí pujawai" turamkurminkia: "Wáitrawai" tusárum, anturkáirap.

22 Kame, pénger áinia aun anankawártaj-sar, wáimiakua aínsarank, Ashí-Tujintcha-Utsumka aínsarank, aents-tujíntiamua núnisank najanawártatui.

23 Anankramawáirum tusan, yamáikia ujá ujá awajeájrume.

Arútam-aénts-ajasun tátinri.

(Mt.24,27; Nk.21,25).

24 Nuí tsawant kúntuts aa áakua, tsawái-nantu kirit ajásmatai, kashi-nántusha te ajástatui.

25 Yáasha akákenak, mai inkiunái ajáiniak, teterkasá menkás ajainiákui, ashí mash' yumpúnrattui.

26 Nuíkie Arútam-Aénts-Ajasú nii kakarmarijaj, nii nankamakmarijájisha yuránkminiam páchitkia, newa winián wainkiártatui.

27 Ashí mash' nii aéntsri irurarat' tusa, nii Pasukrin ashí nunkánam, nayáimpinmash akupkártatui.

28 Atumsha, nase ti nasentkui: "Uwí winiáwai" tátsurmek ?

29 Aínsarmek, wi tájarmena nu wainkiárum: "Utsumka tasátuk ajasái" titiárum.

30 Nekás tájarne: "Yamáí aents^u pujuiniána nu amunáiniatsaink, nuka mash' aminkíártatui.

31 Kame, nayáimp' nunkasha amunainiakúisha, winia chichámruka penke amukáshtatui - timia, tímiaja, Jesús.

Tátinri nékachma.

(Mt.24,36; Nk.21,34).

- 32 Urutái nii tatiniáit ? Nu penké nékatsji. Arutman Uchirí, nii Pasúkrishta penke nekainiátsui. Aya ii Aparí Arútam nékawai.
- 33 Nii tátinri nékachu asárum, aneárum, iwiárnarum pujustárum.
- 34 Jéentin yajá wéak, nii jéen wainkiarat' tusa, nii takárniurin chicharáiniak: "Ashí mash' nii takatrin najanatí. Jea wáinniuka anear, wáiti asákar pujustí" tawai.
- 35 Aíntsarmek atumsha, atumí Uuntrinkia kíarai, ajámpek, tsawana aínkish nékachma tatin asamtai,
- 36 "kanú pujarin waitmakáij' " tusárum, aneárum pujustárum.
- 37 Atumín tájarmena juka, ashí mash' aents^u aneárar pujusarat' tusan, tajai - timia, tímiaja, Jesús.

AKANKAMU 14.

Jesús maatái tama.

(Mt.26,1; Nk.22,1; Jn.11,45).

- 1 Uunt-nampérnum wakápruchun yuátin, aya jímiarchik tsawant ajasái, Wean Úuntri, Unuíkiártiniash: - Itiurkárík Jesús anankar', maawáintiaj' ? - túsar, eármia, tímiaja.
- 2 - Aents^u kajertamkaráij' - tinia: - Námper jeátsaink, turatái - tíarmia, tímiaja.

Kunkuínjai yakarma.

(Mt.26,6; Jn.12,1).

- 3 Jesús Petania irutkámunam, kuchápruku Semunkan jeén yurúmuk pujái, nua kunkuínian ti kuítjai sumakman itiá, Jesusan tarí, nuna ijiákar, nii muukeén ukatramia, tímiaja.
- 4 Aents^u nuí pujúinia nuna wáinkiar, kajékar, númtak chicháiniak: - Urukamtai ju kunkuín imiá kuítniash wasúrea ?

Mk. 14,5.

- 5 Ju ti núkap kuítjaj surukar', utsumainiána au yáimiai ajakji - túsar, nuwan kajeriármia, tímiaja.
- 6 Tuiniákui, Jesús chicháak: - Ju nuwa, wijáinkia ti pénger asamtai, urukamtai kajérearum ?
- 7 Kame, utsumainiána au atumjaj tuke pujúinia asamtai, átum wakérakrum yainkminiáitrame. Antsu wikia atumjaj tuke pujuscháttajai.
- 8 Ju nuwa turunáttana nuna najanayi. Kame winia iwiartúsartin asamtai, winia iniáshruí kunkuínjaj ukatrurái.
- 9 Nekás tájarme: "Ashí nunkánam Pénger-Chichaman etserainiána au, yamáí ju nuwa áitkiara júnasha ujmatáartatui" - timia, tímiaja.

Jutas anánkkartin.

(Mt.26,14; Nk.22,3).

- 10 Nuínkia chikíchik akátramu, Kiriutniúmiá Jutas, Jesusan surúktaj-sa, Wean Uuntriín wemia, tímiaja.
- 11 Nuna nekáwar, warásar: - Kuit amastaji - tu tuiniái: - ltiúrkanak Jesusan inkiúnkan, wárik surútkaj ? - tu enentáimiu wekáimia, tímiaja.

Yurúmak-nántar juárma.

(Mt.26,17; Nk.22,7; Jn. 13,21: 1 Kuri. 11,23).

- 12 Úunt-námper jeákui, wakáprachu yurúmmanum íikmakan main áarmia nuí, nii aéntsri Jesusan chicharáiniak: - Tuí íikmak iwiamniáitiaj' ? - tíarmia, tímiaja.
- 13 Tuiniákui, Jesús jímiar aéntsriin akúpeak, chicharáiniak: - Irutkámunam werum, aents^u yumin shikik jua wainkiárum, patatuktárum.
- 14 Wayamtai, jéentin chichárkuram: "Tuít winia tankamáshiur aéntsrujaj íikmak yurumatniusha ? wínia Úuntur túramui," titiárum.

Mk. 14,15.

- 15 Yakí tankamash' iwiáramun iniakturmastátrumna nuí, íikmak iwiaratárum - timia, tímiaja.
- 16 Nii aéntsri wéar, Jesús tímia núnisarank wáinkiar, íikmakan iwiarármia, tímiaja.

Anánkamu étserma.

(Mt.26,21; Nk.22,21; Jn.13,18).

- 17 Kiáakui, Jesús nawe jímiar Akatramurijai ta,
- 18 yurúmuk pujús, chicharáiniak: - Nekás tájarme: atumiya chikíchik wíjají yurumna nu surutkáttawai - .
- 19 Tákui, kúntuts enentáimirar: - Uuntá, wiashítiaj ? - túsar, chikíchikimsar anintruiniákui:
- 20 - Apatkun wijají pinínknumia achiana, nuíti.
- 21 Arútam-aénts-ajasú aármanum tana núnisank jakatniuíti. Tumaitkuísha, aents^u súrana nuka, yumínkramu asa, akínmainchu ajakuíti - timia, tímiaja.

Yurúmak-nántar.

(Mt.26,26; Nk.22,19; 1 Kuri. 11,23).

- 22 Jesuska yurúmuk pujús, yurumkan achik, usukruá, púuk, suíniak, chicháak: - Achiktárum: juka winia iniashruíti - .
- 23 Núnisank sawen achik, Arutman yuminkias, súsam, mash' umararmia, tímiaja.
- 24 Nuí chicharáiniak: - Juka winia numparuíti. Untsurí aéntsun irúrtinian puártatna nuíti.
- 25 Ju nekatárum: "Sawen penké úmutsuk, áyatik Arútam Irunramúnam yamáram sawen umártatjai" - timia, tímiaja.

Anankruáttame tama.

(Mt.26,30; Nk.22,31; Jn. 13,36).

- 26 Nuyá ujajmáwar, amíkiar, Kunchái náintnium weármia, tímiaja.

Mk. 14,27.

- 27 Nuí Jesús chicharáiniak: - "Pámukan ijiún, nii tankuríniash ipisrártatjai" tu aárma asamtai, atumsha ju kashi natsantrúrum, pisartátrume.
- 28 Tumaitkuísha, aneántan, Kariréanam nakastátjarme - timia, tímiaja.
- 29 Kaya nuna antuk, chicháruk: - Chíkich natsántramrar, pisainiakuísha, wikia ayamruktátjame - .
- 30 Tu tai: - Nekás tájame: "Ju kashi atash' jimiará shiniátsaink, ámeke menáintiu anankruáttame - timia, tímiaja.
- 31 Takuísha: - Jáaknasha áminkia penké anankashtájme - túsar, Kaya nii aéntsriша нúnisarank atsanmarmia, tímiaja.

Jesús janíksamu.

(Mt.26,36; Nk.22,39).

- 32 Jesús, nunka Jetsemaní náartinnium ta, nii aéntsrin chicharáiniak: - Juí pujustárum. Wikia aranta aí Arutman anentruátaj-san wéajai - timia, tímiaja.
- 33 Nuí Kayan, Santiákun, Juánknasha júkiar wesa, jatan nekápeak, sapíjmiak,
- 34 chicharáiniak: - Winia wakaniur ti kúntuts pujawai. Juí pujúsrum, iwiá pujutárum - .
- 35 Tinia ikiúkiar, ishíchik ékemsank, nunká piniákumar, anéntrak: - Wi waitsatniúnmani nankamachkúnka, mak ainti - tía,
- 36 - Aparú, ashí tujintcha asam, ti waitkiarsáip, antsu, wi wakéramu ítsuk, ame wakéramna nu atí - timia, tímiaja.
- 37 Nuna tía amik, nii aéntsri kanú tepenan jeáriar, Kayan chicháruk: - Kánamek ? Ámeke ishíchkisha iwiá pujutaj tatsumeápi !
- 38 lírshimp' awaktamkáirum, iwiásrum anentrú pujutárum. Kame wakankia kakarmáiti, antsu iniáshkia kakarmachuíti - timia, tímiaja.
- 39 Ataksha Waketkin, núnisank nii Apárin anentruámia, tímiaja.

- 40 Tura nii aéntsriñ ataksha werí, kanú tepena wainkiáram, karí pujakui, aíkcharmia, tímiaja.
- 41 Anentrasúa amik, ataksha waketki, chicharáiniak: - Antsu yamáikia ayámrrarum, kanartárum. Mámete. Arútam-aénts-ajasú tunartin aéntsnum surúnkatin tsawant jeáyi.
- 42 Wetái; nantaktiárum. Surutkáttana nu winiáwai - timia, tímiaja, Jesús.

Jesús emétamu.

(Mt.26,47; Nk.22,47; Jn. 18,2).

- 43 Jesús nuna chicháa wajáink, Jutas, Jesusan Akatramurintiat, ti núkap aéntsjaí, Wean Úuntri, Jutíun Úuntri, Unuíkíártiniash akupkamu ásar, machítjaí, numijáisha nékachma tariármia, tímiaja.
- 44 - Wi mejeástatjana nu achíkrum, jukitiárum - tiniu asa,
- 45 tsekent ta, Jesusan weantuk: - Uuntá ! - tinia, yapíñiam mejeásmia, tímiaja.
- 46 Turamtai, achíkiar, emetá, jukiármia, tímiaja.
- 47 Turuiniákui, Jesusan aéntsri machitian jútakin, Wean Úuntrin takárniurin kuishín tsupirkamia, tímiaja.
- 48 Jesús aents^u kaúnkarun chicharáiniak: - Kasakáitiaj, machítjaí, numijáisha achirkátñiua ?
- 49 Wikia Úunt-ayámtainiam tuke tsawanttin unuínia pujumaj nuísha achírtsuk, yamáí Ujajmatáñiam aárma nu aminkiat' tusárum, jutikrárme - timia, tímiaja.
- 50 Jesús nuna takui, nii aéntsriñkia ikiúiniak, mash' pisararmia, tímiaja.
- 51 Uchi natsa awankemjaí penúmar Jesusan nemarki wean emétam,
- 52 awankémnaka ikiúak, misú pisarmia, tímiaja.

Jesús makumu.

(Mt.26,57; Nk.22,54; Jn. 18, 12).

- 53 Wean úuntri pujámunam Jesusan jukiármatai, úunt-wea, unuíkiartin, jutíun úuntrisha irunrarmia, tímiaja.
- 54 Káyasha arántak nemarkí, wean úuntrin jeén wayá, nii takarniuríjají jínia anámuk pujumia, tímiaja.
- 55 Ashí mash' úunt, wean úuntrisha irunrarmia nu: - Jesuska maatái - túsar, tsanumniun eainiáksha, wainkiacharmia, tímiaja.
- 56 Untsurí aents^u tsanumruiniáksha, métekrak chichainiáchkui, makutaj tukamá, tujintkiármia, tímiaja.
- 57 Tumaitkuísha chíkich wáitruiniak chicháiniak:
- 58 - "Wikia úunt-ayamtaí aents^u najánamun upukukan, menáint tsawántchinmank chíkich ayamtaí aents^u najanáchman jeámtiatjai" tu chicháa antúrkamji - tíarmia, tímiaja.
- 59 Tuiniayat, métek chichascharmia, tímiaja.
- 60 Tumainiákui, wean úuntri wajakí, ashí iimiainiái, Jesusan chicháruk: - Turamainiána nusha amesha warítmea? Ayamrumátsmek ? -
- 61 Tamaitiat, chichátsuk wajaákui, wean úuntri ataksha aniak: - Amekáitiam Arutman Uchirí, Utsumka ajásua ? -
- 62 Tu tai, Jesús chicháak: - Ee, wiyáitjai. Arútam-Aents-ajasú ashí tujintcha Arútmajají tsanink yuránkminiam pachitkia winiá wainkiáttarme - timia, tímiaja.
- 63 Nuna antuk, wean úuntri nii pushirín tséut jáak: - Yamáikia makukrátniuka utsúmatsji.
- 64 Kame atumsha waitruánia nu antukú asárum, warítrumea?- Tu chicháakui: - nekás mantniáiti - tíarmia, tímiaja.
- 65 Nuna tuiniákui, yapíniam usukiáwar, jíin epétkar: - Ya aítkiárma wátsek nekámakia ! - túsar, awatiármia, tímiaja. Ayamtaí wáinniusha júkiar, asutrarmia, tímiaja.

Mk. 14,66.

Kaya anánkkartuamu.

(Mt.26,69; Nk.22,55; Jn. 18, 15).

- 66 Kaya aách' pujái, nuwa, wean úuntrin takárniuri, tarí,
67 jinia anamú pujá asamtai, weántuk, íitia amajas, chicháruk: -
Ameja Nasarenumiá Jesusjai wekaimiáme. -
68 Tu tai: - Atsá, wikia táména núnaka penke nékatsjai - tusa,
jǐinkí wemia, tímiaja.
69 Wéakui, nuwa wáiniak, aents^u pujuármia nuna chicharáiniak:
- Jusha nii aentsriniáiti - tímia, tímiaja.
70 Káyaka: - Atsá - tákui, árusank ashí mash': - Kariréa
chichame chicháa asam, nekás niiniúítme. -
71 Tuiniákui: - Atsá, wáitratsjai, wikia nu aéntsnaka nékatsjai -
tusa, kajekmia, tímiaja.
72 Tu wajái, ataksha atash' shiniúkmatai: - Atash' jimiará
shiniátsaink, menáintiu anankruáttame - Jesús timia nuna
anentáimias, ti úutmia, tímiaja.

AKANKAMU 15.

Jesús Piratui jukimiu.

(Mt.27, 1; Nk.23, 1; Jn. 18,28).

- 1 Káshik tsawármatai, wean úuntri, Jutíun úuntri,
unuíkiartiniash, chichaman najánawar, Jesusan jinkiárar,
Piratui jukiármia, tímiaja.
2 Piratu Jesusan aníntrak: - Amekáitiam Jutíun úuntriya ? - Tu
tai: - Ee, nékasmek tame - timia, tímiaja.
3 Úunt-wea mai tu ajainiákui,
4 Piratu ataksha chicháruk: - Tuiniána nu ántatsmek ?
Ayamrúmatmek ? -
5 Támasha Jesús chicháchkui: - Itiurkátjak ? - tusa,
enentáimias juákmia, tímiaja.

Mk. 15,6.

- 6 Pirátuka, aents^u seáiniam, tuke úunt-nampérnum aents^u epénmian jíiki, ankant akupniúya, tímiaja.
- 7 Parapás náartin maniámunam nii aéntsrijai aéntsun maa asamtai, nuí epenmia pujumia, tímiaja.
- 8 Aents^u kaúnkar: - Chikíchik epenmia nu ankant akupkatá - tuiniákui,
- 9 Piratu chicharáiniak: - Jutíun úuntrin akupkat' tusárum, wakérarmek ? -
- 10 "Jesusan kajeráiniak surukaruítí" tusa, tu aniasarmia, tímiaja.
- 11 Tu tai, úunt-wea aéntsun chicharáiniak: - "Parapás jíiktiá" titiárum - tíarmia, tímiaja.
- 12 - Parapás jíiktiá ! - tuiniákui, Pirátusha: - Jutíun úuntri tárugna nunasha, itiurkáttaja ? - takui,
- 13 Aéntska kakántar, chará tíar: - Paúnam ajjintiatá - tíarmia, tímiaja.
- 14 - Kame, warí yajáuchinia najanáit ? - Piratu tu tai, ashí aents^u chará chará ajákiar, ti kakántar: - Paúnam ajjintiatá - tíarmia, tímiaja.
- 15 Tuiniákui, Piratu Aents^u warasarat' tusa, Parapasan jíiki, Jesúsna asú asuti amajas: - Atum paúnam ajjintiatárum - tinia, nankí-júun akupkarmia, tímiaja.

Jesús jankin etsenkrumtikiámu.

(Mt.27,27; Jn. 19,1).

- 16 Nankí-juu jeá áach' ampákmanum, Pritiúriu náartinnium Jesusan jíikiar, nii aíjajai irúnrar,
- 17 pushí kapakun aéntsrar, jankin múuknum etsenkrumtikiármia, tímiaja.
- 18 Túrawar: - Amíkmajme, jutíun úuntriya ! - túsar,
- 19 píntiujajai múuknum awátar, usúkiawar, tikíshmatrar, wishíkiármia, tímiaja.

Mk. 15,20.

20 Wishíksúa iniáisar, ataksha pushí kapakun áitkiar, nii pushirín aéntsrar, paúnam ajjintiatái túsar, aa jikiármia, tímiaja.

Jesús ajjintiámu.

(Mt.27,32; Nk.22,26; Jn. 19,16).

21 Nankirtin jintía wésar, Sirenénmaya Semunk, Arejantru Rújunash aparí, takatnúmia waketki winián inkiúnkar: - Pau júkitin Jesús yainktá - túsar, achikiármia, tímiaja.

22 Kúrkuta, shuár-chamjai ukunch' náint támanum jéawar,

23 Sáwenam yapá pachímramun umarat' túsar, suámsha, umarcha, tímiaja.

24 Nuí Jesusan paúnam ajjintiáwar: - Nii pushirín yaki jukit' ? - túsar, nakurutáijai nekawarmia, tímiaja.

25 Nantu takuna aí ajjintiawarmia, tímiaja.

26 Urukamtai makumuít ? Nuna ashí mash' nekawarat' túsar: - Juka Jutíun uuntrinti - tu aárman yakí paúnam peerkármia, tímiaja.

27 Núnisarank jimiará kasan, chikíchkiniak untsurínini, chikíchnasha menarínini numíniam ajjintiawármia, tímiaja.

28 Kame: - *Yajáuchiniam pachikmáiti* - Ujájmatáiniam tu aárma asamtai, nuí uminkíamiayi.

29 Nuí aénts^u wekáinia katsékkar: - Ámeka úunt-ayamtai upúkukam, menáintiu tsawátnum ataksha jeamminiaitkiúmka,

30 wátskea, yamá paúnmaya akáikim, ewemratá - tíarmia, tímiaja.

31 Aínsarank úunt-wea, unuíkiártiniash wishíkrar, númtak chicháiniak: - Chíkichnaka ewemtikraitiat, níinkikia ewémratniun tujíntiawai.

32 Yamái Paúnmaya akaakuínkia, íisha, "Nekás Utsumkáiti; nekás jutíun uuntrinti" tíntji - tíarmia, tímiaja. Níijai ajjintiámu áarmia nusha katsekiármia, tímiaja.

Jesús jakamu.

(Mt.27,45; Nk.23,44; Jn.19,28).

- 33 Nantu tutupniarái nuyá ayantántainia timianái, ashí nunkánam kakirít te ajasmia, tímiaja.
- 34 Nuí Jesús kakántar chicháak: - Eruí Eruí, rama sapaktaní (shuár-chámjaj: "Arutmá, Arutmá, urukamtai kajinmátruknium ? ") - timia, tímiaja.
- 35 Nuí antú pujúniaka: - Eríasan untsúawai - tuiniákui,
- 36 chikíchik, churuíniam urúchin ajámar, píntiunam péeras, Jesusan áapa, chicháak: - Iniaisatárum: wátsek Erías ta, akáktimpiash ? - timia, tímiaja.
- 37 Tu tai, Jesús chará ajakí, jakamia, tímiaja.
- 38 Nu chichamáik úunt-ayámtainiam ejátak jímiapetek tséut jaanakmia, tímiaja.
- 39 Rumánmaya nankí-juun úuntri, nuí naka wajáa, Jesús itiur jaka nuna wáiniak, chicháak: - Ju aéntska nekás Arutman Uchirinti - timia, tímiaja.
- 40 Maktaránmaya Marí, chíkich Marí, Santiáku Jusénash nukurí, Sarumeshá, arántat ii wajáarmia, tímiaja.
- 41 Nu núaka Kariréanam Jesusan nemársar, yain áarmia, tímiaja. Chíkich núasha Jerusarénknum nemariármia nusha pujuriármia, tímiaja.

Jesús iwiársamu.

(Mt.27,57; Nk.23,50; Jn.19,38).

- 42 Kunkuk' tsawant kiáakui, Úunt-namper nuntumtuámu asamtai,
- 43 Arimatéanmaya aénts^u, Jusé náartin, Uuntan irunramuríin pujúmia nu, níisha Arútam-Irúnramun naka pujú asa, ishámstuk Piratun jearí, Jesusan iniashín seámia, tímiaja.
- 44 Pirátuka: - Nekás jakáyash ? - tusa, nankí-juun úuntrin untsuk, anintrusmia, tímiaja.

Mk. 15,45.

- 45 - Nekás jakayi - tákui, Jesusan iniashín Jusén susamia, tímiaja.
- 46 Juseka Jesusan iniashín paúnmaya akakí, tarach' sumák-majai penuar, kaya waa taúrmanum ikiús, wáitiniam kaya úuntan akankétak, epenmia, tímiaja.
- 47 Ikiuniákui, Maktaránmaya Marí, chíkich Marisha, José nukurí, ii wajáarmia, tímiaja.

AKANKAMU 16.

Jesús aneántma.

(Mt.28,1; Nk.24,1; Jn.20,1)

- 1 Saké tsawant nankamásmatai, Maktaránmaya Marí, chíkich Marí, Santiákun nukurí, Sarumesha Jesusan iniashín kuértaj-sar, kunkuínian sumakarmia, tímiaja.
- 2 Ayamtai tsawant yama tsawái, kirítiak wéar, etsa jiniái iwiarsámunam jeawarmia, tímiaja.
- 3 Númtak chichániak: - Yaki kaya iwiársamun epétea nuna eketramkataj' ? - tukí wésar,
- 4 káyaka ti uuntaitiat, ékekman wainkiármia, tímiaja.
- 5 Iwiarsámunam wayáwar, natsa pushí ti pujun entsaru untsurnúmani eketun wáinkiar, ishamkarmia, tímiaja.
- 6 Pásuk nuwan winínian chicharániak: - Ishamrukáirap ! Nasaretnumia Jesús, ajintiámu jaka eármena nu, aneántu asa, juí pujatsui. Wátsek, atumsha nii ikiúsmari íkiua !
- 7 Pai ! Yamáikia wárik wakétkirum, nii aéntsri, Kayasha chichárkuram: "Jesús Kariréanam éemka wéawai. Nii tíniua aínsarmek nú wainkiáttarme" tu titiárum - timia, tímiaja.
- 8 Núwaka ti ishámkar, iwiarsamúnmaya wárik jiniáir, ti sapijmia ásar, chikíchnaka penké ujátsuk, weármia, tímiaja.

Jesús wantínkiamu.

(Jn.20,11).

- 9 Jesuska Ayámtai tsawantin káshik aneant, Maktaránmayau Marí, tsénken emeskan j̄irkímia nuna éemka wantintiúk^umia, tímiaja.
- 10 Níisha Jesusan aénts^urin kúntuts uutu pujuármia nuna ujakártaj-sa wemia, tímiaja.
- 11 - Wi wainkiájai; iwiáku pujawai - takuísha: - Áantar tawai - tíarmia, tímiaja.
- 12 Nuyá ataksha Jesuska, jimiará aénts^uri irutkámunam wenan, j̄intiá wantintiukarmia, tímiaja.
- 13 Nusha wakétkiar etserkarmatáisha: - Áantar tuiniáwai - tíarmia, tímiaja.
- 14 Ukúnam, nawe-chikíchik aénts^uri yurumá pujúinian wantíntiukar, núkap ujakmaitiat íimiarcha asármatai, kakantrármia, tímiaja.
- 15 Nuyá chicharáiniak: - Ashí nunkánam werum, ashí mash' Pénker-Chícham ujaktárum.
- 16 Ya íimiaru ajás, imiáneá aúka, ewemráttawai. Ya íimiaru ajástinian nakitia nuka, yumínkramu átatui.
- 17 Íimiaru ajainiána au, winia kakármarjaj̄i wawekan j̄iki akúpkar, yamáram chichaman chichasártatui.
- 18 Napín antinkiar^umatáisha, nuka esaichártatui. Tseasan umarársha, jakachártatui. Jaa ainiána aun ewején awántsar, tsuarártatui - timia, tímiaja, Jesús.

Jesús wakamu.

(Nk.24,50).

- 19 Uunt Jesús nii aénts^urin tuasúa amik, Nayáimpiniam waka, Arutman untsurini ekemsamia, tímiaja.
- 20 Nii aénts^urinkia nuna etserkátaj-sar ashí nunkánam weármatai, Jesuska, ashí mash' nii chichame nekasáiti tíarat' tusa, níinini aénts-tuj̄íntiamun najanki wemia, tímiaja.

PÉNKER - CHICHAM

WÁIMIAKU RUKAS AÁRMA.



AKANKAMU 1.

Éemkari.

- 1 Untsurí aents^U iín turunámia nu auj mátsamun timiátrusar aáarmiayi.
- 2 Wainkiármia nu ashí mash' aúj matsar, nuna etserin ajasarmia, tímiaja.
- 3 Tuma asamtai, wisha nuna ashí mash' eákan, pénker aáran, amin, Tiujirú, amástaj-san wakérajai.
- 4 Jujáinkia, mash' jintíntramawarmia nu, páant ajasártatui.

Juánkan akiniátniuri étserma.

- 5 Aents^U, Sakarías náartin, úunt Erútes pujái, Jutéanam pujumia, tímiaja. Apías irunramúnam wea aúyayi. Nii nuweshá, Isaper náartin, Aarunkan shuaríyayi.
- 6 Mai ti pénker ásar, Arútam awemamun tuke amirín áarmiayi.
- 7 Mai úuntach' ásar, nuarisha kaa nua asamtai, uchí tákakcha áarmia, tímiaja.
- 8 Sakarías wéajai úunt-ayámtainiam anentrú pujái:
- 9 - Wátsek, ju kíarai yaki íikmatai pujámunam enkemá, shirípkijai kaniukat' - túsar: - Sakarías atí - tíarmia, tímiaja.
- 10 Nuí wayamtai, mash' aents^U áa anentrú pujuármia, tímiaja.
- 11 Nuí, íikmatain untsurini, Arutman Pasukri wantíntiukam,
- 12 Sakarías wáiniak, ishamkamia, tímiaja.
- 13 Pásuk chicháruk: - Sakariasá, ishamrukáip ! Ame anéntramna núnaka Arútam anturtamkái. Amé núwem Isaper ajápruk, uchin jurértatui. Uchi akiniámtai, Juank anaikiatá.
- 14 Nekás ti waráakmin, untsurí aéntssha warasártatui.
- 15 Kame Arútam amé Uchirmin nankámaku awajsáttawai. Akíntsuk wáimiaku ajás, tuke ijiármaku átatui.
- 16 Núkap Israer aéntsun enentáimtikrar, Arútmajai irurártatui.

Rk.1,17.

- 17 Apa nii uchirijai nawamnaikiarat' tusa, wáimiaku Eríasan kakármarin takús, jintintiwártatui.
Arútam-aents-ajasún wainkiarat' tusa, enentáimcha ainiána aun enentáimin awajsártatui - timia, tímiaja.
- 18 Tu tai, Sakarías chicháruk: - Wíkia winia nuárjai uuntchitiáshi, itiúrak nusha ati ? -
- 19 Tu tai, Pásuk chicháak: - Wiyáitjai Pásuk Kaprier, Arútmanam pujájna nu ! Wi Pénker-chichaman etsérkatniun Arútam akúptuku aínk, ame ímiarcha ajasuitkiumnisha, nu aminkiáttawai.
- 20 Antsu, wi tájana nu "nekascháiti" tiniu asam, nu amínmiam, chichachu juáktatme - timia, tímiaja.
- 21 Ashí aents^u aa naka pujuármia nu, Sakarías j*ini*áchkui: - Jush urukáyik ? - tu pujuármia, tímiaja.
- 22 J*in*kí, chichástaj tukamá, aya uwíjmiakui: - Arútam wantintiúkchiash ? - tíarmia, tímiaja.
- 23 Sakaríaska ayámtainiam takatrin amuk, nii jéen waketkimia, tímiaja.
- 24 Tsawant nankámaki wéakui, Isaper ajápruk, ewej nantu úukma pujumia, tímiaja.
- 25 Arútam ti pénker asa, natsántruiya ewemtikrúrtaj-sa, jutíkrawai - tu enentáimmia, tímiaja.

Marí Pasukjai.

- 26 Ujuk nantu nankamásmatai, Arútam nii Pasukri Kapriéran nua antínkchamu pujámunam akupkamia, tímiaja.
- 27 Nu núaka, Marí náartin, Kariréanam, Nasaret irutkámunam, pujumia, tímiaja. Tawit shuar asamtai, Jusé anajmarúya, tímiaja.
- 28 Pásuk tarur, chicháreak: - Mariyá warastá. Wáimiaku asam, Arútmajai pujame ! - timia, tímiaja.
- 29 Taman antuk, íshamsank: - Nush urukamtai túruta ? - timia, tímiaja, Marí.

Rk. 1,30.

- 30 Tura Pásuk chicháruk: - Arútam wakerutma asamtai, áantram sapijmiakáip.
- 31 Kame ajáprukam, Uchi juréram, náari Jesús anaikiatá.
- 32 Tura, Arutman Uchirí asa, ashí nankámaku átatui. Arútam Tawitian chimpirín susáttawai.
- 33 Israéran úuntri ajásmatai, nii irunrámuka tuke túkesha átatui - timia, tímiaja.
- 34 Tu tai, Marí chicháak: - Itiúrak nusha ati, áishmankjai tsaninkchaitiátnasha ? -
- 35 Táku: - Iwiáikratin tarutrámmitai, aya Arutman kakarmaríjaink ajaprúktatme. Ame Uchíram, Arutman Uchirí asa, tuke wáimiaku átatui.
- 36 Amé kaímsha Isaper, kaa nuaitiat, uuntchitiátsha, ajaprúkmariujuk nantu wéawai.
- 37 Kame Arútam tujintniukáit ? - timia, tímiaja, Pásuk.
- 38 Tu tai, Marí chicháruk: - Wikia, winia Úuntrun tuke umirín asamtai, nii wakérana nu atí - timia, tímiaja. Táink, Pásuk waketkimia, tímiaja.

Marí Isaperjai.

- 39 Nu tsawántak Marikia wárik Jutá nunkánam we, irútkamu náintnium pujumia nuí jeámia, tímiaja.
- 40 Sakaríasan jeén enkémuk: - Kajichirú winiájai - tu tai,
- 41 nu chichamáik Isaperan nakichiín uchirí wara warat muchítmia, tímiaja.
- 42 Turunamtai, Isaper wáimiak, kakáram chicháak: - Nuánmash nankamakuítme; amé Uchíram nankámaku asamtai -
- 43 tinia: - Wi péejchach' aísha, itiúra Arutman Nukurisha winítra!
- 44 Íisia, "Winiájai" yama turútkumin, winín winia uchirka wara warat muchitkiái.

Rk. 1,45.

- 45 Warastá, ame íimiaru asakmin, Arútam túrammia nu nekás
turunáttawai - timia, tímiaja.
Tu tai, Marí chicháak:
- 46 - Winia Úuntur náatui, tajai.
Ayamrutkui, ti waráajai.
- 47 Wi péejchach' asámtaisha,
nankámantu awajtúsmiayi.
- 48 Arútam winia íirsamtai,
ashí aents^u nampertiártatui.
- 49 Ashí tujintcha Arútmaka,
naatmamtíkrúkú asamtai,
"ti penkeráiti" mash' tiartí.
- 50 Ashí amírainia nuna
tuke tuke yainkiártatui.
- 51 Ashí mash' nupetin asa,
nankámantun amúkmiayi.
- 52 Kakáram áinian utsánkar,
péejchachin úunt awajsáiti.
- 53 Utsuma nuna ayura,
Kuítrinniun atantrámiayi.
- 54 Wáit anentin Arútmaka
Israéran ayamrúkmiayi.
- 55 Apráamnaka tiniu asa,
tuke túkesha amíawai. -
- 56 Nuna tía, Marí menáintiu nantu nii kaná-kajjai pujús, nii
jéen waketkimia, tímiaja.

Juank akiniámunam.

- 57 Nii tsawantri jeámtai, Isaper uchin jurermia, tímiaja.
- 58 Nii shuar, Arútam tsankatkamia nuna neka ásar, warásar,
Isaperan iyuwarmia, tímiaja.

Juank tsupírnaku.

- 59 Yarush' tsawant nankamásmatai, uchín shuníchiri tsupirkatái túsar, jeawármia, tímiaja.
- 60 Nii aparí náari apujtustái túsar wakerakuísha, nii nukurí: - Atsá, Juank átatui - timia, tímiaja.
- 61 Chíkich aents^u chicharáiniak: - Amé shuar nu náartinkia atsawai - túsar,
- 62 nii aparisha nii náarin etserkat' túsar, uwijiármia, tímiaja.
- 63 Sakarías tatánknum: - Juank átatui - tu aármatai, mash' enentáimiam ajáarmia, tímiaja.
- 64 Nu chichamáik chichátak, Arutman yuminksamia, tímiaja.
- 65 Nu turunamun mash' nekáwar, ashí Jutéa náintnium nunak ujmatíármia, tímiaja.
- 66 Aents^u nuna antúkar: - Arútam yaya asamtai, ju uchi urukatniukit ? - tu enentáimiam ajáarmia, tímiaja.
- 67 Sakarías wáimiak, chicháak:
- 68 - *Arútmaka tarutramrar',
Ewemtíkkiartin asamtai,
nii aentsrití yuminksatái.*
- 69 *Ti kakáram Ayámkartin
Tawit shuárnum tarútramji.*
- 70 *Wáimiaku tíarmia núnisank,*
- 71 *ii numasrin amúktinian,
ashí tujíntcha Arútmaka,
Ewémtikniun akuptúrmakji.*
- 72 *Yaúnchu tímia núnisank^e,
wáit anéntkartin Arútmaka,
chicham najánamun umíawai.*
- 73 *Apráamnaka tiniu asa,
ii numasrin amutramkar',
tuke tuke ayamrútmaji.*
- 74 *Ishámstusuk níjajai irunrar',*

Rk.1,75.

- 75 *ii páuskari japirar',
tuke pénker ajastái*
- 76 *Juanká, etserin ajástatme.
Arutman jintí iwiáram,*
- 77 *Tsankúkratin iimítkiatme.*
- 78 *Arútmaka tsanka asa,
yakí etsaya aínsank^e,
aéntsun tsáapin awájtatui.*
- 79 *kiritin amukat' tusa,
waratáiniam jintíntiatin
ju nunkánam taráttawai.-
Tu anentruámia, tímiaja, Sakarías.*
- 80 *Uchi tsakakí, wáimiaku ajakí, nunka-itiárkanam tuke pujús,
úunt ajás, Israer aéntsun tariármia, tímiaja.*

AKANKAMU 2.

Jesusan akiniámuri.

- 1 Nu tsawanttin máshiniun úuntrinkia, ashí aents^u nii náarin peekarat' tusa, akupkamia, tímiaja.
- 2 Kiriniu Siria úuntri pujái, nuna turawarmia, tímiaja.
- 3 Ashí aents^u nii úuntrin irutkamuriín náarin péektaj-sar weármia, tímiaja.
- 4 Jusesha Kariréa nunkánam, Nasarétnum pujayat, nii úuntri Tawit asamtai, Jutéa nunkánam, Perénknum,
- 5 Marijajai nii náarin péektaj-sa, wemia, tímiaja.
- 6 Marí íraru asa, Perénknum pujús nii tsawantri jeá asamtai,
- 7 nii uchirí iwiáirin jurermia, tímiaja. Jea ankantcha asamtai, tankú jeén jurer, jáanchjajai penuás, tankun yurumtairín aepsamia, tímiaja.
- 8 Kashi tankú-wáinin nuí kampúntniunam, pujuiniái,
- 9 Arutman Pasukri newa tariármia, tímiaja. Aents^u ti ishamainiákui,

Rk.2,10.

- 10 Pásuk chicharáiniak: - Ishamrukáirap ! Ashí aents^u warasarat' tusan, chícham pénkeran itiárjarme.
- 11 Tawitian irutkamuriín ashí tujintcha Utsumka, nekás Uwémtikin, yama akintiurmarme - tinia:
- 12 - Iyutárum; Uchich' jáanchjaj penuásma, tankun yurumtairiín tepá wainkiáttarme - timia, tímiaja.
- 13 Nu chichámaik ti untsurí Pásuk wantíntiukar, Arutman naatmamtikiáiniak:
- 14 - Nayáimpiniam Arútam nankámaku atí, aínsank nunkasha nii aneámuka pénker pujusartí. - tíar, ti shíir nampersarmia, tímiaja.
- 15 Pásuk yakí waketainiái, númtak aents^u chicháiniak: - Arútam turámjinia nu Perénknun iyutái - túsar,
- 16 tseke weármia, tímiaja. Marín Jusejaj wáinkiar, Uchíchish tankún yurumtairiín tepán wainkiármia, tímiaja.
- 17 Nuyá wáinkiar, Pásukan chichamen etserkármatai,
- 18 ashí aents^u enentáimiam ajáarmia, tímiaja.
- 19 Marisha ashí turunamia nuna esétar íis, tákamtak enentáimiu pujumia, tímiaja.
- 20 Tankú-wáinin Pásuk ujakarmia nuna wáinkiar, nekasáiti túsar, Arutman naatmámtikiar, waketkiármia, tímiaja.

Jesús tsupírnaku

- 21 Yarush' tsawant nankamásmatai, Arútam tímia núnisank, Uchin shuníchirin nuapén akántkar, Marí ajápratsaink Pásuk tiniu asamtai, Jesús anaikiármia, tímiaja.

Jesús Arútam susamu.

- 22 - *Juretan páuskari japirtárum* - tu Muisés akupka asamtai, Marí tsawantri jeámatai, nii Uchirín Arutman susátasa Jeru-sarénknun jukiármia, tímiaja.

- 23 Kame: - Áishmank iwiáirin Arútam susatárum - tu aárma asamtai, nuna amikiármia, tímiaja.
- 24 Aíntsank jimiará yápankam íikmak ajasarat' nusha susatárum - tu aárma asamtai, nunash amikiármia, tímiaja.
- 25 Aents^u wáimiaku ti pénker, Semeunk náartin, Jerusarénknum pujumia, tímiaja.
- 26 Nii Iwiaikrátniuri chicháak: - Ashí tujintcha Utsumka wáintsuk, jákashtatme - tíniu asamtai, nuna naka pujumia, tímiaja.
- 27 Arútam amirkatái túsar, Marí Jusejai yama winiái, Simeúnksha nii Iwiaikrátniuri akúpkam, ayámtainiam jeámia, tímiaja.
- 28 Uchi Jesuschin achik, miniákas, Arutman yuminkias, chicháak:
- 29 - Ame tímiamna nuna wáinkia asán,
- 30 Uuntá, yamá ti warasan jakátjai.
- 31 Ju ashí tujintcha Uwémtikin ashí aéntsnum iniakmamsáttawai.
- 32 Ashí nunkánam tsáapin ajás, jutíusan náatu awajsártatui. - tímia, tímiaja.
- 33 Uchin nukurí, nii aparisha nuna antúkar, enentáimia pujuiniákui,
- 34 Simeúnk yumínkias, Marín chicháruk:
- Ju Uchi chíkich Israer aéntsun ayámrukar, chíkichnaka amukártatui. Untsurí aents^u kajerkármatai, ámeke ti waitsáttame.
- 35 Tumaitkuísha, aents^u warí anentáin tákakainiána nuna iwiainiakártatui - tímia, tímiaja.
- 36 Nua úuntach', Ana náartin, Aser shuar, Januéran nawantri, yarush'-nawe-áintiuk uwín tákaku, nuí pujumia, tímiaja.
- 37 Tsénken uwí nuátnaik pujái, nii áishri jarukmia, tímiaja. Waje asa, tsawái káshisha ijárma, ayámtainiam tuke anentrú pujumia, tímiaja.

- 38 Niisha wáimiaku asa, nuí ta, Arutman naatmámtik, Uwémtniun nakau áarmia nuna Uchiniun ujáarmia, tímiaja.
- 39 Juseka Marijai Arútam awemamun amírkar, Kariréa nunkánam, Nasarétnum, nii irutkámuri asámtai, waketiármia, tímiaja.
- 40 Uchi tsakaki, kakáram ajakí, nekás nekakí, tuke waimiakí wemia, tímiaja.

Jesús Jerusarénknum juákma.

- 41 Tuke uwitin Úunt Námper jeáakui, Jusé Marijai Jerusarénknum weu, tímiaja.
- 42 Jesussha nawe-jímiar uwí tákaku asa, Arútam awemamun amíktaj-sa, níijai wemia, tímiaja.
- 43 Uunt-Námper amukamtai, nii aparí, nii nukurisha waketainiákui, Jesús nuna ujátsuk, Jerusarénknum juáku, tímiaja.
- 44 Marisha Jusesha: - Wi shuárjai winiáwai - túsar, chikíchik tsawant wekasármiai. Jesús atsákui nekáwar, nii shuárnum ea eainiákua,
- 45 wáinkiachar, aní anintruiniákua, Jerusarénknum waketiármia, tímiaja.
- 46 Menáint tsawant eákar, Ayámtainiam unuikiártinjai chichá puján wainkiármia, tímiaja. Jesuska unuikiártinian antúrak, aníármia, tímiaja.
- 47 Mash', nékashtai chichámnasha neka asamtai: - Aúsha imiá uchíchitiátsha, túyana unuimiaruí ? - túsar, túmam ajáarmia, tímiaja.
- 48 Wáinkiar, nii aparí, nii nukurisha ti warasarmia, tímiaja. Tura Marí chicháruk: - Uchírú, urukamtai aínkiam ? Amé apájai kúntuts enentáimran, eákjame - timia, tímiaja.
- 49 Tu tai, Jesús chicháak: - Urukamtai eátrum ? Nekátsrumek ? Wikia winia Apar turutmia nuna amíktiniáitjai. -
- 50 Takuísha, nii chichamen nekacharu, tímiaja.

Rk.2,51.

- 51 Jesuska Nasarétnum waketkin, nii úuntrin tuke umiras pujumia, tímiaja. Nii nukurí ashí turunamia nuna nii anentaín takús, esétar enentáimiu pujumia, tímiaja.
- 52 Jesús Arútmanam aentsnumsha enentáimin tsakakí, úunt ajakí, tuke waimiakí wemia, tímiaja.

AKANKAMU 3.

Juank Imiakratin

(Mt.3,1; Mk.1,1: Jn.1,19).

- 1 Uwí nawe-ewejtin úunt Tiperiu pujái, Jutéanam Punsiu Piratu akupniúyayi; Kariréan úuntrinkia Erutes aúyayi; nii yachí Jiripsha Itiuréanam, Trakunitínmasha akupniúyayi; Apirénianam Risiánias pujumia, tímiaja.
- 2 Wean úuntri Anás, tura Kaijuás áarmiayi. Nu pujuiniámunam Arútam Juánkan, Sakaríasa uchirín, nunka-itiárkanam puján untsuk, akupkama, tímiaja.
- 3 Jurtán entsánam Juank chicháak: - Atumí tunari sakarat' takúrmeka, nekás enentaimratárum - tusa, imiakrátinian juarkimia, tímiaja.
- 4 Turamtai, Isaías aárma amínkiáiti. Kame: - Nunka-itiárkanam Chícham chicháak: "Uuntan jintí iwiárarum, naka awajsatárum.
- 5 Chaúna akirkárum, náint paka awajsatárum. Jintia tuniru naka iyáikrum, iwiankartárum".
- 6 Nu antúkum amireákrumin, Uwemtíkkiartin Arutmánmaya winiá, ashí mash' wainkiáttarme - timia, tímiaja, Isaías.
- 7 Ashí aents^u imiantiái túsar, kaunáinian Juank chicharáiniak: - Napia aniu, ya makuntrashtátrume turammiárum ?
- 8 Aántrarum: "Apráaman uchirintji" tútsuk, nekás enentáimrarum, atumí anentái yapajiatárum. Kame Arútam kayánmaya Apráaman uchirín najankáinti.

Rk.3,9.

- 9 Kanamp numin tsupín winiáwai. Nerétsuk wajana aun tsupik, jinium epeáttui - tu chichá wemia, tímiaja.
- 10 Aéntska: - Warí itíurkataj' ? - tuiniákui:
- 11 - Warírtinia nuka nakak, warírtichun susatí; núkap yurumkan tákakea nusha, utsuman ayuratí - timia, tímiaja.
- 12 Kuítian-juu ainiásha Juank imiatít' túsar: - Uuntá, ísha itíurkatniúítiaj' ? -
- 13 Tuiniákui: - Aántrarum aents^u kasarkáirap - timia, tímiaja.
- 14 Núnisank nankí-júusha aníniak: - lisha warí itíurkatniúítiaj' ? - tu tai: - Aents^u awakkáirap; tsanumráirap; antsu akirmármena nújaink, mákete titiárum - timia, tímiaja.
- 15 Ashí aents^u: - Juka Ashí-Tujintcha-Utsumkáshit ? - tu enentáimiam ajainiákui,
- 16 Juánk chicharániak: - Wíkie aya entsajai imiáajrume. Antsu winia ukurui winiána ju nankámaku winiáwai. Wíkie níijainkia peejchachítjai. Níinkia lwiakrátniujai ,jijáisha imiatmíitiarme.
- 17 Míikian júana núnisank, nerén tishir, sáipenka ji kajinchatáiniam epeáttui - timia, tímiaja.
- 18 Ti pénker chichaman tuke tu etser wemia, tímiaja.
- 19 Erutes, nii yachí nuwejai tsanírmak, ti yajáuch' najankui, Juánk jiám, achik epenmia, tímiaja.
- 20 Nuna turá, ataksha ti úunt tunán najanamia, tímiaja.

Jesús imiáimiu.

(Mt.3,13; Mk.1,9; Jn.1,29).

- 21 Chíkich tsawantin, aents^u imiántaj-sar wininiákui, núí pachinia Jesussha imiánmia, tímiaja. Anentrú pujái, nayáimp' kinkiajar ajásmanum,
- 22 lwiáikratin yápankma anin muukeén tarúrmatai, nayáimpinmaya chicham chicháak: - Winia Uchír ti anéamu asam, winia atsankriniáitme - tímia, tímiaja.

Jesusan weátri,

(Mt. 1, 1).

- 23 Jesuska menáint-nawe uwí takús, Arutman chichamen etsérkatniun juarkimia, tímiaja. Ashí mash': - Jusén uchirinti - tíniu áarmiayi. Jusé aparinkia, Eriyayi.
- 24 Erín aparinkia, Mata. Matan aparinkia, Rewí. Rewín aparinkia, Merkí. Merkín aparinkia, Janái. Janáin aparinkia, Jusé;
- 25 Jusén aparinkia, Matatías. Matatíasan aparinkia, Amús. Amusan aparinkia Naúm. Naúman aparinkia, Esrí. Esrín aparinkia, Nakái.
- 26 Nakáin aparinkia, Máat. Máatan aparinkia, Matatías. Matatíasan aparinkia, Semái. Semáin aparinkia; Jusé. Jusén aparinkia, Jutá.
- 27 Jután aparinkia, Juanank. Juanankan aparinkia, Resí. Resín aparinkia, Surupaper. Surupaperan aparinkia, Saratier. Saratiéran aparinkia, Nerip.
- 28 Neripian aparinkia, Merkí. Merkín aparinkia, Atí. Atín aparinkia, kuram. Kuraman aparinkia, Ermata. Ermatan aparinkia, Eer.
- 29 Eéran aparinkia, Jesús. Jesusan aparinkia, Eriaser. Eriaseran aparinkia, Jarim. Jarimian aparinkia, Matat.
- 30 Matatan aparinkia, Rewí. Rewín aparinkia, Simiunk. Simiúncan aparinkia, Jutá. Jután aparinkia, Jusé. Jusén aparinkia, Junank. Junankan aparinkia, Eriakim.
- 31 Eriakimian aparinkia, Meréa. Meréan aparinkia, Mená. Menán aparinkia, Matatá. Matatán aparinkia, Natank.
- 32 Natankan aparinkia, Tawit. Tawitian aparinkia, Jesé. Jesén aparinkia, Upet. Upetan aparinkia, Púus. Púusan aparinkia, Sarumunk. Sarumuncan aparinkia, Najasunk,
- 33 Najasuncan aparinkia, Aminatap. Aminatapan aparinkia, Atmink. Atminkian aparinkia, Arní. Arnín aparinkia, Esrunk. Esruncan aparinkia, Juáres. Juáresan aparinkia, Jutá;

Rk.3,34.

- 34 Jután aparinkia, Jakup. Jakupan aparinkia, Isáak. Isáakan aparinkia, Apraám. Apraáman aparinkia, Tera. Teran aparinkia, Najur.
- 35 Najuran aparinkia, Seruk. Serukan aparinkia, Rakank. Rakankan aparinkia, Juarek. Juarekan aparinkia, Sara.
- 36 Saran aparinkia, Kainiam. Kainiáman aparinkia, Arjuasak. Arjuasakan aparinkia, Séem. Séeman aparinkia, Nué. Nuén aparinkia, Ramek.
- 37 Ramekan aparinkia, Matusarenk. Matusarenkan aparinkia, E nuk. E nukan aparinkia, Jaret. Jaretan aparinkia, Mararer. Marareran aparinkia, Kainiam.
- 38 Kainiáman aparinkia, Enús. Enusan aparinkia, Séet. Séetan aparinkia, Atank. Atankan aparinkia, Arutmáiti, tíniu áarmiayi.

AKANKAMU 4.

Jesús íirshimpjai.

(Mt.4,1; Mc.1,12)

- 1 Jesuska Jurtánum wáimiaku ajásmatai, nii Arútmari nunka-itiárkanam ejemia, timiaja.
- 2 Nuí aíntiuk-nawe tsawant, kashi tsawáisha yurúmtsuk pujá asa, tsukamakui, emésak nekapsataj tusa, tarimia, tímiaja.
- 3 Tarí chicháruk: - Arutman uchirintkiúmka, wats, ju kaya tepétar ajáinia ju, yurúmak najanamtikiatá - timia, tímiaja.
- 4 Tu tai, Jesús chicháruk: - *Aéntska aya yurumkajáinkikia iwiáku pujatsui* - timia, tímiaja.
- 5 Nuyá emésak náintian tsakariín jukí, nu chichámaik ashí mash' irútkamun iniáktus,
- 6 chicháruk: - Mash' winia surusaru asármatai, wi wakéraj nuna susáttajai. Tuma asamtai, nii aéntsrin, nii kuítriniash amin amástatjai.
- 7 Túrasha, winia tekemrutkumínkia, ashí mash' áminiu átatui - timia, tímiaja.

Rk.4,8.

- 8 Tu tai, Jesús ayak: - *Aya Arútam, amé úuntrum asamtai, tekémruram, nii awemamu amirkatá, tu aarmáiti - timia, tímiaja.*
- 9 Nuyá emesak Jesusan Jerusarénknum jukí, úunt-ayámtainiam yakí iwiak, chicháruk: - Arutman Uchirintkiúmka, juyá uukasá iniatá.
- 10 Kame *Arútam amin yaintmakarat' tusa, nii pasukrin akupturmáktatui.*
- 11 *Nuka, nawem kayánam ajintraínk túsar, takurmiártatui, tu aarmáiti - timia, tímiaja.*
- 12 Tu tai: - *Arútam ame Úuntrum "nekapsataj" tip, nusha aarmáiti - timia, tímiaja, Jesús.*
- 13 Emesak anankataj tukamá, tujíntiak: - Atak nekapsamij - tusa, wemia, tímiaja.

Jesús nii túratniun étserma.

(Mt. 13,53).

- 14 Jesuska wáimiaku ajás, Kariréanam waketkí, ti náatu ajasmia, tímiaja.
- 15 Jutíun ayamtairiín wayá, étserkui, ashí mash' naatmamtikiármia, tímiaja.
- 16 Nii nunkeén, Nasarétnum ta, Sкетин tuke turin asa, ayámtainiam we, aujsátaj-sa wajakmia, tímiaja.
- 17 Isálasan papirí súsam, atir, urak, aújuk:
- 18 - *Iwiáikratin winín pujá asa, péejchach' ainiána aun Pénker-Chichaman ujáktinian; epenmia ainiána aun ankant awájsatniun; ji kusurú áinian íimtíksatniun, kajérkamun uwemtíkratniun;*
- 19 *tura Arútam "Tsankamtai-uwí" etsérkatniun, utsúrak akuptukuíti - tu aujsamia, tímiaja.*
- 20 Papín penuar, yáimniun susa, kutánknum ekemsamtai, ashí mash' pujuármia nuka, íit íit awajiármia, tímiaja.

- 21 Nuíkia Jesús chicharáiniak: - Yaúnchu aárma antukúrmena nu, yamáí aminkiái - timia, tímiaja.
- 22 Jesús "Tsankamtai-uwín" étserkui, ashí mash': - Penkeráiti - tuiniayat: - Juka Jusén uchirinchukáit ? - tíarmia, tímiaja.
- 23 Tu tuiniái: - "Tsuakratniúa, amek tsuamartá" tama túrutearme. "Kaparnaúnknum aents-tujíntiamu najanamamna nu, juísha turatá" túrutearme.
- 24 Tínkias wáimiaku nii nunkeénka ti kajerkamuíti.
- 25 Kame yaúnchusha wáimiaku Erías pujái, menáint uwitin penke yútutsuk pujakui, ti úunt tsuka jeámtai, Israérnum ti untsurí waje pujuármiai.
- 26 Tumaitkuísha, Erías nuna yáintsuk, aya Sitún nunkánam, Saréptanam , waje pujumia nunak yáinkmiayi.
- 27 Núnisank wáimiaku Eriséu pujái, Israérnum núkap kuchápruku pujuiniakuísha, aya Sírianmaya Namankan tsuármiai - timia, tímiaja.
- 28 Nuna antúkar, ashí mash' kajerkarmia, tímiaja.
- 29 Achíkiar, aa jíikiar, jápanum akankektái túsar, jukiármia, tímiaja.
- 30 Tumaitkuísha, Jesús sáinchi íisar, awákkar, ankant wemia, tímiaja.

Jesús tsuákratu.

(Mk. 1,23; Mt. 4,24; 8, 14).

- 31 Jesuska Kariréa nunkánam, Kaparnaúnknum we, saké tsawantin unuiniakí wemia, tímiaja.
- 32 Ti neka aínsank chicháakui, ashí mash' "aniawá" túmam ajáarmia, tímiaja.
- 33 Ayámtainiam aents^u waweámu pujumia nu, chará ajáak:
- 34 - Nasaretnumia_a Jesusá, warí wakéram ? lin amutmáktiniak taúm ? Wikia nékajme; ámeke Arutman Uchirintme - timia, tímiaja.

- 35 Tura Jesuska emeskan kajérak: - Takamatrumsatá, wárik aentsnumiá j̄intiumkitiá - tu tai, emésak j̄iniak, aéntsun tut ajiar, warí itiúrtsuk ikiúkma, tímiaja.
- 36 Ashí mash' íimiam ajáiniak: - Jush ya asampa; aya chíchámj̄aink wawekan j̄iki akupea ! - tíarmia, tímiaja.
- 37 Nu turámunam ashí irutkámunam naatkamia, tímiaja.
- 38 Jesús ayámtainmayá j̄inki, Semunkan jeén enkemamia, tímiaja. Semunkan tsatsarí ti tsuer pujakui: - Tsuatrurtá - tíarmia, tímiaja.
- 39 Tuiniákui, Jesús jaa tepán tsuntsumruá, tsuemún chicháruk: - Ju nua iniaisatá - takui, nu chichámaik tsuemuka menkatukmia, tímiaja. Nuíkia nua pénker ajás, nantátakin ashí ayurawarmia, tímiaja.
- 40 Kiákui, aents^u jáiniaka kaúnkar ajainiákui, Jesús antínkiar, tsuás tsuás akupiármia, tímiaja.
- 41 Aíntsank, untsurí wáwek aéntsnum pujúniasha j̄iki akupáiniam: - Ámetme Arutman Uchirim ! - tinia, menká weármia, tímiaja. Nuka neka ásar: - Jesús Utsumkáiti - tuiniákui: - Takamatrumsatárum - tinia, akupiármia, tímiaja.
- 42 Tsawáakui, Jesuska j̄inkí, nunka-itiárkanam wemia, tímiaja. Aéntska eákar, nii pujámurin jeáriar: - lin nunkeyá j̄inkip ! - amajiármia, tímiaja.
- 43 Tuiniakuísha, Jesús chicharáiniak: - Máshiniun akupkamu asán, Arútam-Irúnramu atí tusan, ashí irutkámunam Pénker-Chichaman etserkatniuíjtjai - timia, tímiaja.
- 44 Tura Jutéa nunkánam ashí ayámtainiam Arutman chichamen etserkí wemia, tímiaja.

AKANKAMU 5.

Jesús namakan itiaú,

- 1 Nu tsawanttin Jesuska Jenesaret antumiánkan kanmatkariín wajaákui, Arutman chichamen antúktaj-sar, untsurí aents^u téntakar, shitiármia, tímiaja.
- 2 Nuí namakan-achín nekán nijáiniak, jimiara kanu jinkia aépsamun Jesús wainkiámia, tímiaja.
- 3 Kanúnam enkemá, Semunk nérentin asamtai, chicháruk: - Ishíchik tupaastá - tinea, ekemas, aéntsun unuínian juarkimia, tímiaja.
- 4 Tura, unuinasúa amik, Semunkan chicháruk: - Kunánam kanu jukim, neka aí ajunktatarum - timia, tímiaja.
- 5 Semunk chicháruk: - Tse, Jesusá, káshisha wekátusan, nékanka ajú ajunkuar', namáknaka penké achíkchasha; kame ame támena nuí nekan ajunktajai - timia, tímiaja.
- 6 Nekan ajunk, japistaj tukamá, kijinian te amajmia, tímiaja. Namak ti untsurí nemaru asa, nékanka tsuriástatuk awajmia, tímiaja.
- 7 Nii aí chíkich kanúnam yujáinian uwíjrar, yaintmaktái túsar, untsukarmia, tímiaja. Nusha táar, jimiara kanúnam namakan aimkiármatai, kanu ukanástatuk ajasarmia, tímiaja.
- 8 Semunk Kaya nuna wáiniak, Jesusan tikíshmatar: - Uuntá, wi ti tunartin asán, ámijai pujuschamniáitjai - timia, tímiaja.
- 9 Kame, namak nukuma asamtai, nísha, níí aijaisha ti sapijmiakarmia, tímiaja.
- 10 Aíntsan Semunkan aí, Sepetéun uchirí, Sántiak, Juánkjai tumawarmia, tímiaja. Tumaitkuísha, Jesús Semunkan chicháruk: - Ishamrukáip, yamáikia namak irúrumna aínsa-mek, aénts^u irumín átatme - timia, tímiaja.
- 11 Nuínia kanun tsukint anunk, ikiúiniak, Jesusan nemarsarmia, tímiaja.

Kuchápruku tsuárma.

(Mk.1,40; Mt.8,2).

- 12 Chíkich irutkámunam Jesús pujái, aents^u kuchápruku tarimia, tímiaja. Jesusan tekémrur, múuken nunká atsuntsá, chicháreak: - Uuntá, wakerákmeka tsuaramniáitme - timia, tímiaja.
- 13 Jesús ewejejai antink: - Wakera asán, tsuamartá, tájame - timia, tímiaja.
- 14 Nu chichámaik tsuamármatai, Jesús akúpeak: - Pénkesha yákesh ujakáip. Antsu, nekasáiti tití túsam, wea werim, kucháprukma tsuamármanum Muisés timia aínsamek, imiátkin suutá - timia, tímiaja.
- 15 Jesús ti náatu ajáakui, untsurí aents^u anturkatái túsar, taríar, jaamuríniash tsuamararmia, tímiaja.
- 16 Tumasha, Jesuska tuke aents^u atsámunam we, anentrú pujuya, tímiaja.

Sumpenkun tsuárma.

(Mk.2,1; Mt.9,1).

- 17 Chíkich tsawanttin Jesús unuíkiartu pujái, Pariséu, unuikiártiniash Kariréanmaya, Jutéanmaya, Jerusarenknúmiasha táaru, atema pujusarmia, tímiaja. Jesuska Arutman kakarmaríjai aéntsun tsuármia, tímiaja.
- 18 Turú pujái, aents^u sumpenkun peáknun yanákiar itiar, Jesús jeánam pujakui, awayar' ejetitiái túsar, eármia, tímiaja.
- 19 Untsurí aents^u matsatkui, awayáchmin ásar, jeá chaikriín wákar, urákar, peákjai jinkiárar, Jesús pujámunam itiararmia, tímiaja.
- 20 Ímiaru ainiáwai tusa, Jesús chicháruk: - Umpá, tunárminkia tsankúreajme - timia, tímiaja.
- 21 Nuna antúkar, unuíkiartin, tura Pariséusha kajérkar, níinki enentáimsar: - Tsej, ju aents^u yajáuch' chicháawai. Kame

Rk.5,22.

- aya Arútmak aéntsun tunarin japirminiáiti - tu enentaimmiármia, tímiaja.
- 22 Jesús nuna neká, chicharáiniak:
- 23 - Urukamtai tusha enentáimrum ? kame tua imiá yupichuchít ? Tunarmin tsankúreajme támak ? Túrutskesha wajákim wekasatá támak ?
- 24 Arútam-aénts-ajasú aéntsun tunarin japiniáiti, nuna nekawarat' tusan: "Nantákim, peákrum achíkiam, wetá" tájame - timia, tímiaja, sumpenkun.
- 25 Nu chichámtaik aents^u íimiam ajáamunam, nantátaki, peákrin achik, Arútman yumínkias, wémia, tímiaja.
- 26 Ashí mash', "aniawá" túmam ajáiniak, Arutman naatmámtikiar: - Nekás aénts-tujíntiamu wáinkiaji - túsar, Arutman arantukarmia, tímiaja.

Rewí untsukma.

(Mk.2,13; Mt.9,9).

- 27 Jesuska nuyá j̄inkí, wesa, kuít-juutáiniam Rewí puján wáiniak: - Nemartustá - tu tai,
- 28 mash' ikiúak, Jesusan nemarsamia, tímiaja.
- 29 Nuyá Jesusan nampérsatin nii jeén ipiám̄tai, untsurí kuítian-juu, tura chíkich aéntsush níj̄ai irunrarmia, tímiaja.
- 30 Pariséu, tura unuikiártiniash nuna wáinkiar, Jesusan aénts̄rin chicharáiniak: - Urukamtai atumsha kuítian-júuj̄ai, aents^u tunartinj̄aisha yurúmearum ? – tuiniákui,
- 31 Jesús nuna antuk, chicharáiniak: - Nékatsrumek ? Pénker áinia au tsuákratniun utsumainiátsui. Antsu jainiána au tsuákratniun utsumainiáwai.
- 32 Kame wikia aya pénkernak yaruáktaj-san tacháit̄jai; antsu tunártiniash enentaimrarat' tusan tawit̄jai - tímia, tímiaja.

Ijiármamu

(Mt.9,14; Mk.2,18).

- 33 Jesús takui, chicharáiniak: - Juánkan aéntsrinkia, pariséun aéntsrissha ijiámawar, anentruiniáwai. Tuma aísha urukamtai amé aéntsrumka ijiarmainiátsu ? - tíarmia, tímiaja.
- 34 Tuiniákui, Jesús chicháak: - Nuatnáiya pujai, ipiámuka ijiarmastárum timinkíáitrum ?
- 35 Antsu nuatnáiyán jukiármatai, ijiarmawártatui - timia, tímiaja.
- 36 Nuyá chicháak: - Yákesh tarach' mamurúnam yamarman anujcháiti. Anujtúkmaka, tarach' arutan usúmpear, núrnt jáaktatui.
- 37 Aíntsank nijiamanch' yamáram punu arútnum uwashtáinti. Kame nijiamanch' kariák, punun ijiakramtai, mash' amukattui.
- 38 Tuma asamtai, nijiamanch' yamáram, punu yamármanum uwatniuíti.
- 39 Aíntsank nijiamanch' karián umin áinia au, nijiamanch' yumínian nakitin ainiáwai. Kame: - Kariá imiá penkeráiti - tíniu ainiáwai - timia, tímiaja, Jesús.

AKANKAMU 6.

Saké tsawantan nérentniuri.

(Mk.2,23; Mt.12,1).

- 1 Saké tsawantin sha ukushmakmanúmani Jesús nii aéntsrijai nankámainiak, nuna júukar, yukí weármia, tímiaja.
- 2 Pariséu nuna wáinkiar: - Urukamtai átumka saketin turáshtinia nu najánearum ? - tíarmia, tímiaja.
- 3 Tuiniákui, Jesús chicharáiniak: - Átumka aujsachukáitrum ? Tawit ti tsukamak, nii aéntsrijai itiurkamia ?

Rk.6,4.

- 4 Úunt-ayámtainiam wayá, yurúmak usukruámun yuá, nii aéntsri^uniash ayurawármiai. Aya wea yutaintkiuísha, turawarmia, tímiaja -.
- 5 Nuna tinia iniáis: - Arútam-aents-ajasú saké tsawantan nerentniurínti - timia, tímiaja.

Ewejé sumpeáru tsuárma.

(Mt. 12,9; Mk.3,1).

- 6 Chíkich saketin Jesús ayámtainiam enkemá, unuínia pujai, nuí aents^u untsur ewejé sumpeáru pujumia, tímiaja.
- 7 Unuíkiartin, pariséusha pujúniaka: - Saké tsawantin tsuarmatáinkia makutái - túsar, ii pujuriármia, tímiaja.
- 8 Jesús, nii anentáin nekaráinia asa, sumpeárun chicháruk: - Wajákim, ajapén wajastá - timia, tímiaja.
- 9 Wajáakui, chicháak: - Atumsha warítrum ? Saketin utsuma au yáinktinkíaitiaj' ? Túmatskesha yainkchatniukáitij' ? Aents^u jáa tsuátsuk, jakatí, titinkíaitiaj' ? - timia, tímiaja.
- 10 Tura, íitia amájsar, jáan chicháruk: - Wátsek, ewejem umuchkiatá - tu tai, ewejenka ti pénker ajatsamia, tímiaja.
- 11 Tu tsuármatai, Pariséu kajékar: - Jesús máatin itiurkáintjik? - tífarmia, tímiaja.

Akatramu anaikiárma.

(Mk.3,13; Mt.10.1).

- 12 Nu tsawanttin Jesús náintnium waka, kashi Arutman ané anéntrakua, tsawarmia, tímiaja.
- 13 Káshik nii aéntsri^u untsúkar, niiníyan aya nawe-jímiarchiniak júuk, "Akatramu" anaikiármia, tímiaja.
- 14 Anáikiamu ju ainiáwai: Semunk Kaya anáikiamu, tura nii yachí Antrés, nuyá Sántiak, Juank, Jirip, Parturumé,
- 15 Matéu, Tumás, Sántiak Arjéun uchirí, Semunk Ásump' tama,

Rk.6,16.

16 Jutas Santiákun yachí, nuyáá kiriutnumia Jutas, Jesusan surukmia nu.

Náintnium chicháamu.

(Mt.5,1).

17 Jesús nii Akatramuríjai naintniúmia akáiki wesa, pakánam jeá, untsurí nemárniuri, tura Jutéanmaya, Jerusarenknúmia, nuyáá Tiru Situnkan kanmatkaríyasha ti núkap aents^u: - Anturkar' tsuamartái - túsar, pujúinian wainkiármia, tímiaja.

18 Ashí mash' waweámunash tsuármia, tímiaja.

19 Níiniya kakármari jíinia asamtai, antínkiar, tsuamarármia, tímiaja.

20 Nuíkia nii aéntsrin íitia ajás, chicharáiniak: - Kuítrintin ajátsuk, utsuma yayármena au warastárum, kame Arútam-Irúnramu atúmnia átatui.

21 Yamái tsukamákrum waitiármena nu warastárum, kame ayúramu átatrume. Útearmena nusha warastárum, kame atsánkramu átatrume.

22 Winia asárum, aénts^u kajertámkurmin, katsekrámkurmin, mankartiniáiti túsar, jíiki akúptámkurmin, warastárum.

23 Turutmainiákrumin, nekás warastárum. Kame Nayáimpiniam ti núkap akikma átatrume. Yaúnychusha aínsarank wáimiakun turawármiai - timia, tímiaja, Jesús.

Aents^u yumínkramu.

24 Nuyáá Jesús chicháak: - Antsu átum kuitrintniutíram, kúntuts enentaímsatárum. Kame átum yamá waráa asárum, atak warascháttarme.

25 Yamái ashí mash' tákakearmena nu, kúntuts enentaímsatárum. Kame atak tsukái waitsáttarme. Atumsha

Rk.6,26.

waráarmena nu kúntuts enentaimsatárum. Kame ukúnam waitiákrum, uuttiátrume.

- 26 Ashí mash' naatmamtíkramainiákui waráarmena nu, kúntuts enentaimsatárum. Kame yaúnychusha anánkartinian naatmamtikiármiayi - timia, tímiaja, Jesús.

li numásrijai pujáamu.

- 27 Nuyá Jesús chicháak: - Atumí numasri aneásrum, kajertamármena nusha yainktárum, tájarme.
- 28 Yuminkramainiármena nu yumínksarum, waitkiarmainiána nu anentrutatárum.
- 29 Atumí yapín ijiutmakrumnínkia, atú yapísha tsankatkatárum. Atumí pushirín atankittiájrume takuínkia, mash' susatárum.
- 30 Seatmármena nu susárum, atantrámrumna nu: - Awankturkitiá - tírap.
- 31 Pénker awajtusarat' takúrmeka, núnisrumek chíkich aéntsasha pénker awajsatárum.
- 32 Aya anentmármena nuke aneákrumka, warí pénkera najanárum ? Kame yajáuchisha nuna turin ainiáwai.
- 33 Aíntsarmek yaintmármena nuke pénker awajkúrmeka, warí pénkera najanárum ? Tunártin áinia nusha turin ainiáwai.
- 34 Aya warinchi seátaj-sa íkiaakrumka, warí pénkera najanárum ? Kame númtak tunártiniash ikiánain ainiáwai.
- 35 Antsu atumí numasri aneásrum, pénker awájsarum, warínkisha seamij' tútsuk, ikiastárum. Turakrumka, ti núkap akikma ajásrum, Arutmá uchirí átatrume. Kame Níisha anénkratcha, tunartin áinia aúnnash yainiáiti.

Wáit anénkratin ajáamu.

- 36 Atumí Aparı wáit anénkratniua aínsarmek ajastárum.

- 37 Makuráink takúrmeka, makuírap. Kajertukáink takúrmeka, kajerkáirap. Tsankurturat' takúrmeka, tsankuratárum.
- 38 Surusat' takúrmeka, susatárum. Turakrumka, nu iniánkas achiktátrume. Kame átum aitkiármena aiksank aitkiámu átatrume - tímia, tímiaja.
- 39 Junasha chicharáiniak: - J̄i kusurú chikíchnash kusurún, jintintiamniakáit ? Atsá, métek wáanam iniámnia ainiáwai.
- 40 Aíntsank unuímiau nii unuikiártinrin nankáatsui. Antsu jintintíamka nii únuntriya aíntsank ajástatui.
- 41 Urukamtai j̄imín numi enketáisha, ame yatsumín: "j̄iyá tsuátan jurustájme" tame ?
- 42 Penke wainmachiátmesha, itiur wainkiúmea ? "Yatsurú, tsuátan jurustájme" timiniáitiam ? Ániumsha waitiá ! Ameá ameá j̄imiya numi jusamka, páant wáinmakam, yatsumsha jurusminiáitme.
- 43 Numi pénker pénkeran neréawai; antsu numi yajáuch' pénkeran neréatsui.
- 44 Tuma asamtai, numin neré íisar', numi urukuít nu nekatáinti. Kame kúrichip yurumkan nerechuíti; untukrasha yasun neréatsui.
- 45 Aíntsank aents^u pénker, nii anentáin pénkeran tákaku asa, pénkeran j̄iawai. Antsu yajáuchikia, nii anentái yajáuch' asamtai, yajáuchin j̄iawai. Kame aents^u anentáiniam táka-kainiána nuna, wenej̄i chichainiáwai.
- 46 Urukamtai "Uuntá" turutiátrumsha, wi tájana nu amíatsrum?
- 47 Winia chichamrun antuk umiána nuka, urukuít nuna titiátjarme:
- 48 Nuka kayánam jean ukurmia aintsankete. Kame nase winiakuísha, entsa kayánam tukumkuísha, penke pukuátsui.
- 49 Antsu winia chichamrun antuk, amíatsna nuka, aents^u náikminiam jean ukurmia aniuíti. Kame entsa nujankruá, tukúmar yumpuáwai - tímia, tímiaja, Jesús.

AKANKAMU 7.

Jutíuchu íimiaru.

(Mk.8,5; Jn.4,46).

- 1 Nuna chicharsúa amik, Jesuska Kaparnaunk irutkámunam tamia, tímiaja.
- 2 Nuí nankí-juun úuntri nii ti anéamu takárniurin takakuya nu, penke jamia, tímiaja.
- 3 Jesús tsuákratui taman neká: - "Takárniurun tsuatruítí" tawai, titiárum - tusa, ti náatu jutíun akupkarmia, tímiaja.
- 4 Jesusan jeariar, chicharáiniak: - Nu aents^u pénker asamtai, wáit aneásam yainktá.
- 5 Kame íin anéntmakur', ii ayamtáirin jeamniuíti - túsar, ti núkap seármia, tímiaja.
- 6 Tuiniákui, Jesuska níijai jintiá winíniniak, jeá nuntumsarai, úunt nii aéntsrin chicharáiniak: - Uuntá, wi péejchach' asamtai, winia jearuí enkemachminiáitme.
- 7 Tuma asán, penkesha amiínkia winíchmajai. Antsu ame takumínkia, winia takárniurka pénker ajástatui.
- 8 Kame wisha winia nankírtinrun akupniúítjai. "Wetá" tákui, wéawai; tura "winitiá" tákui, winiáwai. Aíntsanak takárniurnash: "Nu turatá" tákuínkia, najanniuíti - nuna tiarat' tusa, akupkarmia, tímiaja.
- 9 Jesuska nuna antuk, aents^u nemariármia nuna chicharáiniak: - Nekás tájarme: Israérnum aents^u tímiaju íimiaru pénkesha wainkiachuítjai - timia, tímiaja.
- 10 Akupkámuka jeá wakétkiar, uuntan takarniurínkia ti pénker tsuámarun wainkiármia, tímiaja.

Wajen uchirí aneántu.

- 11 Áruntak Jesuska nii aéntsrijai, tura núkap aentsjáisha Naim irutkámunam wemia, tímiaja.

Rk.7,12.

- 12 Irutkámunam wayástatuk ajasái, wájeka chikíchik uchirí tákakma jakamtai, untsurí aéntsjaí jukí, iwiarsátaj-sa wemia, tímiaja.
- 13 Jesuska nuna wáiniak, wáit anéntar, chicháruk: - Úutip ! - tía, tía,
- 14 weántuk, jakan peákrin antínkmatai, entsakí wena setur wajasármatai, chicháak: - Uchirú, aneanttá tájame ! - timia, tímiaja.
- 15 Takui, jaka nantátaki chichárkut ajamia, tímiaja. Turamtai, nii nukurín susamia, tímiaja.
- 16 Aents^u nuna wáinkiar, íimiaru ajásar, Arutman naatmamtekiániak: - Wáimiaku ti kakáram tarútramji, Arútam nekás íin íirmasji - túmam ajáarmia, tímiaja.
- 17 Jutéanam, nuyá irútkamu ayámach' irunmanumsha, Jesús turamia nuna etserarmia, tímiaja.

Juank Imiákratin akupkarma.

- 18 Juánkka, Jesús túramun nii aéntsri ujákam, jímiarán akúpeak:
- 19 - Uuntá, amekáitiam tátinia nua ? Turútskesha, chikíchak nákastataj' ? - tu anintrusarat' tusa, akupkama, tímiaja.
- 20 Jesusái jeáwar, chicharáiniak: - Juank Imiákratin chichártamuk: "Amekáitiam tátinia nua ? Turútskesha chikíchak nákastataj' ?" túramui - tíarmia, tímiaja.
- 21 Nuí Jesuska aents^u jáinia aun, tunamárúnash, jí kusurúnash tsuak, wáweknash jíiki akupmia, tímiaja.
- 22 Tura akupkamun chicharáiniak: - Átum wainkiárumna, antukúrmena nusha Juank ujautárum. Kame jí Kusurú wainmainiáwai; shutuápsha wekainiáwai; mushúrkasha pénger ajainiáwai; empekusha antuiniáwai; jákarusha aneantainiáwai; péejchach' áinia aúsha, Pénger-Chicháman antuiniáwai.
- 23 Nekás winia wáitiak nékarna nuka, warastí - tímia, tímiaja.

- 24 Akupkámuka waketrármatai, Jesús Juánknan pachís, aéntsun chicharáiniak: - Nunka-itiarkánmasha warí wainkiataj tusárum wemárum ? Mayái pintiun umuchia nuka íistaj-srum wemárum ?
- 25 Warí iyumárum ? Aents^u pénkeran entsáruk wainkiamárum? Atsá, kame aents^u ti pénker iwiármamrar, nampermainiána nuka, úunt ásar, kayá-jeánam pujuiniáwai.
- 26 Nuíkia, warí iyumárum ? Wáimiakuk iyumárum ? Ee, nekás tájarme: Juankka waimiákunash nankakáiti.
- 27 Kame Ujajmatáiniam Juánknan chicháak: - Íis, amé jintimin iwiarat' tusan, winia etsérniurun éemka akúpeajai - tu aarmáiti.
- 28 Nekás tájarme: nuánam akíniaka Juánknash iniánkas atsawai. Tumaitkuísha, Arútam-iruntramúnam imiá péejchach' ana nuka Juánknash nankakáiti.
- 29 Ashí mash' aents^u tunártiniash Juánkan antúrkar, nii tunarin etsérkar, imiáimiu ajasármiai.
- 30 Antsu Pariséuka, tura unuikiártinkia, imiántinian nakitra ásar, Arútam wakéramun emesármiai.
- 31 Nu aents^u yaya ánin ánia ? Urukú ánia ?
- 32 Uchi nakúruiniak: "Umpúakui jantsematárum, nampeákui uuttiárum" tamaitiat, túrutsuk kajernainiána ánin ainiáwai.
- 33 Aíntsank Juank Imiákratin yurúmstusuk, úmutsuk pujákui: "Emésak enkemtuamuíti" timiárme.
- 34 Tura Arútam-aents-ajasú ta, yurúmeakui, umáakui: "Ushu, nampén, nuyá tunártinjai, yajáuch' aéntsjai irúneawa !" tárume.
- 35 Tumaitkuísha, níiniurínkia nii turamurínini nuna nekainiáwai.

Nua tsanirmau.

- 36 Pariséu aéntska Jesusan ayurátaj-sa, nii jeén ipiámia, tímiaja. Jesuska wayá, jutíu turin áarmia aíntsank, yurumátaj-sa tepesmia, tímiaja.
- 37 Nu irutkámunam nua tsanirmau pujumia, tímiaja. Nuka Jesuska pariséun jeén yurumú puján neká, kunkuínian achik, jeá wayamia, tímiaja.
- 38 Naweni pujuras, útas útas nii neajkiríjaj*í* nijjar, intiashíjaj*í* ujújar, mejeás, kunkuínjaj*í* yakáa pujumia, tímiaja.
- 39 Túrakui, Pariséuka nii anentaín chicháak: - Jesuska waimiakuitkiúnka, ju nua urukuit ? Nekás tsanirmawáiti tíinti - tu enentáimia pujumia, tímiaja.
- 40 Tu enentáimkiui, Jesús chicháak: - Semunká, juna títiáj-san wakérajme - tu tai: - Páchitsuk titiá, Uuntá ! - timia, tímiaja.
- 41 - Jímiar aents^u tumáshmaku áarmia, tímiaja. Chíkich ewej-washim-nupanti tumashíyayi. Chíkichkia ewej-nawe tumashiya, tímiaja.
- 42 Akikmáktinian tákakainiáchkui, nii úuntrinkia tsankurarmia, tímiaja. Túramu ásar, yaki imiá anemia ? -
- 43 Entá, ti núkap tumáshmakun tsankuramia nua ! – Semunk takui: - Nékasmek tame - timia, tímiaja, Jesús.
- 44 Nuán apajás íis, chicháruk: - Semunká, ju nua wáinmek? Ámeka jeemiín wayaj nuí, nawénkesh nijjarát' túsam, éntsakesh suruschame. Antsu níinkia nii neájkiríjaj*í* nijjárur, intiashíjaj*í* ujujturái.
- 45 Ámeka wayaj nuí yapir mejentruschame. Antsu níinkia wayá, nawérun mejéntrak pujawai.
- 46 Ámeka múukrui kunkuínkish ukatrurchame. Antsu níinkia naweruí kunkuínian ukatrurái.
- 47 Ju núaka ti anenta asamtai, ti untsurí tunari tsankuramuíti. Antsu ishíchik tsankurámuka ishíchik anenkratniuíti - tímia, tímiaja.
- 48 Nuyá nuan chicháruk: - Ame tunárminkia tsankúrajme - .

Rk.7,49.

- 49 Takui, nuí yurumá pujúiniaka, chicháiniak: - Jusha ya asampa "tunarmin tsankúrajme" tu weká ? - tíarmia, tímiaja.
- 50 Tuiniakuísha, Jesús nuan chicháruk: - Íimiaru asam uwemrame; pénker wetá - timia, tímiaja.

AKANKAMU 8.

Nua Jesusan nemariáru.

- 1 Jesuska nii nawe-jímiar akatrámurin yaruás, ashí irutkámunam, matsatkamúnmasha wekás, Arútam-Irúnramun etsermia, tímiaja.
- 2 Aíntsank nuásha emésak jíirkimiu, tsuárma áarmia nusha nemariármia, tímiaja. Mataránkmaya_a Marí, tsenken emeskan jíirkimia nu,
- 3 tura Juán, Erútesan takárniuri Kusan nuwé, nuyá_a Susán, chíkich nuásha, nii kuítrijai_i Jesusan yáin áarmia, tímiaja.

Sha atsámramu.

(Mk.4, 1; Mt. 13, 1)

- 4 Núkap irutkamúnmaya_a untsurí aénts^u, Jesús wainkiatái túsar, irunrarmia, tímiaja. Nuíkia Jesús aujmatsámujaink jintíntiatniun juarkimia, tímiaja.
- 5 Atsamín shana atsamrátaj-sa wemia, tímiaja. Sha jintiá iniarárunka aents^u najatkármiai; tura chinkisha yuawarmia, tímiaja.
- 6 Kayánam iniaráruka tsapainiariat, nantu etsántramtai, kaararmia, tímiaja.
- 7 Jankíniam kakekáruka tsakarariat, janki amuam, jakarmia, tímiaja.
- 8 Antsu nunka pénkernum kakekáruka pénker tsakárar, ti núkap nerekaromia, tímiaja -. Nuna tuasúa amik, Jesús

Rk.8,9.

- chicháak: - Ya antúktaj ta, nu antuktí - tu chicharkarmia, tímiaja.
- 9 Nuyá nii aéntsri aníniak: - Nu aujmatsámusha warinia unuítiamaj' ? - tíarmia, tímiaja.
- 10 Tuiniákui, Jesús chicharáiniak: - Átumka Arútam-Irúnramu páchitsuk nekatniuítrume. Antsu chíkichkia wainiainiáyat wainkiaráink; antuiniayat nekacharat' tusan, aujmatsámu-jaink jintintiainiájai.
- 11 Aujmatsámuka juna jintíntramji: Shaka Arutman chichamente.
- 12 Sha jintiá iniararmia nuka, aents^u Arutman chichamen antúkar, nii anentaín ekemamtáisha: - Ímiaru ajásar uwemraráink - tusa, emésak wárichik júrana nuíti.
- 13 Sha kayánam iniararmia nuka, aents^u Arutman chichamen antúkar, warásar amirainiayat, nii anentaín kankaprurcharu asamtai, itiúrchatnum wárichik ikiúinia nuíti.
- 14 Sha janki írummanum iniararmia nuka, aents^u Arutman chichamen antukariat, tsawant nankámaki weákui, aya nii takátriniak, nii kuítriniak, nii waratáiriniak enentáimtusar, kajínmatki wena nuíti.
- 15 Sha nunka pénkernum iniararmia nuka, aents^u Arutman chichamen antúkar, kajínmattsuk amíkiar, ti pénger nerena nuíti.

Shirípik keeá.

(Mk.4,21).

- 16 Yákesh shiripkin ekémak, nukuk, túrutskesha wakénam uuchuíti. Antsu tsáapin ajasat' tusa, yakí ekenniuíti.
- 17 Mash' úukma ana nu, tuke nekánattui. Aíntsank ishishmas túinia nusha, páant nekamu átatui.
- 18 Antúkrum, nu nakasáshit tusárum, pénger nekatárum. Kame tákakna nu, yáinkma átatui. Antsu tákakcha nuka, atankímiu átatui.

Jesusan Nukurí.

(Mk.3,31; Mt.12,46).

- 19 Jesusan Nukurí, nii yachisha Jesusan wainkiátaj-sar wakeruiniáksha, untsurí aents^u matsatu asamtai, tujintiármia, tímiaja.
- 20 Nuí aents^u Jesusan chicháruk: - Ame Nuku, yatsumsha aa wajásar, untsurmainiáwai - .
- 21 Tu tai: - Winia chichamrun antúkar, amiiniána au, winia nukur, winia yatsur ainiáwai - tímia, tímiaja, Jesús.

Nase emenkakma.

(Mk.4,35; Mt.8,18).

- 22 Chíkich tsawanttin Jesuska nii aéntsrijai kanúnam enkémrar: - Antumiank amáini katinktái - túsar, wiánkiar weármia, tímiaja.
- 23 Wiánmaki wenái, Jesuska kanú tepemia, tímiaja. Tumai, aya aneáchma nase ti kakáram umpúakui, entsa takuni kanúnam mete ajatesmia, tímiaja.
- 24 Túmakui, Jesusan ishíntiániak: - Uuntá, Uuntá, jakéaji - tuiniákui, Jesús nantátakin, mayai entsasha tímiatman kakántar, majat awajsamia, tímiaja.
- 25 Tura chicharáiniak: - Aushá, atumsha íimiarukáitrum ? - tu tai, nii aéntsrinkia sapíjmiakar: - Jusha ya asámtaiya, entsasha máyaisha amírainia ? - tumam ajáarmia, tímiaja.

Waweámu kúukjai.

(Mk.5,1: Mt.8,28).

- 26 Antumiank amáini, Jerásanam, Kariréa ínkiuasmak pujana nuí, jeáwarmia, tímiaja.
- 27 Kanúnmaya yama jjiiniainiái, nu írutkamúnmaya aents^u waweámu tamia, tímiaja. Emésak enkemtuámu asa,

- wáurua aínsank misú wekás, jeá pujútsuk, aya jaka iwiarsámunam pujuya, tímiaja.
- 28 Jesusan wáiniak, chará chará ajatki, tikíshmatar: - Wish amijáisha warinia iistiniáitaj, Jesusá, Arutmá Uchiríya ? - tinia: - "Waitkiarsáip" tusan, seájme - timia, tímiaja.
- 29 Kame Jesuska: - Emeská, j̄intiumkitiá - tímia, tímiaja. Emésak niinín enkemainiákui, nu aents^u náikjaj̄i kaeká jinkiármasha, jirujaj̄i peperká penuármash, putit putit kammia, tímiaja. Kampúntniunam tsuat ana nuí emésak tuke ju wemia, tímiaja.
- 30 Jesús aníntrak: - Ya naartiniáitiam ? - Tu tai: - Wíkia untsuriyáitjai - timia, tímiaja, nu aéntsnum untsurí emésak enkemá ásar.
- 31 Nuka Jesusan ishámainiak, tunkuruánam akuptamkáj̄i túsar,
- 32 nuí untsurí kúuk náintnium shushúnmak yujáakui, chicháiniak: - "Aí enkematárum" túsam, tsankatkartuktá -. Ajainiákui: - Ayu wetárum - timia, tímiaja.
- 33 Tákui, emésak aentsnumiá j̄j̄inkiar, kúuknum enkemawármatai, nuka tsékenkiar, naintniúmiá entsá iniánkar, jakékarmia, tímiaja.
- 34 Kúukan-wáinniuka nuna wáinkiar, tsékenkiar, írutkámunam mash' etserarmia, tímiaja.
- 35 Nuna antúkar, aéntsush warí urukának ta túsar, iyúwar, aents^u waweámu pénker ajás iwiármamar, Jesusjaj̄i puján wainkiármia, tímiaja.
- 36 Ashí mash' ishamáiniákui, nekawáruka itiur tsuamarmia nuna etserkarmia, tímiaja.
- 37 Nuíka Jerasánmayá aéntska ti sapíjmiakar, Jesúsna nua níi nunkeyá j̄j̄inkit' túsar, seawarmia, tímiaja.
- 38 Jesuska kanúnam enkemar, wáketkui, aents^u waweámu tsuárma: - Wisha ámijaj̄i winitjai - tákui:

Rk.8,39.

39 - Atsá; jeemiín wakétkim, Arútam tsuármara nu amé shuar ujauwartá - timia, tímiaja. Tu tai, irutkámunam we, Jesús túramun mash' etserámia, tímiaja.

Jáirun nawantri aneántma.

(Mk.5,21; Mt.9,18).

- 40 Jesuska waketki támatai, ti untsurí aents^u naka pujuráinia ásar, warásar irunrarmia, tímiaja.
- 41 Nu chichámaik Etsérkartin, Jáiru náartin ta, Jesusan tikíshmatar: - Wáit anéntrusam, winia jeáruí winitíá.
- 42 Kame winia nawántchir, nawe-jímiar uwí tákaku, penke jarutui - tímia, tímiaja. Takui, nii jeén wenái, aéntska kaki ajáasar Jesusan chanuármia, tímiaja.
- 43 Nuí nuásha nawe-jímiar uwí numpa pujak, tsuamártaj-sa uwishniun akíak, mash' nii kuítchirin amuksha, penké tsuamarcha asa, Jesusan ukuriín wemia, tímiaja.
- 44 Jesusan awankemrin antink, nu chichámaik numpa pujak jaamurinkia pénger ajátasmia, tímiaja.
- 45 Nuíkia Jesús chicháak: - Ya antintkia ? - Tamaitiat: - Wicháitjai - mai tu ajainiákui, Kaya chicháak: - Uuntá, aents^u untsurí asar chanuntmáiniajanta ! - timia, tímiaja.
- 46 Tu táisha, Jesús chicháak: - Aents^u antintkiáyi; kame winiya winia kakármar j̄j̄inkiyi - timia, tímiaja.
- 47 Núaka nekamu asa, sapíjmiak, Jesusan tikíshmatar, urukámtaiya nii awankemrin antink, nu chichámaik pénger ajasmia nuna, mash' íimiainiámunam etseramia, tímiaja.
- 48 Nuíkia Jesús chicháruk: - Nawantrú, íimiaru asam tsuamarume. Pénger wetá - timia, tímiaja.
- 49 Nuna chicháa pujái, aéntska Jáirun tarí, chicháruk: - Amé nawántrumka jakayi; yamáikia Úuntka itit awajíp - timia, tímiaja.
- 50 Nuna antuk, Jesús chicháak: - Áantram kúntuts enentaímsáip. Íimiaru ajaakminkia, nawántrum ewémrattui - timia, tímiaja.

Rk.8,51.

- 51 Jeá jeáwar, Jesuska aétsnaka awáintsuk, áyatik Kayajai, Juánkjai, Santiákjai, nuyá nuachín aparí nukurijaink wayamia, tímiaja.
- 52 Aánka aétska charátum, úur ajainiákui, Jesús chicharáiniak: - Útírap, kame nuáchikia jakachái: áyatik kanú tepawai -.
- 53 Takui, nekás jakan neka ásar, wishíkiármia, tímiaja.
- 54 Tumaitkuísha Jesuska nuáchin ewéjnum achik: - Nawantchirú, nantaktiá - timia, tímiaja.
- 55 Takui, nu chichámaik wakaní waketkimtai, nantatakmia, tímiaja. Aneántmatai: - Ayuratárum - timia, tímiaja, Jesús.
- 56 Nuna turamtai, nii aparí, nii nukurisha íimia ajainiákui: - Nu turunamu penke etserkáirap - tinia, Jesuska ikiukiármia, tímiaja.

AKANKAMU 9.

Nawe-jímiar akupkamu.

(Mt. 10,5; Mk.6,7).

- 1 Jesuska nii nawe-jímiar Akatrámurin irur, ashí mash' wawekan jíikiar, jainiánsha tsuararat' tusa, utsukarmia, tímiaja.
- 2 Tura: - Arútam-Irúnramu etserkárum, mash' tsuakratratárum - tinia, akupkarmia, tímiaja.
- 3 - Weákrum warínkish jukírap. Payanksha, pitiáksha, kukáisha, kuítiash jútsuk, aya entsasmáchijaink wetárum.
- 4 Jeá wayármeka, wémam nuínk pujustárum.
- 5 Tuínkish nakitramármena nuínkia, weákrum, makunrártarme tusárum, kusuí usukiárum ikiuktiárum - timia, tímiaja.
- 6 Nawe-jímiar akatrámuka irutkámunam wekásar, Pénker-Chichaman etsérkar, ashí mash' jáinian tsuakí weármia, tímiaja.

Rk.9,7.

- 7 Erúteska nuna neká: - Warinkit ? - Tu enentáimia, tímiaja. Kame chíkichkia: - Juank aneantuíti -.
- 8 Chíkichkia: - Erías ataksha tayi -. Tura chíkichkia: - Yaúnychukia wáimiaku nantakniuíti - tuínia, tímiaja.
- 9 Erúteska chicháak: - Wi Juankan muukén tsupirmamtikkiámjai. Nuíkia jusha ya asámtaiya ! Tímiaun najáneawai tuínia - tusa, wainkiátaj-sa wakerímia, tímiaja.
- 10 Akatrámuka wakétkiar, ashí mash' túramun Jesusan ujakarmia, tímiaja. Nuíkia Jesuska aya níjaink pujústaj-sa, Petsáitia irutkamúnmani yaruak, wemia, tímiaja.
- 11 Tumaitkuísha, aéntska nekáwar, patátukar jearím, Jesuska irur, Arútam-Irúnramun jintintiáwar, jainiánsha tsuararmia, tímiaja.

Yurúmak ikiáunkamu.

(Mk.6,30; Mt.14,13; Jn.6,1).

- 12 Kiáakui, nawe-jímiar akatrámuka Jesusan weántuk, chicharáiniak: - Juínia nunca-itiárkanam pujaji. Aéntska kanártinian, yurumatniun earmakarat' túsam, irutkamúnam akupkartá - tíarmia, tímiaja.
- 13 Tuiniákui: - Átum ayuratárum - tu tai: - Ílikia ewej apátkuchik, jimiará namákchik takákeashi. Kame nuíkia ju ayurkamatín yurúmak sumáushtajiash ? - tíarmia, tímiaja.
- 14 Ewej-nupanti aents^u ainiakuísha, Jesús chicháak: - Ewej-nawe, ewej-nawe irúnrar pujusartí, titiárum - tímia, tímiaja.
- 15 Akatrámuka nutiksarank apujsarmia, tímiaja.
- 16 Nuíkia Jesuska ewej apatkun, jimiará namáknash achik, nayáimpiniam íimias, usukruá, púuk, aents^u ayuratárum tusa, akatrámurin súsarmia, tímiaja.
- 17 Ashí mash' nii wakéramun yurumawarmatáisha, ampiniárun nawe-jímiar chankín juukármia, tímiaja.

Kayan iimiármari.

(Mk.8,27; Mt.16,13).

- 18 Chíkich tsawantin Jesuska kampúntniunam anentruátaj-sa we, nii aéntsrissha níjaink pujá asármatai, chicharáiniak: - Aéntsush yáiti turutáinia ? -
- 19 Takui chicháiniak: - Chíkichkia: "Imiákratin Juankáiti". Chíkichkia: "Eriasáiti". Antsu chíkichkia: "Yaúnychuya wáimiaku aneantuíti" turámainiajánta ! - tíarmia, tímiaja.
- 20 Tu tuiniái: - Atumsha yáiti turútrum ? - Tu aníntrakui, Kaya chicháak: - Ámeka, nekás Arútam Utsúkmáitme ! -
- 21 Tu chichákматаi: - Penke etserkáip - tímia, tímiaja, Jesús.

Jesusan waitsámuri.

- 22 Nuink Jesuska chicháak: - Arútam-aents-ajásuka ti waitsatniuíti. Kame Jutiun úuntri, wean úuntrisha, unuíkiártiniash kajérkar, maawarmatáisha, menáintiu kanar, aneántatui - tau, tímiaja.
- 23 Nuyá ashí aéntsun chicháreak: - Ya winia nemartústinian wakera nuka, nii wakerámurin iniáis, tuke tsawant waitiáksha nemartustí.
- 24 Kame, iwiáku pujústaj-sa wakera nuka, nii iwiákmarin ememkáktatui. Antsu winia ayamrúteak jáana nuka, tuke iwiáku pujústatui.
- 25 Nii iwiákmarin emenkakártatna nuka, ju nunkánam ashí mash' irumainiáksha, penke áantar irumainiáwai.
- 26 Winia, tura winia chichámrunash natsántruinia núnaka, Arútam-aents-ajasú nankámaku ta, nii Aparí, nii pasúkrissha iimiainiái, natsantráttawai.
- 27 Nekás tájarme: pujuínia ju, yákesh játsuk Arútam-Irúnramun wainkiártatui.

Rk.9,28.

Jesús yapajniámu.

(Mk,9,2; Mt. 17, 1; Jn. 12,28).

- 28 Jesuska chichakmia nu yarush' tsawant nankamásmatai, Kayan, Santiákun, Juánknash jukí, náintnium anentruátaj-sa wemia, tímiaja.
- 29 Nuí anentrú pujús, nii yapí yapajniá, nii pushirísha ti puju, ti wincha ajasmia, tímiaja.
- 30 Jimiará aents^u, Muisés Eríasjaj, taríar, níin aujiármia, tímiaja.
- 31 Ti tsáapin ajásar, nii Jerusarénknium wématai, aminkiatniúya nuna aujmatíármia, tímiaja.
- 32 Káyaka nii ajíaj kanú tepenayat, kurat shintiárar, Jesús ti nankámaku ajás, wínchar ajáamunam jimiará aents^u níijajink pujúinian wainkiármia, tímiaja.
- 33 Jímiar aéntska menkasáttuk ajasái, Kaya Jesusan chicháruk: - Uuntá, Juí pujustin ti penkeráiti. Ame, Muisés, Eríassha juí pujúsminrum, menáintiu áak aakmaktái - núnaka enentáimtsuk timia, tímiaja.
- 34 Tu chicháa wajái, yuránkim surut utsana amuam, sapijmiakarmia, tímiaja.
- 35 Nu chicháamaik yurankmínmaya chícham chicháak: - Juíti winia Uchir wi akupkamu: anturkatárum - tímia, tímiaja.
- 36 Tu chichákматаi, Jesuska níinki juákma, tímiaja. Akatrámuka nuna wáinkiaríat, nu tsawanttin tákamtak pujúsar, penke etserkacharmia, tímiaja.

Namperú tsuárma.

(Mk.9, 14; Mt. 17, 14).

- 37 Kashín naintniúmiá akáikiar, untsurí aéntsun inkiunkarmia, tímiaja.
- 38 Nuyá chikíchik aents^u chará ajakí, chicháak: - Uuntá, wáit anéntrusam, winia uchir, júchik asamtai, iirtustá.

- 39 Kame emésak enkém^tak, chará awajkí, tut ajián saún kaput apám^tik, wáitkias ikiúawai.
- 40 Tura ame aéntsrumsha j̄irkitiaj tukamá, tujintkiármiaji - timia, tímiaja.
- 41 Jesús chicháak: - Aniutírmesha, íimiarcha, nékachua, urutmá atumj̄aj pujúsan, katsuntratniúítiaj ? -
- 42 Tinia: - Uchíram juí itiatá - timia, tímiaja. Uchi Jesusan weántakui, emésak tut ajián péper péper awajkui, Jesús j̄íiki akúptukam, úchikia pénker ajásmatai, nii aparín susamia, tímiaja.
- 43 Túrakui, ashí aents^u íimiam ajáiniak: - Arútam ashí tujintcháiti - túmam ajáarmia, tímiaja.
- 44 Tumaitkuísha Jesús nii aénts^rin chicharáiniak: - Átumka ju pénker nekatniuítrume: Arútam-aents-ajasú surukma átatui - timia, tímiaja.
- 45 Takuísha, nekachariat, ishama ásar, anintruscharmia, tímiaja.
- 46 Nii aénts^rinkia chíkich' tsawanttin, yaki imiá nankamakuít túsar, kajernainiármia, tímiaja.
- 47 Jesuska nuna neká, uchín itia, ajapén awajas, chicháak:
- 48 - Ya winia enentáimturas, ju uchín yaya nuka, winia turútawai. Tura winia aítkiarea nuka, winia Akuptúkunash túrawai. Kame yamáí atumiya péejchach' ajana nu, imiá nankámaku átatui - timia, tímiaja.
- 49 Tura Juank chicháak: - Uuntá, aents^u íij̄aj wekáichu amin pachitmas, emeskan j̄íiki akupkui, suritkiámji - .
- 50 Takui, Jesús chicháak: - Suritkiáirap. Kame aents^u atumín kajertamainiátsrumna nuka, atumj̄aj pujuiniáwai - timia, tímiaja.

Irutkámunam Jesusan nakitraru.

- 51 Nayáimpiniam wákatin tsawant jeástatuk ajásmatai, Jesuska: - Jerusarénknum wéajai - tímia, tímiaja.

Rk,9,52.

- 52 Samarían irutkamuriín kanutain iwiarú ajarat' tusa, nii aéntsrin éemtik akupkarmia, tímiaja.
- 53 Tumaitkuísha Samaríanmaya aéntska: - Jerusarénknum wéawai - taman nekáwar, nuí ikiánratniun nakitrarmia, tímiaja.
- 54 Akátramú Sántiak Juánkjai nuna nekáwar, chicharániak: - Uuntá, nayáimpinmaya ji akuptukar', amuktin wakéramek ?
- 55 Tuiniákui, Jesuska kakántrar,
- 56 chíkich' irutkámunam weármia, tímiaja.

Jesús untsukarma.

(Mt.8,19).

- 57 Jintiá wenái, chikíchik chicháak: - Tuínkish weakmínsha, amín nemarsatájme -.
- 58 Tu tai, Jesús chicháak: - Kujánchmasha kanutáirin tákakeawai; chinkisha pasunkrin tákakainiáwai; antsu Arútam-aénts-ajasuka kanútainkish tákaktsui - timia, tímiaja.
- 59 Antsu chikíchniaka: - Nemartustá - tu tai: - Winia apar jakamtai, ikiúsan, nemarsatájme - timia, tímiaja.
- 60 Tu tai, Jesús chicháak: - Númtak tunártinkia jakámunam ikiunái pujuartí. Ámeke Arútam-Irúntramú etsérkatin wetá - timia, tímiaja.
- 61 Tura chíkich' chicháruk: - Uuntá, nemarsatájme. Tumaitkuísha, éemka wi-shuáran iyuwártasa tsankatruktá -.
- 62 Takui: - Ya nemartayat, ukúnam apajás íimna nuka, Arútam-Irúnramun najánatniun jeátsui - timia, tímiaja, Jesús.

AKANKAMU 10.

Tsenken-nawe-jímiar akupkamu.

(Mt. 10,15; Mk.6,7).

- 1 Nuyanka Úunt Jesuska tsenken-nawe-jímiar aéntsrin untsuk, jímiar jímiaran apátak: - Éemka wetárum - tusa, ashí

Rk.10,2.

- irutkámunam, ashí nunkánmasha nii wetiniúya nú akupkarmia, tímiaja.
- 2 Tura chicharáiniak: - Takat ti nukapete, antsu takakmau ti ishíchik ainiáwai. Tuma asamtai, takatan Úuntri takakmaun akupkat' tusárum, anentruatárum.
- 3 Wetárum. Túmasha tánkua aítkiasnak úunt-yawá matsátmanum akupeájrume.
- 4 Pitiaksha, awankemsha, nawénam-awétainkish jútsuk, átumshuar pujamúnmasha kanaráirap.
- 5 Jeá wayákrum: - Arútam tarímtanam iwiaitmaktárum – tu amikmatárum.
- 6 Nú aents^u pénker pujákka, Arutman pénkerin achíktatui. Yajauchitkiuínkia Arutman pénkeri níinín enkémstsuk, atumiín waketkíttiawai.
- 7 Nú jeánmak pujúsrum, ajamrárumna nu yurumárum, umartárum; kame takákmauka tuke akikma atiniáiti.
- 8 Jeakar jeakar wekátsuk, irutkamúnam wayárum, ajamrárumna nu yuárum,
- 9 jainiána au tsuartaárum. Tura nu irútkamun chichárkuram: "Arútam-Irúnramu atumiín tayi" titiárum.
- 10 Tuínkish irútkamu nakitramármena nuínkia, aa jjiínkírum, chichárkuram:
- 11 "Atumí páuskari jurumakíj' tusar', pearar' ikiúaji; tumaitkuísha, Arútam-Irúnramu jeástatuk ajatramsarme" tu titiárum.
- 12 Tínkás tájarme, makurtin tsawant jeám tai, nu irutkámuka Sutúmanash iniánkas, makurma átatui.
- 13 Nekaprumrattarmeápi Kurasainkiá, Petsaitiyá ! Atumiín aénts-tujíntiamun najánnama aítkiasank Tiru, Sitiunknúmasha najanamuitkiuínkia, aéntska enentáimrar, ijarmawaru áaráyí.
- 14 Tuma asamtai, makúrtin tsawántinkia Tiru, Sitiunksha újumekek makurma áartatui.

Rk. 10, 15.

- 15 Amesha Kaparnaunká, takám̄tsuk nayáimpiniam jeátajtai tameápi ! Ániumka tunkuruánam utsankma átatme - timia, tímiaja.
- 16 Nuna tuasúa amik: - Ya atumín anturtámrumna nuka, winia antúrtawai. Atumín kajertamárumna nuka, winia kajértawai. Tura winia kajerta nuka, winia akuptúkunash kajérawai - timia, tímiaja, Jesús.

Jesús yumínkmasma.

(Mt. 11,25).

- 17 Tsénken-nawe-jímiar aénts akupkámuka waketkí táar, wará warat Jesusan chicharáiniak: - Uuntá, amé kakarmármijaink eméskasha awakkamji - tíarmia, tímiaja.
- 18 Tu tuiniái: - Ee, wisha nayáimpinmaya péem péetna núnisank, emésak akáiki iniáan wainkiámjai.
- 19 Nekatárum: - Napi najármasha, titínk najármasha, tura ashí atumí numasri kajertamárumna nusha, emestamráirum tusan, winia kakármarun amasmájrume.
- 20 Tumaitkuísha, emésak awákeaji tusárum, warasáirap. Antsu Arútmanam jeátin asárum warastárum.
- 21 Nu chichámaik Iwiáikratin enkém̄tuam, Jesús wara warat chicháak: - Aparú, unuímiau, nekau áinia aúsha ju úurkam, péejchach' áinia au ujakú asakmin, yumínkiajme. Kame ámeke nu penkeráiti tau asakmin, nekaskete.
- 22 Winia Aparka ashí mash' surusuíti. Yákesh nii Uchirín nékatsui; áyatik nii Aparínk nékawai. Aíntsank yákesh nii Aparín nékatsui; aya nii Uchirink neka asa, nii wakera nuna ujáawai - timia, tímiaja.
- 23 Arúm nii aéntsrin akánkar, chicharáiniak: - Átum wainiármena nuna wainiainiána au, warasartí !
- 24 Kame ti núkap wáimiaku, úuntash yamáí átum wáinrumna nuna, wainkiátaj-sar wakeruiniáksha, wainkiachármiai. Aíntsank átum ántarmena nuna antúktaj-sar wakeruiniáksha, anturkachármiai - timia, tímiaja.

Awemamu ti nankámaku.

(Mt.22-34; Mk.12,28).

- 25 Unuikiartin wajatkin itiúrchatan apujsátaj-sa, Jesusan chicháruk: - Uuntá, tuke iwiáku pujústaj-san, warí itiurkatniuíitaj ? - timia, tímiaja.
- 26 - Ujájmatai waritia ? Aujsachukáitiam ? -
- 27 Jesús tu tai: - "Arútam amé Úuntrum anetá. Amé anentáimjai, amé wakánmijai, amé kakarmármijai, amé enentaimmijáisha anetá. Núnismek chíkich aéntsush, ame anémamna núnismek anetá", tu aarmáiti - timia, tímiaja.
- 28 Nuikia Jesús chicháruk: - Nékasmek tame. Nu nájankumka, iwiáku pujústatme - timia, tímiaja.

Samaríanmayá aents^u pénker.

- 29 Jesús takui, unuikiártinkia nuna pénker nekátaj-sa, chicháak: - Nekás wi anétniusha, yáit ? -
- 30 Tu tai, chicháruk: - Jerusarenknumiá aents^u Jerikiúnam weái, kasa áinia au achíkiar, nii takakmachirin kasárkar, pujuká awátrar, mayái ashímkiamtai, ikiukiáru, tímiaja.
- 31 Anéachma wéasha nu jintiánmani winís, tepán wainkiayat, wáit anéntsuk, ikiúkma, tímiaja.
- 32 Aíntsank wean yáinrisha nuna wainkiayat, íis, ikiúkma, tímiaja.
- 33 Antsu Samaríanmayá aents^u winís, nuna wáiniak, nii numásrintiat, wáit anentra, tímiaja.
- 34 Weántuk, nii tsupirmariín wéen apujtus, nijíá nijíá amajas, penuár, kawáinium patak, kanútai-jeánam jukí, pénker wainkiámia, tímiaja.
- 35 Kashín tsawármatai, jéentniun kuítian akik, chicháruk: "Pénker iirtustá. Wi amajna ju taasmataísha, wi wáketkun akíktajme" tía, weu tímiaja - .

Rk. 10,36.

- 36 Jesús nuna aujmitsúa amik, aníak: - Wats, yaki nu aéntsun aneásmia ? -
37 Tu tai: - Entá, utsuman wáit anentramia nuíti -, Takui: - Amesha weme, núnismek turatá - timia, tímiaja, Jesús.

Marta, Marijai.

- 38 Jesuska jintiá wesa, irutkámunam jeámtai, nua Marta náartin nii jeén awayamia, tímiaja.
39 Nii kaj Marikia Jesusan anturkátaj-sa, ayámach' pujursamia, tímiaja.
40 Antsu Marta, Jesusan ayurátaj-sa, warinchun íwiaruk ajaa asa, Jesusan chicháruk: - Marikia wíniaka yaintkiátasa, ámeke wakératsmek ? "Kajm yainktá" turutritiá - tímia, tímiaja.
41 Takui, Jesús chicháruk: - Martá, ámeke warínchuku iwiarátaj-sam wáurtakam.
42 Antsu aya chikichiki waurtuktinkia ! Tuma asamtai, Marikia winia eátka asa, imiá pénkera nuna achikiái. Núnaka pénkesh atankichártatui - timia, tímiaja, Jesús.

AKANKAMU 11.

Anéntruatin jintiámu.

(Mt.6,9;7,7).

- 1 Chíkich' tsawanttin Jesuska anentrasúa amúkmatai, chikíchik aéntsri chicháruk: - Uuntá, Juank nii aéntsrin jintintiámia aínsamek, anéntruatin jintintkiartuatá - tímia, tímiaja.
2 Takui: - Anentrakrumka juní titiárum: "Apawá, amíniak mash' yuminkramsartí. Amé Irúnramu iín tatí.
3 Tuke tsawantin ii yurúmkari sukartitiá.

Rk.11,4.

- 4 li numasri tsankurainiájnia aínsamek, ii tunari tsankurkarturtá. Antsu emésak anankramawáij', yainkratkatá - timia, tímiaja.
- 5 Tura junasha chicháak: - Wátsek, átum kashi ajámpek nantákrum, átum shuar werírum: "Yurúmak ajamrustá, kame íirar tau asamtai, ayúratniun takáksujai".
- 6 Takurminsha, jéentniuka jjíintsuk: "Itit katsáip. Wáitish epemramuíti; winia uchir, tura wisha kana asar', nantakir', amaschamniáitji" ticháintiash ?
- 8 Tinkás tájarme: aá unsumú wajaakuínkia, nantarkí, nii shuar asámtainkia susáshtatui, antsu itit ewekatsáink tusa, mash' utsuma nuna susáttawai.
- 9 Tuma asamtai, atumsha surusat' tusárum seatárum; wainkiátaj takurmeka eaktárum, uratrit' tusárum wáitiniam unsumkatárum.
- 10 Kame seámna nuka sunástatui; eána nuka wainkiáttawai; wáitiniam unsumna nuka uratmia átatui.
- 11 Ya úunta nii uchirí namakan seámkui, napín sua ?
- 12 Túrutskesh nujint seám, titínkin sua ?
- 13 Tuma asamtai, átum yajáuch' asármesha, atumí uchirín pénker ana nu suakruminkia, atumí Aparí Nayáimpiniam pujana nu imiánkaska seakruminkia lwiáikratniun amastátrume - timia, tímiaja, Jesús.

Jesús emeskan kajerín.

(Mk.3,22; Mt.12,23; Mk,4,21; 9,40).

- 14 Chíkich' tsawanttin Jesuska aents^u chichachun emésak jjíirkim chichákmatai, ashí aents^u íimiam ajáarmia, tímiaja.
- 15 Tumaitkuísha, chíkich chicháiniak: - Juka emeskan úuntri, Persepú taman kakarmarijai, emeskan jjíáawai - tíarmia, tímiaja.
- 16 Antsu chíkichkia itiúrchatnum enkeatin, aents-tujíntiamun Arutmánmaya itiat' túsar, seawarmia, tímiaja.

Rk. 11, 17.

- 17 Jesuska nii anentáimmiarin nekárawar, chicharáiniak: - Matsatkámunam númtak kajernainiákka níinki amunainiáwai.
- 18 Núnisank númtak emésak kajernainiákka, itiúr irúnrar pujusarminiáit ?
- 19 Wi emeská úuntrin kakarmarijaj wawekan jíiki akupeakuínkia, átum shuársha yana kakarmarijaj jíiki akupkarmia? Uwíshniuka Arutman kakarmarijajink jíiki akupka ásar, níisha atumín makurmáttarme.
- 20 Wisha aya Arutman kakarmarijajink emeskan jíiki akúpeajai. Tuma asamtai, Arútam-Irúnramu atumín jeáyi.
- 21 Aents^u kakáram, nankijaj enear pujakuínkia, nii warínchurin atankichártatui.
- 22 Antsu chíkich imiá kakáram táanka, awákak, nii warínchurin atankí, súrawai.
- 23 Aíntsank wijaj irunainiátsna au, winia kajertuiniáwai. Núnisank wíjajink takakmainiátsna au, áantar takakmainiáwai.
- 24 Emésak aentsnumiá jíinkinkia, ayamrátaj-sa tentá wekáawai. Tura penke tujintkiánka: "Tuyá jíinkímiaj nuink waketkitjai" tawai.
- 25 Waketkí, enkémataj tukamá, nu aents^u ti pénker pujá asamtai, tujíntiawai.
- 26 Nuíkiá tsénken ti yajáuch' eméskajaj irúnar, enkémeawai. Turamtai, nu aéntska awénmama, ti wajáuch' ajástatui - timia, tímiaja, Jesús.
- 27 Jesuska chicháa pujái, aents^u tuámunam nua kakántar chicháak: - Nua amin takúrmas, umuntstamamia nu warastí -
- 28 Tu tai: - Arutman chichamen antúkar, nekás amiiniána au, imiá warasartí - timia, tímiaja, Jesús.
- 29 Ti untsurí aents^u tuakí wenakui, Jesús chicháak: - Ju aéntska yajáuch' ainiáwai. Aénts-tujíntiamun seamainiakuísha, áyatik Junás iniakmásmiak nuke sunasártatui.
- 30 Kame Junás Niniwénmayá aéntsun iniaktusarmia aíntsank, Arútam-aents-ajasú ju aéntsun iniaktusártatui -.

Rk.11,31.

- 31 Makutin-tsawant jeámtai, nua nankámaku, yaúnchu Sarumunkan anturkátaj-sa, nunka nankatkamúnmayá tamia nuka, wajatkí, ju aéntsun makuártatui. Kame juínkia Sarumúnknash nankaka pujakuísha, anturainiátsui.
- 32 Makutin-tsawant jeámtai, Niniwénmayá aents^u yaúnchu Junasan antúrkar, enentaimrarmia nuka, wajatkiar, ju aéntsun makuártatui. Kame juí Junásnash nankaka pujakuísha, anturainiátsui.
- 33 Yákesh shirípkín úuktaj-sa ekématsui. Antsu ashí mash' sukuit' tusa, yakí ekénuí.
- 34 Ame jímkia tsáapín awájtamui. Jími penkeraitkiuínkia, pénger enentái takústatme. Antsu jími yajauchitkiuínkia, kirítniunam wekasáttame.
- 35 Nuíkia tsáapín amiín pujana nu kiritin ajasáink túsam, pénger iistá.
- 36 Tsáapniunam pujákmeka, amiín kiritin atsá asamtai, shiripkia aínsamek tsáapín ajástatme - timia, tímiaja, Jesús.

Pariséu jíákma.

(Mt.23,1).

- 37 Jesuska chichasúa amik, chikíchik pariséu untsúkam, nii jeén wayá, yurumátaj-sa ekemsamia, tímiaja.
- 38 Pariséuka, Jesús nijiamatsuk ekemsa asamtai, chicharkamia, tímiaja.
- 39 Nuíkia Jesús chicháruk: - Pariseutírmeka nekachuítrome. Kame pinink, umámkusha aya pátatek nijiaukáitrum ? Atsá. Inít ana nusha nijiauwaitrome. Antsu átumka atumí iniashí pátatek nijiakrumsha. yajáuch' inít ana nuka nijiatrume.
- 40 Arútam pátatek najanamia nuka, inítsha najanachmakía ?
- 41 Antsu átumka inít ana nu japiachiátrum, utsúmana nu yáinkrum, nujáinkia mákete tárume.
- 42 Wáawa pariseutíram ! Átumka imítmachu, anénkratin ajátsuk, áyatik kuít tesárum Ayámtainiam sutíram,

nekaprumrattarmeápi ! Turashtiniátrume. Antsu anénkratin ajásrum, yainkratkatniuítrume.

43 Wáawa, pariseutíram ! Nankámaku pujúsrúm, jintiásha amikmatawarat' tusárum wakerintíram nekaprumrattarmeápi!

44 Wáawa pariséuwa ! Átumka kaúru áruminink, aents^u nekarmainiachiat nemartamkurminsha, anirmartatrumeápi ! - timia, tímiaja.

45 Nuíkia unuíkiartin chicháak: - Uuntá, tu chichamna nujai, íniash kajerkártame -.

46 Takui: - Wáawa atumsha unuíkiartiniá ! Atumsha ishíchkisha amiachiátrum, papí najánarúm, aents^u amirkarat' tusárum waitkiautíram, anirmartatrumeápi !

47 Wáawa unuíkiartiniá ! Atumí úuntri wáimiakun kajersúa, maawármatai, átumka kajinmatkiaráink tusárum, nakumka awajniutíram anirmartatrumeápi !

48 Kame atumsha atumí úuntriya aínsarmek asárum, nii turamu penkeráiti tusárum, nakúm kamu apujniuítrume.

49 Tuma asamtai, Arutman Chichámtinri chicháak: - Wáimiakun, akatrámunash akupkamtáisha, kajérkar maawártatui - tawai.

50 Nuíkia yama nankamtaiknúmiank wáimiaku numpén ukarármanum, átum makunráttarme.

51 Apernumiá juárnaki, Sakaríassha íikmatáiniam numpé ukarmia timianái, nii maawármanum yamáiyá aents^u makunrártatui.

52 Wáawa unuíkiartiniá ! Atumsha nekachiátrum, aya íik mash' nékaji tusárum, aents^u suritniutíram, nekaprumrattarmeápi ! - timia, tímiaja, Jesús.

53 Nuna tuasúa wéakui, unuíkiartin tura pariséusha: - itiúrchatnum enkear', makurtái - tusar, ti núkap anintriármia, tímiaja.

AKANKAMU 12.

Itiúrchatnum katsúntratin.

(Mk. 3, 28; 8, 38; Mt. 10, 19; 12, 31).

- 1 Aents^u ti núkap irúnrar, mai shitiánai ajainiákui, Jesús nii aéntsrin chicharáiniak: - Pariséu anánkartin asármatai, anturkáirap.
- 2 Kame úukma nu páant ajástatui. Nekáchma nu nekamu átatui.
- 3 Tuma asamtai, kirítniunam tárúmna nu páant ajástatui. Úukrum, kuíshnum ishíshmasrum tárúmna nunasha, ashí mash' antukártatui.
- 4 Tuma asamtai, wi shuárchiru, aya atumí iniashín mainiána au ishankáirap.
- 5 Antsu iwiakman atankí, tunkuruánam akupkámnia nu ishankatárum. Nekás aya nuke ishankatniuítrume.
- 6 Chinki ti kuítchasha surushtainkiáit ? Tuma aínk Arútam wáiniatsuk ?
- 7 Átumea imiánkas chínkish nankakáitrum. Áantrarum ishankáirap. Kame Arútmaka atumí intiashinsha nekápmar, mash' pénker wainniuíti.
- 8 Tinkás tájarme: Aents^u iimiainiámunam winia ayamrutainiána aun, Arútam-aents-ajasúsha Arutman Pasúkri iimiainiámunam núnaka ayamrukártatui.
- 9 Antsu, aents^u pujuiniámunam winia ayamrutainiátsna aúnka, Arutma Pasúkri pujuiniámunam ayamrukchártatui.
- 10 Yákesh Arútam-aents-ajasún kajerainiána aúnka tsankurarmiániiti. Antsu, lwiáikratniun nakítrar, wishikiainiána aúka penke tsankurachma áartatui.
- 11 Ayámtainiam, makukratáiniam, úunt makurmakrumínsha, waríniak títiaj, itiúrak ayamrumaktaj tu enentaimsáirap.
- 12 Kame lwiáikratin warí titiátrum nuna jintinramáttarme – timia, tímiaja, Jesús.

Rk. 12, 13.

Kuítjai iwiákma sumakchamniáiti.

- 13 Aents^u irúnar ámanum, chikíchik aents^u chicháak: - Jesúsá, winia yatsur chicháarkum: "Apáram ikiurtamkimia nu, amé yatsumjai nakarnaikiatá" titiá - timia, tímiaja.
- 14 Tu tai, Jesús chicháruk: - Kame, ya iwiárin, túrutskesh makúkratin atá tusa, anaitiúkma ? -
- 15 Tinia, ashí aéntsun chicharáiniak: - Atumsha enentaimsatárum: Kuitjáinkia atumí iwiákma sumákchamnia asárum, áantrarum chikichan wariri akasmatkáirap - timia, tímiaja.
- 16 Tura, tu jintintiwármia, tímiaja. - Yaúnchu aents^u kuítrintin nii ajarín arak, ti núkap júukma, tímiaja.
- 17 Núkap asamtai: "itiurkátjak ? Tuink ikiústaj ?"
- 18 Tu enentaimsúa iniáis: "Jean ti úuntan najanan, nuí mash' winia yurúmkarun ikiustajai.
- 19 Turan, ti núkap yurumkan irumra asán: "Ayamú pujutjai; yurumatjai; umartajai; núkap uwitin páchitsuk wi wakéramun najanatjai, títiatjai" tímia, tímiaja.
- 20 Tu enentáimia pujái, Arútam chicháruk: "Netse, nekachuítme. Ju kashi jakáttame. Mash' irúmramna aúsha yának juakat' ?" timia, tímiaja -.
- 21 Tuasúa amik: - Arúتمانun takákmatsuk, aya níiniunak írumna nuka tumáwai - timia, tímiaja, Jesús.

Waríniak utsúmtiaj, tírap.

(Mt. 6, 25).

- 22 Jesús nii aéntsrin chicháreak: - Waríniak yuataj, waríniak entsartaj, tusárum, aya nuke enentaimsáirap.
- 23 Kame iwiákmaka yurúmkanash nankakáiti. Iniáshkia entsatáiniash nankakáiti.
- 24 Enentaimsatárum: chinkisha yakí nanámmainiak, yurumkan arakmainiátsui. Tura júuk, yurumkan ikiuiniátsui. Tuma aínk

Rk. 12,25.

- Arútam ayurainiátsuk ? Aíntsank átumka chinkisha nankaka asákrumin, yaintmaktátrume.
- 25 Ya nii iniashín ishíchichik atsakramniáit ?
- 26 Ishitiúpchichia au najánatin tujintniuitiátrumsha, itiúrak úunta nusha najanamniáitrum ?
- 27 Kujukj' iistárum. Kutamainiachiat, awantainiachiatsha, ti pénker Sarumúnknash iniánkas entsainiáwai.
- 28 Átum iimiarcháitrome. Kame Arútam, kampuntniúnam kukuj' kashinkia jawíntiar wajatniun aéntsea nu, atumnia imiánkas-ka amastátrume.
- 29 Waríniak yuataj ? Waríniak umartaj ? Aya nuke tuke enentáimia pujuírap.
- 30 Aya ju nunkánmayan enentaimainiána au, nunak takústaj-sar takakmainiáwai. Antsu átumka: "Arútam Apá ii utsúmajnia nuna nékawai" tusárum,
- 31 Arútam-Irunramúnam takakmastárum. Turakruminkia, ashí mash' patátak amastátrume.
- 32 Wi shuarchirú, áantrarum ishankáirap. Kame atumí Aparí Arútam-Irunramun warás amasuítrume.
- 33 Tákakrumna nu surúkrum, utsumainiána au susatárum. Kasa áinia aúsha kasámkachmin, kaniásha amúkchamnia, Nayáimpiniam kuít irúmrrarum, tuke takustin ikiaunkatárum.
- 34 Kame aya atumí kuítri pujana nuí, tuke enentáimiarme - timia, tímiaja, Jesús.

Aneára pujustárum.

(Mk. 13,33; Mt.24,43;6,19).

- 35 Jesús chicháak: - Iwiárnarum, shirípiik ekémakrum, náksamstatárum.
- 36 Aents^u nii úuntri nampernúmia ta, untsunkui, wáitin urátiaj-sa naka pujana aínsarmek pujustárum.
- 37 Naka pujúinia au, warasartí. Kame úuntrisha ta, irur, ayurawártatui.

Rk. 12,38.

- 38 Kashi ajámpek, tsawamunmánkesha támatai, naka pujúinia au nekás warasartí.
- 39 Nekatárum: Jéentin kasa tátinian nékakka, warinchun kasartukáink tusa, anear pujuínti.
- 40 Atumsha aínsarmek Arútam-aents-ajasún tátinri nékachu asárum, tuke iwiárnara pujustárum - timia, tímiaja.Jesús.
- 41 Nuínkia Kaya chicháak: - Támena nu íinkik tukártam, túrutskesha máshiniuk tame ? -
- 42 Takui: - Wats, úuntka, takákmaun íisar, akikiarat' tusa, aents^u nekaun apújeatsuk ?
- 43 Nu aents^u pénker pujakka, warastí.
- 44 Kame nii úuntri ashí mash' tákakea nuna wainkiat' tusa apujstáttawai.
- 45 Antsu, nu aents^u apújsamu, wínia úuntur yajá pujawai tusa, takakmáinian katsúmkar, aya yurumatniun, nampéktinian pujurun
- 46 aneáchma nii úuntri tarín: "yajauchitme" tusa, ashí mash' atántar, jiki akupkáttawai.
- 47 Kame takarín neka nekayat, nii úuntri taman amíatsna au, kajérkamú áttatui.
- 48 Antsu nii úuntri wakéramun nékachu asa, najáneatsna nuka, ti kajérkamú áhattui. Núkap susamua nuka, núkap seámu áttatui. Aínsank ti núkap susamua nu, imiá núkap seámu áttatui - timia, tímiaja, Jesús.

Itiúrchat apújsamu.

(Mt. 10,34;5,25;16,2).

- 49 Jesús chicháak; - Wíkiea jiya aniun nunká apujstáttaj-san tawitjai. Nu ji aesú pujut' tusan, ti wakérajai.
- 50 Aínsanak, imiantiniáitjai. Nu wárik amínkiat' tusan, wáitsan naka pujajai.
- 51 Átumka "ju nunkánam warástinian itiauíti" turútsurmeash ? Atsá, wíkiea itiúrchatan apujstáttaj-san tawitjai.

Rk. 12,52.

- 52 Kame yamáikia jeánmayá númtak nakánairártatui.
- 53 Apá nii uchirín kajéreakui, uchisha nii aparín kajerkáttawai. Aínsank, nuku nii nwantrin kajéreakui, nawantrisha nii nukurín kajerkáttawai. Núnisank, tsatsari najatín kajérakui, najatisha tsatsarín kajerkáttawai - timia, tímiaja.
- 54 Jesús junash aéntsun chicharáiniak: - Átumka yuránkim arákani te ajasmatáinkia, "yutúktatui" tákurmin, nékasenk yutúktatui.
- 55 Nase ti nasentkuíinkia, "esatrúrtatui" tákurmin, nekás esatrúrtatui.
- 56 Ániutírmesha, nu nekayátrumsha, urukamtai yamáí wi túrajna nu wainiayátrum nékatsrum ?
- 57 Urukamtai pénger ana nu wainkiárum, "penkeráiti" tátsuram?
- 58 Amé numásrum makukratáiniam juramkuíinkia, makúrmar wáitiai-jeánam ikiurmainiátsaink, jintiá wésam, itiúrchatrum iwiaratá.
- 59 Turachkumka, mash' akí akíkmakuam j̄j̄inkít̄t̄iame - timia, tímiaja, Jesús.

AKANKAMU 13.

Numi nerechu.

- 1 Chíkich' aents^u Jesusan weántukar, itiur Piratu Kariréanmayá aéntsun ayámtainiam máawar, nii numpén íikmakj̄ai pachimtikiámia nuna ujakarmia, tímiaja.
- 2 Nuna antuk, Jesús chicharáiniak: - Átumka nu kariréu chikíchnash iniánkas, tunartin áarmiayi, tárumek ?
- 3 Atsá, antsu atumsha chíkich jintia achiachkúrmeka, níiya aínsarmek jakáttarme.
- 4 Núnisank, Sirué jea yumpúneak, nawe-yarush' aéntsun kajenkmia nu, Jerusarenknumiáj̄áinkia imiá tunartin áarmiayi, tárumek ?

Rk. 13,5.

- 5 Atsá. Antsu atumsha chíkich jintia achíachkúrmeka, níya aínsarmek jakáttarme - timia, tímiaja.
- 6 Júnash Jesús aújmatuk, chicháak: - Aents^u ajánam yáasun takumia, tímiaja. Nerén akarmártaj-sa werí, nerekchan wainkiámia, tímiaja.
- 7 Tumakui, takakmaun chicháruk: "Menáintiu Uwitin nerekchan wáiniajai. Tuma asamtai, áantar wajáink túsam, tsupíkiám ajapatá" timia, tímiaja.
- 8 Takui, "Uuntá, ju uwitin iniaisatá: wi ti pénker ipiántratjai.
- 9 Túramash, nereachkuínkia, tsupíkiám ajapatá" -timia, tímiaja.

Saketin tsuárma.

- 10 Jesuska Saké tsawanttin ayámtainiam unuíkiartú pujumia, tímiaja.
- 11 Nuí nua waweámu, nawe-yarush' uwí wáwek tunamam-tikramu asa, pujuruya, tímiaja.
- 12 Jesús nuna wáiniak, untsuk, chicháreak: - Nawantrú, pénker ajasume - tinia,
- 13 ewején awantsamtai, nu chichámaik nakuénak, pénker ajás, Arutman yumínksamia, tímiaja.
- 14 Turamtai, ayamtain úuntri kajek, chicháak: - Ujuk tsawant takákmasin awai. Urukamtai saketin tsuamártaj-sa winiárum ? Saketin tátsuk, chíkich tsawant tatiniáitrume -
- 15 Takui, Jesús chicháruk: - Ániutírmesha, atumsha saké tsawanttin tanku atichukáitrum ? Ayurchakáitrum ?
- 16 Ju núanash, Apraáman nawantrin, nawe-yarush' uwí wáwek jinkiámun, saké tsawantin atirchamniakáit ? - timia, tímiaja.
- 17 Tu chicháakui, nii numásrinkia natsamainiakuísha, ashí mash' aents-tujíntiamun wáinkiar, ti waráarmia, tímiaja.

Aujmátsamu.

(Mt. 13,31; Mk. 4,40).

- 18 Jesús chicháak: Arútam-Irunrámuka urukuit ? Warijaj metekmar', iisminiáitiaj' ?
- 19 Aents^u nii ajariín uwí jinkiáchirin aramia nuniniáíti. Nu tsakar, numi úunt ajásmatai, chinkisha nukeén kanin ainiáwai, tímia, tímiaja..
- 20 Ataksha chicháak: - Arútam-Irúnramu warijaj metekmar', iisminiáitiaj' ?
- 21 Nua karinian enketea aniuíti. Nu karín ishichkitiat, núkap karímtikiui - timia, tímiaja.

Wáiti aánkamu.

(Mt. 7,13; 8,11; 19,30; 23,37).

- 22 Jesuska Jerusarénknun wéak, matsatkámunam, irutkamúnmasha jintírkutak wemia, tímiaja.
- 23 Nuí aents^u aníntrak: - Uuntá, nékasenk ishíchik aents^u uwemrártata ?
- 24 Tu tai, Jesús chicháruk: - Kakáram ajásrum, wáiti pipiknúmani wayatárum. Nekás tájarme: nuníni untsurí aents^u enkemataj tukamá, tujintkiártatui.
- 25 Jéentin wáitin epénmiatai, átumka aá wajasrum, "Uuntá, uratritiá" takurminsha: "Yatsukáitrum, nékatsjarme" turamtiátrume.
- 26 Nuí átumka chicháakrum: "Ámijaj irunrar' yurúmmiaji; ii irutkamurínish jintínkiartimiáme",
- 27 Takurminsha, chicháak: "Nékatsjarme; tuyantskáitrum ? Yajáuch' asárum, winiaiyanka enkatmastárum" turamtiátrume.
- 28 Nuí átumka jinium utsáamu esáakrum, Apraam, Isáak, Jakup, ashí mash' waimiákusha Arútmanam pujúinia wainkiárum, wáitiakrum uuttiátrume.

Rk.13,29.

- 29 Ashí nunkánmaya^u aents^u, jutíuchu ainiáksha, Arútam-Irunramúnam kaúnkar, ti nampermawártatui.
- 30 Yamái éemak pujuiniána au, ukúnam pujusártatui. Antsu péejchach' ukúnam pujuiniána au éemak, ti nankámaku pujusártatui - timia, tímiaja.
- 31 Nu chichámaik pariséu taríar: - Juyanka wetá; Erutes mantamátasa wakérawai -.
- 32 Tuiniákui, Jesús chicháak: - "Yamáí, kashínish wawekan jíikin, tsuákratran, nu kashini amíktatjai" tawai tusárum, nu Kujáncham ujautárum.
- 33 Yamái, kashín, tura kashinia nuísha takakmastiniáitjai; kame waimiákuka chíkich irutkámunam mantámnatsuk, Jerusarenknum mantamnatniuíti.
- 34 Jerusarenká Jerusarenká, urutmá wáimiakua akuptukmaitiátam, tukúram maachuítiam ? Urutmá, amé uchirmin atash' nii shiámpchirin etéktana aitkiataj takuísha, ámeke nakítráitiam ?
- 35 Tuma asamtai, atumí ayámtairi wáak juáktatui. Nekás tájarme: "Arutmá Uchirí winiána au yuminksatái" tachakrumka, penkesha waitkiashtátrume - timia, tímiaja, Jesús.

AKANKAMU 14.

Eáru tsuárma.

- 1 Chíkich tsawanttin Jesuska, pariséu nankámakun jeén yurumátaj-sa wématai, Saké tsawant asamtai, makutái túsar, íí awajiármia, tímiaja.
- 2 Nuí aents^u ear, jaa pujúmia, tímiaj.
- 3 Nuíkia Jesús unuikiártinian, pariséunash aníntruiniak: - Saké tsawanttin aents^u tsuártin penkerkái ? -

Rk.14,4.

- 4 Tamaitiat, chichátsuk pujúinia asamtai, jaan ewéjnum achik, tsuar, akupkamia, tímiaja.
- 5 Tura, chicharáiniak: - Wats, yaki tankurí wáanam iniármatai, saké tsawanttin jútsuk iniaisamniáit ? –
- 6 Takui, nékachu ásar, aikcharmia, tímiaja.

Éemka pujústaj tama.

- 7 Ipiámu éemak pujústaj-sar wakeruiniákui, Jesuska chicharáiniak:
- 8 - Yákesh nuatnainiámunam ipiatmainiákui, éemkam, ekemsataj tip; kame amin nankátamka ipiámu aminiáiti.
- 9 Turawákminkia ipiatmá chichártamuk: "Ju aents^u ekemsat' túsam, ámeke ukúnam pujutá". Túramkui, natsáram ukúnam ekemúttame.
- 10 Antsu, ipiatmainiakuíinkia ukúnam pujustá. Turawákminkia, ipiatmá chichártamuk: "Yatsuchí, éemkam pujustá". Turamkui, ashí iimiainiái naatkáttame.
- 11 Kame nankámantu ajana nuka, péejchach' átatui. Antsu péejchach' ajana nuka, nankámantu átatui - timia, tímiaja, Jesús.

Péejchach' ipiámu.

- 12 Jesuska, ipiámia nuna chicháruk: - Nampérnum amé shuar, tura warírtin áinia aúsha ipiawáip. Kame níisha nútiksank turutmawármatai, nújaink akikma átatme.
- 13 Antsu nampérmakun kuítrinha, tunamaru, jì kusurú, shutuap áinia aúsha ipiawartá.
- 14 Turawákminkia, níinkia akirmákchamnia asármatai, warastá. Kame jákaru aneántmanum Arútam mash' akirmáktatui - timia, tímiaja, Jesús.

Rk. 14, 15.

Ipiámu nakitraru.

(Mt. 22, 1).

- 15 Jesús tuasúa amíkmatai, chikíchik aents^u ipiámu chicháak:
- Arútam-Irunramúnam ipiámu átatna nuka warastí -.
- 16 Tu tai, Jesús chicháak: - Yaúnchu aénts^u nampérmak, ti núkap aéntsun ipiámia, tímiaja.
- 17 Tura, mash' iwiarnármatai, nii takárniurin chicháruk: "Ashí mash' iwiárnaru asamtai, winiartí, táwai, titiá" tínia akupkamia, tímiaja.
- 18 Tu ujamaitiat, ipiámuka nakitrarmia, tímiaja. Chíkich chicháak: "Nunkan sumármaku asán, iyútaj-san wéajai; tsankurturtá" timia, tímiaja.
- 19 Aíntsank chikichsha: "Nawe tankun sumármaku asán, penkeráshit tusan, iyuwajai; wáit aneásam, tsankurturtá" timia, tímiaja.
- 20 Antsu chíkichkia chicháak: "Yama nuátka asán, wechamniáitjai" timia, tímiaja.
- 21 Takárniuka waketki ta, nii úntrin mash' ujakmia, tímiaja. Úntka ti kajek, chicháak: "Matsatkámunam weme, jintiá aents^u warírtincha, tunamaru, kusurú, shutuápsa wárichik untsúkam, itiartá".
- 22 Tu tai, takárniuka we, waketki ta, chicháruk: "Uuntá, ipiámu tarmatáisha, jéeminkia piakchayi" timia, tímiaja.
- 23 Ataksha nii úntri chicháruk: "Winia jeáru wari piakat' túsam, jintiá, tesáknumsha wekásam, aents^u kakántram, wárik itiartá.
- 24 Kame, wi ipiamaitiat tacharáinia aúka, wijai penke nampermachártatui" - tu aujmatsamia, tímiaja, Jesús.

Jesús nemársatin itiurchatáiti.

(Mt. 10, 37).

- 25 Untsurí aents^u nemaráiniam Jesús chicharáiniak:

Rk.14,26.

- 26 - Yákesh winín winítiasa, nii aparín, nii nukurín, nii nuwén, nii uchirín, nii yachín, nii umáiniash nakítrar, tura níinkisha nakitmámatsna nuka, wíniachu átatui.
- 27 Wínia nemartayat, itiúrchatan katsúnteatsna nuka, wínia achamniáiti.
- 28 Atumsha jea jeámstusuk, kuít jeáwash tusárum, enentaimchakáitrum ?
- 29 Kame jea nankamayátrum, amuktin tujintiakrumnínkia, ashí aents^u nuna wáinkiar, wishikramráttarme.
- 30 "Juka nékachu asa, nankamayat amukchayi" turamtiátrume.
- 31 Aíntsank nankí-juu chikichjai mániktaj-sa, éemka "urutma nankírtinniak tákakeaj, tura níisha urutma tákakea" tusa, enentaimchakáit ?
- 32 Nupetkachminiaitkiúnka, nuntumainiátsaink, aéntsun akúpak, "pénker iwíaratái" tátsuk ?
- 33 Núnisank, yákesh ashí mash' iniáísatniun nakitia nuka, winia achamniáiti.
- 34 Wee penkeráiti. Tumaitkuísha michu ajasmatáinkia ejeakachminiáiti.
- 35 Yajáuch' asamtai, ajapatniuíti. Ya antúktaj ta, nu antuktí.

AKANKAMU 15.

Tanku menkaka.

(Mt. 18, 12).

- 1 Ashí mash' tunartin, aéntsush yajáuch' áinia aúsha, "Jesús anturkatái" túsar, kauniármia, tímiaja.
- 2 Tumainiákui, pariséu unuikiártinjai aujmatáiniak: - Ju aéntska tunártinjai irúnar, níijai yurúmeawai - tíarmia, tímiaja.
- 3 Nuíkia Jesús juna aujmatsamia, tímiaja.

- 4 - Atumí tankurí washim tákakma chikíchik menkakamtai, chíkichkia ikiúakrum,menkaka nu eáktaj-srum,weátsrumek?
- 5 Tura, wainkiármeka, warásrum jukírurum,
- 6 jeá tárurum, átum shuar irúrum: "Tankur menkakan wainkiájai; atumsha warastárum" tíchakáitrum ?
- 7 Aíntsank chikíchik aents^u tunártin nii anentáin yapajiamtáinkia, Nayáimpinmanka tunártincha pujúinia aúdash nankákar, nampermatawártatui.
- 8 Nuásha nawe kuit tákakma chikíchik menkátukam, shiripkin ekémak, pénger japímiak, eachukáit ?
- 9 Wáiniak, nii shuaran untsur: "Warastárum, kuítian emenkatmákmiak nuna wáitmakjai" tichakáit ?
- 10 Núnisank, chikíchik tunártin nii anentáin yapajiamtáinkia, Arutman Pasúkrisha ti warasártatui - timia, tímiaja, Jesús.

Uchi menkaka.

- 11 Junasha Jesús aújmatuk, chicháak: - Yaúnchu aents^u jimiará uchín takakuya, tímiaja.
- 12 Patái aparín chicháruk: "Nunka nakákam, winiásha surustá" tu tai, jimiaapétek nakak, susamia, tímiaja.
- 13 Wárum tsawant pujús, patáinkia ashí mash' surur, kuítian achik, yajá nunkánam we, nii yajáuch' wakéramun nájanuk, kuítrin amukmia, tímiaja.
- 14 Nuí pujái, tsuka iniámtai, tákakcha asa, utsúmmia, tímiaja.
- 15 Nuíkiak takatan wáiniak, aéntsun takárniuri ajás, kúukan wáinkiatin kampúntniunam wemia, tímiaja.
- 16 Yurúmak atsakui, tsukama asa, kúukan yurúmkarin yuátaj-sa wakerimia, tímiaja.
- 17 Nuíkiak wáitiak, níinki enentáimias, chicháak: "Winia aparjai takákmainia aúka, ti pénger yurumá pujuiniawapi. Antsu wíkiak tsukái waitiú wekaja!

Rk. 15, 18.

- 18 Urukamtai waketkichminiáitaj ? Jeán, aparún chichárukun: Aparú, Arutman umírtsuk, amíniash umírkachu asán, tunámkajai.
- 19 Yamáikia: uchirú, turutip. Antsu ame takarniúrmea aínsamek iirsatá, títiatjai" tíaia,
- 20 ené enentáimkua, aparín waketkimia, tímiaja. Aparinkia árantiank winián wáiniak, wáit anéntar, "uchírúa" tinia, miniákmia, tímiaja.
- 21 Tura uchi chicháruk: "Aparú, Arutman umírtsuk, amíniash umírkachu asán, tunamkajai. Yamáikia uchirmea ánin iirsáip" timia, tímiaja.
- 22 Tákuisha, aparinkia takárniurin chicharáiniak: "Wárichik pushí yamáram itiarum, aéntsrum, ewéjnum kuri apújturum, nawénam ewétaisha apujtustárum.
- 23 Túrarum, warasar' yurumawarmi, tanku tukuís íisrum, maatárum.
- 24 Kame winia uchir jaka aínsank menkakamia nu, ataksha iwiáku tarutyi. Yaúnchu menkakamia nuna wainkiájai" takui, namperan juarkiármia, tímiaja.
- 25 Nii uchirí iwiáirinkia takátnum weu waketas, jeá nuntumas, jantsémainiak, shakapan, tampúrnash túntuinian antukmia, tímiaja.
- 26 Ta, takárniurin untsuk: "Nusha warimpiáit ?" tu aníntrakui:
- 27 "Amé yatsum menkakamia nu, iwiáku waketki támatai, ápaka tanku tukuisan maa, nampermáteawai" timia, tímiaja.
- 28 Takui, iwiáirinkia kajek, wayatniun nakitiákui, nii aparí jjiintiukí: "Uchirú, urukamtai áiniam ? Wayatá" tíaia, tímiaja.
- 29 Tu táisha, chicháruk: "Wíikia ámijaink tuke pujusan, takákmasan tuke umirniúítjame. Tuma aínk: ishíchkisha nii aǵǵai nampermat' túsam, tankúchiksha suruscháitme.
- 30 Antsu ámeaka, uchíram kuítrumin jukí, tsanirmasúa amuk támatai, tanku tukuís íisam, mántame" timia, tímiaja.
- 31 Takui, aparí chicháruk: "Uchirú, ámeaka tuke wijai pujá asam, wi tákakjana nu mash' aminiuíti.

Rk. 15,32.

32 Túmasha, ame yátsum jaka aínsank menkaka, iwiáku waketkí tau asamtai, ataksha wáinkia asar', warasar' nampermatniuítji" timia, tímiaja.

AKANKAMU 16.

kuítian-juu enentáimin.

- 1 Ataksha Jesús aújmatuk, nii aéntsrin chicharáiniak: - Yaúnchu aents^u kuítrintniun: "Amé takárniuram, kuítian-juu, kasártamui" tu ujakarmia, tímiaja.
- 2 Tu tai, úunt untsuk chicháruk: "Nusha itiurkámunam turámainia ? Yamáikia jjíktiátjame; ashí mash' sururma anújram, surustá" timia, tímiaja.
- 3 Kuítian-júuka, nii úuntri tu tai: "Yamáisha warí itiurkátjak ? Takakmástinian jeátsjai. Kuítian seámkunash natsarcháintjash ?
- 4 Ayu nuíkia, úunt jjíki akuptakuísha, aents^u yaintkiarat' tusan, tumashrin ementukártatjai".
- 5 Tinia, nii úuntrin tumashmakaruya nuna chikíchkimias untsuk, éemkan chicháruk:
- 6 "Urutmá úunt tumashítiam ?" "Washim muítsan kuntut aimkiámun tumashítjai" tu tai: "Wárik juí ekémsam, aya ewej-nawe muíts aáram, kuesmartá" timia, tímiaja.
- 7 Nuyá chikíchnash chicháruk: "Amesha urutmá tumashítiam?" "Aíntiuk-washím nusén aimkiámun tumashítjai" tu tai: "Aya menáintiuchik-washim aimkiámu aáram, kuesmartá" timia, tímiaja.
- 8 Nii úuntri nuna neká chicháak: "Penkerjájinkia yajáuch' aents^u áinia au imiá enentáimin ainiáwai" tusa, kuítian-juu kasamka asamtáisha: "Nekás enentaimniuítme" timia, tímiaja -.
- 9 Jesús nuna tíaia, chicháak: - Wisha tájarme: Yajáuch' kuítjai utsumainiána au yáinkrum, nawamkatárum.

Rk.16,10.

- Turakrumnínkia, atumí kuítri amukamtáisha, níisha yáinkma ásar, tuke iwiáku pujústinian Nayáimpiniam juramkíttiarme.
- 10 Takat ishitiupchitkuísha, pénker takakmasúa nuka, úunt takátash susamu átatui.
- 11 Antsu takat uchichitkuísha pénker takákmascha nuka, úunt takátash súsachma átatui. Tuma asamtai, yajáuch' kuítjai pénker takakmaschaitkiurmínkia, yaki nekás kuítian amastárum?
- 12 Kuít chikíchna asamtai, pénker íschaitkiurmínkia, yaki íiniuna amastárum ?
- 13 Takákmausha jimiará úuntrin takuschamniáiti. Kame chikíchkiniak anéak, chikíchniaka kajérkattui. Atumsha kuít aneakrumka, Arútmaka aneátsrume - timia, tímiaja, Jesús.
- 14 Pariséuka kuítrintin ásar, nuna antúkar, Jesusan wishikiármia, tímiaja.
- 15 Tumainiákui, chicharáiniak: - Átum "ti penkeráitjai" takurminsha, Arútmaka atumí anentáin nékawai. Kame Arútmaka "yajauchíti" tusa, penke nakitia nuna, aéntska "penkeráiti" túsar, ti wakeruiniáwai.
- 16 Yaúnchu chícham, yaúnchu waimiakusha, Juankáin aminkíarmiayi. Nuyanka Arútam-Irúnramu nánkamu asamtai, nú enkematin kakáram ajastiniáitji.
- 17 Tumaitkuísha, yaúnchu Arútam timia nusha, ju nunka amukuísha, tuke átatui.
- 18 Áishmank nii tarímtarin ajapa, chikichan nuátea nuka, tsanírmawai. Aíntsank tarímiat ajápamun nuátea nusha tsanírmawai - tímia, tímiaja, Jesús.

Rásaru kuitríntniujai.

- 19 Jesús aújmatuk, chicháak: - Yaúnchu aents^u ti kuítrintin pushín ti pénkeran entsar, tuke tsawantin ti pénker yurúmuk, nampermáuya, tímiaja.

- 20 Chíkich aéntsush, Rásaru náartin, kuítrintcha, kuí kuímiaru
ajasú, kuítrintniun waitiriín pujús,
- 21 yurúmak tsáinias akákean júuk, yu pujuya, tímiaja.
Yawasha tariar, nii kuímiarin nukatin áarmia, tímiaja.
- 22 Rásaruka jakamtai, Arutman Pasukri Nayáimpiniam
Apráamai jukiármia, tímiaja. Núnisank kuítrintniusha
jakamtai, iwiarsarmia, tímiaja.
- 23 Nuka Tunkuruánam ti wáitias pujús, Nayáimpiniam íimias,
Rásaru Apráamai ti warás puján wáiniuk,
- 24 chará ajáak: "Aparú Apraamá, wi ti waitiájai. Wáit
anéntusam, Rásaru nii ewéjchirin entsánam injiás, wínia
iniáirun imichturat' túsam, akupturkatá" timia, tímiaja.
- 25 Takui, Apráam chicháruk: "Uchírú, enentaimsatá. Ámeka
nunká pujúsam, ti warasú asam, yamáikia nú
waitsatniuítme. Antsu Rásaru nunkánam ti wáitsa asa,
yamáikia juí tuke warastiniáiti.
- 26 Tuma asamtai, íikia atumiín jeachminiáitji. Aíntsarmek
atumsha íinin tachamniáitrume" timia, tímiaja.
- 27 Takui:"Nuíkia Aparú, wáit aneásam, wi shuárnum,
28 winia ewej yatsur, níisha waitsátniunam táaraink, nuna
ujakarat' túsam, Rásaru akupkatá" timia tímiaja.
- 29 Nuíkia Apráam chicháruk: "Muisesan, tura waimiákunash
tákakainiáwai. Nuna anturkartí".
- 30 Tu tai: "Atsá Aparú, juyá jákaru jearí ujamka, nekás
enentaimrártatui".
- 31 Tákuísha, Apráam chicháruk: "Muisésan, tura
waimiákunash anturainiáchusha, itiúrak jákaru jearí
ujamsha anturkarat' ?" timia, tímiaja -. Tu aujmatamia,
tímiaja, Jesús.

AKANKAMU 17.

Tunámtikma.

- 1 Jesús nii aéntsrin chicharáiniak: - Aents^u tunamín, tura tunámtikin atsuchminiáiti. Tumaitkuísha, tunamtikiainiána au yumínkramu áartatui.
- 2 Núnaka, chikichan tunamtikiainiátsaink, kuntújnum kayan netuáwar, entsá ajapainiákka, máak aaráinti.
- 3 Atumsha ju turatárum: Amé yátsum kajértama chicháarkam, enentaimramtáinkia, tsankuratá.
- 4 Tuke tsawanttin ti núkap kajertameayat, "atakká turáshtatjai" tusa, enentáimiar tarutrammiatáinkia, tsankuratá - timia, tímiaja.

Péejchach' enentáimsatin.

(Mt. 17,20;21,21).

- 5 Akatrámuka chicháiniak: - Uuntá, íimiaru awajkartustá -
- 6 tuiniákui, Jesús chicháak: - Ishíchkisha iimiaruitkiúrmeka, ju numi chicháarkuram: "Ukuíniakam, nayántsanam wajatá" takurminkia, turunawáinti.
- 7 Atumsha, takakmau tankun wainsúa, pimpikí támatai: "Juí pujustá, ayúratjam" tiniukáitrum ?
- 8 Atsá. Antsu: "Wárik apátuk iniáarkam, suruitiá. Wia wiá yurumantai, ámeká arum yurumatá" tichakáitrum ?
- 9 Takákmauka timiátrua takakmasmatáisha, yuminkniukái-trum ?
- 10 Aíntsarmek atumsha Arútam awemamu amíkrum: "Takákmau asar', najanatniuítiaj' nuke umikji" titiárum.

Nawe aénts^u kuchápruku.

- 11 Jesús Jerusarénknun wesa, Kariréa, tura Samaría tesákrini nankamakmia, tímiaja.
- 12 Irutkámunam jeámtai, nawe aents^u kuchaprukaru árantak taríar,
- 13 chará ajákiar: - Uuntá, Jesusá, wáit anenkartustá -
- 14 tuiniákui: - Wea matsátmanum wetárum - timia, tímiaja.
- 15 Jintiá wénak, pénger ajasarmia, tímiaja. Ashí mash' pénger ajainiáksha, aya chikíchik Arútman naatmámantikki, chará chará ajakí ta,
- 16 Samarianmayáitiat, Jesusan taket tikíshmatar, yuminksamia, tímiaja.
- 17 Tumakui Jesús chicháruk: - Náwechuk pénger ajasúram ? Chikichsha tuá weára ?
- 18 Aya jutíuchukek Arutman yuminksataj tusa, tai ? -
- 19 Tinia, chicháruk: - Wetá; íimiaru asam, ewemrame - timia, tímiaja.

Arútam-Irúnramu.

(Mt.24,17)

- 20 Pariséu Jesusan aníntruiniak: - Urutáink Arútam-Irunrámusha tatiniáit ? - Tuiniákui: - Arútam-Irunrámuka wainkiachminiáiti.
- 21 Juí pujawai; aí pujawai tichamniáiti. Antsu nekatárum: Arútam-Irunrámuka yamáisha atumiín pujawai - timia, tímiaja.
- 22 Tura nii aéntsrin chicháruk: - Ukúnam Arútam-aents-ajasun tsawantri wainkiátaj-sa wakerakrúmsha, wainkiashtátrume.
- 23 Nuí chicháiniak: "Juí pujawai; aí pujawai" turamkurminsha, "nekasapítia" tusárum, wérap.
- 24 Kame Arútam-aents-ajasú winiákka, nékachma cháarpia núnisank Nayáimpinmaya newa ajakí, tátatui.

Rk.17,25.

- 25 Antsu éemkaka aents^u kajérkamu ajás, ti waitsatniuíti.
26 Arútam-aents-ajasun tsawantri jeámtainkia, Nué pujámunam urukawármia aínsank ainkiáttawai.
27 Yurumáwar, umárar, áishmank nuasha nuatnáirar ajá matsatainiái, Nuéka kanúnam enkemamtai, entsa amáarak amukármiai.
28 Núnisank Rut pujáisha, yurumáwar, nampékar, sumákar, súruiniak, jeánash jeámiar ajainiái,
29 Rutka Sutuman ikiúkmiatai, Arútam nayáimpinmaya_u ji keán yutúmtik, mash' amukármiai.
30 Aínsank Arútam-aents-ajasú táamunam turunáttawai.
31 Nu tsawanttin áach' pujayátam, warinchu jukítiaj-sam, jeá wayawáip. Takátnum pujayátam, jeá wakétkip.
32 Rutan nuwé urukamia nu enentaimsatárum.
33 Kame ya iwiáku pujústaj-sa wakera nuka, iwiákmarin emenkáktatui. Antsu nii iwiákmarin súana nuka, tuke iwiáku pujústatui.
34 Nekás tájarne: Nu kashi, jímiar tsanink kanú tepenakuísha, chíkíchik jukimiu átatui.
35 Jímiar nua tsanink takakmainiakuísha, aya chíkíchik jukimiu átatui - timia, tímiaja.
36 Nuíka Jesusan aníniak: - Uuntá, nusha tuínk turunat' ? -
37 Tu tuiniái: - Iniash' kaurú ana nuí, chuánksha kautainiá-tsuk ? Aínsank Arútmanam turunáttawai - timia, tímiaja, Jesús.

AKANKAMU 18.

Pimpítsuk anentruatniuíti.

- 1 Jesuska, pimpítsuk tuke anentruawarat' tusa, aújmatuk, chicháak:
2 - Yaúnchu irutkámunam makúkratin, Arutman, aéntsnasha ishamcha, pujumia, tímiaja.

Rk.18,3.

- 3 Nuínk nua waje tarí, chicháruk: "Winia numásur makurtin, chícham najatruatá".
- 4 Ti núkap takuísha, penke nakitrayat, ataksha enentáimiar: "Arútmán, aéntsnasha ishamchaitiátnasha,
- 5 ju waje itit awájtink tusan, chichaman najátatjai" timia, tímiaja -.
- 6 Nuna tinia, Jesús chicháak: - Yajáuch' makúkratin timia nu antukúrmek ?
- 7 Aíntsan , aents^u yajáuch' awajtusáink túsar, tsawái káshisha tuke seámainia nuna, Arútam anturchakáit ?
- 8 Nekás tájarne: "Arútmaka antúrak, wárichik yainkiártatui. Túmasha, Arútam-aents-ajasú ataksha ju nunkánam páant winiak, íimiarun wainkiártimpiash ?" - timia, tímiaja.

Pariséu kuítian-júujai.

- 9 - Íchik penkeráitji, chíkich' yajáuch' ainiáwai - aents^u tu enentaimainiákui, Jesús juna aújmatsumia, tímiaja.
- 10 - Jimiará aents^u Arutman anentruátaj-sar, ayámtainiam wayawarmia, tímiaja. Chikíchik pariséuyayi; chíkichkia kuítian-júuyayi.
- 11 Pariséuka naka wajás, nii anentaiín anéntrak: - "Arutmá, tuke yumínksamu atá. Kame wíkie aents^u kasa, imítmau, tsanírmá kuítian-juu aí pujana aniuchúitjai.
- 12 Antsu wíkie tuke atsákamutin ijiárman, suámunam wínie kuítrun nawe tesán tuke suwitjai" timia, tímiaja.
- 13 Kuítian-júuka ukúnám pujús, tsuntsumás, nii ewejejai netsépnum awátmameak: "Arutmá, wíkie ti tunartin asamtai, wáit anentrustá" timia, tímiaja -.
- 14 Nuna aújmatas, Jesús chicháak: - Kuítian-júuka nekás wáimiaku ajásmiayi. Antsu pariséuka waimiakchámiayi. Kame nankámaku ajáinia au, péejchach' ajasártatui. Antsu péejchach' ajáinia au, ti nankámaku áartatui - timia, tímiaja.

Rk. 18, 15.

Jesús uchijai.

- 15 Aéntska, Jesús takasat' túsar, nii uchirín itiaiiniákui, Jesusan aéntsriakia jiaakarmia, tímiaja.
- 16 Turuiniákui, Jesús untsúkar, chicharáiniak: - Úchikia winín winiarat' tusárum, iniaisatárum. Kame uchía anin ainiána au, Arútam-Irunramúnam pachintiuiniáwai.
- 17 Nekás tájarme: Úchia ánin ajachkúrmeka, Arútam-Irunramúnam enkemashtátrume - timia, tímiaja, Jesús.

Natsa warirtin.

(Mk.10,17; Mt.19,16).

- 18 Aents^u nankámaku Jesusan aníak: - Uuntá, tuke iwiáku pujústaj-san itiuurkatniuítiaj ? Ame pénger asam, turuttiá - timia, tímiaja.
- 19 Tu tai, Jesús chicháruk: -Urukamtai "pénkeráitme" turútam? Kame nekás pénger aya Arutmakete.
- 20 Arútam awemamu: "Tsanirmawáip, mankartuawáip, kasamkáip, tsanumráip, amé úuntrum arantuktá" tana nuka nékatsmek ? -
- 21 Jesús tu chicháream: - Uchich' asának, núnaka tuke uminiáitjai -.
- 22 Takui, ti aneás íis, chicháreak: - Nuíkia ishíchik taatrámeawai. Ashí mash' tákakmena nu utsumáinia au susartá. Túrakmeka Nayáimpiniam ti núkap takústatme. Túram, wínia nemartustá - timia, tímiaja.
- 23 Nuna antuk, nu aents^u ti kuítrintin asa, kúntuts enentaimramia, tímiaja.
- 24 Nuíkia Jesús esétar íis, chicháreak: Maj, kuítrintniuka Arútam-Irunramúnam enkematin ti itiuurchatáiti.

Rk.18,25.

- 25 Wátsek, pamá tupú jíín nankamakminkiaít ? Aínsank kuítrintin Arútam-Irunramúnám enkemachminiáiti - timia, tímiaja.
- 26 Aéntska nuna antúkar: - Nuíkia yaki ewemramniáit?
- 27 Tuiniákui: - Aents^u tujintiainiakuísha, Arútmaka penke tujintcháiti - timia, tímiaja.
- 28 Nuíkia Kaya chicháak: - Íikia: "amin nemársatjam" tusar', ashí mash' ikiukniuítji -.
- 29 Tu tai, Jesús chicháruk: - Ya Arútam-Irúnramun najanátajsa, nii jéen, nii nuwén, nii yachín, nii aparín, uchiríniash ikiúá nuka,
- 30 ju nunkánám núkap takús, nuyá_u Nayáimpiniam tuke iwiáku pujústatui - timia, tímiaja.
- 31 Nuyanka Jesuska nawe-jímiar Akatrámurin irur, chicháruk: - Yamáikia Jerusarénknum wéaji. Yaúnchu wáimiaku ashí mash' Arútam-aents-ajasun tíarmia nuka aminkiaítawai.
- 32 Kame apáchnum surukármatai, wishíkrar, wáitkiasar, usukiáwar,
- 33 asútrar, maawarmatáisha, menáint tsawántnumank aneánttatui - timia, tímiaja.
- 34 Akatrámuka nuna antukariat; - Warí túsank ta ? - tíar, nuna nekacharmia, tímiaja.

Ji kusurú.

(Mk.10,46;Mt.20,23).

- 35 Jerikúnám nuntumsarái, aents^u jí kusurú jintiá kuítian seámu pujumia, tímiaja.
- 36 Aents^u nankamáinian antuk: - Nusha warimpiáit ? - tu aníntrakui:
- 37 - Nasaretnumiá_u Jesús nankámawai - tíarmia, tímiaja.
- 38 Tuiniákui, chará ajakí: - Jesús, Tawitian uchiriya, wáit anentrustá - timia, tímiaja.

Rk. 18,39.

- 39 Aéntska: - Takamatrumsatá - tuiniakuísha, nu kakántar chará ajakí: - Jesús, Tawitian uchiriya, wáit anentrustá - timia, tímiaja.
- 40 Nuíkia Jesuska weayat, setur wajás; - Itiatárum - tía, itiármatai aníntrak:
- 41 - Warí itiurtukat' túsam, wakéram ? - Tu tai: - Úuntá, wainmáktaj-san wakérajai - timia, tímiaja.
- 42 Takui: - limtiá; íimiaru asam ewemrame - timia, tímiaja.
- 43 Nu chichámaik kusuruka pénker wáinmak, Arutman náatmamtik, Jesusan nemarmia, tímiaja. Aíntsarank ashí mash' aéntsush Arutman naatmamtikíarmia, tímiaja.

AKANKAMU 19.

Jesús Sakejai.

- 1 Jesuska Jerikúnam jeá, irutkamúnmani wemia, tímiaja.
- 2 Nuí aents^u ti kuítrintin, Saké náartin, kuítian-juun úuntri pujumia, tímiaja.
- 3 Níisha Jesús urukukit tusa, wainkiátaj-sa wakéraksha, aents^u ti núkap wénakui, sútarach' asa, tujintmia, tímiaja.
- 4 Nuíkia tsekenkí, éemak, numíniam waka, Jesús nankámakui wainkiátaj-sa, íí ekemia, tímiaja.
- 5 Jesuska, Saké waka ekétmanum jeá, nakáas íis: - Sakeá, akaikitiá; wi ame jeemiín kanártaj-san winiájai - timia, tímiaja.
- 6 Tu tai, sháutak wárik tara, wará warat nii jeén jukimia, tímiaja.
- 7 Túramtai, mash' aents^u irúnrar wena ishíshmasar, Jesusan aujmatáiniak: - Tunartin aéntsun jeén kanártaj-sa wéawai - tíarmia, tímiaja.
- 8 Tumaitkuísha Sakeka Jesusan wajas, chicháruk: - Uuntá, winia kuítrun máimtek nakakan, utsumainiána aún susártatjai. Tura aéntsun kasarkaitkiúnka, aintiuk patatkan, ataksha awantukiartajai - timia, tímiaja.

Rk. 19,9.

- 9 Takui, Jesús chicháak: - Ju aents^u nekás Apraáman uchirí ajasú asa, yamáikia nii jéen ewemrayi.
- 10 Kame, Arútam-aents-ajásuka mash' menkakarmia nuna eák, ewentikrátaj-sa tawiti - timia, tímiaja.

Nawe kuit,
(Mt.25, 14).

- 11 Ashí mash' Jesusjai wénaka, Jerusarénknum nuntúmsar: - Juiniápi Arútam-Irúnramu juarnáktiatua ! – tu enentaimainiákui, Jesús juna aujmatsamia, tímiaja.
- 12 - Aents^u ti náatu úunt náamak, wárik waketkítaj-sa, chíkích' nunkánam wemia, tímiaja.
- 13 Nawe takárniurin untsúk, ankant ankant chikíchik kuítian súsar, chichárainiak: "Ju kuítjai wi waketmam iwiasmaktárum" tímia, tímiaja.
- 14 Turaitkuísha, takárniuka kajera ásar: "Íikia ii úuntri aínk tusar' nakitiáji" tu ujakarat' túsar, ukúnam aéntsun akupkarmia, tímiaja.
- 15 Tumaitkuísha, úuntka naamka waketki ta, kuítian susármaj nujáisha urútmak ikiaunkara tusa, nii takárniurin untsukarmia, tímiaja.
- 16 Éemka untsukma ta, chicháak: "Uuntá, kuítrumka ataksha nawe kawenkai".
- 17 Tu tai: "Ti penkeráitme; ishíchik susamaitiátam, ikiáunka asam, nawe matsátkamun úuntri atá" timia, tímiaja.
- 18 Chíkích' takarín ta, chicháak: "Uuntá, kuítrumka ataksha ewej kawenkái".
- 19 Tu tai, nunash aítkiasank chicháruk: "Amesha ewej matsátkamun úuntri atá" timia, tímiaja.
- 20 Amuámu ta, chicháruk: "Uuntá, pai kuítrumka; wíikia amín ishámakun, menkakáink tusan, pénker penuáran ikiúsmajai.
- 21 Kame ámeke ikiuschiátam seamniuítme; arachiátam juuwitme. Tuma asakmin ishamkamajme" timia, tímiaja.

Rk. 19,22.

- 22 Tu tai, úunt chicháruk: "Ámeka yajauchitme. Amé chichámrumek makúrmawai. Wi ikiuschiátan seámin aí, arakchiátan juu aí nekayátmesha,
- 23 urukamtai winia kuítiur pamparat' túsam, enkeachmiam ? Turaitkiumninkia, wi waketki tana, pamparun jurumsájai" timia, tímiaja.
- 24 Tura, aéntsun chicharáiniak: "Nii kuítri atankírum, nawe ikiáunka nu susatárum".
- 25 Takui, chicháiniak: "Uuntá, nawe tákaku aísha, urukamtai súam ? "
- 26 Tuiniái: "Nekás tájarme: ya ikiáuwea nuka, susamu átatui. Antsu ikiauweátsu nuka, mash' tákakmarish atankimiu átatui.
- 27 Aíntsarmek wínia numásur, wi úunt aínk túsar nakitrurarma nuka, juí itiarum, wisha íimiaink, maatárum" timia - tímiaja Jesús.

Jesús Jerusarénknum.

(Mk. 11, 1;Mt.21, 1;24,2;Jn. 12, 12).

- 28 Nuna tuasúa amik, Jesuska Jerusarénknum éemka wéakui, ashí aéntsush weármia, tímiaja.
- 29 Petpajé, tura Petaniánmasha jeástatuk, kunchái náint ana núí jeá, Jesús jímiar aénsrin akúpeak:
- 30 - Amáin irútkamu pujana aí werum, kawái ekemtúkchamu, jinkiámu wajana nu, atíá itiatárum.
- 31 Yákesh: "Urukamtai juárum ?" turamkurminkia: "li úuntri utsúmakui júaji" titiárum - timia, tímiaja.
- 32 Akupkámuka wear, Jesús timia nútiksarank wainkiármia, tímiaja.
- 33 Kawáin atíniakui, neréntniuri táar, chicharáiniak: - Urukamtai kawáisha atíárum ? -
- 34 Tuiniákui: - li úuntri utsúmawai - tíarmia, tímiaja.
- 35 Kawáin itiar, Jesús ekemkat' túsar, nii awankemrin awantkarmia, tímiaja.

Rk. 19,36.

- 36 Jesús kawáinium ekémak wéakui, aéntska nii awankemrin jintiá aépruki weármia, tímiaja.
- 37 Nuí Kunchái náintnium akasáttuk ajásar, ti untsurí aents^u, aents-tujíntiamun najanamia nuna wáinkia ásar, wará warat charátum ajakiar, Arútman naatmamtekiáiniak:
- 38 - Úunt, Arútam akupkamu, winiána au yuminksatái. Pai yakisha naatmámtikiar, warasartí - tíarmia, tímiaja.
- 39 Pariséuka nuna antúkar, Jesusan chicharáiniak: - Uuntá, amé aéntsrum timiatáinia nu, "Takamatsatárum" túsam, kakantrartá -.
- 40 Tuiniákui: - Nekás tájarme, ju charátum ajainiachkuínkia, kaya chichachu ainiayat, charátum ajaráinti - timia, tímiaja.
- 41 Tura Jerusarenknum nuntumas, nuna íis, úutmia, tímiaja.
- 42 Kúntuts enentáimiar, chicháak: - Jerusarenká, yamáí amesha tarímtanam pujustin jintia nékakmeká, máak aíntme. Kame yamáikia nékachu asakmin,
- 43 amé numásrum arentmáktatui.
- 44 Nuí amé uchírmijai mash' epení apújtamsar, awaktamkártatui. Nuí waitkiármasar, mash' kupí kupí ikiurmakiártatui. Yamái winiána ju "Arutmaapítia" tacha asam, penkesha juakcháttame - timia, tímiaja.
- 45 Nuyanka Jesuska ayámtainiam wayá, aents^u surú pujúinian jíiki akúpar,
- 46 chicharáiniak: - *"Winia jearuínkia aya anentruatniuítrume"* tu Ujajmatáiniam aarmaitkuísha, átumka kasan jéena aitkiárme - timia, tímiaja.
- 47 Tuke tsawantin ayámtainiam jintiáakui, wea úuntrinkia, unuikiártiniash, jutíun úuntrisha, "Itiúrak maawáintiaj' " túsar, anentáin juriármia, tímiaja.
- 48 Tumaitkuísha, ashí mash' aents^u anturáinia asamtai, makúrtinian tujintiármia, tímiaja.

AKANKAMU 20.

Nekás úunt.

- 1 Jesuska ayámtainiam Pénker-Chichaman aéntsun jintintíú pujái, wean úuntri, unuíkiartin, jutíun úuntrisha taríar, chicharáiniak:
- 2 - Jusha urukamtai aítkiam ? Ya akupkamuítiam ? - tíarmia, tímiaja.
- 3 Tu tuiniái: - Wats, wisha aniasatjármena nu airkatárum:
- 4 Juank imiákratniun, ya akupkamia ? Arútmak ? Túratskesha aéntsuk ? -
- 5 Takui, enentáimsar: - "Arútam akupkámiayi" takurninkia, "nuíkia urukamtai íimiaru ajaschamiárum?" turámchatjish?
- 6 Antsu, "aents^u akupkamuíti" takurninkia, aénska "Juánkka waimiakuíti" túsar, kayajai tukurmachártatjish ? -
- 7 Tu enentáimsar: - íikia nékatsji - tíarmia, tímiaja.
- 8 Nuíkia Jesussha chicharáiniak: - Wisha ya akupkamu asana aítkiaj, nuna ujakchatájrome - timia, tímiaja.

Takakmau mankartin.

(Mk. 12, 1; Mt. 21, 33).

- 9 Jesuska aéntsun jintíntiuk, juna aujmatsumia, tímiaja. - Yaúnchu úunt ajarín arákmak, takárniuri takakmasarat' tusa, ikiúiniak, yajá nunkánam núkap uwí pujústaj-sa, wemia, tímiaja.
- 10 Júuktin tsawant jeámtai, "júuk akupturkartí" tusa, nii aénsrin akupkarmatáisha, takárniuka asútrar, penke sútsuk, akupkarmia, tímiaja.
- 11 Ataksha chikichan akupkamtáisha, nútiksarank awátrar, katsékar, penke sútsuk, akupkarmia, tímiaja.
- 12 Ataksha akupkamtáisha, nútiksarank nunasha awátrar, máankiasar akupkarmia, tímiaja.

Rk.20,13.

- 13 Turawarmatáisha, nérentniuka enentáimiak: "Warí iturkártajak ? Arantukarat' túsar, wi ti anéamu uchirun akupkatjai" timia, tímiaja.
- 14 Turamtáisha, takárniuka nuna wáinkiar: "Juchakáit nérentniun uchiriya ? Nunké atankitiái" túsar,
- 15 achíkiar, tsuátnum júkiar, maawármiai - . Jesús tu aújmatas, chicháak: - Tura asármatai, nérentin iturkatin?
- 16 Nékachma ta, yajáuchinkia amúkar, ajarinkia chikichan susártatui -. Takui, aéntska: - Arútam nuna turachkunka, máak - tíarmia, tímiaja.
- 17 Jesús íitia awájsar, chicharáiniak: - "Jeá jeamín, numi yajauchiti túsar, ajapawarmia nuka, yamá Pau ajasuíti.
- 18 Ya Paúnam shushumea nuka, kupiniártatui. Aíntsan Páu iniáakka nekéntatui" tu Ujajmatáiniam aárma, warinia unuitiámeaj' ? - timia, tímiaja.
- 19 Unuíkiartin, wean úuntrisha: - Jesús tana nuka íin túramji - túsar, achiktaj tuiniayat, aéntsun ishama ásar, iniaisarmia, tímiaja.

Sésar akiktin.

(Mk. 12, 13; Mt. 22, 15).

- 20 Nuyanka: - Jesús chichákmatai, nii chichámejaink makurtái - túsar, íimiaru nútiksarank anturkarat' túsar, aents^u anankkártinian akupkarmia, tímiaja.
- 21 Nu anánkkartin aníniak: - Uuntá, ámeke aents^u uruku áinia nuka íitsuk, tuke wáitruitsuk Arutman chichame etsérkam jintiáme.
- 22 Nuíkiawats waritmea: li kuítri tesar', Sésar susatniukáitiaj'?
- 23 Tuiniákui, Jesuska: - Anankruiniawapi - tusa, chicharáiniak: - Wátskea, kuít iniatúrsakua ! - timia, tímiaja.
- 24 Kuítian iniakmainiákui: - Juí kuítnum yana yapí, yana náari péeta ? - Tu tai: - Úunt Sesarnáiti - tíarmia, tímiaja.

Rk.20,25.

- 25 Tuiniákui: - Sesarnaitkiuínkia, Sésar susatárum. Tura Arutmanuitkiuínkia, Arútam susatárum - timia, tímiaja.
- 26 Nuíkiá: - Makutái - tukamá, tujíntkiar, antsu: - Ti nékawai - túsar, atakka penké anintruscharmia, tímiaja.

Jákaru aneantártatui.

(Mk. 12, 18).

- 27 Satuséuka: - Jákaru penke aneantchártatui - tu unuíniau ásar, Jesusan aníniak:
- 28 - Uuntá, Muiseska chichártamkur': "Áishmank uchin yajútmatsuk jakámtainkia, jakan uchirín akintiataj tusa, nii patái wajén nuatkatniuíti" túramji.
- 29 Wats, tsenken yachintin áarmiayi. Iwiáiri nuátak, yajútmatsuk jakámiayi.
- 30 Patáisha nútiksank wajén nuátak, jaka asamtai,
- 31 chikichsha mash' wajén nuátak, yajútmatsuk jakáirmiayi.
- 32 Ukúnam nuásha jakámiayi.
- 33 Tuma asamtai, aneántin tsawant akuínkia, nu nua untsurí nuátkamu asa, yana nuwenk ati ? - tíarmia, tímiaja.
- 34 Tuiniákui, Jesús chicharáiniak: - Ju nunkánmaka áishmank nuásha nuatnainiáwai.
- 35 Antsu aneántar, Arútmanam jeawártatna nuka, penke nuatnaikiachártatui.
- 36 Páant nekatárum: Arutmá Pasúkriya aínsarank ajásar, penké jakachártatui. Arútam aneantmamtikiámu ásar, nii uchirí áartatui.
- 37 Jakáruka nekás aneantártatui. Kame Arútam numi keámunam Muisesan waritmia ? "*Wiyáitjai Aprááman, Isáakan, Jakúpnasha úuntri*" tíchamkia ?
- 38 Tuma asamtai Arútmaka aents^u jákarun uuntrichuíti. Antsu níinin mash' iwiáku pujúinia asamtai, iwiákun uuntrinti - timia, tímiaja.

Rk.20,39.

- 39 Chíkich unuikiártinkia: - Uuntá, ti pénker chichakume - túsar,
40 ataká penké anintruscharmia, tímiaja.
41 Nuyanka Jesús chicháak: - Utsúmkaka "Tawitian uchirinti" tichamniáiti.
42 Entá, Ujajmatáiniam Tawítiak chicháak: "*Úunt winia Úuntrun chicháruk:*
43 *Amé numásrumin amú ajaái, wínia untsuruíni ekemsatá*" timia, tímiaja.
44 Tura, "Winia uuntru" tayatsha, itiurá nii uchirí aminiáit ? - timia, tímiaja, Jesús.
45 Tura ashí aents^u antuiniái, nii aéntsrin chicharáiniak:
46 - Unuikiártinjái aneartárum. Kame níinkia ti shíir iwiármamrar, jintiá amíkmatawarat' túsar, ayámtainiam, nampernúmsha éemka pujústaj-sar, wakerin ainiáwai.
47 Anéntrajái túsar, wajén kuítchirin amutin ainiáwai. Nuka wáit anéntsuk, makumu áartatui - timia, tímiaja.

AKANKAMU 21.

Waje suámu.

(Rk.12,41).

- 1 Jesuska ayámtainiam pujús, kuítrintin itiur suámunam apujáinia nuna, íi pujumia, tímiaja.
2 Wajesha penké kuitrintchaitiat, jimiará kuítchin ápujun wainkiámia, tímiaja.
3 Tura Jesús chicháak: - Tínkas tájarme: Ju waje kutrintniunka iniánkas, imiá núkap apujsayi.
4 Kame kuítrintniuka ampiniárun Arútman suiniakuísha, wájeka utsumayat, mash' tákakmanka susayi - timia, tímiaja.

Jerusarenk yumpúnratin étserma.*(Mk. 13, 1; Mt. 24, 1).*

- 5 Chíkichkia: - Ayamtai kayajaj, kurijaj ti pénker jeammiáiti - túsar, Jesusan iniaktusarmia, tímiaja.
- 6 Nuna tuiniái: - Átum timiá pénker jeamniáiti takurminsha, ukunma nuínkia mash' yumpúnar amukattui - timia, tímiaja.
- 7 Takui, chicharáiniak: - Uuntá, nusha urutáink turunat' ? Itiúrak juarnakit ? -
- 8 Tu anintruiniákui, chicharáiniak: - Anankramawáirum; aneartárum. Kame untsurí aents^u winia náarun pachisar: "Wiyáitjai uwémtikniun; yamáikia Arutman tsawantri tayi" tuiniakuísha, anturkáirap.
- 9 Aéntska kajernáikiar, mesetan najanainiakuísha ishámkáirap. Kame nuka éemka turunatniuíti. Tumaitkuísha amukátniuka wau tacháttawai.
- 10 Antsu, úunt matsátkamu chikichjaj nankín jurunaikiártatui. Tarímiat-aents^u chíkich aéntsajaj manikiártatui.
- 11 Nuí ashí nunkánam uurkáttawai. Sunkur átatui. Tsukasha átatui. Aíntsank ti tsumai átatui. Nayáimpinmasha ishámkamnia wantinkiártatui.
- 12 Nuka turuntsáink, atúmniaka, wi shuar asákrumin, apapétmakrum, epeni apujtamsáttarme. Makukrátniunam juramkírum, wáittiai-jeánam apujtamsáttarme.
- 13 Nuna turutmákrumin, winia nekamtikiáttarme.
- 14 Itiúrak ayamrumaktaj tu enentaimsáirap.
- 15 Kame, wiki yákesh awákkachmin chichaman ujaktátjarme.
- 16 Aíntsank atumí aparí, atumí yachí, átum shuársha makúrmarar,
- 17 mantamáttarme.
- 18 Wi shuar asákrumin, kajerkamuitiátrum, penke menkakash-tátrume.
- 19 Katsuntratárum. Turakrumka ewemráttarme.

Rk.21,20.

- 20 Nankirtin Jerusarenkan téntatkar pujúinia wainkiármeka, "nii yumpuntrátniuri tsawant jeáyi" titiárum.
- 21 Átumka Jutéanam pujakrumka, náint pisartárum. Matsatkámunam pujakrumka, wárichik jjíinki wetárum. Kampúntniunam pujakrumka, matsatkámunam waketkírap.
- 22 Kame nu tsawántinkia nii amukátniuri Ujajmatáiniam aárma nu aminkíáttawai.
- 23 Ajamtin, uchin umúntsainia aúsha, waitsártatui. Kame Arútam ti kajérkamu ásar, ashí mash' itiúrchatnum pujusártatui.
- 24 Chíkichkia nankíjají máamu, chíkichkia jukí epénmia áartatui. Turawármatai, jutíuchu Jerusarenkan neréntniuri ajáasar, jutíu wakétkitin tsawant jeámam, tuke pujusártatui - timia, tímiaja, Jesús.

Arútam-aents-ajasú tátinri.

(Mt.24,29;Mk. 13,24).

- 25 Nuyá Jesús chicháak: - Nuíkia tsawái-nantu, kashí-nantu, yáasha tsúumai ajáartatui. Aíntsank ashí nunkánmasha nayants uu ajáakui, aents^u ishámainiak, waitsártatui.
- 26 Ashí mash' téter ajainiákui, aéntska nújaink sapíjmiakar, jakártatui.
- 27 Nuíkia Arútam-aents-ajasú nii kakarmarijají, nii nankamak-marijájísha yuránkminiam páchitkia, newa winián wainkiártatui.
- 28 Túmakui, pankái íisrum: "li ewémratin tsawant tayi" titiárum - timia, tímiaja.
- 29 Nuyá junasha chicharáiniak: - Atumsha, nase ti nasenkui,
- 30 "Uwí winiáwai" tátсурmek ?
- 31 Aíntsarmek wi tájarmena nu wáinkiarum: "Arútam-Irúnramu jeástatuk ajasái" titiárum.
- 32 Nekás tájarme: Yamái aents^u pujuiniána au amunainiatsáink, nuka mash' aminkíártatui.

Rk.21,33.

- 33 Kame nayáimp' nunkasha amuwainiakuísha, winia chichámruka penké amukáshtatui.
34 Tuma asamtai, yajáuch' ajátsuk, nampétsuk, aya ju nunkánmaya enentáimtutsuk, aneárum pujutárum.
- 35 Turachkúrmeka, ashí nunkánam nékachma támatai, ewemrashtátrume.
- 36 Tuma asamtai, nu tsawanttin ewémraram, Arútam-aents-ajasújai irunramniúram, tuke aneárum, anentrú pujutárum - tímia, tímiaja.
- 37 Jesuska tuke tsawanttin ayámtainiam unuikiartasúa amik, káshikia kunchái-náintnium pujústaj-sa weúya, tímiaja.
- 38 Kashi-káshikkia ashí aents^u "nii chichame anturkatái" túsar, ayámtainiam irunin áarmia, tímiaja.

AKANKAMU 22.

Jutas anánkkartin.

(Mk. 14, 1; Mt. 26, 1).

- 1 Úunt namper, líkmak támanum, yurúmak karíntichu tsawántnum,
2 wea úuntri, unuikiártiniash: - ltiurkárik Jesús maawáintiaj' ? - tuiniáksha, aéntsun ishammiármia, tímiaja.
- 3 Tumaitkuísha, Kiriutnumia Jutas, Jesusan akatramuriya nu, emésak enkémtuam:
4 - Wi itiúrak Jesusan surukáintiaj ? - tusa, wean úuntrijai, tura ayamtai-wáinniun uuntrijáisha chichástaj-sa wemia, tímiaja.
- 5 Nuna antúkar, warásar: - Kuít amastái - tuiniákui,
6 Jútaska: - Ayu - tía, aents^u wainiainiátsaink, úuknak suruktaj tusa, eámia, tímiaja.
- 7 Yurúmak karíntichu yutáiniam, íikmakan main áarmia, tímiaja.

Rk.22,8.

- 8 Nu tsawant jeámtai, Jesús Kayan Juánkjaí akúpainiak: - Werum, Ílkmak yuátin iwiarutárum - timia, tímiaja.
- 9 Tu tai: - Tuí iwiarutaj' - tuiniákui,
- 10 Jesús chicharáiniak: - IruTkámunam werum, aents^u yumin shikik jua wainkiáttarme.
- 11 Patátukrum, jeá jeárum, nérentin chicháarkuram: " li úntri chichártamuk: Tuí winia aéntsrujají lílkmakan yurumataj túramui", titiárum.
- 12 Takurminkia, tankamash' yakí utsáimiunam pénker iwiáramun iniakturmastátrumna nuí, warinchu iwiaratárum - timia, tímiaja.
- 13 Akatrámuka wear, Jesús timia núnisank wáinkiar, lílkmakan iwiararmia, tímiaja.

Jesús kayármakma.

(Mk.14,12; Mt.26,17).

- 14 Ashí mash' iwiarármatai, Jesús nii aéntsrijají yurumátasa pujús,
- 15 chicharáiniak: - Waitsátniunam wétsuk, ti nekiás atumjají lílkmakan yurumátaj-san ti wakerimjai.
- 16 Kame yamáí yurumán, atakka atumjají penke yurúmtsuk, áyatik Arútam-Irúnramu páant támatai, warasan yurumáttajai - timia, tímiaja.
- 17 Nuyá, sawen achik, Arutman yuminkias, chicharáiniak: - Umárum, ajamnaisatárum.
- 18 Nekás tájarme: Aya Arútam-Irúnramu jeámam, atakka penké umarcháttajai -.
- 19 Tínia, yurumkan achik, Arutman yuminkias, púuk suíniak: - Juka winia iniashruíti, atumnia súnana nu. Winia enentáimturkuram aitkiatárum - timia, tímiaja.
- 20 Nútiksank yurumá amik, sawen achik, chicháak: - Juka winia numparuíti. Unsurí aéntsun Yamáram-Irunramúnam irúrtinian puártatna nuíti.
- 21 Túmasha, wínia surutkatta nuka juí wijají pujawai.

Rk.22,22.

- 22 Arútam-aents-ajasuka yaúnchu tíarmia núnisank jakatniuíti. Tumaitkuísha súrutna nuka, nekaprumrattuápi- timia, timiaja.
23 Takui: - Yaki suruktiniáit ? - túsar, mai aniniai ajáarmia, timiaja.

Yáit nekás úunt ?

(Mk. 10,42; Jn. 13, 1).

- 24 Tura Jesusan aéntsrinkia númtak aujmatáiniak: - Yaki nankámaku atiniáit ? –
25 Tuiniákui, Jesús chicharáiniak: - Ju nunkánmaya úuntka, aéntsun nérentniuri ajásar, waitkiainiyat, "penkeráitme turuttiárum" tuiniáwai.
26 Átumka anin achatniuítrume. Antsu nankámantua nuka péejchach' ajastí. Akúpniusha yáimin atí.
27 Nérentin takárniujai, ya imiá nankamakuit ? Nérentin imiá nankamakuíti. Tumaitkuísha wi nerentniuitiátan, atumí takárniuri ajasuítjai.
28 Atumsha wíjaink takákmasrum wáitsa asákrumin,
29 wínia Apar nankámantu awajtusmia aínsanak, atúmniasha nankámantu awajsáttajrume.
30 Kame atumsha winia jearuí wijai yurumárum, chimpínium ekémsarum, Israérnum nawe-jímiar irúnramu ana nu makurtátrume - timia, timiaja.
31 Ataksha chicháak: - Semunká, nekatá: "Emésak Arutman seáu asa, atumín waitkiarmástasa nekapramsáttarme.
32 Tumaitkuísha, tuke íimiaru áminiam tusan, wi anentruá asamtai, ámeke tunamkámunam enentáimram, amé yatsumsha íimiaru ajasarat' túsam, awájitsuk ikiakarartiniáitme.
33 Tu tai, Kaya chicháruk: - Uuntá, waitsátniunam, jakatniúnmasha ámijai tuke wétatjai -.
34 Takui: - Kayá, yamá kashi atash' shiniátsaink, ámeke menáintiu: "Jesúsnaka nékatsjai" títiatme - timia, timiaja.

Rk.22,35.

- 35 Ataksha Jesús chicharáiniak: - Pitiak jútsuk, uyunt jútsuk, nawénam-ewétaisha jútsuk, wemárumna nuí, warínkisha utsummiakárum ? - Tu tai: - Atsá - tíarmia, tímiaja.
- 36 Tuiniákui: - Antsu yamáikia uyunt, pitiáksha páchitsuk jukitiárum. Kuchí tákakchakrumka, awankem surúkrum, sumarmaktárum.
- 37 Kame, ashí mash' Ujajmatáiniam aárma nu, winín aminkiatniuíti. "Mankártinia aitkiásarank iisártatui" tu aárma asamtai, aminkiatniuíti - timia, tímiaja.
- 38 Nuíkia nii aéntsrinkia chicharáiniak: - Juí jimiará kuchí tákakeaji - tuiniákui: - Mak mak, takamat ! - timia, tímiaja, Jesús.

Aja Jetsemaní.

(Mk. 14,32).

- 39 Tuasúa amik, Jesuska tuke Kunchái náintnium weu asa, nuí wéakui, nii aéntsrishia patatukármia, tímiaja.
- 40 Ajánam jeá, chicharáiniak: - Írshimp' anankramawáirum, anentruatárum - timia, tímiaja.
- 41 Tura, arantchia aí ékemsank, tikíshmar, anéntrak:
- 42 - Aparú, ti waitkiarsáip: antsu wi wakérajna nuka najántsuk, ame wakéramna nu najanatá - tímia, tímiaja.
- 43 Nuíkia Nayáimpinmayá Pásuk ikiakártaj-sa tarimia, tímiaja.
- 44 Jesuska ti kakáram anentrú pujús, kúntuts enentáimias, aya númpanak seár, chúkuijjar ajamia, tímiaja.
- 45 Tura wajakí, nii aéntsrin iyú, kúntuts enentáimiainiak kanú tepán wáinkiar,
- 46 chicharáiniak: - Urukákrumea kanush tepárum ? Írshimp' anankramawáirum, anentruatárum - timia, tímiaja.

Jesús anánkamu.

(Mk. 14,43;Mt.26,47;Jn. 18, 13).

- 47 Jesuska nuna chicháa pujái, Jutas, Jesusan akatramurintiat, aéntsun yaruak ta, Jesusan yapíniam mejeástaj-sa weántukmia, tímiaja.
- 48 Túram chicháruk: - Jutasá, ámeke Arútam-aents-ajasú surúktasmek yapíniam mejeam ? - timia, tímiaja.
- 49 Akatrámuka turunáttana nuna nekáwar: - Uuntá, machítjají ayamrumáktatjik ? - tinia,
- 50 chikíchik wéan takárniurin untsur kuishín tsátsut tsupírkamia, tímiaja.
- 51 Túramtai, Jesús: - Iniaisatá - tía, kuishín antíntiak, tsuármia, tímiaja.
- 52 Nuyá wean úuntri, ayamtai-wáinin, jutíun úuntrisha achíktái túsar, kaútkamu asa, chicharániak: - Wisha mankartinkíaitiaj, machítjají, numijají tarutiártinia ?
- 53 Wikia atumjají kashí-kashinínk ayámtainiam pujakuísha, achirkachmarme. Antsu yamáikia kirítinunam pujá asárum, jútikrarme - timia, tímiaja.

Jesús makumu.

(Mk. 14,53;Mt.26,57).

- 54 Nuyanka Jesúsna achíkiar, wean úuntrin jeén júkiar, awayawarmia, tímiaja. Kayasha árantak patátuki wemia, tímiaja.
- 55 Wean takárniuri áach' jinia ikiapárar, anamú pujuiniái, Kayasha núí ta, anamsamia, tímiaja.
- 56 Nua natsach', Kaya jinia anamú puján wáiniak: - Jusha Jesusjají wekáimiai - takui:
- 57 - Atsá, makú, wikia núnaka penké nékatsjai - timia, tímiaja.
- 58 Áruntak chíkich' chicháak: -Amesha Jesusjají wekaimiáme-. Tu tai: - Atsá, wicháitjai - timia, tímiaja.

- 59 Nuyá arum chíkich wajaantu kakántar chicháak: - Nekás jusha níijai wekáimiai; kame, juka Karireanmayáiti -
- 60 Takui: - Yatsuchí, nusha itirkamua túruteam? Wikia nuna penké nékatsjai - timia, tímiaja. Támajai métek atash' shiniúkmia, tímiaja.
- 61 Jesuska apajás iimsamtai, Káyaka: - Yamái kashi atash' shiniátsaink, menáintiu "Jesúsnaka nékatsjai" turúttiatme - timia nuna enentáimias,
- 62 áa jíinki, úutmia, tímiaja.
- 63 Aents^u Jesusan achikiármia nuka, awatiar, wishikiármia, tímiaja.
- 64 Jíniash epétkar, awátiar: - Wats, ya aitkiárma nekamatá - túsar,
- 65 chíkich yajáuch' chichámnash chichásar, katsekiármia, tímiaja.
- 66 Kashín tsawármatai, jutíun úuntri, wean úuntri, unuikiártiniash irúnrar: - Makutin Jesús itiatárum - túsar, akupkarmia, tímiaja.
- 67 Itiármatai, chicharáiniak: - Nekás Úunt Utsúmkakáitiam ? - Tu aníntram: - Ee, witjai takuísha, nekasáiti tícháttarme.
- 68 Tura, wi anintrakuísha, airkashtátrume.
- 69 Tumaitkuísha, yamáikia Arútam-aents-ajásuka, ashí tujintcha Arutman untsurini ekemsáttawai - timia, tímiaja.
- 70 Takui, chicharáiniak: - Nuíkia ámeke Arutman Uchirinkiáitiam ? - Tu tuiniái: - Ee, nékasenk tárume: Arutman Uchirintjai - timia, tímiaja.
- 71 Nuna antúkar: - Mak mak; chíkich makurat' tusar', utsúmtsji. Kame níinki chicháak makumarái, nu páant antukji - tíarmia, tímiaja.

AKANKAMU 23.

Jesús Ruman úuntrijai.

(Mt.27,1;Mk.15,1;Jn.18,28).

- 1 Tura, irúnar aújmatkar, Jesúsnaکا Piratui jukiármia, tímiaja.
- 2 Nuí tsanumáiniak: - Ju aents^u itiúrchat ewekákratui. "Úunt Sésarsha akikiáirap" tinea: "Witjai Utsumkan, Arútam akupkamun" tawai - tíarmia, tímiaja.
- 3 Pirátusha aníntrak: - Nekásenk ame jutíun uuntríntiam ? -tu tai: - Ee, nékasmek tame; wiyáitjai - tímia, tímiaja.
- 4 Nuíka Pirátuka wean úuntrin, aéntsnasha chicharáiniak: - Ju aents^u warínkish najánachu asamtai, makuchminiáitjai -.
- 5 Takuísha, mash' chicharáiniak: - Aéntsun itit awájeawai.
- 6 Kariréanmayá juárki, ashí jutíu nunkánmasha yajáuch' chichaman etserki wéawai - tíarmia, tímiaja.
- 7 Pirátuka, Jesuska Karireanmayáiti taman neka, Erutes nu nunkan úuntri, Jerusarénknum pujakui, níinin akupkamia, tímiaja.
- 8 Erúteska, aéntska Jesusnan núkap aujmatainiakui, wainkiátaj-sa ti wakera asa, níinin támatai: - Aents-tujíntiamun najánattui - tusa, ti warasmia, tímiaja.
- 9 Tu enentáimiu asa, ti núkap anintrakuísha, Jesuska penké aíkchamia, tímiaja.
- 10 Turái, weán úuntri, unuikiártiniash nuí pujúrsar, mijiámrutsuk tsanumriármia, tímiaja.
- 11 Erúteska nankírtinjai Jesusan wishíkrar, aya pújunak aéntsrar, Piratui ataksha awainkimia, tímiaja.
- 12 Nu tsawánttinink Erutes Pirátujai nemásnaikia ainiayat, nawamnaikiármia, tímiaja.
- 13 Ataksha Pirátuka, wean úuntrin, jutíun úuntrin, ashí aéntsnasha irur,
- 14 chicharáiniak: - Átumka ju aents^u itit ewekákratui takurminsha, wíka atumsha iimiárminink aníasan, itiúrchat tárumna nuna wainkiáchmajai.

Rk.23,15.

- 15 Aíntsank Erútesha itiúrchatan wáinkiachu asa, makútsuk awanturkiyi. Nuíkia itiúrchatan najánachu asamtai, mantamnachminiáiti
- 16 Tuma asamtai, asutran, ankant akupkáttajai - timia, tímiaja.
- 17 (Tuke uwitin chikíchik aents^u makumun, ankant akupín asa),
- 18 takui, mash' aéntska charátum ajákiar: - Juka máam, Parapás ankant akupkatá - ajáarmia, tímiaja.
- 19 Parapaska Jerusarenknum mankartua asamtai, epeniármia, tímiaja.
- 20 Pirátuka Jesusan ankant akupkáttaj-sa wakera asa, ataksha chicharkarmia, tímiaja.
- 21 Tumaitkuísha: - Paúnam ajjintiatá, ajjintiatá - ajainiákui,
- 22 ataksha chicharáiniak: - Warí itiúrchatan najanáit ? Mantámnatin yajáuchirin penké tákaksui. Tuma asamtai, aya asutran, ankant akupkáttajai - timia, tímiaja.
- 23 Takuísha, ashí aéntska nu kakántar: - Paúnam ajjintiatá - tíar, chará chará ajáarmia, tímiaja.
- 24 Nuíkia Pirátuka, ti tuiniákui, Jesusan makú, susarmia, tímiaja.
- 25 Tura Parapásnaka nekás itiúrchat apújniunak, mankartinaitkuísha ankant jjíiki, Jesúsna nii wakéramun najanawarat' tusa, susarmia, tímiaja.

Jesús paúnam ajjintíamu,

(Mt.27,32;Mk.15,16).

- 26 Jesusan Ukunch'-náintnium jukí wésar, Sirinénmayá Semunk takatnumiá waketun wáinkiar: - Páu júkitin Jesús yaintá - túsar, achikiármia, tímiaja.
- 27 Untsurí aents^u patatuiniákui, núaka enentáimrar, úutkin weármia, tímiaja.

Rk.23,26.

- 26 Jesuska apajás íisar, chicharáiniak: - Jerusarenknumia nuatíram, anéntakrum uutírap. Antsu atúmniak, atumí uchiríniuk enentáimtusrum uuttiárum,
- 29 Kame, "nua uchín takuscharu, umuntsacháruscha warasartí" tíartatna nu, tsawant jeástatuk ajasái.
- 30 Nu tsawanttin sapíjmiainiak chicháiniak: - Náint yutukra-tanká máak aintiuápi; nunka yukukratanka máak aintiuápi - ajáartatui.
- 31 Numi iwiákun aitkiainiána áuwash, káarunash imiá turacharat' ? - timia, tímiaja.
- 32 Jesusjai mantamnátniun jimiará aents^u yajáuchin jukí weármia, tímiaja.
- 33 Nuí Ukunch'-náintnium jeáwar, Jesusan paúnam ajjntiawarmia, tímiaja. Núnisank nii untsurini chikíchik yajáuch' áishmankan ajjntiáwar, chikíchnaka menarini ajjntiawarmia, tímiaja.
- 34 Nuna turuiniái, Jesús chicháak: - Aparú, ju aitkiaráinia au tsankurartá. Nékachu ásar, aitkiarainiáwai - timia, tímiaja. Nuyá Jesusan entsatáirinkia nakurús íisar, ankant ankant yaruakarmia, tímiaja.
- 35 Ashí aéntska íimiam ajainiái, jutíun úuntrisha wishíkiainiak: - Chikíchniaka ewentikráchmaka ? Wats, Arútam anaikiamuitkiúnka, Utsumkaitkiúnka, níinki ewemráttawai - túmam ajáarmia, tímiaja.
- 36 Nankin-júusha nijiamanch' churuínian áapawar, wishíkiainiak:
- 37 - Nekás jutíun uuntrintkiúmka, amek ewemratá - tíarmia, tímiaja.
- 38 Kame yakí: - Juka jutíun uuntrinti - tu aar péerkamu asantai, nuna tíarmia, tímiaja.
- 39 Chikíchik yajáuch' aents^u ajjntiámu, Jesusan katsékeak: - Amechukáítiam Utsúmkamea ? Ayamrúmakam, íinsha ayamkartuktá - timia, tímiaja.

- 40 Takui, nii aḷ chicháruk: - Ániumsha, yajáuch' asakmin, ajintiamuitiátmesha, Arútam ishámatsmek ?
- 41 Íkia yajáuch' asar', junikiar' jakatniuítji.
- 42 Antsu juka penke tunartincháiti - tinia: - Jesusá, Arútmanam jeam, winiáša enentaimtursatá - timia, tímiaja.
- 43 Tu tai, Jesús chicháruk: - Nekás tájame: yamáik wíjaj Arútmanam jeáttame - timia, tímiaja.
- 44 Nantu tutupin ajasa aí ashí nunkánam te ajás, ayantanta timianái ejemia, tímiaja.
- 45 Nu chichámaik úunt ayámtainiam ejátak apújsamu jimiapétek tseu nakakamia, tímiaja.
- 46 Nuí Jesuska ti kakántar chicháak: - Aparú, winia wakaniur jukitiá - tinia, sukanat mayatin jakamia, tímiaja.
- 47 Nankírtinian úuntrinkia, nu turunamtai: - Arútam aitkiáyi - tinia: - Tinkás ju aéntska imitmakcháiti - timia, tímiaja.
- 48 Ashí aents^u nuna íistaj-sar táarusha, nu túrunan wáinkiar: - Nekás tunartiniáitji - tíar, enentáimrar waketrarmia, tímiaja.
- 49 Ashí mash' Jesusan nekáiniaka, tura nua Kariréanmaya patatukarmia nusha, árantak pujúsar, mash' turunamun wainkiármia, tímiaja.
- 50 Aents^u Jusé náartin, wea irunramúnam pachitkiaiat, imítmachu, penkeráuya, tímiaja.
- 51 Nuka Jutéa nunkánam, Arimateanmayáuyayi. Arútam-Irúnramun naka pujú asa, Jesusan maawaráink tusa, nakitmia, tímiaja
- 52 Niinki Piratun werí, Jesusan iniashín seámia, tímiaja.
- 53 Nuyá paúnmaya akakí, taráchjiḷ penuar, kaya taúrma yákesh ikiúschamu amia nuí, iwiarsamia, tímiaja.
- 54 Úunt nampérnum, líkmak iwiártai tsawant kiákui, kashín saké tsawant asamtai,
- 55 nua Kariréanmaya Jesusan nemarsarmia nuka, Jusé itiur Jesusan iniashín iwiarsamia nuna wainkiármia, tímiaja.
- 56 Nuyá ni jeén wakétkiar, kaúshtai-kunkuínian iwiárar, saketin, ayamtai-tsawant asamtai, ayamrarmia, tímiaja.

AKANKAMU 24.

Jesús aneántu,

(Mk. 16,8;Mt.28,1).

- 1 Tura ayamtai-tsawant yama tsawái, kirítiak núaka kaúshtai-kunkuínian iwiararmia nuna júkiar: - Jesusan ikiúsmari iyutái - túsar, weármia, tímiaja.
- 2 Iwiársamu kaya úuntjaj epenmiáuya nusha akankekman wáinkiar,
- 3 wáyá, íiyaj tukamá, Jesusan iniashinkia penke wainkiacharmia, tímiaja.
- 4 - Jush urukáyik ? - tinia, nu chichámaik jimiará aents^u wincha entsarun wainkiármia, tímiaja.
- Urukamtai iwiáku pujasha nii ikiusmariínsha eárum ?
- 6 Juí pujatsui. Aneántai. Kariréanam pujús, turammíárumna nu, kajinmatkiniúrmek ?
- 7 "Arútam-aents-ajasuka tunártinnium surúkam, paúnam ajjintiámu jakasha, menáintiu kanar, aneánttatui" tichamkía?
- tíarmia, tímiaja, Pásuk.
- 8 Nuna antúkar, enentáimiainiak: -Jesuska nekasapi tímiaya-tíarmia, tímiaja.
- 9 Jeá wakétkiar, nawe-chikíchik akátramun, tura ashí aents^u nuí pujuármia nunasha, mash' wainkiármia nuna ujakarmia, tímiaja.
- 10 Maktaránmaya Marí, Juánash, tura Marí Santiáku nukurisha, aínsank chíkich' nua níijaj pujuármia nusha, núnisank etserkarmia, tímiaja.
- 11 Nua etserainiakuísha: - Áantar waitruiniáwai. Nekascháiti - túsar, anturkacharmia, tímiaja.
- 12 Tuiniákui, Káyaka tsekenkí, ikiúsmanum jeá, tekenas iyaksha, Jesusan iniashín wáintsuk, aya penuármarin wáiniak: - Urukáyik ? - ti, enentáimki waketkimia, tímiaja.

Emausnumia Jesusan aéntsri.*(Mk. 16, 12).*

- 13 Nu tsawánttinink jímíar Jesusan aéntsri, Emaús
Jerusarenknúmia arant pujana nuí wésar,
- 14 ashí mash' turunamia nuna aújmatki weármia, tímiaja.
- 15 Aújmatki kakáram tunáikiar wenái, aya aneáchma Jesús
aneántu weántukar, níjai weármia, tímiaja.
- 16 Wainiainiyat, penké nekacharmia, tímiaja.
- 17 Jesús chicharáiniak: - Warimpia jintiash aújmatki weárum ?
- Takui, setúrar, kúntuts enentáimrar, wajasarmia, tímiaja.
- 18 Tura chikíchik, Kreupás náartin, chicháruk: - Ma, ámechikík
Jerusarénknúm ashí mash' túrunama nu nékatsum ? -
- 19 Tu tai: - Warí urukama ? - timia, tímiaja. Jesús tu aníntra-
kui: - Entá, Nasaretnumia Jesús, wáimiaku asa, nii
chichámejaish, nii najanamurijaisha ti kakáram
iniakmamsamia nuna, Arútam, aéntsush aneámunak,
- 20 yamáichik wean úntri, jutíun úntrisha makúar, paúnam
ajjintíwar, máawarajanta.
- 21 Líkia: "Níyapitia Israéran ewémtikniua !" tímiaji. Tumasha nu
máamuka jimíara tsawántchik nankamasái.
- 22 Tumaitkuísha nuwa ii nekachmin ewekátmakji.
- 23 Kame káshik iwiarsámunam wéar: "Iniashí wáinkiachji. Aya
Arutman Pasukri chichartamkur': lwiáku pujawai, túramji"
túkam táarai.
- 24 Tuiniákui, íniusha wéar, nua tíarma aínsank wainkiariat,
Jesúsna wainkiacharmai - timia, tímiaja.
- 25 Takui, Jesús chicharáiniak: - Maj, tírutma nekátsrum ?
Yaúnchu wáimiaku tíniu áarmia nu nekátsrumek ?
- 26 Uunt Utsumka nankámaku ajástaj-sa, wáitias jakashtínkia ?
- tinia,
- 27 Muisesnumia juarkí, ashí mash' wáimiaku Ujajmatáiniam
níiniun tíarmia nuí aújmatas ejemia, tímiaja.
- 28 Irukámunam jeáwar, Jesuska nankámakui,

Rk.24,29.

- 29 chicharáiniak: - Kiáwai; íjaj juaktá - tu tai, juákmia, tímiaja.
30 Yurúmuk pujús, yurumkan achík, usukruá, púuk, susarmia, tímiaja.
31 Nu chichámaik kurat shintiárar, nekam Jesuska aya menkakamia, tímiaja.
32 Turunamtai, núamtak chicháiniak: - Íjaj chichaki, Ujajmatáinmayan jintíntramki winiákui, shíir antukír' winiáitiashi ! - tíarmia, tímiaja.
33 Nuíkia nu chichámaik wajátakiar, Jerusarénknum wakétkiar, nuí nawe-chikíchik akátramun nii ajjaj irúnrar pujúinian wainkiármia, tímiaja.
34 Táarmatai, chicharáiniak: - Nekás Jesuska aneántai. Kame Semunkan wantintiukái - tuiniákui,
35 níisha jintiá túrunamun, tura yurumkan púukmatai, nekawarmia nunash etserkarmia, tímiaja.

Jesús Akátramun wantintiukú.

(Jn.20,19).

- 36 Nuna chicháa pujuiniái, aya aneáchma Jesús ta, wajátasmia, tímiaja.
37 Tura chicharáiniak: - Arútam tarímtanam iwiaitmaktárum - tákui: - Iwianchiti - túsar, ishamkarmia, tímiaja.
38 Tumainiákui: - Urukamtai nekasáshit tusárum, imiásha ishamrárum ?
39 Wats, ewéjrush, nawérsha iistárum. Wiyáitjai. Pénker takársarum, nekaratárum. Kame iwianchkia iniashtin, ukunchtin wiya aniuchuíti - tinia,
40 ewején, nawénash iniaktusarmia, tímiaja.
41 Ti waráiniak, nuna waininiayat, enentaimainiáchkui, Jesús chicharáiniak: - Yurúmak takákrumek ? -
42 Takui, namak penkamun susam,
43 iimiainiái yurumamia, tímiaja.

Jesús wakamu.

- 44 Tura Jesús chicharáiniak: - Ju turuntsáink, atumjaj pújúmiaj nuí timiájrume. Ujaj, Muisés, wáimiakusha Ujajmatáiniam winian tíarmia nu aminkiatniúyayi - timia, tímiaja.
- 45 Tura, Ujajmatáiniam aárma nuna pénker nekawarat' tusa, chicharáiniak:
- 46 - Juka aarmáuyayi: "*Úunt Utsumka wáitias, jakamúnmayá menáint tsawántnum aneanttiniáiti.*
- 47 Tura, *ashí aents^u enentaimrármatai, tsankúramu aarat' tusa, Jerusarenknumiá juarkí, ashí nunkánmash nii chichame etsernaktiniáiti*".
- 48 Tu aárma nu aminkiamtai, átumka wáinkia asárum, nékarme.
- 49 Yamáikia, "wínia Apar amastátrume" timiájrumna nuna akuptuktátjarme. Tuma asamtai lrutkamúnmayá jíintsuk, nu Nayáimpinmayá Kakáram achímiam, pujustárum - timia, tímiaja.
- 50 Tura, Jesuska níi aéntsrijaj wéar, Petánianam jeástatuk, ewején takuí, usukruawarmia, tímiaja.
- 51 Usukrú pujús, kanákmiatai, Nayáimpiniam junakmia, tímiaja.
- 52 Nii aéntsrinkia ashí mash' tekémrurar, ti warásar Jerusarenknun wakétkiar,
- 53 tuke tsawanttin Ayámtainiam Arutman naatmámtikiu pujú áarmia, tímiaja.



PÉNKER - CHICHAM WÁIMIAKU JUANK AÁRMA.



AKANKAMU 1.

Chichamtin aents^u ajasú.

- 1 Yama nankámtaikkia Chichamtin ámiayi. Chichamtin Arútmanam pujúmiayi. Kame Chichamtin Arutmáyuyayi.
- 2 Níinkia yama nankámtaikkia Arútmanam pujúyayi.
- 3 Ashí mash' najánkamu áinia nu, Níinini najánkamu ainiáwai. Nii najanáchmaka penke atsuiniáwai.
- 4 Mash' najánkamu nii iwiákmarin tákakeawai. Nu iwiákma aéntsun tsaapnirinti.
- 5 Nu tsáapin kirítniunam tsáapniawai. Kirítniusha ikiajniaktáj tukamá, tujíntkiáiti.
- 6 Aents^u, Juank náartin, Arútam akúpkam, támiayi.
- 7 Níinini ashí aents^u íimiarártinian, tsáapniun iniakmástaj-sa, támiayi.
- 8 Níinkia tsaapnichúyayi. Antsu tsáapniun iniakmástaj-sa támiayi.
- 9 Chichamtin nekás tsaapniniúyayi. Ashí aents^u ju nunkánam táinia nuna tsáapin awajainiáwai.
- 10 Ju nuncan najana asa, ju nunkánam tuke pjuwítí. Tumaitkuísha nunka niin nekáchmiayi.
- 11 Nii jéen tamatáisha, nii shuárka nakitrármiai.
- 12 Antsu níijai irunrarmia núnaka, íimiaru asármatai, Arutman uchirí awajsármiai.
- 13 Nu Chichamtin aents^u yajutmárchamu asa, aya Arutmánmaya_a tawiti.
- 14 Kame Chichamtin iniáshtin ajás, iín pujúmiayi. Anánkkartichu tuke anénkratin asa, nii Aparín páantniurínti. Ápaka nii Uchirín naatmámtikia asamtai, nii pénkeri wainkiáitji.
- 15 Juank chicháak: - Wi tímiajrumna nuka juíti. Ukúruí winímia nu, éemka pujáwai. Kame wi akíntsaink, tuke pujúyayi - tímia, tímiaja.
- 16 Ashí mash' tákaku asa, tuke nii pénkerin áantar súrumeaji.

Jn. 1, 17.

- 17 Arútmaka Muisesnúmani nii awemámurin amasuítji. Antsu Utsumka Jesusnúmani wáitruksuk anénaitniun, nii Iwiaikrátniurin amasuítji.
- 18 Aentstikia Arútmaka penké wáinkiachuítji. Aya Arutman Uchirí, nii Apariín tuke pujú asa, Arutman iniákturmasuítji.

Juank Jesusan iniákma.

- 19 Jerusarenknumiá jutíu: - "Ame yáitiam ?" - tu aníasarat' túsar, weán nii yáinrijaí Juankái akupkármatái, Juank nuna páant chicháak:
- 20 - Wikia Ashí-tujintcha-Utsumkachuítjai - tímia, tímiaja.
- 21 - Nuíkia, yáitiam ? Eriaskáitiam ? - tuiniákui: - Atsá, Eriascháitjai - takui: - Nuíkia, Uunt Waimiakukáitiam ? -
- 22 - Atsá - takui, ataksha iníntruiniak: - Wáit aneásam, ujakratkatá; iín akuptamka ujáktai taji. Ameksha "yáitjai" tame - tíarmia, tímiaja.
- 23 Juank chicháak: - Wiyáitjai chícham, nunka itiárkanam chará:"Uuntan jintí iwíaratárum" tana nuítjai. Yaúnchu wáimiaku Isaías etserkámia nuítjai - tímia, tímiaja.
- 24 Akupkámuka pariséu ásar,
- 25 chicharáiniak: - Enta nuíkia, urukamtai Utsumkachuitiátam, Eriaschaitiátam,Úunt Waimiakuchuitiátmesha imiákrateam? -
- 26 Tuiniákui: - Wíkie aya entsajai imiákrateajai. Antsu atumiín, chíkich átum nekáatsrumna nu, pujáwai.
- 27 Nuka winia ukúruí winiáwai. Ti Úunt asamtai, níijai ti peejcháitjai - tímia, tímiaja Juank.
- 28 Juka Petapará nunkánam, Jurtán amáini, Juank imiákratmia nuí, turunamia, tímiaja.
- 29 Kashín, tsawanttin Juank Jesús winián wáiniak, chicháak: - Juítí líkma, Arútam akupkamu ashí aéntsun tunarin japiana nu.
- 30 Juítí aents^u wi akíntsaink tuke pujú, "winia ukúruí winiáwai", timiájrumsa nu.

Jn. 1,31.

- 31 Wi niin nekachuitiátan, entsánam Israérnum iniakmamsat' tusan, imiákratin ajásmiajai - tímia, tímiaja.
- 32 Tura Juank chicháak: - Iwiáikratin yápankma aínsank Nayáimpinmayau tara, niinín puján wainkiájai.
- 33 Wíkie nékachu aínk, entsajai imiakrattíá tusa, akuptúkma nu, chichártak: "Iwiaikrátniuja*i* imiáittiana nuí Iwiáikratin taru wainkiáttame" turútmiai.
- 34 Nuna wáinkia asán: "Nuka nekás Arútam Utsumkáiti" tájai - tímia, tímiaja.

Akatramu untsukma.

- 35 Kashín, tsawanttin Juank jímiar aéntsrija*i* nuí ataksha pujumia, tímiaja.
- 36 Jesús nankaman wáiniak: - Juíti líkma Arútam akupkamu ! - tímia, tímiaja.
- 37 Jímiar aéntsri nuna antúkar, Jesúsán patatukármia, tímiaja.
- 38 Jesús apajás íis, nuna wáinkiar, chicharáiniak:-Warí eárum ? - tu tai: - Uuntá, tuí pujám ? - tíarmia, tímiaja.
- 39 Jesús chicharáiniak: - Winírum, nekatárum - tákui, wéar, nantu patámsatuk ajásmatai nii pujámurin nekáwar, nu tsawanttin níjjaink juakármia, tímiaja.
- 40 Jesusan patatukmia nu Antresáuyayi, Semunk Kayan yachí.
- 41 Antreska, nii yachí Semunkan eák, wáiniak, chicháruk: - Ashí Tujíntcha Utsumka wainkiaji - tinia,
- 42 Jukí, Jesusan iniaktusmia, tímiaja. Jesuska Semunkan esétar íis, chicháruk: - Ámeke Semunkáitme, Juankan uchirim ! Ámeke yamáikia Kepas (Kaya tama) átatme - tímia, tímiaja.
- 43 Kashín tsawanttin Jesús Kariréanam wesa, Jiripin wáiniak: - Nemartustá - tímia, tímiaja.
- 44 Jirípsha, Antresa tura Kaya aínsank, Petsaitianmayáuyayi.

Jn. 1,45.

- 45 Jiripkia Natanaéran wáiniak, chicháruk: - Utsumka tátinian Muisés, tura Wáimiakusha aáarmia nu wáinkiaji; Jusé uchirí, Nasaretnumiá Jesusáiti - tímia, tímiaja.
- 46 Tura Natanaer chicháak: - Nasaretnúmiasha aents^u pénker j̄inkimniakáit ? - tu tai: - Winim, íitiá - tímia, tímiaja, Jirip'.
- 47 Natanaer winiákui, Jesús chicháak: - Winiána au Israernumiá aentsuíti nekás wáitrichu ! -
- 48 Tu tai, Natanaer chicháruk: - Itiúra nekáream ? - tákui: - Jiripkia untsúrmatsaink, yasun kankapén ekétaitmena nuínk wainkiájme - tímia, tímiaja.
- 49 Nuíkaa Natanaer chicháak: - Uuntá, ámeaka Arutman Uchirintme; nekás Israéran Uuntríntme -
- 50 tákui: - Ámeaka, "Wi wainkiájme" tájamna nuí, íimiaru ajasume. Tumaitkuísha ju iniánkasam wainkiáttame - tinia:
- 51 - Nekás tájarne: Nayáimp' urántmianum Arutman Pasukri Arútam-Aents-ajasún amírainiak, mai nankanai ajáinia wainkiáttarme - tímia, tímiaja.

AKANKAMU 2.

Kanánam aents-tujíntiamu najánamu.

- 1 Menáint tsawant nankamásmatai, Kariréanam, Kaná irutkámunam, aents^u nuatnainiákui, Jesusan Nukurisha nuí pujumia, tímiaja.
- 2 Núnisank Jesussha ipiámu asa, nii aéntsrijai nampérnum jeamia, tímiaja.
- 3 Nijiamanch' táarmatai, Marí nii Uchirín Jesusan chicháruk: - Nijiamanch' táaraijanta ! -
- 4 Tu tai, Jesús chicháak: - Wínia kakármarmar iniákmastin jeáchu asamtai, wisha warínia íistiniáitaj ? - tímia, tímiaja.
- 5 Takuísha, nii Nukurí nijiamchin-juun chicharáiniak: - Jesús "aitkiatárum" takui, turatárum - tímia, tímiaja.

- 6 Jutíu aents^u nii páuskarin japírtinian, nuí ujuk ti úunt muíts pujuármia, tímiaja.
- 7 Jesús nijíámchin-juun chicharáiniak: - Muítsnum entsa aimratárum - tu tai, muítsnum entsan mete mete aímiar, ekentsarmia, tímiaja.
- 8 Júkerusank Jesús chicháak: - Yamáikia shikíkrum, nanperan úuntri iniaktuutárum; umás íisat' - takui, suwaru, tímiaja.
- 9 Susam, umás íistaj tukamá, entsa pénker sáasat karían tsúut umaru, tímiaja. - Ja, imiá penkeráitia ! Jush tuyampa jusárum? - takui, nijiamchin-juu: - Aya entsa apújsamu nijiamánch' najanarái - tíarmia, tímiaja.
- 10 Namperan úuntri yama nuátkan werí, chicháruk: - Saweá saweá wáinmastaj támek ? Ámeka wapuchiá wapuchia wáinmasumjánta ! Aitkiashtiniáiti; aents^u núkap umuiniatsáink sawe susatárum túmai ajakume. Ámeka ukúnam sáwe wáinmasuítme - tímia, tímiaja.
- 11 Kaná nunkánam Jesús aénts-tujíntiamun najánatniun nankamamtai, nii aéntsri íimiarar: - Nekás nankamakuíti - tíarmia, tímiaja.
- 12 Nuyá Jesús nii Nukuríjaj, nii yachijaj, nii aentsrijáisha kaparnaún irutkámunam wéar, wárumchik tsawant nuí pujusarmia, tímiaja.

Ayámtainiam súruinia jíirma.

- 13 Jesuska Jutíun namperi jeástatuk ajasai, Jerusarénknum wémia, tímiaja.
- 14 Ayámtainiam enkemá, íimsataj tukamá, núkap shuar tankun surúiniak, kuítنيash yapájainiak pujúinian wainkiámia, tímiaja.
- 15 Chapikian yarur: - Wari jíintiumkitiárum - tinia, tankúrtiuk asutir jíikiar, kuít patáamunash shitiá ukatrarmia, tímiaja.
- 16 Yampitsan suruiniánsha chicharáiniak: - Mash' jíirtárum. Winia Aqarún jée asamtai, surukchatniuítrome - tímia, tímiaja.

Jn.2,17.

- 17 Nuna antúkar, nii aéntsri chicháiniak: - "Arutman jeén emesainiákui, suritkiartiniáitjai" tu aárma asamtai, túrawai - tíarmia, tímiaja.
- 18 Antsu jutíu chicharáiniak: -Ju aitkiátniusha, amesha yáitiam? Arútam akupkamuitkiúmka, nii kakármari iniakmastá -
- 19 Tuiniákui, Jesús chicháak: - Wátsek, ju ayamtai upukukakrumnisha, wíkia menáintiu tsawántnumank jeámtiatjai - tímia, tímiaja.
- 20 Nuna antúkar, chicharáiniak: - Tse, waurchakáitiam ? li úuntri áintiuk-nawe-ujuk uwíniam wai waitiainiákua jeammiármia nusha, itiurá ameksha menáint tsawantchínmasha jeamminiáitiam ? - tíarmia, tímiaja.
- 21 Jesuska ayámtain enentáimias tíchámiayi. Antsu nii iyáshín enentáimtus nuna tímiayi.
- 22 Kame jaka, menáint tsawant kanar nantákmiatai, nii aéntsrinkia tímia nuna enentáimsar: - Nii chichame nekasáiti - tíarmia, tímiaja.
- 23 Jesuska Jerusarénknum nampérnum pujús, aénts-tujíntiamun najáneakui, untsurí aents^u ímiaru ajasarmatáisha, nii anentáin nekaráinia asa, arantiármia, tímiaja.
- 24 Kame Jesús aéntsun anentáiín pujana nuna neka asa, ujachmaitiat nekamia, tímiaja.

AKANKAMU 3.

Jesús Nikiutémujai.

- 1 Jutíu aents^u, Nikiutemu náartin, pariseúya, tímiaja. Nuka kashi Jesusan werí, chicháruk:
- 2 - Uuntá, ámeke Unuikiártinia aínsamek Arutmánmaya tau asakmin, nékajai. Kame aénts-tujíntiamun najanainiána au, Arútmajai pujuiniáwai - tímia, tímiaja.

- 3 Tu tai, Jesús chicháreak: - Nekás tájame: ya yakiya ataksha akiniachuít, nuka Arútmanam penke jeachminiáiti - tímia, tímiaja.
- 4 Tákui: - Itiúra aents^u úuntchitiátsha ataksha akiniamniáit ? Ya ataksha akiniátaj-sa, nii nukuriín enkemamniáit ? -
- 5 Tu tai: - Ya entsánam lwiakratniúnmasha ataksha akiniachuít, nuka Arútam-irunramúnam jeachminiáiti.
- 6 Kame ya aya iniáshnium akinia nuka, aya iniáshik átatui. Antsu ya lwiakrátniunam akinia nuka, wáimiaku átatui.
- 7 Tuma asamtai, yakiya ataksha akíniatniuíti, nekás tájame.
- 8 Nasesha umpúakui, uu ajá antichukáitiam ? Tumaitkuísha tuyá winiá, tura itiur wea, nu nékatsme. Núnisank lwiakrátniunam akínia nuka, tuyá winiá, tuá wea, nuna nékatsui - tímia, tímiaja, Jesús.
- 9 Nikiutemu ataksha aníntrak: - Nusha itiúra aminiáit ? -
- 10 Tákui, Jesús chicháruk: - Ámeka Israérnum unuikiartiniáitám. nu nékatsmek ?
- 11 Nekás tájame: líkia páant wáiniajnia nu neka asar', étsereaji. Tumaitkuísha ii tájnia nu, nekasáiti tátsurme.
- 12 Ju nunkánmaya chicháakui nekachutírmesha, itiúrak Nayáimpinmayan chichaakuish nekatárum ?
- 13 Tumaitkuísha, yákesh Nayáimpiniam wakachuíti. Aya Arútam-aénts-ajasú Nayáimpinmaya tara asa, Nayáimpiniam wakáiti.
- 14 Nunka itiarakanam Muisés napin nakúmak awajámia núni-sank,
- 15 ashí íimiaru ajásar, tuke iwiáku pujusarat' tusa, Arútam-aénts-ajasún ajíntiawar takuiniartiniáiti.
- 16 Arútam aéntsun ti anéa asa, ashí mash' íimiarar, menkátsuk tuke iwiáku pujusará' tusa, nii Uchirí chikíchik tákakman susámiayi.
- 17 Arútmaka aéntsun makuártaj-sa nii Uchirín akupkachuíti. Antsu níiníni uwemrarat' tusa, akupkáiti.

Jn.3,18.

- 18 Niinini iimiaráruka menkakachártatui. Antsu niinini iimiai-niátsna au, Arutman Uchirín nakitra ásar, makumu ainiáwai.
- 19 Tsáapin ju nunkánam tamatáisha, aéntska yajáuch' ásar, kirítنيun wakerukármiai.
- 20 Kame yajáuch' ainiána au, "ii tunarí nekartamawar', makurmaráij' " túsar, Tsáapنيun kajérkar, niín tainiáchu ásar, makumu ainiáwai.
- 21 Antsu pénkernum wena nuka, "ii nájanma Arútam wakera aínsank najánamu asamtai, ashí mash' nuna wainkiarat'" túsar, Tsáapنيun eainiáwai - tímia, tímiaja Jesús.

Juánk etsérkamú.

- 22 Nuyá Jesuska nii aéntsrijai Jutéanam wémia, tímiaja. Nuínk níijai wárum tsawant pujús, imiakrátنيian nankamamia, tímiaja.
- 23 Imiákratin Juánksha Sarim nuntúmas, Enúnknum, entsa ápunam aents^u táarmatai, imiakratniúya, tímiaja.
- 24 Juank epénnatsuk pujús, nuna turú pujumia, tímiaja.
- 25 Chíkich tsawantنيin Juánkan aéntsri imiántنيin chichaman Jutíujai tunainiármia, tímiaja.
- 26 Juánkan werí chicharáiniak: - Uuntá, ámijai Jurtán amáini pujúmnia, níiniu pénker aújmatنيamna nu imiákratkui, ashí aents^u niín wenawai - tíarmia, tímiaja.
- 27 Tu tuiniái, Juank chicháak: - Yákesh nii wakéramun najántsuk, aya Arútam wakéramun najanatنيuíti.
- 28 Atumsha wi tímiaj nu páant nékarme. Wíkie Ashí Tujintcha Utsumkachuítjai. Nii tátinrin etsérkatin éemka akupkamuíjtjai, tímiajrumé.
- 29 Aya anájmaru nii anajmármarin tákaktsuk ? Nii aéntsri sha níijai pujúsar, nii chichamen antúkar, warainiátsuk ? Aínsanak wisha nii pujá asamtai, ti waráajai.
- 30 Kame nii ti nankámantu ajáakui, wíkie péejchach' ajastiniáitjai.

Jn.3,31.

- 31 Nayáimpinmaya táana au imiá nankamantuíti. Nunkánmaya winiána nuka, nunkánmaya asa, aya nunkánmaya chichaman itiáwai. Antsu aya chikíchik Nayáimpinmaya winiáwai.
- 32 Nuka Nayáimpiniam pujana nuna wáinkia asa, etserkuísha, penke anturainiátsui.
- 33 Antsu anturainiána au, Arútam waitrichuíti tuiniáwai.
- 34 Nu Utsumka, Arútam akupkamu asa, nii lwiakrátniurin antúrak, ashí mash' Arutman chichamen étserui.
- 35 Arútam Apá, nii Uchirín anéa asa, ashí mash' niin suwíti.
- 36 Tuma asámtai, nii Uchirini íimiaru ajainiána au, tuke iwiáku pujusártatui. Antsu níinini íimiaru ajainiátsna auka, Arútam kajérkam, nii iwiákmarin achíkchártatui - tímia, tímiaja, Juank.

AKANKAMU 4.

Jesús Samaríanmaya nuájai.

- 1 Pariséuka: - Jesús imiákratuk, Juánknash iniánkas aéntsun íruawai - taman antukarmia, tímiaja.
- 2 Tumaitkuísha Jesuska imiákratchai, aya nii aéntsri imiakratiármia, tímiaja.
- 3 Jesús nuna neká, Jutéan ikiúak, Kariréanam waketkímia, tímiaja.
- 4 Samaríanmani we,
- 5 Sikar irutkámunam, Jakup nii uchirí Jusén nunkán susámia nuí, jeámia, tímiaja.
- 6 Nuí Jakupan yumirmatáiri ámia, tímiaja. Jesuska weká wekaku, nantu tutupnírmatai, ti pimpikín asa, nuí yumirmatáiniam ekémsamia, tímiaja.
- 7 Nuí pujái, Samaríanmaya nua entsan shikíktaj-sa támatai, Jesús chicháruk: - Entsa ajamrustá - tímia, tímiaja.

- 8 Kame nii aéntsringia irutkámunam yurumkan sumáktaj-sar weáru, tímiaja.
- 9 Tu tai, nua chicháak: - Itiúra Jutiuitiátmesha, Samaríanmaya áisha seátam ? - (Jutíu Samaríanmayáajai kajérnain asármatai) tímia, tímiaja.
- 10 Nuíka Jesús chicháruk: - Iwiáikratin nekam, winiásha nekarkumka, ameá ameá seatíntme. Tura wíka entsa iwiákun amasáintjai - tímia, tímiaja.
- 11 Tu tai: - Yumírmatai imiá inít ana aúsha, waríjai shikíkmea jusáttam ? Tuyá entsa iwiákusha itiáttam ?
- 12 Jakup ju yumírmatain najana, nii aéntsrijai, nii tankurijáisha umármia nu, nankakakáitiam ? -
- 13 Tu tai: - Ya ju entsan úmuinia nuka, ataksha kitiamártatui. Antsu wi entsan susáttajna nujáinkia, penke kitiamchártatui.
- 14 Kame entsá susáttajna nu, aéntsnum yumírmatai ajás, tuke iwiáku atin, púkunia aínsank puka puka ajá pujúttawai - tímia, tímiaja.
- 15 Tákui, nua chicháruk: - Ataksha kitiámakun waitsáij túsán, ataksha shikíkian juínij, nu entsa surustá, tájame - .
- 16 Tu tai, Jesús chicháruk: - Áishrum untsúkam, ititiá - tímia, tímiaja.
- 17 Takui: - Wíka áishrunka takáksujai - tu tai, Jesús chicháruk: - Ti nekás takáktsume.
- 18 Kame ewej áishmank iniumkáitme. Yamái tákakmena nusha aishrumcháiti - .
- 19 Tákui: - Uuntá, nekáajme; nekás waimiakuítme.
- 20 Ii úuntringia Arutman tekemrúrtaj-sar, tuke ju náintnium tau áarmiayi. Tura átum jutiutíram, urukamtai aya Jerusarénknimak Arútam tekemrurtiniáitji, tárurum ? - tímia, tímiaja.
- 21 Tu tai: - Makú, anturtuktá. Yamáikia aya juínkikia, tura aya Jerusarenknúmkeka Arútmaka tekemrurcháttarme.

Jn.4,22.

- 22 Átum Samarianmayatíram, Arútam nekachiátrum tekemrármēna nu, íikia Jutiutíkiā neka asar', tekémraji. Kame aya Jutíunmaya ín uwemrátņiuri tátatui.
- 23 Antsu, yamáí tsawant jeáyí: ashí mash' aents^u nii Aparí Arutman tekemruiniána au, ashí nunkánam nii anentaiín nekás tekemrurártatui.
- 24 Arútam Apa aya nu aéntsun wakeruiniáwai. Kame iniáshtichu asamtai, tekemruiniána au, nii anentaiín nekás tekemrurartiniáiti - tímia, tímiaja.
- 25 Takui, nua chicháak: - Wisha Utsumka tátinia núnaka nékajai. Nii ta, ashí mash' jintinramáttaji - .
- 26 Nuíkiā Jesús chicháruk: - Nuka Wiyáitjai, ámijai chicháajna nu ! - tímia, tímiaja.
- 27 Samaríanmaya nuájai chicháa pujái, nii aéntsriša táar, íí ajáarmia, tímiaja. Tumaitkuísha, urukamtai nii numásrijai chicháa, nuna anintruscharmia, tímiaja.
- 28 Núaka, nuí yumin ikiúak, tsekenkí we, aéntsun ujáak:
- 29 - Aents^u ashí mash' wi najánamun nekartuánia nu, winírum, íitiárum. Nuka Utsumkachukáit ?
- 30 Takui, ashí mash' aents^u ashíntiukar, iyuwarmia, tímiaja.
- 31 Núaka ímiai wekáí, nii aéntsrinkia: - Uuntá, yurumatá - tuiniakuísha,
- 32 chicháak: - Wíkiā yurúmak átum nékachman tákakeajai - tímia, tímiaja.
- 33 Takui: - Yákesh yurumkan susacháriash ? - tu enentaimainiákui,
- 34 Jesús chicháak: - Winia Akúptukun wakerámurin najánatņiua, nuíti winia yurúmkarka.
- 35 Átumka: - arákmarun turuástatuk ajasái - tichakáitrum ? Aínsanak wikia chicháakun: - Arútam-Irúnramu najánatin jeástatuk ajásái - tájarme.
- 36 Arákman juiniána auka akíkma ásar, tuke iwiáku pujústinian neren juiniáwai. Turawármatai, arákmausha níijai warainiáwai.

- 37 Kame chíkich arákmaakui, chíkich júana, nu nekasáiti.
- 38 Wíkia, chíkich arákma juuktárum tusan, akupeájrumé. Chíkich wáitsa arakarmia nu, yamáikia átum júarme – tímia, tímiaja, Jesús.
- 39 Núaka: - Wi najanámurun nekartuáyi - tíniu asamtai, untsurí Samaríanmayá aents^u íimiaru ajasarmia, tímiaja.
- 40 Jesusái jeáwar: - Íijai juaktá - tu tuiniákui, jimiará tsawant núi pujumia, tímiaja.
- 41 Tura aents^u nii chichamen antúrkar, íimiaru kawenkarmia, tímiaja.
- 42 Nuka nuan chicharáiniak: - Ame tímiamna nujai íimiaru ajaschamji, antsu íik anturkar: "Nekás ashí aéntsun Uwemtikniuíti" taji - tíarmia, tímiaja.
- 43 Jimiará tsawant nankamásmatai, Jesús Kariréa nunkánam wémia, tímiaja.
- 44 Nii yaúnchu chicháak: - Nii nunkeén Wáimiakun antu-rainiátsui - takuísha,
- 45 aents^u nampérnum pujúsar, Jerusarénknun túramia nuna wáinkia ásar, Kariréanam jeám tai, níijai ti shíir irúnrarmia, tímiaja.

Kaparnaunknúmią uchi tsuárma.

- 46 Jesuska Kariréa nunkánam, Kaná irutkámunam, entsan nijiamanch' najanamia núi, waketkímia, tímiaja. Kaparnaunknúmią úunt, nii uchirí jáakui,
- 47 Jesús Jutéanmayá Kariréanam ta puján neka asa, "uchirí tsuátrurai" títij-sa, werímia, tímiaja.
- 48 Jesús chicháreak: - Átumka aents-tujíntiamu wainchakrumka, íimiaru ajachuítrome - takui,
- 49 úunt chicháruk: - Uuntá, winia uchir jáatsaink, wáit aneásam winítritiá - tímia, tímiaja.
- 50 Tu tai: - Ame uchírmeka pénger ajasái, waketkitiá - Jesús takui, íimiaru ajás, "nekasapítia" tusa, waketkimia, tímiaja.

Jn.4,51.

- 51 Uuntka Kaparnaúnknúm akáai, nii takárniuri inkiúnkar: - Uchírmeka pénker ajasái - tíarmia, tímiaja.
- 52 Tuiniákui: - Nantusha uruká aí pénker ajasma ? - tu tai: - Yaú, nantu pukuntai, tsuemuríngia menkatúkmai - tíarmia, tímiaja.
- 53 Jesús, nantu pukuntai: - Ame uchírmeka pénker ajasái - tíniu asamtai, úunt ashí mash' nii aéntsrijai íimiaru ajasarmia, tímiaja.
- 54 Jujáingia Jesuska jimiará aents-tujíntiamun najanamia, tímiaja. Jutéanmaya Kariréanam waketas, júnaka turamia, tímiaja.

AKANKAMU 5.

Sumpeáru Petestá maátainiam

- 1 Jesuska Jutíun namperiín Jerusarénknúm ataksha wemia, tímiaja.
- 2 Jerusarénknúm, "Tankun waitiriín" maátai, Jutíu chichámjai Petestá tama, amia, tímiaja.
- 3 Nuí maátainiam, ewej áaknum, untsurí aents^u jáinia, kusúrusha, shutuápsha, sumpearárusha, nu entsa muchitkiat' túsar, naká pujú áarmia, tímiaja.
- 4 Kame Arutman Pasukri entsan umuchkiámtai, niá niá winchúmaka, iniank pénker ajaúya, tímiaja.
- 5 Nuí aents^u jaa, menáintiu-nawe-yarush' uwí nákasú pujumia, tímiaja.
- 6 Nuna Jesús wáiniak, núkap uwí pujá asamtai neka asa, chicháruk: - Tsuamártaj-sam wakéramek ? - tímia, tímiaja.
- 7 Tu tai, jaa chicháruk: - Uuntá, entsa muchitkiúisha, yaki ajuntkat' ? Iniánktaj-san ajáai, chíkich niá niá iniáawai - tímia, tímiaja.
- 8 Nuígia Jesús chicháruk: - Nantakim, peákrum achíkiám, wetá - tímia, tímiaja.

Jn.5,9.

- 9 Nu chichámaik jaa pénker ajás, nantátaki, peákrin achik, wemia, tímiaja.
- 10 Saké tsawant asamtai, pénker ajasún jutíu chicharáiniak: - Saketin, takákmashantai asamtai, peak jukishtiniáitme -
- 11 Tu tuiniái, chicháak: - Tsuára nu chichártak, "peákrum achíkiam, wetá" turutui - tímia, tímiaja.
- 12 Tu tai, nusha: - Ya "Peákrum achíkiam, wetá" túramea ? - tíarmia, tímiaja.
- 13 Jesuska untsurí aents^u núí pujuiniámunam pachinia, menkaka asamtai, jáaka yaki tsuára nuna nekáchmia, tímiaja.
- 14 Kiáakui, Jesús aents^u pénker ajasun Ayámtainiam wáiniak, chicháruk: - Yamáikia pénker ajasume; nu arant ajasáim, atakka tunamkáip - tímia, tímiaja.
- 15 Tsuármaka nuna neká, Jutíun werí, chicharáiniak: - Jesús tsuaráyi - tímia, tímiaja.
- 16 Takui, jutíu Jesusan kajérkar, chicharáiniak: - Urukamtai Saké tsawant arántatsum ? - tíarmia, tímiaja.
- 17 Jesús ayak: - Winia Apaṙ tuke takakma asamtai, wisha takákmaajai - tímia, tímiaja.
- 18 Saké tsawantan arántutsuk, Arútam Apaṙuítí tusa, níiya aínsank ajáakui, jutiu máataj-sar wakeriármia, tímiaja.

Arutman Uchirí túramuri.

- 19 Jesús chicháak: - Úchikia níiniun najántsuk, nii Apaṙíin wáinia nuna nájanui. Apaṙ warínkish najankui, Uchisha nuna najanniuítí.
- 20 Apaṙ nii uchirín anéa asa, nii najánmarin iniáktawai. Átumka wáinkiarum, wanká íimtiátrumna nunasha iniáktústatui.
- 21 Apaṙ jakan aneántmamik, iwiákman súana núnisank, Uchisha nii wakera nuna iwiakman suáwai.

Jn.5,23.

- 23 Túrakui, Apan naatmamtkiainiána aínsarank, Uchíniash naatmamtkiártatui. Úchikia Apa akupkamu asamtai, aents^u niin naatmamtkitsuna nuka, Ápanash naatmamtkitsui.
- 24 Nekás tájarme; Ya wínia chichamrun antuk, "Akupkamuíti" túsa, iimiaru ajana nuka, tuke iwiáku pujústatui. Kame jakaitiat, iwiaku ajasú asa, penke makúnychattui.
- 25 Nekatárum, tsawant jeástatuk ajasái, antsu jeáyi. Jaka ainiána au, Arutman Uchirín chichamen antúkar, iwiáku ajasártatui.
- 26 Apa níinin iwiákman tuke tákaku aínsank, Uchisha níinin iwiákman tuke tákakuíti.
- 27 Uchi aents^u ajasú asamtai, nii Aparí makúkratin awajsámiayi.
- 28 Áantrarum awakmamkáirap. Kame ashí aents^u iwiársamu ainiána au, winia chichámrun antuktin, tsawant jeáyi.
- 29 Pénkeran najanawáruka aneántar, tuke iwiáku pujúsar, warasártatui. Antsu yajáuchin najanawáruka wáitsatniun aneantártatui.
- 30 Wikia wi wakéramun nájaneatsjai. Antsu makútaj-san winia Aparún ánturjai. Wi wakerámurun najántasuk, winia Akuptúkmia nuna wakerámurin najánea asán, awájitsuk makúajai.
- 31 Wiki ayamrumáknaka, áantran ayamrúmajai.
- 32 Antsu Chíkich ayámrutka asamtai, nii chichame nekasáiti tajai.
- 33 Átum Juank inintrústaj-srum wemiármena nuí, páant turammiárme.
- 34 Antsu wikia aents^u ayamrutkarat' túsan, utsúmatsjai. Átum uwemramniúram tusan, juna tájarme.
- 35 Juánkka shirípkia aínsank kirítiniunam sukuí, tsáapin awajtamsárum, waramtikramsamiárme.
- 36 Juank wínian turammiármena nunash iniánkasan, wikia itiarjarme. Aents-tujíntiamu najánatniun Apar surúsmia nuíti. Kame wi nuna nájanea asán, Apa akupkamuítjiana nuna páant iniákmaajai.

Jn.5,37.

- 37 Winia akáttur akuptukmia nuka, winia Aparuítí. Átumka nii chichámesha, nii yapisha waitkiachuítume.
- 38 Nii Akupkamu nakitiakrumka, nii chichame penke antukcháttarme.
- 39 Átumka Ujajmatáiniam íisrum, tuke iwiáku pujustin wainkiátaj-srum, wakérame. Ujajmatáiniam winian aujmateakuísha,
- 40 winín tatin nakitia asarum, iwiákma achikchamniáitume; kame aya winiyá jíiniawai.
- 41 Wikia, aents^u winia pénger aujmatrusarat' tusan, eátsjai.
- 42 Kame nékajrume. Átumka Arútam aneátsrume.
- 43 Winia Aparuíyá winiakuísha, átumka anturtátsrume. Antsu chíkích akupkachma winiána aúka, antúreame.
- 44 Arútam naatmámtiktsuk, númtak naatmamtíknai pujatírmesha, itiúrak íimiaru ajasminiáitrum ?
- 45 Tumaitkuísha, wikia makushtátjarme. Antsu Muisés átum wakerármena nu makurmáttarme.
- 46 Kame Muisés wínian aátruru asamtai, nekás nii antureakrumka, winiásha anturtukáintrume.
- 47 Muisés aármia nusha anturkachutírmesha, itiúrak wi tájarmena nusha, "nekasáiti" titiárum ? (Is.7,21-24).

AKANKAMU 6.

Yurúmak ikiáunkamu,
(Mk.6,34; Mt.14,13; Rk.9,10).

- 1 Nuyá Jesuska Kariréa antumiánk, Tipiríates tama, amáini wemia, tímiaja.
- 2 Jáinian tsuá asamtai, ti untsurí aents^u nemariármia, tímiaja.
- 3 Jesús nii aéntsrin yaruak, náintnium waka, núí pujusmia, tímiaja.
- 4 Jutíun úunt-namperi jeatemamia, tímiaja.

Jn.6,5.

- 5 Jesús íis, ti núkap aents^u wininian wáiniak, Jiripin chicháruk: - Ju ayurawartin, tuyank yurúmak sumakáintiaj' ? - tímia, tímiaja.
- 6 Túratniun nekayat, warítiak enentáimainia tusa, tu aníasmia, tímiaja.
- 7 Jirip' chicháak: - Jimiará-washim kuítjáisha ishíchkisha ayúratin jeáshtatjánta - tímia, tímiaja.
- 8 Chíkich, Semunk Kayán yachí, Antrés tama, chicháak:
- 9 - Juí uchi ewej apatkun, nuyá jimiará namakchin tákaku pujawai. Tumaitkuísha nujáinchikkia timiajú aents^u ayurkamachminiáitji - tímia, tímiaja.
- 10 Jesús chicharáiniak: - Aents^u pujusartí titiárum - tákui, chirichríniam ewej-nupanti áishmank pujusarmia, tímiaja.
- 11 Nuíkiá Jesús apatkun achik, Arutman yuminkias, kakut púuk, aents^u pujuármia nuna susarmia, tímiaja. Núnisank namáknasha achik, turamia, tímiaja. Ashí nii wakéramun achíkiar, yuawarmia, tímiaja.
- 12 Ashí mash' ejemarármatai, Jesús nii aéntsrin chicharáiniak: - Wasurnakáink tusárum, ampirma juuktárum - tímia, tímiaja.
- 13 Ewej apatkuitiátank, mash' yurumawarmatáisha, nawe-jímiar chankín tiármia, tímiaja.
- 14 Nuna wáinkiar, aéntska chicháiniak: - Juíti Wáimiaku tatiniúya nu ! - túsar: - Nakitiakuísha achikiar', ii Úuntri awajsatái - tiarmia, tímiaja.
- 15 Jesús nuna nekama, ikiúkiar, úumak, níinki kampúntniunam wemia, tímiaja.
- 16 Kiáakui, nii aéntsrinkia kanmátkanam wéar,
- 17 kanúnam enkémrar, kashi ajásmatai, Jesús níijai pujáchkuísha, antúmiank amáini, Kaparnaunknúmani weármia, tímiaja.
- 18 Nase túput túput ajáakui, entsa mai takunái ajámia, tímiaja.
- 19 Ti jeáchat wiánki wésar, Jesús entsá wáitsuk wekás, wean wáinkiar, ti sapijmiakarmia, tímiaja.

- 20 Chará chará ajainiákui, Jesús chicharáiniak: - Kakáram ajastárum ! Wiyáitjai, ishamrukáirap ! - tímia, tímiaja.
- 21 Takui, kanúnam enkértaj tuiniakuísha, kanu kanmátkanam wárichik shushumkamia, tímiaja.
- 22 Kashí tsawármatai, aents^u amáini juakarmia nuka, kanu atsán wáinkiar, Jesussha nii aéntsrijai wechan nekawármia, tímiaja.
- 23 Yurumkan yuawármia núí jeástatuk, Tiperiatesnúmia kanu jeawármia, tímiaja.
- 24 Jesús, tura nii aéntsriша atsuiniákui, ashí mash' kanúnam enkémrar, Jesusan eáktaj-sar Kaparnaúnknum weármia, tímiaja.
- 25 Amáini puján wáinkiar: - Uuntá, itiurá juísha taum ? - tíarmia, tímiaja.
- 26 Tuiniákui, chicharáiniak: - Átumka aents-tujíntiamu wainkiárumna nu enentáimtsuk, áantar ayúrtamji tusárum, eátearme,
- 27 Aya ju nunkánam yurúmeajnia nujai enentáimtsuk, chíkich yurúmkanam, jáchatai yurúmak asámtai, enentaimsatárum. Arútam-aents-ajasú nu yurumkan amáarme, kame Arútam Apá nuna akúpak, iniakturmasuítrume - tímia, tímiaja Jesús.

Jáchatai yurúmak.

- 28 Jutíu Jesusan aníntruiniak: - Warí najanatniuítiaj' ? Arútam warinia akatramráitiaj' ? -
- 29 Tuiniákui, Jesús chicharáiniak: - Arútmaka Utsumkan antúrkar, iimiararat' tusa, wakérawai - tímia, tímiaja.
- 30 Nuna antúkar, chicharáiniak: - Tuít aénts-tujíntiamu ame najanma wainkiar', iimiártinsha ? Tuít ame najánmasha ?
- 31 li úntrinkia atsámunam yurumkan yuawármiai. "Nuka nayáimpinmaya yurumkáiti" Ujajmatáiniam tu aarmáiti - tíarmia, tímiaja.

- 32 Tuiniákui, Jesús chicharáiniak: - Muiseska nayáimpinmaya_u yurumkan susáchmiayi; antsu winia Aparka nekás nayáimpinmaya_u yurumkan sukártawai,
- 33 Nayáimpinmaya_u yurumkan Arútam súana nuka, ashí aéntsun iwiákman súawai - tímia, tímiaja.
- 34 Tákui: - Uuntá, íinsha tuke nu yurúmak sukartitiá - tíarmia, tímiaja.
- 35 - Wiyáitjai jáchatai yurumkan. Winín winiána nuka, penke tsukámchattui. Winín íimiaru ajana nuka, penke kitiámchattui.
- 36 Tumaitkuísha, átumka wainkiayátrum, íimiaru ajastin nakitiárme.
- 37 Ashí mash' winia Apar surusmia nuka, winín táartatui. Tainiákui, winia awajsártatjai.
- 38 Kame wi wakéramun najanátaj-san Nayáimpinmaya_u tacháitjai; antsu winia Akúptukun amírkátaj-san tawitjai.
- 39 Winia Akuptúkuka ashí mash' surusmia nuna emenkátsuk, amúamu tsawántnum aneantmamtikiarat' tusa, wakérawai.
- 40 Ashí aents^u, Arutman Uchirín wáinkiar, íimiaru ajásar: "Nekás Arutmáiti" tuiniána au, tuke iwiáku pujusarat' tusa, winia Apar wakérawai. Wisha amúamu tsawántnum nuna aneantmamtikiártatjai - tímia, tímiaja, Jesús.
- 41 - Wiyáitjai jáchatai yurumkan Nayáimpinmaya_u tara - Jesús takui, jutíuka kajérkar, chicharáiniak:
- 42 - Juka Jusén uchirinchukáit ? Nii aparí, nii nukurisha nékashi. Tuma aísha, urúkamtai "Nayáimpinmaya_u taráitjai" ta ? - tíarmia, tímiaja.
- 43 Tu tuiniái, Jesús chicharáiniak: - Átumek aujmitsáirap !
- 44 Winia Apar untsuáchmaka, winín penke táchamnia ainiáwai. Amúamu tsawántnum aya untsukman aneantmamtikiártatjai.
- 45 "Ashí mash' aents^u Arútam unuiniárma áartatui" yaúnchu wáimiaku tu aáru asantai, aya Arútam Apan antúrkar, amirainiána nuka, winín winiártatui.

- 46 Yákesha Apan wainkiachuíti. Aya Arutmánmayaa táuwa nuke Apan wainkiáiti.
- 47 Tájana nujai íimiaru ajáakrumka, tuke iwiáku pujustátrume, nekás tájarme - tímia, tímiaja, Jesús.

Jesús jáchatai yurumkáiti.

- 48 Wiyáitjai Jáchatai yurumkan.
- 49 Atumí úuntri nunka itiárkanam yurúmak taramia nuna yuawariat, jakármiai.
- 50 Juí yurúmak nekás Nayáimpinmayaa tara tákakrume. Tuke iwiáku pujustin yuatárum.
- 51 Wiyáitjai jáchatai yurumkan Nayáimpinmayaa tara ! Ya ju yurumkan yua, nuka tuke iwiaku pujústatui. Wi yurumkan susáttajna nuka, winia iniashruíti. Ashí mash' tuke iwiaku pujusarat' tusan, susáttajai - tímia, tímiaja.
- 52 Tákui, jutíu chicháiniak: - Itiurá jusha nii iniashín ayurtamamniáitaj' ? -
- 53 Tu chichainiákui: - Nekás, ti nekás tájarme: ya Arútam-aents-ajasun iniashín yúatsu, nii numpénash úmatsu, nuka iwiáku pujatsui.
- 54 Antsu, ya winia iniáshrun yua, winia numparun uma, nuka tuke iwiáku pujawai. Nunaka amúamu tsawanttin aneantmamtikiáttajai.
- 55 Winia iniáshruka nekás yurumkáiti. Winia numparsha nekás umútainti.
- 56 Ya winia iniáshrun yua, winia numparun uma, nuka winín pujakui, wisha niinín pujajai.
- 57 Winia Aparka iwiáku asa, winia akúptuku asamtai, wisha niinín iwiákjai. Aíntsank winia yurana nuka, winia iwiákmarun achíawai.
- 58 Juíti yurúmak nayáimpinmayaa tara ! Yaúnchu atumí úuntri yuawariat jakarmia aniuchuíti. Kame juna yuiniána nuka, tuke iwiáku pujusártatui - .

59 Kaparnaúnk ayámtainiam Jesús tu chichamia, tímiaja.

Jesusan ikiukiáru.

60 Nuna antúkar, untsurí aents^u Jesusan patátuinia chicháiniak:
- Tana nu nekachminiáiti. Penke antukchamniáiti - tíarmia, tímiaja.

61 Jesús, nii aéntsri sha nii chichamen nakitiainiákui nekama, chicháak: - Wi tájana nújaink itiúrchat nekapeatírmesha,

62 Arútam-aénts-ajasú nii pujutairín wáakui, itiúrak enentaimratárum ?

63 Iwiáikratniuka iwiákman súawai; iniáshkia penke aantráiti. Winia chichámruka kakáram asa, iwiákman sukártawai.

64 Túmaitkuísha chíkíchik íimiaru ajainiátsui - tímia, tímiaja.
Kame Jesuska aitake ya íimiarcha áinia, tura ya niin surúktata, nuna nekamia, tímiaja.

65 Tura ékesank chicharáiniak: - Yákesha winia Apar nii kakármarin suáchmaka, winín jeachminiáiti tatsújrume ? - tímia, tímiaja.

66 Takui, ti untsurí aentsri ajapa ikiukiármia, tímiaja.

67 Jesús nii nawe-jímiar Akatrámurin chicharáiniak: - Atumsha ikiúrkítin wakérmek ? -

68 Takui, Kaya chicháak: - Uuntá, amin ikiúakrikia, yáinink wétaj' ? Ame tuke iwiáku atin chícham tákakeame.

69 Íikia íimiaru asar', "Ámeke Arutmá Uchiríntme" taji - tímia, tímiaja.

70 Tu tai, Jesús chicháak: - Wiki nawe-jimiartírmin achikmájrumek; tumaitkuísha atumiya chikíchik emeskáiti - tímia, tímiaja.

71 Júnaka, Kiriutnúmia Júlasan, Semunkan uchirín, nawe-jímiar aéntsriya niin suruktiniúya nuna tímia, tímiaja.

AKANKAMU 7.

- 1 Nuyanka Jesuska Kariréa nunkánam wekatan juarkimia, tímiaja. Kame Jutéa nunkánmaya máataj-sa wakéram, nuíkia wéchamia, tímiaja.
- 2 Jutíunam Aak-namper jeástatuk ajasmia, tímiaja.
- 3 Nuíkia nii yachi chicharániak: - Jutéa nunkánam amé aéntsrumsha nekarmawarat', aénts-tujíntiamu iniakmautá.
- 4 Aents^u náatu ajástaj-sa wakera nu, úumak pujatsui. Amesha aénts-tujíntiamu nájanu asam, ashí nunkánam nekamtikiatniuítme. -
- 5 Nii yachinkia ímiarcha ásar, tu chichariármia, tímiaja.
- 6 Tuiniákui Jesús aíniak: - Átumka, ashí tsawantin túratin penkeráiti, tárume. Antsu wikia tsawántrun tákakeajai. Nu tsawant jeátsui.
- 7 Yajáuch' ana nuka atúmniaka kajertamátsrume. Antsu wikia, nii yajáuchirin páant awájtakui, kajértawai
- 8 Átum wakerakrumka, nampérnum wetárum. Wikia, winia tsawántur jeáchu asamtai, wecháttajai. -
- 9 Tu tinia, Jesuska Kariréanam juákmia, tímiaja.
- 10 Nii shuar Jerusarenk nampérnum weármatai, níisha, aents^u waitkiaráink tusa, níichik úumak wemia, tímiaja.
- 11 Jutíusha nampertin eákar, wáinkiachar: - Jusha tua we ? - tíarmia, tímiaja.
- 12 Chíkich: - Ju aents^u penkeráiti -, tura chíkichkia: - Ju aents^u anankkartiniáiti – túsar,
- 13 ashí mash' jutíun úuntrin ishámkar, ishísmasar chicháu áarmiayi,
- 14 Nampérnaka juárki matsamtuiniái, Jesuska Ayámtainiam jeá, unuíniatan nankamamia, tímiaja.
- 15 Jutíu nuna antúkar, chicháiniak: - Ju aents^u unuimiarchaitiátsha, itiurá imiásha neka ? - tíarmia, tímiaja.
- 16 Tuiniákui Jesús chicharániak: - Wikia winia chichamrun étsertsujai. Antsu winia Akúptukun chichamen étseraeajai.

- 17 Arutman amirainiána áuka, winia chichámur wíniachuíti, antsu Arútmanuíti nuna nekainiáwai.
- 18 Ya nii chichámenak étserna nuka, níinki naatmámeawai. Antsu nii akúpkamun naatmámtikia nuka, nekás pénker asa, nekás chichaman chicháawai.
19. Muiséschak awemámun amasmiárum ? Nu atumsha umirchiátrumsha, urukámtai mantuátaj-srum wakerutárum ? - tímia, tímiaja.
20. Tu tai, chará ajátkiar: - Emésak enkémtuamu asam, tu chicháame. Ya mantamátasa wakera ? - tíarmia, tímiaja.
21. Nuíntia Jesús chicháak: - Aénts-tujíntiamun yama nájanea asantai, wāankárum íimrume !
22. Wats, Muisés yaúnychusha nii úuntri túrutain, tsupírnáktinian amasú asákrumin, atumsha saketin nu turiniáitrum.
23. Átumka saketin nu najanchakrúmka: "Aents^u yáinkcha asar', tunámeaji" tíntrume. Tuma asantai, urukámtai wi saketin aéntsun pénker awajsa aísha kajertárum ?
24. Nuíntia, nii urukuít, nu íitsuk makuírap. Antsu pénker íisrum makutárum - tímia, tímiaja.
- 25 Jerusarenknúmiā aents^u chicháiniak: - Júnachuk máataj-sar wakéruinia ?
- 26 Énta, irunramúnam chichaakuísha, yáakesh pachíniatsja ? Nuíntia ii úuntrinkia, juka Utsumkáiti, tuiniátsuash ?
- 27 Atsá. Kame ju aents^u tuyā winiá, nu nékaji. Antsu nekás Utsumka tuyā tatiniáit, nu mash' nékatsji - tíarmia, tímiaja.
- 28 Tuma asantai, Jesús ayámtainiam unuínia pujús, kakántar chicháak: - Winia nekárum. Tuyā winiáj, nusha nékarme. Tumaitkuísha wikia wi wakérakun tacháitjai. Winia Akúptukuana nu, átum nekachkurmínsha, nekás waitrichuíti.
- 29 Wikia níiniyā winiá asán, winia Akúptuku asantai, páant nékajai - tímia, tímiaja.
- 30 Nuna antúkar, jutúka: - Achikiar' epentiái - tuiniayat, nii tsawantri jeáchkui, penke antínkcharmia, tímiaja.

Jn.7,31.

- 31 Tumaitkuísha, untsurí aents^u íimiaru ajásar, chicháiniak: - Nekás Utsumka táanka, aents-tujíntiamun ju aents^u iniákmana au iniánkas, iniakmástimpiash ? - tíarmia, tímiaja.
- 32 Pariséuka aents^u túinian nekáwar, wean úuntrijaj chichásar, Jesusan achíkiarat' túsar, nankírtinian akupkármiá, tímiaja.
- 33 Nuíkia Jesús chicháak: - Ishíchik tsawant atumjaj pujusan, winia akúptukuí waketkittiájai.
- 34 Átumka eatiátrum, waitkiashtátrume. Kame wi wéajna núí, átumka winichminiáitrome - tímia, tímiaja.
- 35 Takui, jutíuka númtak chicháiniak: - Tuink imiá wainkiáchminiash weti ? Kriáku nunkánam, jutíu kanakiáru, jutíuchusha matsatainiámunmash jintiátaj-sa weti ?
- 36 Nusha warí tusa: "eateayátrum, waitkiashtátrume; kame wi wéajna núí winichminiáitrome" ta ? - tíarmia, tímiaja.

Entsa iwiáku.

- 37 Námper amusáttuk ajásmatai, Jesús wajakí, kakántar chicháak:
- 38 - Kitiamatíram, winí winitiarum; kame Ujajmatáiniam: "*níiníyá entsa iwiaku jjinkíttiawai*", wínian tu aátruru asamtai, íimiáruka umártinian takusártatui - tímia, tímiaja.
- 39 limiáruka lwiáikratniun arum achikiártatna nuna enentáimias, tímia, tímiaja. Kame Jesuska aneánt, yakí wecha asamtai, lwiáikratin tachamniáuya, tímiaja.

Utsumka tuyá winiá tama.

- 40 Nuna antúkar, untsurí chicháiniak: - Tínkas ju aents^u Úunt-Waimiakuíti - tíarmiayi.
- 41 Chíkichkia: - Nekás Utsumkáiti - tuiniákui, chíkichkia: - Kariréanmayasha Utsumka taminkíait ? - túsar:
- 42 - "*Utsúmkaka Perénknum Tawítnumjá akiniatniuítí*", wáimiaku yaúnchu ticharmakía ? - tíarmia, tímiaja.

Jn.7,43.

- 43 Nuikia aéntska Jesusnan mánikiar, nakanaikiármia, tímiaja.
44 Chíkichkia: - Achikiar',epentiái - tuiniayat, pachischarmia, tímiaja.
45 Nankirtin Ayámtainiam pujuármia nu waketki táarmatai, wea, pariséusha chicharáiniak: - Urukamtai itiachúram ? -
46 Tu tuiniái: - Ju aents^u chichana aínsank chicháu, penke atsawai - tíarmia, tímiaja.
47 Pariséu chicharáiniak: - Nuikia atumniásha anankramármek?
48 Ya úunta, ya pariséuwa níin íimiaru ajasaruí ?
49 Ya awemamun nékatsu nuka, netse ainiáwai - tíarmia, tímiaja.
50 Tu chichainiákui, Nikiutemu, nuík Jesusan iyumia nu, pariseuitiat, chicharáiniak:
51 - Aents^u antúrtsuk, warínia najanáit nusha aníntrutsuk, "makurminiáitrumé" ii awemámuri túramjik ? -
52 Takui, chicharáiniak: - Amesha karireanmayakáitiam ? Ujájmatai esetra aújsam, Kariréanmayanka wáimiaku tacha áinia nu nekátame -
53 tíar, ankant ankant nii jeén waketrármia, tímiaja.

AKANKAMU 8.

Nua tsanirmau.

- 1 Jesuska Kunchái náintnium we,
2 Kashi tsawáakui, Ayámtainiam waketki, untsurí aents^u irúnturam, unuiniártaj-sa pujursamia, tímiaja.
3 Nuí unuíkiartin, pariséusha, nua wáinmakman itíariar, ajapén awájtusar,
4 chicharáiniak: - Uuntá, ju nuan wainmakarái.
5 Muisés awemámuka: " *Nua wainmákma kayajaj tukúnar, mantamnatniuíti*" túramji. Wats amesha warítmea ? - tíarmia, tímiaja.

- 6 Nujaj Jesusan itiúrchatnum enkékar, makúrtaj-sar, tíarmia, tímiaja. Jesuska chichátsuk, tsuntsumá, ewejejaj nunká aákmaa pujumia, tímiaja.
- 7 Imiá aníntam, pankái, chicharáiniak: - Ya tuná penké tákaksu, nuka niá niá kayán nankiatí - tinia,
- 8 ataksha tsuntsumá, aákmaak pujúmia, tímiaja.
- 9 Nuna antúkar, ashí mash', uuntnumia juárkiar, wekar wekar ikiukiármatai, aya Jesús nuájajink juákmiá, tímiaja.
- 10 Nuíkia Jesús ataksha pankái, nuán chicháruk: - Makú, tuá wéara ? Yákesh makurmacháik ? -
- 11 Tákui: - Atsá, Uuntá ! - tímia, tímiaja. Tu tai: - Ayu, nuíkia wisha makuátsjame. Wetá, ataksha tunamkáip ! - tímia, tímiaja.

Jesús tsaapniuíti.

- 12 Ataksha Jesús chicháak: - Wiyáitjai aéntsun tsáapniri ! Winia nemártana nuka, kirítniunam wekátsuk, tsáapniun achik, iwíákman takústatui - tímia, tímiaja.
- 13 Nuíkia pariséu chicharáiniak: - Ma, nu ámekek túmameam ? Túrasha ame táména nuka penké aantráiti - .
- 14 Tuiniákui, Jesús chicháak: - Wi tuyá winiaj, tuí wéaj, nunash neka asán, wi túmameajna nuka nekasáiti. Túrasha átumka tuyá winiaj, tuí wéaj, nusha nekátsrume.
- 15 Átumka aéntsua aínsarmek makukrátrume. Antsu wikia yánkesh makúatsjai.
- 16 Wikia makukratíntjai. Kame wíkiakia makurcháintjai; antsu winia Apar akuptukmia nujaj pujá asamtai, wi makuámuka nekás aínti.
- 17 Atumí awemamurísha: "*Jimiará aénts túinia au nekasáiti*" tátsuk ?
- 18 Aínsanak wi wiki tumamkuísha, winia Apar akuptúkmiá nusha, nunak tawai - tímia, tímiaja.

Jn.8,19.

- 19 Nuíkia: - Tuímpia Apármesha pujá ? - Tu túiniái: - Átumka winiásha nekarcha asárum, winia Aparsha nekátsrume. Kame winia nekarkúrmeka, Aparsha nekawáintrume - tímia, tímiaja.
- 20 Núnaka Jesuska Ayámtainiam tímia, tímiaja. Warinchun sútainiam pujakuísha, nii tsawántri jeáchu asamtai, yákesh achik, epencharmia, tímiaja.
- 21 Ataksha Jesús chicharáiniak: - Wikia wéajai. Átumka tunartin asárum, eatkúrmesha, wi wéajna nuí winichminiáitrum - tímia, tímiaja.
- 22 Nuíkia jutúuka númtak chicháiniak: - Nii wea nuí wechamniaitkiurninkia, níinki maamátaj-sa tátsuash ? -
- 23 Tuiniákui: - Átumka nunkayáitrum; antsu wikia yakiyáitjai. Átumka juyáitrum; antsu wikia juyachuítjai.
- 24 Tuma asamtai, winia: "Arutmáiti", turútcha asárum, atumí tunárijai jakáttarme - tímia, tímiaja.
- 25 Takui, chicharáiniak: - Nuíkia, amesha yáitiam ? - Tu tuiniái, Jesús chicháak: - Yaúnchu timiájrum.
- 26 Ti núkap atumín chichárkatniun tákakeajai. Tumaitkuísha, winia Akuptukmia nu Anankártichu asamtai, niinín wáiniajna nunak étserjai - tímia, tímiaja.
- 27 Nii Aparíniun takuísha, nekacharmia, tímiaja.
- 28 Jesuska ataksha chicharáiniak: - Arútam-aents-ajasú takuírum, nekás Arutmáitiajna nu nekárum, wikia wi wakéramun najántsuk, aya winia Apar jintintruámun étserjana nusha nekáttarme.
- 29 Winia Akuptukmia nuka wijai pujawai. Nii wakéramun tuke najanin asamtai, penkesha ajapa ikiurcháiti - tímia, tímiaja, Jesús.

Anankártichun uchirí.

- 30 Untsurí aents^u Jesusan anturkarmia nuka íimiaru ajasarmia, tímiaja.

- 31 Tura Jesuska jutíu íimiararun chicharáiniak: - Winia chichámur amirtakrumka, nekás winia aéntsúr átatrume.
- 32 Túrarum, nekás chícham wáinkiarum, ankant ajastátrume.
- 33 Takui, chicharáiniak: - Íikia Apraáman uchirí asar', tuke ankant pujuwítji. Tuma aísha, urukamtai "ankant ajastátrume" tukártam ? - tíarmia, tímiaja.
- 34 Tu tuiniái, Jesús chicharáiniak: - Nekás tájarme; "tunamainiána au ankant ainiátsui. Kame tuná wakéramun najánainiak, ankant ainiátsui.
- 35 Tunártinkia winia Aparjají tuke pujuschártatui. Antsu wi, nii Uchirí asán, tuke pujústatjai.
- 36 Nii Uchirí tunártincha awajtámkurmin, nekás ankant átatrume.
- 37 Tíngas Apraáman uchiríntrume, nuna wisha nékajai. Tumaitiátrum, winia chichámur nakitia asárum, mantúatin wakéramena nunasha nékajai.
- 38 Aparuí wainkiáitíaj nuna tajai. Antsu átumka atumí aparí jintintrárumna nu najánearme - tímia, tímiaja.
- 39 Tu tai, chicháiniak: - li Aparinkia Apraamáiti -. Tuiniákui: - Apraáman uchiríntkiúrmeka, níiya aínsarmek aíntrume.
- 40 Tumasha átumka níiya aínsarmek Arutman chichame amíreátsrume. Kame wi, Aénts-ajasú, Arutman chichamen antukuítíajna nuna etserkuísha, átum: "maatái", turútrume.
- 41 Kame átumka, atumí aparíya aintsankétrume -. Tu tai: - Íikia chíkich apa tákakeatsji. li nekás Aparinkia aya Arutmakete - tíarmia, tímiaja.
- 42 Nuígia Jesús chicharáiniak: - Arútam atumí Aparintkiuínkia, anentíntrume. Kame wikia niiníya jínkiniáitjai. Wikia winia anentairjáinkia tacháitjai, antsu nii akuptukuítí.
- 43 Wi tájana nu nakitia asárum, winia chichámur ántatsrume.
- 44 Emésak atumí aparí asamtai, atumsha emeska aínsarmek enentáimrume. Emésak tuke aéntsún máataj-sa wakérawai. Aya wáit chícham niinín pujá asamtai, tuke waitriniáiti.

- Tsanumín asamtai, anankkártinian aparí asamtai, niiniya aya wáit chichámak jíiniui.
- 45 Antsu, wi nekás chichaman takuísha, átumka "wáitrawai" túrutearme.
- 46 Wátskea, ya winín wáit chichaman wáinia ? Wi nekás chichaman chicháisha, urukamtai antúrtatsrum ?
- 47 Nekás Arutman aéntsrinkia nii chichamen antin ainiáwai. Antsu átumka Arútmanuchu asárum, penké anturtátsrume - tímia, tímiaja.
- 48 Takui, Jutíu chicharáiniak: - Ámeka nekás Samarianmayáitme, nekás emésak enkemtuamuítme, nu yamáí nékaji - .
- 49 Tuiniákui: - Wikia emeskan takáksujai. Antsu winia Aparún amirai, átum kajértarme.
- 50 Wikia wiki naatmámtsujai. Antsu Chíkich naatmámantikruk, ayamrútkattui.
- 51 Nekás tájarme: winia chichamrun amia nuka, penke jakáshtatui - tímia, tímiaja.
- 52 Takui: - Yamáikia páant nékaji: nekás emésak enkemtuamuítme. Kame Apraam, tura wáimiakusha jakármiai. Tuma aísha, urukamtai "winia chichamrun amíakka jakáshtatui" tame ?
- 53 Apraam, nuyá waimiakusha jakarmia nusha nankákamek ? Tse, waurkachukáitiam ? - tíarmia, tímiaja.
- 54 Nuíkie Jesús chicharáiniak: - Wiki shíir enentaimtumáknaka, áantran enentaimtumajai. Antsu winia shíir enentaimturna nuka, winia Aparuíti, átumka "Arutmáiti" tárugna nu !
- 55 Nusha tayátrum, nii nékatsrume. Antsu wikia niin nékajai. "Niin nékatsjai" takunka, atúmjai métek wáittrin aíntjai. Kame niin neka asán, nii tana nuna tuke turiniáitjai.
- 56 Atumí úuntri Apraam, wi ju nunkánam taman nekátaj-sa yaúnchu wakerukú asa, wáitiak, ti shíir warásmiayi – timia, tímiaja.

Jn.8,57.

- 57 Tu tai, jutíu chicharáiniak: - Wáitrame. Ame ewej-nawe uwí tákakchiátam, urukamtai "Apraámna yaúncu wainkiámiajai" tame ? -
- 58 Tu chichainiákui: - Ti nekás tájarme: Apraámka akíntsaink, wi Arútam asán, tuke pujuwítjai - tímia, tímiaja, Jesús.
- 59 Jutíuka nuna antúkar, kayán achíkiar, tukutaj tu tai, Jesuska úumak, Ayámtainmaya j̄inkimia, tímiaja.

AKANKAMU 9.

J̄i kusurú tsuárma.

- 1 Jesuska nuí nankámak, aents^u j̄i kusurú akínian wainkiámia, tímiaja.
- 2 Nuí nii aéntsri chicharáiniak: - Uuntá, júnik akinia asamtai, ya tunamkáit ? Níinkik ? Túrutskesh nii aparínk ? -
- 3 Tuiniákui Jesús chicháak: - Atsá; níinki, tura nii aparisha tunamka asármatai, juní akiniachuíti. Antsu Arutman kakármari iniákmastin asamtai, juní akiniáiti.
- 4 Tsawái winia Ap̄ar turutmia nuna takakmastiniáitjai. Kame kashi ajásmatai, takakmaschatniuíti.
- 5 Antsu wi ju nunkánam pujakun, tsáapin awájeajai - .
- 6 Nuna tinia, nunkán achik, usukij̄ai pachímiar, kusurún j̄jniúm nuj̄ai yakar,
- 7 chicháruc: - Máatai Sirué náartin, "Akupkamu" támanum, weme, nijiamautá - takui, kusuruka we, nijiamar, ti pénker íimin waketkímia, tímiaja.
- 8 Nuik kuítian seámu pujú asamtai, aents^u wáinkiar, chicharáiniak: - Juchakáit juí pujús, kuítian seámniu nua ? -
- 9 Tuiniái, chíkich: - Ee, níiyáiti - . Antsu chíkichkia: - Níiya aniuíti - tíarmia, tímiaja.
- 10 Tsuamarú: - Nekás wiyáitjai - takui: - Itiúra yamáisha wáinmam ? - tu anintrusarmia, tímiaja.

Jn.9,11.

- 11 Tu tai: - Aents^u, Jesús tuiniána nu, nuwejai jíruí yakar, "máatai Sirúiniam nijiamautá" túrutkui, nijíamaran, páant wainmákmajai - tímia, tímiaja.
- 12 - Nusha tuí pujá ? - tuiniákui: - Cha, nékatsjai - tímia, tímiaja.
- 13 Saké tsawanttin Jesús nuwejai jí kusurún tsuármatai,
- 14 jutíu, tsuamarun pariséunam jukiármia, tímiaja.
- 15 Ataksha pariséu chicharáiniak; - Itiur tsuamármam ? - tuiniákui: - Nuwen jíruí apujtursamtaí, nijíamaran, wainmákmajai - tímia, tímiaja.
- 16 Nuíkia chíkich pariséu Jesusan aujmatáiniak: - Ju aents^u, Saketin takakma asa, Arutmánmaya winiátsui - . Tui-niakuísha, chíkichkia: - Aénts-tujíntiamun najanea nu, itiúrak tunartin aminiáit ? - túsar, kajernaikiármia, tímiaja.
- 17 Chichá chichainiákua, tsuamarun aníntruiniak: - Amesha tsuarmarái nu warítiam ? - Tu tuiniákui: - Nekás waimiakuíti, tajai - tímia, tímiaja.
- 18 Jutíuka: - Nu aents^u jí kusuruya núcháiti - túsar, páant nekátaj-sar, nii aparín untsúkar,
- 19 aníntruiniak: - Jukáit amé uchíram, kusurú akiniámia nua ? Tumaitiátsha, itiurá wáinma ? - tíarmia, tímiaja.
- 20 Tuiniákui, nii aparí chicháak: - Nekás winia uchiruíti, jí kusurú akiniámia nu.
- 21 Itiur wáinma, ya iimtiksái, nu nékatsji. Níinki anintrustárum. Kame níisha uuntchakáit ? - tímia, tímiaja.
- 22 Jutíuka "Jesús Utsumkáiti" túinia nuna, nii irutkamuriya jíiki akupáinia asármatai, ishámak:
- 23 - Uuntáiti; níinki inintrustárum - tímia, tímiaja.
- 24 Ataksha pariséu tsuamarun untsúkar, chicharáiniak: - Wáitruksuk titiá; kame íikia nékaji: aents^u tsuarmárma nuka nekás tunartiniáiti - tíarmia, tímiaja.
- 25 Tu táisha: - Wíikia aútsuk tunartiniáitia, túrutskesh tunartincháitia tátsujai. Antsu wikia jí kusurúyaj nuna yamáí wáinmajai, nu nekasáiti - tímia, tímiaja. Takui:
- 26 - Warí itiurtámkama ? Itiur iimtikrámsama ? - tíarmia,tímiaja.

Jn.9,27.

- 27 Nuíkia chicháak: - Yaúnchu ujakmaitiátrum, "nekasáiti" tátsurme. Warí urukámtai ataksha anintruteárum ? Atumsha nii aéntsri ajástaj tárumek ? - tímia, tímiaja.
- 28 Takui, katsékainiak: - Entá, ame nii aéntsri akia ! líkia Muisesan aentsriniáitji.
- 29 Arútam Muisesan chicharkamia nu nékaji. Antsu juka tuyá winiá, nuka nékatsji - tíarmia, tímiaja.
- 30 Nuíkia tsuamarú chicháak: - Aents^u winia iimtikrúsmania nu tuyá winiá ? Ma, nu átum nekátsrumna !
- 31 Tíinkiás ashí mash' nekainiáwai: Kame Arútmaka tunartin ainiána aúna antúrtsuk, aya aents^u pénker, nii wakéramun najánainia nuna ánturui.
- 32 Aents^u jji kusurún iimtikui támaka, penké antukcháitji.
- 33 Ju aents^u Arutmánmayá winiachkunka, juna najanachminiáiti - tímia, tímiaja.
- 34 Takui, chicharáiniak: - Tunajai akiniaitiátmesha, itiurá ínsha jintinkiártuatin wakéram ? - tíar, jíiki akupkarmia, tímiaja.
- 35 Jesuska jíiki akupkamun neká asa, wáiniak chicháreak: - Arútam-aénts-ajásunam iimiarukáitiam ? -
- 36 Tu tai: - Yáit, Uuntá, níinin íimiaru ajástiniash ? - tímia, tímiaja.
- 37 Jesús chicháak: - Wiyáitjai, ámijai chicháajna nu ! -
- 38 Takui: - Nekasáiti - tinia, íimiaru ajás, tikíshmatramia, tímiaja.
- 39 Nuíkia Jesús chicháak: - Juí nunkánam itiúrchatan apujsátaj-san tawítjai. Kame aents^u íimiarcha, íimiaru ajasártatui. Antsu íimiaruka, jji kusurúa aínsarank ajasártatui - tímia, tímiaja.
- 40 Pariséu Jesúsjai pujuármia nu chicharáiniak: - Íisha kusurukáitiaj' ? -
- 41 Tu tuiniái: - Kusuruítji takúrmeka, tunártincha aárme. Antsu "wáinmaji" tau asárum, tunartiniáitrum - tímia, tímiaja, Jesús.

AKANKAMU 10.

Wiyáitjai nekás Pámukan.

- 1 Jesuska chicháak: - Nekás tájarme: Ya tankun wáitirini enkémstuk, chínkiamin enkema nuka, kasáiti.
- 2 Antsu tankun nerentniurinkia wáitinmani enkémeawai.
- 3 Tankun wáinniuka wáiti uráimtai, tanku nii úuntrin antúrkar, ankant ankant untsúam, wenuknumiá jjiiniainiáwai.
- 4 Nii úuntri éemak wéakui, tanku, nii chichamen neka ásar, patatuiniáwai.
- 5 Antsu chíkichnaka, nii chichame nekachu ásar, nemarainiátsui - tímia, tímiaja.
- 6 Jesuska nu aujmitsámujai jintiakuísha, aéntska nekacharmia, tímiaja.
- 7 Tuma asamtai, Jesús ataksha chicháak: - Nekás tájarme: Wiyáitjai tankun Wáitirinkia.
- 8 Ashí mash' táarmia nuka, yajáuch', kasa asármatai, tánkuka anturkachármiai.
- 9 Wiyáitjai Wáitinkia. Winíni enkemna nuka, uwémrattui. Ankant ajás, yurumkan takústatui.
- 10 Antsu kásaka aya kasamkátaj-sa, máataj-sa, emesrátaj-sa, enkemui. Wíkiashí mash' takúsar, iwiákman achíkiarat' tusan, tawítjai.
- 11 Wiyáitjai tankun Pamukrin. Pámuk pénkerka nii tankurin ayamrúktaj-sa jáawai.
- 12 Antsu akikma nuka, pá mukcha asa, tanku níiniuchu asármatai, úunt yawá winiákui, utsank, ikiúawai.
- 13 Kame akikma asa, tankun anechuítí.
- 14 Antsu wikia nekás Pámuk asán, winia tánkurun nekainiájai, tura níisha nekarainiáwai.
- 15 Winia Ap̄ar nékarna, tura wisha niin nékajna, núnisarank tanku nekarainiáwai. Tuma asármatai, winia iwiákmarun suiniájai.

Jn.10,16.

- 16 Chíkich tanku wijai pujuiátsui. Nusha wi untsukáram, winia chichamrun antukártatui. Túrawar, ashí tanku aya chikíchik Pámukjaink irunrártatui.
- 17 Ataksha achíktaj-san, winia iwiákmarun súsatin asamtai, winia Apara anéntawai.
- 18 Kame winia Apara akúptuku asamtai, winia iwiákmarun susan, ataksha achikminiáitjai. Tuma asamtai, yákeshtantrúkchattui. Antsu, wi wakera asán, susáttajai - tímia, tímiaja, Jesús.
- 19 Nuna antúkar, jutíu ataksha nakanáirar,
- 20 chíkich: - Iniaisatái, kame emeskan tákaku asa, wáurui - .
- 21 Antsu chíkichkia: - Emeskan tákakuka ainíntia chichachuítí. Kame emésak jji kusurún iimtiksamniakáit ? - tíarmia, tímiaja.
- 22 Yumí-nantu asamtai, Jerusarénknum Ayamtain-namperin najatiármia, tímiaja.
- 23 Jesuska ayámtainiam, Sarumunkan jeáshkiriín wekáakui,
- 24 jutíu téntakar, chicharániak: - Urutáinia tukártittiam ? Nekás Arutmaitkiúmka, páant titiá - .
- 25 Tuiniákui: - Yaúnchu tamaitiátrum, átumka ímiarcha asárum, "nekascháiti" tárume. Aents-tujíntiamun winia Aparjai nájanea nu, wi yáitaj, nuna etserainiáwai.
- 26 Antsu átum winia tánkurka asárum, iimiarcháitrame.
- 27 Kame winia tánkurka winia chichamrun nekainiáwai. Wisha niín nekainiájai. Níisha nemartuiniákui,
- 28 tuke iwiáku pujusarat' tusan, iwiákmarun suiniájai. Tuma asamtai, penke jakachártatui. Tura yákeshtantrukhártatui.
- 29 Kame winia Apara nii kakármarin surusú asamtai, yákeshtantrukhártatui.
- 30 Wikia winia Aparjai chikíchik Arutmáitjai - tímia, tímiaja, Jesús.
- 31 Takui, jutíuka tukútaj-sar kayán achikiármia, tímiaja.
- 32 Túram, Jesús chicháak: - Winia Aparún kakarmaríjai untsurí pénkeran najana asámtaik, tukúrtiaj-sa wakérum ? -

Jn. 10,33.

- 33 Tu tai: - Pénker najana asákminkia kayajaj tukútjam tátsuji. Antsu aentsuitiátam, "Arutmáitjai" túsam, Arútam arántachkumin taji - tíarmia, tímiaja.
- 34 Tura Jesús chicharáiniak: - "*Atum Arutmáitrume, Wi tájarme*" tu aarmachukáit ?
- 35 Kame Arutman chichamen amirainiána au "*Arútam ainiáwai*", Ujájmatáiniam tu aárma asamtai, "wáitrawai" tichamniáitji.
- 36 Winia Apar utsúrak, akúptuku asamtai, Arútman wishíktsuk: "*wisha Arutman Uchiríntjai*", tichamniakáitiaj ?
- 37 Winia Aparún kakármarin iniakmaachkuínkia, nekascháiti turuttiárum.
- 38 Antsu nii kakármarin iniakmaakuínkia, winia nakitrakrúmsha, wi najánamu íisrum: "Nii Aparí nekás niinín pujákui, nísha nii Aparíin pujáwai" turuttiárum - tímia, tímiaja.
- 39 Nuíkia: - Achikiar' epentiái - tuiniakuísha, Jesuska pisarmia, tímiaja.
- 40 Jurtán entsánam nantu-tatáinmani we, Juank yaúnchu imiákratmia nuí pujumia, tímiaja.
- 41 Untsurí aents^u, iistái túsar, táar, chicháiniak: - Juánkka aents-tujíntiamun nájanchiat, ju tátinian tímia nu nekasáiti - túsar,
- 42 ti núkap iimiararmia, tímiaja.

AKANKAMU 11.

Rásaru aneántma.

- 1 Petania irutkámunam, Marín, tura Martan umái, Rásaru náartin, jaa pujumia, tímiaja.
- 2 Marikia yaúnchu kunkuínaj Jesusan nawén ukátar, intiashijaj japírmia nuúya, tímiaja.
- 3 Mai kaíaj Jesusan chichaman akúptuiniak: - Uuntá, ame ti anéamna nu jáawai - tu ujakármia, tímiaja.

- 4 Nuna antuk, Jesús chicháak: - Játai sunkurcháiti. Antsu Arútam naatmámtiktai sunkuráiti. Kame nujai Arutman Uchirí náatkattui - tímia, tímiaja.
- 5 Jesuska Martan, nii kaín, Rásarunash ti anenaitiat,
- 6 Rásaru jaakuísha, nuí jimiara tsawant juákma, tímiaja.
- 7 Nuyá nii aénsrin chicharáiniak: - Jutéanam ataksha waketkitiái - takui:
- 8 - Uuntá, jutíu kayajai tukúrmar, mantámatniun wakeriármánia nuí, ataksha wetaj támek ? - tíarmia, tímiaja.
- 9 Tu tai, Jesús chicháak: - Tsawant nawe-jímiar tesamun tsáapniawai. Tuma asamtai, tsawái weká nuka, wáinma asa, tukúmtsui.
- 10 Antsu kashi wekáa nuka, wáinmachu asa, tukúmeawai.
- 11 Nuna tinia, chicháak: - li yachí Rásaru kanú tepá asamtai, ishintiauwájai - tímia, tímiaja.
- 12 Takui: - Kanú tepá asa, tsuamártatui - tíarmia, tímiaja.
- 13 Jesuska: - Rásaru jakayi - nuna etserkátaj-sa wakerakuísha, nii aénsrinkia: - Nekás kánawai - tu enentáimsar, nuna tíarmia, tímiaja.
- 14 Nuíka Jesús páant chicharáiniak: - Rásaru jakayi.
- 15 Wi aí pujachu asán, waráajai. Kame yamáikia aí weákrin, nekás íimiaru ajastátrume - tímia, tímiaja.
- 16 Takui, Tumás, Jimiámramu tama, nii aín chicharáiniak: - lisha níijai weri, jakatái - tímia, tímiaja.
- 17 Rásaru ikiúsma aintiuk tsawant nankámasu aí, Jesús jeámia, tímiaja.
- 18 Petániaka Jerusarenknúmiá arántchich' pujá asamtai,
- 19 untsurí jutíu, umái jakámunam: - Marta, Marísha atsankratái - túsar, kautkarúya, tímiaja.
- 20 Mártaka, "Jesús winiáwai" taman antuk, Maríka jeá pujái, Jesusan inkiúntaj-sa werimia, tímiaja.
- 21 Inkiúnk, chicháruk: - Jesusá, juí pujaitkiuminkia, winia umar jamáin chu ajakái.

Jn.11,22.

- 22 Tumasha, ame Arútam warínkish seákminkia, antuk, amástatui, tajai - tímia, tímiaja.
- 23 Takui, Jesús chicháreak: - Ame umáimkia aneánttatui - .
- 24 Tu tai - Ee, ju nunca mesérmatai, ashí aéntsjaí métek aneánttatui, tajai - tímia, tímiaja.
- 25 Nuíkaa Jesús chicháak: - Wiyáitjai iwiáku awajkártinian ! Ya íimiaru ajás, "Arutmáiti" túruta nuka, jakasha aneánttatui.
- 26 Tura aents^u iwiáku pujana nusha, íimiaru ajakka, penké jakáshtatui. Nu nekasáiti támek ? - .
- 27 Takui: - Ee, Uuntá ! Kame ame nekás Utsumka, Arutman Uchirí ju nunkánam tatiniúya nuítme - tímia, tímiaja.
- 28 Nuyá Marín werí, kuíshnum ishishiá, chicháruk: - Uunt juí pujá untsúrmawai - .
- 29 Tu tai, Marikia wajakí, Jesusan iyútaj-sa werimia, tímiaja.
- 30 Jesuska irutkámunam tátsuk, Marta wainkiámia nú pujumia, tímiaja.
- 31 Jutúka, Marín atsánkrataj-sar pujuármia nuka, Marí tseke jiniákui, "ikiúsmanum wéawai" túsar, patatukarmia, tímiaja.
- 32 Marikia Jesús pujámunam jeá, tikíshmatar, chicháruk: - Uuntá, juí pujaitkiumínkia, winia umar jakachayi - tímia, tímiaja.
- 33 Marí úteakui, jutíusha uutainiákui, Jesussha nii anentaín kae kajénak:
- 34 - tuí ikiusmárum ? - takui: - Uuntá, winim iitiá - tu tai,
- 35 útumia, tímiaja.
- 36 Úteakui, jutíu chicháiniak: - Íiskua, imiásha anéawa ! - .
- 37 Tura chíkichkia chicháiniak: - Ji kusurúnash iimtikiat, urukamtai Rásarun "jakáip" tíchama ? - tíarmia, tímiaja.
- 38 Jesuska, nii anentaín úutkin, jaka iwiarsámunam jeámia, tímiaja. Ikiusmarinkia kaya waaúyayi. Kaya úuntjai epenmiaúya, tímiaja.
- 39 Jesús chicháak: - Kaya jurustárum - . Tu tai: - Uuntá, aíntiuk kanaru asa, mejéawai - tímia, tímiaja, Marta.

Jn. 11,40.

- 40 Nuíkiá Jesús chicháreak: - limiaruitkiúmka, Arutman kakármari wainkiáttame, tichámkajam ? - .
- 41 Takui, kayan jurusarmia, tímiaja. Jurusármatai, Jesús Nayáimpiniam íimias: - Aparú, antúrtakmin yumínkiajme.
- 42 Tinkás tuke antúrtame. Ashí mash' aents^u wajáinia ju: "Ameápi nekás Arútam akupkamuítmea !" turutiarat' túsar, seájme - tímia, tímiaja.
- 43 Nuna tinia amik, kakántar chicháak: - Rásaru, j̄inkitiá ! -
- 44 Takui, jaka nantátaki, j̄inkimia, tímiaja. Ewejé nawesha penúntramu, múukesha kamúshjaj̄i nukúkma j̄imkimtai: - Wekasat' atiatárum - tímia, tímiaja, Jesús.

Jesús maatái, tama.

- 45 Aneántman wáinkiar, untsurí Jutíu Marín atsankrátaj-sar taármia nu, íimiaru ajasarmia, tímiaja.
- 46 Antsu chíkíchikia, Jesús turamia nuna nekawarat' túsar, pariséun ujauwarmia, tímiaja.
- 47 Nuíkiá wean úuntri, tura pariséusha, úuntan irúrar, chicharáiniak: - Juka ti núkap aénts-tujíntiamun najanea asamtai, warí itirkataj' ?
- 48 Júnisrik iniaiyakrínkia, ashí mash' patatukármatai, Rumánmayá aents^u ii ayámtairin upúkukar, íinsha amutmáktat̄ji - tíarmia, tímiaja.
- 49 Nuíkiá Kaipás, nu uwitin wea úuntri asa, chicháak: - Enentáimcha ajasáirap.
- 50 Kame, ashí mash' jakaráink, aya chikíchik jamáiniaja ! - tímia, tímiaja.
- 51 Aéntsua aínsank tichámiayi. Antsu Wea Úuntri asa, Jesús ashí jutíunun jákatin asamtai, nuna tímia, tímiaja.
- 52 Aya jutíununkeka jakashtiniúyayi; antsu ashí aents^u kanakiárun irurártinian jakatniúyayi.
- 53 Nu tsawántinink maatái túsar, chicháman najatawarmia, tímiaja.

Jn. 11, 54.

- 54 Tuma asamtai, Jesús jutíunam úumak wekáimia, tímiaja.
55 Uunt-námper nuntumsamtai, ashí jutíu "ii páuskari japirtái"
túsar, Jerusarénknum irúnki weármia, tímiaja.
56 Ashí mash' Jesusan eákar, Ayámtainiam chicháiniak: - Jesús
nampérnum tátimpiash ? - túmam ajáarmia, tímiaja.
57 Nuíkia wean úuntri, tura pariséusha, aéntsun chicharáiniak: -
Jesús wainkiármeka, achikiarat' tusárum, etserkatárum -
tíarmia, tímiaja.

AKANKAMU 12.

Petánianam yurumamu.

(Mt. 26, 6; Mk. 14, 1).

- 1 Uunt-námper jeátin ujuk tsawant tasái, Jesuska Petánianam,
Rásarun aneantmamtikiámia nuí, wemia, tímiaja.
2 Nuí yurumatniun ipiawarmia, tímiaja. Mártaka wáinmai,
Rásarusha ipiámu pujumia, tímiaja.
3 Nuíkia Marí púnutspanam yaún sekútnasha yumiríjaj
pachímramu ti kunkuín asamtai, ti núkap kuítjaj sumak, itiá,
Jesusan nawén ukáttur, nii intiashijaj ujajtúrmatai, jeánka
kúnkunku ajamia, tímiaja.
4 Nuna turamtai, Kiriutnumiá Jutas, Jesusan suruktiniúya nu,
chicháak:
5 - Ju kunkuínkia menántiu-washim kuítjaj surukar',
utsumainiána au yáimiai ajakáí - tímia, tímiaja.
6 Nekás enentáimsamka, utsumáinia aun yáinktaj-sa
tichámiayi. Antsu kasa asa, kuítian-ju asa, enkeámun
kasamniúya, tímiaja.
7 Jesús chicháak: - Iniaisatá. Kame wi jákatin asamtai, winia
iniáshrun kuértinia nuna tákakeawai.
8 Utsumainiána aúka atumjaj tuke pujuártatui. Antsu wíniaka
tuke takurcháttarme - tímia, tímiaja.

Jn. 12,9.

- 9 Untsurí jutíu, Jesús Petánianam puján nekáwar, aya níin íistaj-sárkeka wechármiayi. Antsu Rásarun aneantmamtikiámia nunasha íistaj-sar weármia, tímiaja.
- 10 Nuí wean úuntri, "Rásaruka maatái" tu enentaimsarmia, tímiaja.
- 11 Kame nii aneántmanum untsurí aents^u weán ikiúiniak, Jesúsnum íimiaru ajáarmia, tímiaja.

Jerusarénknum enkemma.

(Mt.21,5; Mk.11,1).

- 12 Kashí tsawanttin untsurí aents^u Jerusarénknum kaunkarmia nu, "Jesuska úunt-nampérnum winiáwai" taman nekáwar,
- 13 páikian achíkiar, charátum ajáiniak: - Arútam akupkamu winiána au yuminksatái. Israéran Úuntri asamtai, naatmamtikkiatái - ajákiar, inkiuwarmia, tímiaja.
- 14 Jesuska kawáin wáiniak, ekemkamia, tímiaja.
- 15 Turamtai, aárma nu aminkiámia, tímiaja. Kame Ujajmatáiniam: - *Amé Úuntrumka kawáinium ekémak, winiá asamtai, Siunk irutkamuá, sapíjmiakáip* - tu aarmáiti.
- 16 Nii aéntsrinkia nuíkkia nuna nekachármiayi. Antsu Jesús aneántmatai: - Jesusjai turawarmia nuna Ujájmatai étserui - tíarmia, tímiaja.
- 17 Aents^u Jesusan nemariármia nuka, itiúr Rásarun untsuk aneantmamtikiámia nuna wainkiáru ásar, aujmatiármia, tímiaja.
- 18 Aénts-tujíntiamun najana asamtai, ti untsurí aents^u Jesusan inkiuwarmia, tímiaja.
- 19 Antsu númtak pariséu chicháiniak: - Íiskua ! Surítíákrinsha, ashí aents^u Jesusan nemárainia janta ! Itiúrkatjik ? - tíarmia, tímiaja.

Jinkiái tsentsachkunka tsapáatsui.

- 20 Nu nampérnum untsurí Kriáku, Arutman tekemrúrtaj-sar, Jerusarénknum weármia, tímiaja.
- 21 Nuyá Kariréa nunkánam Petsáita irutkamúnmayá asamtai, chikíchik Jiripin weántuk chicháruk: - Uuntá, Jesús íistaj-sar' wakérají - tímia, tímiaja.
- 22 Nuíkia Jirip' Antresjai chichás: - Jesús ujaktái - túsar, weármia, tímiaja.
- 23 Ujákam, Jesús chicháak: - Arutam-aents-ajasú naatmamtíkkiatin jeáyi.
- 24 Nekás tájarme: "Jinkiái nunká aramu tsentsachkunka, jáawai. Antsu tsentsáakka, ti núkap nerenáiti.
- 25 Aíntsank, ya jakáij tusa, pénkeran nájaneatsu nuka, nii iwiákmarin emenkáktatui. Antsu pénkeran najanátaj-sa, ju nunkánam nii iwiákmarin súana nuka, tuke iwiáku pujústatui".
- 26 Ya winia amirkátasa wakera nuka, nemartustí. Wi pujajna nuí, níisha pujuttui. Winia amirtuiniána aúнка, winia Apar naatmamtikkiáttui.
- 27 Yamái tsawántur jeá asamtai, waitiáknasha: "Aparú, ewentikrurtá" tichatajai. Kame nuna amíktaj-san tawitjai - . Tinia iniáis, chicháak: - Aparú, naatkatá - .
- 28 Tu tai, Nayáimpinmayá chícham chicháak: - Wiki náatka asán, ataksha naatkatajai - tímia, tímiaja.
- 29 Nuí pujuármia nu, nuna antúkar, chicháiniak: - Ipiamtáiti - . Tura chíkíchkia: - Arutman Pasukri chicharkái - tíarmia, tímiaja.
- 30 Nuíkia Jesús chicháak: - Nu chichamka winia túruttsui. Antsu atumín túramrume.
- 31 Kame yamáikia ju nunkan nérentniuri makúnar, jíiki ajapnattui.
- 32 Tura winia paúnam takuriármatai, ashí aéntsun winí ikiankártatjai - tímia, tímiaja.

Jn. 12,33.

- 33 Nu chichamjajii nii jakátniurin etsermia, tímiaja.
- 34 Takui, chicharáiniak: - Nekás Utsumka, tuke pujutniuíti, Ujajmatáiniam aarmáiti. Tuma aísha, urukamtai Arútamaénts-ajasún paúnam takuiniártatui, tame ? Yánaya chicháam ? - tíarmia, tímiaja.
- 35 Nuikia Jesús chicháak: - Tsáapin wárum tsawántchik atumjajii pujústatui. Te ajátsaink tsáapin pujana juínkia wekasatárum. Kame kirítniunam wéana nu, tuí wea, nuna nékatsui.
- 36 Tsáapnium wekákrum, níinín íimiaru ajákrumka, tsáapniun uchirí átatrume - tímia, tímiaja, Jesús. Nuna tinia, we, uumkamia, tímiaja.

Tsáapin nakítramu.

- 37 Jesuska aénts-tujíntiamun ti núkap iniakmasuitkiuísha, jutíuka iimiarcharmia, tímiaja.
- 38 Kame Isaías chicháak: - *Uuntá, chicháajnia nuna, ya nekasáiti túinia ? Ya uwémratniun úukma chichaman neka ?* - tu aárma aminkiatniúya, tímiaja.
- 39 Nekás iimiarcharmia tímiaja. Kame ataksha Isaías chicháak:
- 40 - *Wainkiaráink tusa, jiiin ukústurar, nekawaráink tusa, nii anentáin kátsuram awájturar, tsuararáij tusa, ímiarcha awajsármiai* -
- 41 Isaías Jesusan nankamámarin wáinkia asa, níijajii enentáimias, tu aármia, tímiaja.
- 42 Tumaitkuísha untsurí aents^u, úuntash, íimiaru ajasariat, "pariséu kajertamkar", jíiki akuptamkájii " túsar, nii iimiármarin páant etsercharmia, tímiaja.
- 43 Kame "Arútam naatmamtíkukat' " tútsuk, "aents^u naatmamtíkukarat' " túsar, wakeriármia, tímiaja.
- 44 Jesuska kakántar chicháak: - Winín íimiaru ajana nuka, winín íimiaru ajáatsui. Antsu winia akuptukmia nuí íimiaru ajáawai.

Jn. 12,45.

- 45 Kame wáitiana nuka, winia Akúptukun wáiniui.
- 46 Wikia íimiaru kirítiniunam wekasáink tusan, ju nunkánam tsáapniua aínsanak tawitjai.
- 47 Winia chichamrun antukiat, umíatsna núnaka, wikia makurchatájai. Kame wikia nuna ewemtikrátaj-san tawitjai.
- 48 Winia kajértuk, chichamprun antúrtatsna nuka, Makúkratniun tákakeawai. Nuka winia chichámur asa, amúkatin tsawanttin makúttawai.
- 49 Kame wikia winia anentáirjai chicháatsjai. Antsu winia Apar akuptukmia nu, warí titiniáit, itiur titiniáit, nuna akattúrmiayi.
- 50 Nekás wikia nékajai: Aparún chichámenka tuke iwiáku pujutai chichamáiti, tájai. Tuma asámtai, nii turutmia núnisnak étserjai.

AKANKAMU 13.

Akátramu nijjárma.

- 1 Uunt námper jeátsaink, Jesuska nii Aparíin wetin tsawant jeáu asamtai, nii aéntsrin ju nunkánam juáinian anea asa, anéashtainiash iniánkas, anémia, tímiaja.
- 2 Nuí yurumainiái, Kiriutnumia Jutas, Semunkan uchirí, emeskan antúrak, Jesusan suruktin anentáin enkemtuámia, tímiaja.
- 3 Jesuska nii Aparí ashí mash' súsam, niiniya jíinkín asa, ataksha waketitniúya nuna nekamia, tímiaja.
- 4 Nuí yurumá pujayat, wajakin, awankemrin aik,
- 5 ujurtain achik, ichínknanam entsan yarak, nii aéntsrin nawén nijjatar, ujurturarmia, tímiaja.
- 6 Nijjakí wesa, Kayan nawén nijjatratat tu tai: - Ámeka, Uuntá, winia nawerka nijjatrurchatniúitme - tímia, tímiaja.
- 7 Takui, Jesús chicháruk: - Wi áitkiajna juka, ámeka yamáikia nékatsme; atak nekátame - tímia, tímiaja.

Jn. 13,8.

- 8 Nuí Kaya chicháak: - Winia nawerka pénkesh nijiatrurcháttame - . Tu tai: - Wi nawemin nijiachkuínkia, wíniachu átatme - tímia, tímiaja, Jesús.
- 9 Takui: - Nuíkia, Uuntá, aya nawérkeka nijiatruráip. Antsu winia ewéjrusha, winia múukrusha nijiatrurtá - tímia, tímiaja.
- 10 Tu chicháakui: - Ya maainiáit, nuka nijiamaru asa, aya nawénak nijiamártatui. Átumka nijiamaruitkiurmínsha, chikíchik nijiamarcháiti - tímia, tímiaja.
- 11 Jesuska ya níin suruktiniúya nuna neka asa: - Chikíchik nijiamarcháiti - tímia, tímiaja.
- 12 Nii nawén nijarsúa amik, ataksha nii awankemrin entsar, chimpínium ekemas, chicháak: - Wi atumjají aítkiajna nu nékarmek ?
- 13 Átumka: "Uuntrú, Unuikiartiniá" turútrume. Nuka nekasáiti; kame nuitjai.
- 14 Wi uuntaitiátan, unuikiartiniaitiátan, atumí nawén nijiaru asantai, atumsha aínsarmek númtak nijiatnairatniuítume.
- 15 Wikia jutikiatárum tusan, aítkiájai.
- 16 Kame nekás tájarme: "Takákmauka nii úuntrin nankáatsui; aínsank akupkámusha nii akúpniurin nankáatsui" .
- 17 Átum nu neka asárum, amireakrumka nekás warastátrume.
- 18 Mashiniutírminkia tatsújrume. Antsu wi untsúkmarka neka asantai, Ujajmatáiniam: "*Wijají apatkun yúana nu kajertúktatui*" tu aárma nu aminkiáttawai.
- 19 Aétake nuna tájarme. Nu turunamtai, nekárum: "Nekás Arútmáiti" turuttiátrume.
- 20 Nekás tájarme: "Aéntsun wi akúpeamun amirainiána nuka, winia amirtuiniáwai. Aínsank winia amirtana nuka, winia Akúptukun amirainiáwai - tímia, tímiaja.
- 21 Jesuska nuna tuasúa amik, kúntuts enentáimias, kakántar chicháak: - Nekás tájarme: "Atumíyá chikíchik winia surutkáttawai - .
- 22 Takui, nii aéntsrinkia, yana ta túsar, íiniaim íiniaim ajáarmia, tímiaja.

- 23 Nuí akátramu ti anéamu, Jesúsjai ayamas pujá asamtai,
 24 Semunk Kaya: - yanak ta iníntrustá - tusa, uwijramia, tímiaja.
 25 Nu akátramuka Jesusan netsepeén anúmtuk: - Uuntá, yáit ?
 - tu tai:
 26 - Wi apatkun ayakan, susáttajna nuíti - tinia, apatkun ayak,
 Kiriutnúmiá Jutas, Semunkan uchirín susamia, tímiaja.
 27 Jutas apatkun yuámtai, emésak enkemtuámia, tímiaja.
 Nuíkia Jesús chicháruk: - Najanátaj-sam wakéram nu, wari
 najanató - tímia, tímiaja.
 28 Jesús timia nuna nii aéntsri antukariat, nekachármiai.
 29 Kame, Jutas kuítian-juu asamtai: - "Yurúmak sumautá",
 túrutskesha, "utsuma iyutá", tátsuash ? - tíarmia, tímiaja.
 30 Jútaska apatkun yuá, kashi asámtaisha, núchamtaik j̄jinkí
 wemia, tímiaja.
 31 J̄jinkí wématai, Jesús chicháak: - Yamáikia Arútam-aents-
 ajasú naatmamtíkkiamu átatui. Aíntsank Arútmasha níinini
 naatmamtíknáktatui.
 32 Arútmaka níinini naatmamtíkkiamu asa, Uchirínsha
 naatmamtíkkiattui.
 33 Uchirué, wikia atumjai ishíchik pujústatjai. Átumka
 eatkáttarme. Jutíusan tímiajna nútiksanak tájarme: "Átumka
 wi wéajna nuí winichminiáitrume".
 34 Yamáram chichaman tájarme: "Wi aneájrurna aínsarmek
 mai anenai ajatárum".
 35 Kame anenaiyakrumninkia: "Nekás Jesús-shuar ainiáwai"
 turamtiáitrume - tímia, tímiaja.
 36 Semunk Kaya chicháak: - Uuntá, tuí wéam ? - Tu tai: - Wi
 wéajna nuíkia ámeke nemartuschamniáitme. Antsu ukúnam
 nemartústatme - tímia, tímiaja.
 37 Nuíkia Kaya chicháak: - Urukamtai, Uuntá, yamáikia
 nemarsachminiáitjam ? Kame mantuiniakuísha, ámijai
 jakáttajai - tákui: - Ámekum winia ayámrutkam jaúmea !
 Nekás tájame: "Ju kashi atash' shiniatsáink, ámeke

Jn. 14, 1.

menáintiu: "Jesúsnaka nékatsjai" turúttiatme - tímia, tímiaja, Jesús.

AKANKAMU 14.

- 1 Jesuska chicháak: - Kúntuts enentaimsáirap. Arútmanam íimiaru asárum, wininsha iimiartárum.
- 2 Winia Aparú jeén peak íruneawai. Nuí atumnian iwiarátaj-san wéajai. Nuna turachkunka tichájrumé.
- 3 Nuna iwiáran, wi pujajna nuí atumsha pujusuk tusan, waketki tana, yaruaktátjarme.
- 4 Atumsha wi wéajna nuí jeátin, jintia nékarme - tímia, tímiaja.
- 5 Takui, Tumás chicháak: - Uuntá, tuí wéam nu nekachutisha, itiúrak jíntiash nekataj' ? -
- 6 Tu tai: - Wiyáitjai nekás jintian, nekás wáitrichun, nekás iwiákmanka. Aya winini winia Aparuí jeamniáitrumé.
- 7 Winia nekarkúrmeka, winia Aparsha nékarme. Kame yamáisha nii wáinkia asárum, nékarme - tímia, tímiaja.
- 8 Tu tai, Jirip' chicháruk: - Wátsek Uuntá, Aparsha iniakmasakminkia, máak ainti - tímia, tímiaja.
- 9 Tákui: - Wi atumjajai núkap tsawant pujajai. Tuma aísha, urukamtai nékartsum, Jiripia ? Kame ya winia wáitia nuka, winia Aparnasha wáiniui. Nuíkia urukamtai, "Apar iniakmastá" túrutam ? Wikia Aparuí pujakui, Aparsha winín pujáwai, nu nékatsmek ?
- 10 Wi tájarmena nu winia chichamruchuíti. Kame Arútam Apar winín pujak, nii wakera nuna nájaneawai.
- 11 Wikia Aparuí pujáku, Aparsha winín pujawai, nu nekachkúrmeka, nii túramuri wáinkiarum iimiartárum.
- 12 Wíkie yamáikia winia Aparuí wéajai. Tumaitkuísha winín iimiaru ajana nuka, wi najáneaj aintsank najánattui. Antsu nuna iniánkas najánattui.
- 13 Apar Uchíniam naatkat' tusan, winini seatkurmínkia, najanáttajai.

- 14 Aínsanak winini seatkurminkia amastátjarme.
- 15 Atumsha winia anentakrumka, wi awemamu amíktátrume.
- 16 Nuíkia wisha seámtai, Apar Yáinkratniun atumjai tuke pujusat' tusa, amastátrume.
- 17 Nuka Wáitrichu Iwiaikratniuíti. Yajáuch' aéntska nuna wáincha asa, núnaka nékachu asa, achikchamniáíti. Antsu átumka, atumiín pujá asamtai, nu nékarme. Kame atumiín tuke pujústatui.
- 18 Mitiáikia aítkiasnak ikiukchatájrume. Antsu ataksha taritájrume.
- 19 Wárum tsawántnum yajáuch' ainiáka waitkiachártatui. Antsu wikia iwiáku pujá asamtai, atumsha iwiáku pujúsrum, waitkiáttarme.
- 20 Nu tsawantin wi Aparuí pujajna, tura atumsha winín pujármena, aínsanak wisha atumiín pujajna nu nekáttarme.
- 21 Winia anenta nuka wi awemamun neká, amíawai. Winia anenta núnaka Aparsha anéawai. Wisha nuna anéa asán, nekarat' tusan iniakmamsáttajai - tímia, tímiaja, Jesús.
- 22 Nuí Jutas (Kiriútnúmiachu) aníak: - Uuntá, urukamtai yajáuch' aéntsnum iniakmámtsuksha, aya iínkisha iniakmámeam ? -
- 23 Tu tai, Jesús chicháak: - Aents^u winia anenta nuka, wi taman amíakui, winia Aparsha anéawai. Tura wisha winia Aparjai tarir', niinín tuke pujústatji.
- 24 Antsu ya wínia anéntatsu nuka, wi taman amírtsui. Nuka Apárnasha amíatsui; kame chichámur winia chichamruchuíti. Antsu winia Apar, akuptukmia nuna chichamente.
- 25 Atumjai pujakun, júnaka tájarme.
- 26 Nuyá wi seamtai, winia Apar nii Arútmarin akupturmaktátrume. Nuka ashí wi ujájumna nu kajínmatkírum tusa, jintinramáttarme.
- 27 Tarímtanam iwiniájrume, pénkerun ikiuájrume. Wi amáajrumna nuka, yajáuch' aents^u amáarmena aniuchuíti. Tuma asamtai, kúntuts ajátsuk, sapíjmía pujuírap.

Jn. 14,28.

- 28 "Wéajai, tura ataksha tátatjai" tájana nu antukurme. Atumsha anentakrumka, "Aparín wéawai" tusárum, warasáintrume. Kame winia Aparka winiash nankatukuíti.
- 29 Wáinkiarum, íimiaru ajásminrum tusan, nankamatsáink júnaka éemka tájarme.
- 30 Ju nunkan neréntniuri winiá asamtai, atakka atúmjainkia chichascháttajai. Nuka winín nii yajáuchirin wainkiáshtatui.
- 31 Antsu Aparún tuke anéa asán, nii wakéramun najáneaj nuna aents^u yajáuch' nekawártatui -. Tinia iniáis: - Wajaktiárum ! Juyanka wetái - tímia, tímiaja, Jesús.

AKANKAMU 15.

Jesús-irúnramu.

- 1 Jesuska chicháak: - Wikia numi nerena aniuítjai. Winia Aparka nuna Nerentniurínti.
- 2 Tsenkeármari nereachkuínia, tsupik, ajápeawai. Ishíchik neréa núnaka, núkap nerekat' tusa, ipiánteawai.
- 3 Winia chichámruka atúmniaka pauskártichu awájtamsa asákrumin, ipiantramuítrome.
- 4 Winín pujustárum. Turakrumnínia, wisha atumiín pujústatjai. Numí tsenkeármari kampuín achitkiachkunka neréatsui. Aíntsarmek atumsha winín achitkiachkúrmeka, nerechamniáitrome.
- 5 Wiyáitjai núminkia, átumka tsenkearmaruítrome. Yákesh winín pujakka, wisha niínin pujakui, ti núkap neréttatui. Kame wijáinchuka penké turachminiáitrome.
- 6 Winín pujatsna nuka, kuká aínsank káarmatai, tsupíniak, jiniúm ekemakma átatui.
- 7 Chichámur antúkrum, winín pujakrumínia, mash' seárumna nuna amástatrome.
- 8 Ti pénker takakmakrumka, nekás winia aénts^{ur} ajásrum, winia Aparsha naatmamtikiáttarme.

Jn. 15,9.

- 9 Winia Apar anenta aítkiasnak, atumniásha aneájrum. Tuma asamtai, atumsha winia anenttiárum.
- 10 Winia amirtakrumka, nekás anéntarme. Wisha Aparún anéa asán, tuke umíreajai.
- 11 Átum ti núkap warasuk tusan, júnaka tájarme.
- 12 Wi awemámuka juíti: "Wi aneájrumna aínsarmek, mai anenai ajatárum.
- 13 Nii aneámurin ayamrúktaj-sa jainiána, nuna iniánkas anéamu atsawai.
- 14 Wi tájana nu amiakrumka, wi anéamu átratume.
- 15 Wi: "Takárniuru" ticháttajrume. Kame takakmau nii úuntri enentáimia nuna nekainiátsui. Antsu, winia Apar turutmia nu, wi ujatma asárum, "Wi shuaráitume" tájarme.
- 16 Átumka winia untsurkachmiárme. Antsu, ti núkap nereákrumin, tura nu nere tuke pujusarmí tusan, wi atumín untsukuítjarme. Nuíkia winini Apar ashí seárumna nuna amasminrum tusan wakérajai.
- 17 Tuma asamtai, "tuke mai anenai ajatárum" tájarme - tímia, tímiaja, Jesús.

Kajérkamu átratume.

- 18 Jesuska chicháak: - Aents^u yajáuch' kajertamainiákrumin, éemka winia kajertukarmia nu enentaimsatárum.
- 19 Átum yajauchitkiúrmeka, kajérkamu acháintrume. Kame aents^u yajáuchikia, yajáuch' áinia aun kajerainiátsui.
- 20 Antsu, yajauchínmaya wi atumín atankin asamtai, yajauchichuítrume. Tuma asamtai, aents^u yajáuch' kajertámrum. "Takákmauka nii úuntrin nankáatsui" timiájrumsa nu kajinmatkírap. Kame winia kajertukarmia aínsarank atumniásha kajertamkartátrume. Winia anturtukarmakía ? Nútiksarank atumniásha anturtamkashtátrume.

Jn. 15,21.

- 21 Nuka winia akuptukmia nuna nékachu ásar, wi shuar asákrumin, turutmáttarme.
- 22 Wi juí tátsuk, chicharkacharuitkiuínkia, tunártincha aaráyi. Antsu wi chichárkaru asamtai, antúrtukcha ásar, "Tunartincháitjai" tíchamnia ainiáwai.
- 23 Winia kajerta nuka, winia Apárnash kajérawai.
- 24 Wi aénts-tujíntiamun najanachuitkiuínkia, tunartin acharáyi. Antsu, nuna wankiaruitiat, winia kajértukar, winia Apárnasha kajerainiáwai.
- 25 Nii Ujájmatairiín: "Áantar kajertukarai" tu aárma asamtai, nu aminkiát' túsar turuiniáwai - tímia, tímiaja, Jesús.

Iwiáikratin tarattui.

- 26 Jesuska chicháak: - Wikia, winia Aparuí pujusan, Niiniya tuke Wáitrichu Iwiáikratniun akuptuktátjarme. Nuka ta, Ayámkartin asa, winia ayamrútkattui.
- 27 Atumsha tuke wijai pujusú asárum, nii kakarmarijai winia ayamrutkáttarme.

AKANKAMU 16.

- 1 Jesús chicháak: - Ishamkáirum tusan, juna aétake timiájrume.
- 2 Jutúka atumí irutkamuriya jíiki akuptamkáttarme. Antsu, "nuna Arútam wakérawai" túsar, mantamáttarme.
- 3 Nuka winia Apárnash nékachu, tura winiasha nékarcha ásar, nuna turawártatui.
- 4 Nu nankámakui, "juna aétake túrammiaji" timínrum tusan, ujáajrume. Nuíkkia atumjai pujakun, júnaka tichamjarme.
- 5 Antsu yamáikia winia Akuptukmia nujai irunrátaj-sa wéajai.
- 6 "Wéajai" takui, kúntuts pujákrum, tuí wéaj nusha anintruteátsrume.

- 7 Wi wemáintjai. Kame wi weachkuínkia, Yáinkratin atumiín tacháttawai. Antsu wi wénaka, akuptuktátjarme.
- 8 Aénts^u anánkamu aaráink tusa, nii táanka: "Tunartin yáit ? Imítmachu yáit ? Yumínkramu yáit ?" Nuna ashí nunkánam páant nekamtikiáttawai.
- 9 Tunartin ya áinia ? Winín iimiarcharmia nu ainiáwai.
- 10 Imítmachu yáit ? Wiyáitjai. Tumaitkuísha winia Aparuí wéakui, waitkiashtátrume.
- 11 Yáit yúminkramusha ? Ju nunká úuntri yúminkramua núiti.
- 12 Wi ti núkap etsérkataj-san wakerakuísha, átumka yamáikia nekachminiáitume.
- 13 Iwiáikratin ta, tuke Wáitrichu asa, ashí mash' páant nekamtikramáttarme. Níinkia nii chichamen chichascháttawai. Antsu winia Aparún antúrak, ashí mash' turunátniunash ujatmaktátrume.
- 14 Winín achik, ujátmakrum, winia naatmamtikrúktatui.
- 15 Kame ashí mash' winia Aparú takakna nusha winiáiti. Tuma asamtai, wínian ujatmaktátrume tájarme - tímia, tímiaja, Jesús.

Winia waitkiashtátrume.

- 16 Jesuska chicháak: - Wárum tsawant waitkiashtátrume, tura ataksha waitkiáttarme - tímia, tímiaja.
- 17 Jesusan aénsrinkia nuna antúkar, chíkichkia chicháiniak: - Urukamtai: "Wárum tsawant waitkiashtátrume, tura ataksha waitkiáttarme, kame Aparuí wéajai," tu chichá ?
- 18 Wárum tsawant támasha, warinkít ? Nusha iikia nékatsji - tíarmia, tímiaja.
- 19 Jesuska anintrustaj taman nekama, chicharáiniak: - Átumka: "Wi wárum tsawant waitkiashtátrume, tura ataksha waitkiáttarme," timiájrumna núí itiúrchat enentáimrume.

Jn. 16,20.

- 20 Nekás tájarme: átum kúntuts pujákrum úteakrumin, yajúuch' aéntska warasártatui. Tumaitkuísha, kúntuts pujákrumsha, ataksha warastátrume.
- 21 Núasha juréttinri jeámtai, najáimiak, úteawai. Túrasha, uchi akiniámtai, najaimiakmaríntia kajínmatki, ti waráawai.
- 22 Aíntsarmek atumsha, yamáikia ti najaimiákrumsha, wi támatai ataksha waitkiárum, ti warastátrumna nuna yákesh atantramkishtátrume.
- 23 Nu tsawántinkia ataksha anintrutsashtátrume. Tíntas tájarme: Winíni Ap̄ar seakruminkia, mash' amastátrume.
- 24 Winíni penke seáchu asárum, nekás seatárum. Seákrumka, achíkrum ti warastátrume.
- 25 Nuíkkia aujmitsámujai jintintiáitjarme. Antsu yamáikia Ap̄arnan páant chicharkátjarme,
- 26 Nu tsawánttinkia winia pachítsarum, Ap̄ar seákrumka, wisha seátin utsumátsrume.
- 27 Kame wi Ap̄aruíya tama nekárum, átum anenta asákrumin, winia Ap̄arsha anéntmarme.
- 28 Ap̄aruíya jíinkin, ju nunkánam tau asán, yamáikia ju nunkan ikiúakun, ataksha Ap̄aruí wáketjai - tímia, tímiaja.
- 29 Takui, nii aéntsri chicharáiniak: - Yamáikia aujmitsámujai jintítsuk, páant chichakume.
- 30 Íikia aninrátstrinink, mash' nékame. Tuma asakmin, íimiaru ajar', "Arutmánmaya tawitme" yamáikia taji - tíarmia, tímiaja.
- 31 Nuíkkia Jesús chicháak: - Átumka "iimiaruítji" tárumek ?
- 32 Wáitarme. Kame yamáí winia ikiurkírum, ankant ankant pisartátrume. Tumaitkuísha, winia Ap̄ar tuke wijai pujá asamtai, wíkkia pujátsjai.
- 33 Winín tarímtanam pujúsminrum tusan, júnaka tájarme. Átum kakerkámu átatrume. Tumaitkuísha, wi ju nunkánam yajúuchin nupetka asamtai, kakáram ajastárum - tímia, tímiaja, Jesús.

AKANKAMU 17.

Jesús anéntramu.

- 1 Nuna chichasúa amik, Jesuska nayáimpiniam íimias, chicháak: - Aparú, yamáikia Uchíram naatmamtikramkat' túsam, nii naatmamtikkیاتá.
- 2 Ashí aents^u susamiámna nu tuke iwiáku pujústinian amé Kakármaram utsukmiámna nuna susatí.
- 3 Kame: "Nekás aya amek Arutmáitme; tura Utsumka Jesús ame Akupkamuítí" tuiniána au, tuke iwiáku pujusártatui.
- 4 Ju nunkánam ame turutmiámna nuna nájankun, naatmamtikkiáitjame.
- 5 Yamáikia Aparú, ju nunka najántsuk ámijai naatniúyajna nu, ataksha surustá.
- 6 Yajáuch' aentsnumia akankim, surusmiámna núnaka, "Ame yáitiam", nuna ujakaruítjai. Áminiu asármatai, yajauchínmaya akankim, surusmiámna nuka, chichámrumin amirtamkaruítí.
- 7 Yamáikia ashí mash' surusmiámna nu, amiíya winiájna nuna nekainiáwai.
- 8 Ame turutmiámna nu susáram, amikiaruítí. Amiya tawítiaj nuna nekáwar, íimiaru ajásar, Ame akupkamuítiaj nunasha nekainiáwai.
- 9 Yajáuch' áinia nunan anéntratsjai. Antsu winia surusmiámna nu áminiu asármatai, anéntrajai.
- 10 Mash' wi tákakeajna nu aminiuítí. Tura mash' ame tákakmena nu winiáiti. Nuíkie níinini naatmamtikkiamuítjai.
- 11 Wi amiín wakéteakun, ju nuankánam juakchatajai. Antsu níinkia juí juakártatui. Aparú, ti pénker asam, mash' surúsmiámna nu wáinkiam, chikichkia aínsarank iya nuke ajasarat' túsam, yainkiartá.
- 12 Wi níijai pujúmiajna nuí, ame kakarmármijai pénker wáiniam, yákesh menkakáchmiayi. Ujajmatáiniam aárma nu aminkiat' tusan, áyatik yúminkramuya nu menkakámiayi.

Jn. 17, 13.

- 13 Warásar, pénker pujusarat' tusan, ju nunkánam tajana nuna ikiúakun, amiín winiájai.
- 14 Wi yajáuchichu asán, ame chichámrumin ujákan, níinsha yajáuchichu awájsaru asamtai, yajáuch' ainiána auka kajerainiáwai,
- 15 "Yajáuch' aentsnumiá jiiikiartá" tátsujme. Antsu: "Emeskánmaya ayamrukartá" tájame.
- 16 Wi yajauchíniuchu asamtai, níisha yajauchíniuchu ainiáwai.
- 17 Tuke wáitrichu ajasarat' túsam, unpuntrartá; kame amé Chichámtinrum penke Waitrichuíti.
- 18 Ame winia akuptukmiámna aínsanak, wisha yajáuch' aéntsnum akupenajai,
- 19 Níisha nekás wáitrichu ajasarat' túsan, wi níiniun líkmak ajáajai.
- 20 Aya níiniunkeka seatainiátsjame. Antsu nii chichamen antúkar, winín íimiaru ajasártatna nunasha seatainiájai.
- 21 Ame winín pujakmin, wisha amiín pujajna aínsarank níisha chikíchik ajasartí. Antsu íijai irúnrar, íijai chikíchik ajasármatai, yajáuch' aéntsush níin íisar: "nekás Arútam akupkamuíti" turutiártatui.
- 22 Ámijai ii chikichichukáitiaj' ? Aínsarank níisha chikíchik ajasarat' túsam, ame naatmamtikrukmiámna nuna níin susaruítjai.
- 23 Nuíkia ame winín pujakmin, wisha níinin pujakui, níisha tu irúnrar, ti pénker ajasártatui. Tuma asamtai, ame akupkamu asán, ame anéntamna núnisnak níinsha anénajna nuna yajáuch' aéntsush nekawártatui.
- 24 Aparú, ju nunka nankamnatsáink ame anéntakum, naatmamtikrukmiámna nuna iisarat' tusan, ashí aents^u surusmiámna nusha wijai pujusartí, tájame.
- 25 Ti pénker Aparú, yajáuch' aents^u nekarmacharuitkiuísha, wikia tuke nekamiájme. Jusha yamáikia Ame akuptukuítmena nuna nekainiáwai.

Jn. 17,26.

26 Wikia nekarmawarat' tusan, jintintiáwaran, tuke jintín weártatjai. Tura, ame anéntamna nusha níinin pujursármatai, wisha níinin pujursártatjai - tímia, tímiaja, Jesús.

AKANKAMU 18.

Jesús epenmia.

- 1 Nuna tuasúa amik, Jesuska nii aéntsrijai Setrunk entsa amáini we, aja ámanum enkemamia, tímiaja.
- 2 Nuí nii aéntsrijai tuke irunin asamtai, Jutas Jesusan suruktiniúya nusha, nuna nekamia, tímiaja.
- 3 Nuka, wean uuntri, tura pariséusha akupkam, jutíun-wáinniurin, ruma-nankírtinrinsha yaruák, Jesús achiktái túsar, shirípkijai sukúkiar, machitjai, nankijáisha nuí tariármia, tímiaja.
- 4 Jesuska turunátniua nuna neka asa, aétake jíintiukí: - Ya eárum ? - tu tai:
- 5 - Nasarenumia Jesús eáaji - tíarmia, tímiaja. Anánkkartin Jútassha nuí pachitkia asamtai: - Wiyáitjai - tímia, tímiaja, Jesús.
- 6 - Wiyáitjai - takui, ashí mash' tekémrurar, iniararmia, tímiaja.
- 7 Ataksha chicháak: - Ya eárum ? - takui: - Nasarenumia Jesús eáaji - tíarmia, tímiaja.
- 8 - Yaúnchu "Wiyáitjai" táitjiarme. Winia eatkúrmeka, aéntsur wearat' tusárum, iniaisatárum - tímia, tímiaja.
- 9 Nujáinkia nii yaúnchu chicháak - *Ame surúsmiam nuna penkesha emenkakchaitjai* - tímia nu aminkíámia, tímiaja.
- 10 Semunk Kaya, machitian tákakuya nujai, wean úuntrin takárniurin, Marku náartinian, untsur kuishín tsupirkamia, tímiaja.
- 11 Turamtai, Jesús chicháruk: - machítrum ikiustá, kame winia Apara turutmia nuna amikchatniukáitaj ? - tímia, tímiaja.
- 12 Nuíkiá nankirtin nii úuntrijai, tura wáinniusha jutíu akupkamu, Jesusan achíkiar, ewején jinkiatrarmia, tímiaja.

Jn. 18, 13.

- 13 Anás, Kaipasan íichri asamtai, éemka níinin jukiármia, tímiaja.
- 14 Nu Kaipassha Jutiún chicharáiniak: - Mash' aents^u jainiatsáink, chikíchik jákatin penkeráiti - tiniúya núiti.
- 15 Semunk Kaya chíkich aǐjaj Jesusan patatukarmia, tímiaja. Nu chíkich aǐnkia wean úuntri nekamu asa, Jesusjaj métek jeá, wayamia, tímiaja.
- 16 Káyaka wáitiniam wajaákui, chíkich aǐ wean úuntri nekamu, wáitin-wáinniujaj chichás, Káyanash awayamia, tímiaja.
- 17 Wáitin-wáinniuka Kayan chicháruk: - Ameja Jesusan aentsrichuashítiam ? - tu tai: - Atsá, wicháitjai - tímia, tímiaja.
- 18 Ti micha ajáakui, takakmau, nuyá nakírtiniash jinia ikiámkar, anamú pujuiniámunam Kayasha núí anámuk, pujumia, tímiaja.
- 19 Wean úuntri Jesusan aníak: - Aéntsrum ya áinia ? Warí unuúkiartam ? - Takui:
- 20 - Wikia úumkan ticháitjai. Mash' íimiainiámunam, Ayámtainiam, jutíun iruntáiriínish páant chichakuítjai.
- 21 Tuma asamtai, urukamtai aníntrutam ? Winia chichámrun antukáruana nu nekáinia asármatai, nii inintrustá - tímia, tímiaja.
- 22 Jutiún ayamrin nuna antuk, Jesusan yapíniam awáteak, chicháruk: - Aínink wean úuntri áinium ? -
- 23 Tu tai: - Yajáuchin chichakuitkiuínkia, turuttiá. Antsu, pénkeran chichaku aísha, urukamtai awáttam ? - tímia, tímiaja, Jesús.
- 24 Anaska, Jesúsna jinkiá, wean úuntri Kaipasai akupkarmia, tímiaja.
- 25 Semunk Káyaka jinia anamú puján chicharáiniak: - Ameja Jesusan aentsrichukáitiam ? - tuiniákui: - Atsá, wicháitjai - tímia, tímiaja.
- 26 Nuyá wean úuntrin takárniuri, Kaya kuishín tsupírkarmia nuna shuar: - Jesusjaj ajánam wainkiáchmakjam ? - Takui:
- 27 - Atsá - táink, atash' shiniúkmia, tímiaja.

Jesús makumu.

- 28 Tsawáakui, Jesúsnaka Kaipasan jéeya jjiikar, Ruman úuntri makut' túsar, ejeniármia, tímiaja. Jutíuka: - Wayákrikia, páuskartin ajasar', úunt-námper najanachminiáitji - túsar, enkemacharmia, tímiaja.
- 29 Nuíkia Piratu jjiintiukí, chicharániak: - Ju aents^u warinma makuárum ? - Takui:
- 30 - Yajauchichuitkiuíkia, juí itiacháji - tíarmia, tímiaja.
- 31 Pirátuka chicháak: - Jukírum, atumí awemamurijaj makutárum - takui: - líkia makurar', maachminiáitji - tíarmia, tímiaja.
- 32 Nujáinkia, Jesús: - Itiur jakatniuítiaj ? - timia nu, aminkiámia.
- 33 Pirátuka waketki, chimpínium ekemas, Jesusan untsuk, aníak: - Ame jutíun uuntrinkáitiam ? - tu tai:
- 34 - Amé anentáimjainkik túrutam ? Túrutskesha, chíkich turutáinia núkechuk awákeam ? - tímia, tímiaja, Jesús.
- 35 Nuíkia Piratu chicháruk: - Wisha jutiukáitij ? Warí itiurká asákminia, amé shuáarak, wean úuntrisha makúrmamar, itiármara ? - tu tai:
- 36 - Wikia ju nunkan uuntrichuítjai. Ju nunkan uuntrinkiuínia, winia nankírtiniur jutíu makuaráink túsar, ayamrutkarayi. Kame juyá úuntcháitjai - tímia, tímiaja.
- 37 Takui Piratu chicháak: - Nuíkia ámeke máshiniun uuntrinkiaítiam ? - Ee, ame nékasmek tame: Wikia máshiniun Uuntrintjai. Nu átaj-san akínian, ju nunkánam tawitjai.
Wáitrichu aa nuna iniakmástaj-san tawitjai. Tuma asamtai, wáitrichu aa nuka wi taman ántawai - tímia, tímiaja.
- 38 Piratu chicháreak: - Wáitrichusha warimpiáit ? - tinia, ataksha jutíu pujuiniámunam we: - Ju aents^u tuná tákakcha asamtai, makuchminiáitjai.

Jn. 18,39.

- 39 Antsu úunt-nampérnum aents^u yajáuchia nuna ankant akupniuítjai. Jutíun úuntrin ankant akupkát' tusárum, wakérmek ? - tímia, tímiaja.
- 40 Takui, jutíu chará ajákiar: - Atsá, nuka akupkáip. Antsu Parapás ankant akupkatá - mankartiniaitkuísha tíarmia, tímiaja.

AKANKAMU 19.

- 1 Nuíkia Piratu chicháak: - Jesús achíkrum, asutratárum - tímia, tímiaja
- 2 Nankírtiniash jankín etenteárar, múuknum etsémrumtikkiar, awankem kapakun aentsrarmia, tímiaja.
- 3 Tura weántukar: - Juíti Jutíun úuntri - tíar, yapínmash awátíar, wishikiármia, tímiaja.
- 4 Pirátuka ataksha jíinkí, chicharáiniak: - Ataksha awaketkitiájrum. Kame nii tunarin wáitkiachu asán, makuchminiáitjai - tímia, tímiaja.
- 5 Jesúska jankín etsénkraku, awankem kapakun entsaru áa jíiniakui: - Pai, aents^u juíti - tímia, tímiaja.
- 6 Wean úuntri, ayámtain wáinniusha nuna wáinkiar, chará ajákiar: - Paúnam ajíntiatá, ajíntiatá - , tuiniákui: - Wikia tunarin wáitcha asán, makuchminiáitjai. Tuma asamtai, átum jukírum, ajíntiatárum - tímia, tímiaja.
- 7 Takui, jutíu chicháiniak: - líkia awemamu tákakeaji. "Arutman Uchirintjai" tiniu asa, ii awemámuri tana aínsank mantámnatí - tíarmia, tímiaja.
- 8 Nuna antuk, Pirátuka ti sapijmiákmia, tímiaja.
- 9 Chimpínium ataksha ekemas, Jesusan aníak: - Ame, tuyampáitiam ? - Tu táisha Jesuska penké aikchamia, tímiaja.
- 10 - Urukamtai aírsum ? Winín pujá asakmin, jíikminiáitjame, túrutskesh paúnam ajíntiamniáitjamna, nu nékatsmek ? -

Jn. 19, 11.

- 11 Takui: - Nu túratin Yakiya tsankatkachmaitkiúmka, wíniaka penké turutachminiáitme. Tuma asamtai, amiín surutkamnia nuka, aminsha iniánkas tunamkáiti - tímia, tímiaja.
- 12 Nuchamáik Pirátuka ankánt akupkátaj-sa wakerakuísha, jutíu charátum ajákiar: - Ya "Ashí uuntrintjai" tana nuka, Sésaran numasri asamtai, amesha ankant akupeákmeka, Sésaran numasri átatme - tíarmia, tímiaja.
- 13 Pirátuka nuna antuk, Jesúsnaka aa aents^u irunramúnam jjiiki, níisha nuí, kayajai ampakma Kapatá náartinnium jjiinki, chimpínium ekemsamia, tímiaja.
- 14 Úunt-námper nuntumtuámunam, nantu tutupnirái, Piratu jutíun chicharáiniak: - Juítí atumí úuntri -.
- 15 Tu tai, charátum ajákiar: - Mak mak, ajjintiatá ajjintiatá - ajainiákui: - Atumí úuntrin ajjintiat' tusárum, wakéarmek ? - tímia, tímiaja. Wean úuntri chicháiniak: - li úuntrinkia aya Sesarkete; chíkich takáksuji - tíarmia, tímiaja.
- 16 Nuíki Piratu Jesusan ajjintiawarat' tusa, susarmia, tímiaja.

Jesús ajjintiámu.

- 17 Nuka Jesúsnaka achíkiar, paun ayánkar, pémpereatak Ukunch' náintnium, jutíu chichámjai "Kúrkuta" támanum, jukiármia, tímiaja.
- 18 Nuí ajjintiawar, menánmani tura untsurnúmanisha jimiará aéntsun ajjintiawarmia, tímiaja.
- 19 Pirátuka: - Nasaretnumia Jesús Jutíun uuntrinti - tatánknum tu aár, paúnam netuawarat' tusa, akupkamia, tímiaja.
- 20 Jesuska irutkamúnmaya tíjiuch' ajjintiámu asamtai, jutíujai, ratínjai, kriáku chichámjaisha aárman, ti untsurí aents^u aajsarmia, tímiaja.
- 21 Nuíki wean úuntri Piratun weríar, chicharáiniak: - "Jutíun uuntrinti" tu aaráip. Antsu "Níinki áantar jutíun uuntrintjai" tímia nu aartá - .
- 22 Tuiniakuísha: - Yaúnchu aármaka, aarmáiti - tímia, tímiaja.

Jn. 19,23.

- 23 Nankírtinkia Jesusan ajjintiáwar, aíntiuk ásar, ankant ankant nii entsatáirin jukiármia, tímiaja. Awankémrinkia aya ésarmak, apárchamu asamtai:
- 24 - Juka jáatsuk, yának ati, nakurusa íistái - tíarmia, tímiaja. - Ujajmatáiniam: - *Entsatáirun ankant ankant jukiar, awankémrunka nakurúsar, jáatsuk chikíchik jukímiayi* - tu aárma núnisank nankírtinjai aminkíámia, tímiaja.

Jáak chichakma.

- 25 Jesús ajjintiámunam nii Nukurí, juna kaí, Marí Kreupasan nuwé, tura Maktaránmaya Marisha wajáarmia, tímiaja.
- 26 Nuí ti anéamu akatrámusha wajáa asamtai, Jesús nii Nukurín íis, chicháreak: - Nukurú, nuíti ame uchíram - .
- 27 Tinia, akatrámunash chicháruk: - Nuíti ame Nukúram - . Takui, akatrámuka nii jeén jukimia, tímiaja.
- 28 Jesuska ashí mash' aminkíámia nuna neka asa, chicháak: - Kitiámajai - tímia, tímiaja. Nujáinkia yaúnchu Ujajmatáiniam aárma aminkíámia, tímiaja.
- 29 Nuínk uruchin pintiúnam péerkar, ichínknanam sawe churuá puján ajámrurar, wenénam aapawármia, tímiaja.
- 30 Jesuska najeká, chicháak: - Mash' aminkíáyi - tinia, muukén utsuntsamtaí, nii wakaní jjiinkimia, tímiaja.

Jesús ijiúmu.

- 31 Jutíuka úunt námper nuntumtuámunam pujá ásar, kashín Saké tsawant Úunt-námper asamtai, ajjintiámu júsachma juakaráink túsar, nii nawé kupíram, wárichik jakarat' túsar, Piratun seawarmia, tímiaja.
- 32 Nuí nankin-juu táar, éemkaka Jesusjai ajjintiámu áarmia nuna kankajín kupírmia, tímiaja.
- 33 Nuyá Jesusan jeáriar, jaka asamtai, kankajín kupirkacharmia, tímiaja.

Jn. 19,34.

- 34 Antsu chikíchik nankirtin nankíjai paénam ijiúmtai, nu chíchámaik numpa entsajai j*in*kimia, tímiaja.
- 35 Wáinkia nuka, átum ímiaru ajásminrum tusa, étsereawai. Nekásana nuna níisha nékawai.
- 36 Ujajmatáiniam chicháak: - *Ukúnychínkia penke kupirkachártatui.*
- 37 *Tura: Ijiúmunash wainkiártatui* - tímia nu aminkíamiayi.
- 38 Nuyá Arimatéanmaya Jusé, jutíun ishama asa, úumkank Jesusan aentsriniúya nu, Piratun werí, chicháruk: - Jesusan iniashín júkitin tsankatruktá - takui: - Ayu - tu tai, jukimia, tímiaja.
- 39 Aíntsank Nikiutemu, kashi Jesusan werí, aujumia nusha, núkap kaúshtai-kunkuín pachímramun itiamia, tímiaja
- 40 Jutíu iwiárin áarmia aíntsank, nu kunkuínjai tarachiín ukátar, Jesusan iniashín penuármia, tímiaja.
- 41 Jesusan ajintiawármia nuí ayámach', aja ámanum jaka-iwiártai yákesh ikiúschamu amia, tímiaja.
- 42 Jutíun namperi nuntumtuámunam pujá ásar, nuínk tijiuchik Jesusan iniashinkia ikiusarmia, tímiaja.

AKANKAMU 20.

Jesús aneántu.

- 1 Ayámtai-tsawant yama tsawái, kirítiak Maktaránmaya Marí Jesusan ikiúsmarin íyútaj-sa we, wáitíniam kaya apújsamu jurúsman wainkiámia, tímiaja.
- 2 Wárichik waketki, Kayan, tura akátramu Jesús ti anemia nuna chicháruk: - Jesusan iniashinkia jusarái. Tuíntsuk ikiusara, nékatsji - tímia, tímiaja.
- 3 Nu chíchámaik Kaya, chíkich akatrámujaink, ikiúsmanum weármia, tímiaja.
- 4 Nuka, chíkich akatrámuka, ti tsékea asa, Kayan ajapa ikiúak, niá niá jeámia, tímiaja.

Jn.20,5.

- 5 Tekenás íis, jinkiarmaninkia nunká tepán wáiniak, wáyachmia, tímiaja.
- 6 Káyasha ta, wáyá, núnisank wainkiámia, tímiaja.
- 7 Antsu taráchkia jaka awasmáuya nuínk atírchamu, penuárma juakuya, tímiaja.
- 8 Chíkich akatrámusha wáyá, íis, íimiarmia, tímiaja.
- 9 Kame, "Jesús jakamúnmayá aneanttiniáiti" tu Ujajmatáiniam aárman nékachu áarmia, tímiaja.
- 10 Nuyá, ataksha nii jeén waketkiármia, tímiaja.

Jesús Marín iniakmamsa.

- 11 Maktaránmayá Marikia Jesús ikiúsmanum aách' pujús, úutu pujumia, tímiaja. Úutiat, tekenas, íyaj tukamá,
- 12 Jesús ikiusmáuya núí, jimiará pásuk, ti pujun entsaráinia, chíkich chaiknúmani, chíkichkia nawénmani eketáinian wainkiámia, tímiaja.
- 13 Tura pásuk chicharáiniak: - Maku, urukamtai úuteam ? - Tu tai: - Winia Uuntrun iniashín jukiármatai, tuínk ikiusara tusan, útjai - tímia, tímiaja.
- 14 Nuna tinia, ayántar, Jesús wajáan wainkiayat, nekachmia, tímiaja.
- 15 Nuíkie Jesús chicháruk: - Maku, urukamtai úuteam ? Ya eám? - Tu tai, níinkia: - Juí takakmauwapítia - tusa: - Uuntá, ame jukiniaitkiúmka, tuí ikiusum, ujatkatá; wi jurumkitiaj - tímia, tímiaja.
- 16 Takui: - Maríyá ! - tu tai, ayantar, chicháak: - Winia Uuntruá (Jutíu 'chamjáinkia "Rapuní") - tímia, tímiaja.
- 17 Miniákkam: - Winia Aparaí wecha asamtai, akuptuktá. Winia aéntsúr chichárukum: "Winia Aparaí atumí Aparaí asamtai, núí wéajai. Arútmaka winiasha atúmniasha asamtai, núí wéajai, tawai" tu ujatrukartá - tímia, tímiaja.
- 18 Takui, Maktaránmayá Marikia we, akátramun chicharáiniak: - Úuntan wainkiájai. Juna túrutui - tusa, etserkamia, tímiaja.

Jesús akatramun wantintiukaru.

- 19 Ayamtai tsawanttin kiárai, akatrámuka jutíun ishamáiniak, wáiti epémarar pujuiniái, Jesús aya aneáchma núí wajatásmia, tímiaja.
- 20 Tura chicharáiniak: - Arútam tarímtanam iwiaitmaktárum - nuna tinia, ewején netsepénash iniaktusarmia, tímiaja. Akatrámuka Úuntan wáinkiar, ti warasarmia, tímiaja.
- 21 Ataksha chicharáiniak: - Arútam tarímtanam iwiaitmaktárum. Winia Apar winia akuptukmia aínsanak, wisha atumín akupeájrume - .
- 22 Tinia iniáis, súut umpuín: - Iwiáikratin atumjai pujustí.
- 23 Ya átum nii tunari tsankúrearum, nuka tsankuramu atí, Antsu, átum tsankurachúram, nuka tsankurachma atí - tímia, tímiaja.
- 24 Jesús tamia núí, chikíchik akatrámu Tumás, jímiámramu tama, pujuchmia, tímiaja.
- 25 Támatai, nii a_l chicharáiniak: - Íikia Úunt wainkiáji - tuiniákui: - Wíikia nii ewején ajjintiámurin wáinkian, w_aa ajasárunam ewejrun awayachkunka, tura winia ewejrun nii paén ijiumuriín awayachkunka, "Jesusapi aneántai" tichatajai - tímia, tímiaja.
- 26 Yarush' tsawant nankamásmatai, Tumás akatrámujai pujuiniámunam, Jesuska wáitikia epenrámunmank aya aneáchma tsekent ta: - Arútam tarímtanam iwiaitmaktárum - tímia, tímiaja.
- 27 Nuyá Tumasán chicháreak: Winia ewejur íisam, winia paeruísha ewejem awayam, íistá. Atakka "nekascháiti" tip, antsu íimiaru ajastá - tímia, tímiaja.
- 28 Núí Tumaska: - Winia Uuntruá, nekás Arutmáitme - tímia, tímiaja.
- 29 Takui, Jesús chicháruk: - Ámeká jíimijai wáitkiam: "Nekasáiti" tame. Antsu jíjajai wáittsuk, íimiaru ainiána au warasartí - tímia, tímiaja.

Amúamu.

30 Akatramu iimiainiái, Jesús ti núkap aénts-tujíntiamun najanamia nuka, máshikia juínkia aarchamuíti.

31 Jesús Utsumka Arutman Uchirínti tiarat', aya juke aarmáiti. Ju aármanum íimiaru ajásrumka, níinini tuke iwiáku pujustátrume.

AKANKAMU 21.

Jesús iniakmámsamu.

- 1 Nuyá Típeríates antumiánkan kaanmatkariín, Jesuska nii aéntsrin tariármia, tímiaja,
- 2 Semunk Kaya, Tumás Jimiámramu, Kariréa nunkánam Kanánmayá Natanaérsha, tura Sepetéun uchirí, nuyá chíkich jímiar akatrámusha irúnrar pujúármia, tímiaja.
- 3 Semunk Kaya: - Namakan achirmáktaj-san wéajai - takui: - Ílisha ámijai winiáji - túsar, wéar, kanúnam enkémrar, kashi nekán ajú ajuntainiákua, penke achikcharmia, tímiaja.
- 4 Tsawana aí, kirítiak, Jesús kaanmátkanam tamatáisha, akatrámuka nekacharmia, tímiaja.
- 5 Nuíkaa Jesús chicharáiniak: - Uchítia, yurumatín tákakrumek? - Tu tai: - Atsá ! - tíarmia, tímiaja.
- 6 - Tse, nusha wátskea; neka untsurnúmani ajunktárum; nuí achiktátrume - tímia, tímiaja. Takui, nekan ajúnkar, ti untsurí namak enkemkamtai, jusataj tukamá, tujintiármia, tímiaja.
- 7 Akatramu Jesús ti anéamuka Kayan chicháruk: - Aúka ii Úuntriyajanta - tímia, tímiaja.
- 8 Káyaka nuna antuk, aímiak pujayat, wárik entsar, níinini yukuárkutak wemia, tímiaja. Chíkich akatrámusha kanúnam táar, ti arant asamtai, nekán japírkutak, kanmátkanam ajuíniármia, tímiaja.

- 9 Kanmátkanam jeáwar, ji ikiapármanum namak apátkujaí jjiámun wainkiármia, tímiaja.
- 10 Jesús chicháak: - Namak achikiúrmena nu itiatárum - .
- 11 Takui, Semunk Kaya kanúnam enkemá, namakan jusamia, tímiaja. Washím-ewej-nawe-menáint ainiayat, nekánash tsurinkcharmia, tímiaja.
- 12 Tura: - Yurumaitiárum - takui: - Jesusapítia - túsar, yákesha: - Ame yáitiam ? - tu aniascharmia, tímiaja.
- 13 Jesuska weántuk, apatkun púuk, namáknash nútiksank kupik, susarmia, tímiaja.
- 14 Jesús jakamúnmayá aneántu asa, jújainkia menáintiu iniakmamsamia, tímiaja.
- 15 Yurumá amíkiar, Jesús Semunkan, Kaya taman, chicháreak: - Semunká, Juankan uchiriya, ju aents^u anentainiána ju nankákam, anéntamek ? - tímia, tímiaja.
- Ee, Uuntá, amesha nékame, wi anéajme - . Takui: - tankúchir wainkiartá - tímia, tímiaja, Jesús.
- 16 Ataksha Jesús aníak: - Semunká, Juankan uchiriya, anéntamek ? - Tu tai: - Ee, Uuntá, ame nékame, wi nekás anéajme - tímia, tímiaja. Takui: - Tankúchirun úuntri waitrukartá - tímia, tímiaja.
- 17 Menáintiu ataksha aníak: - Semunk Kaya, Juankan uchiriya, nekás anéntamek ? - Tu tai, imiá aníam, kúntuts enentáimiar, chicháak: - Ee, Uuntá, ame ashí neka asam, wi anéajmena nu nékame - tímia, tímiaja. Nuíka Jesús chicháreak: - Tankúchirun úuntri jintintiawartá - tímia, tímiaja.
- 18 Tinia: - Ámeka natsa asamka, eménmamam, ame wakéramna nuí weúyame. Antsu úuntach' ajasákminkia, ewéjmin ayapátramrar, jinkiátmawar, ame nakitiámna nuí juramkiártatui - tímia, tímiaja.
- 19 Jesuska Kaya itiurá Arutman náatmamtik jakatniuí, nuna nekat' tusa, tímia, tímiaja.
- 20 Arum Kayan chicháruk: - nemartustá - tímia, tímiaja.

Jn.21,21.

Tu tai, Kaya ukúnam apajás íimias, akatramu Jesús ti anéamu, yurumu pujayat Jesusan netsepeén anúntuk: - Ya surutmáktata ? - tímia nu, ukúnam patáak winián wainkiámia, tímiaja.

21 Wáiniak, Jesusan aníak: - Jusha itiúrkattam ? -

22 Takui, chicháruk: - Wi ataksha waketmam pujut' tusan wakerakuísha, amesha warí iistiniáitiam ? Ámeka nemartustá - tímia, tímiaja.

23 Aéntska nuna antúkar: - Nu akatrámuka jakáshtatui - tiniu áarmia, tímiaja. Tuiniakuísha, Jesuska: - Jakáshtatui - tichá-miayi. Antsu áyatik:- Wi ataksha waketmam pujut' tusan wakerakuísha, amesha warí iistiniáitiam ? - Kayan tímia, tímiaja.

24 Júnaka akatramu Juánkak aáru asamtai, íisha nekasáiti taji.

25 Jesuska ti untsurí iniakmásmiania nu aákrikia, penké amukchamniáitji.



AKATRAMUN TÚRAMURI.

Hecho de los Apóstoles



AKANKAMU 1.

Eémkari.

- 1 Tiujirúá, ashí mash' Jesusan túramurin, unuiniarmarinsha éemka aármajai.
- 2 Yama nankámtaik juárkun, nii Akatrámurin untsúkar, nii Arútmarini jintíntiáwar, Nayáimpiniam wemia, nunash éemka aármiajai.

Jesús wakamu.

- 3 Jesús jaka, aneánt: - lwiáku pujajai - tusa, aintiuk-nawe tsawant nii Akatrámurin wantíntiukar, Arútam-Irúnramu uru-kuít ? Nuna jintíntiawarmia, tímiaja.
- 4 Níijaink irunra pujús, chicharániak: - Jerusarenknumiá jjíntsuk, "winia Ap̄ar amastátrume" tímiajrumna nu nákastárum.
- 5 Kame Juank entsájaink imiaitkuísha, átumka lwiakrátniunam imiántin jeatemayi.-
- 6 Tura, irúnrar pujúsar, Jesusan aníniak: - Uuntá, yamáik Israer-Irúnramu nankámattam ? -
- 7 Tu aníam, Jesús chicháak: - Wínia Ap̄ar warí tsawanttín túratta nu nekachminiáitrum.
- 8 Antsu, atumiín lwiáikratin enkemamtai, nii kakarmarijaink Jerusarenknun, Jutéanam, ashí nunkánmasha wínia chichámur etserkáttarme - tímia, tímiaja.
- 9 Nuna tínia amik, nii Akatramurisha íimia wajainiái, nayáimpiniam wáak, iyá iyam, yuránkminiam pachínia, menkakamía, tímiaja.
- 10 Nayáimpiniam íimia wajainiái, jimiará aents^u pújun entsaru, jeáriar,
- 11 chicharániak: - Kariréanmayá aentsuá, warí nayáimpinmash imiá iyárum ? Ju Jesús wáak^u wainkiármena aínsank, ataksha taráttawai - tíarmia, tímiaja.

Iwiáikratin nákamú.

- 12 Jesusan Akatramurínia Kunchái na intniúmiá akáikiar, Jerusarénkka tíjjuch asamtai, waketkiármia, tímiaja.
- 13 Nii jeén jeáwar, yakí útsaimiunam wakarmia, tímiaja. Kaya, Juánk, Sántiak, Antrés, Jirip', Tumás, Parturumé, Matéusha, tura Sántiak Arjéun uchirí, ásump' Semunk, Jutas Santiáakun yachísha, irunra pujuármia, tímiaja.
- 14 Marí Jesusan Nukuríjaj, chíkich nuájaj, Jesusan yachíjajsha irúnrar, tuke anentrú pujuármia, tímiaja.

Matías anáikiamu.

- 15 Nu tsawánttin washim-jimiará-nawe aents^u, yachiya aínsarank irúnrar pujuíniámunam, Kaya wajakín chicharániak:
- 16 - Yatsurú, Iwiáikratin Tawitniúmani timia nu Ujajmatáiniam aárma asamtai, Jutas Jesusan surukma nu aminkíamiayi.
- 17 Íjjajink takákmastin untsukma asa, íi shuaráuyayi. -
- 18 Túrasha, Jútaska nankímná pujákmatai, ampujenka péerpeer ajasarmia, tímiaja. Jesusan surukmia nu kuítjaj nunkan sumakarmia, tímiaja.
- 19 Jerusarénknum ashí aents^u nuna nekáwar, "Numpá nunka" tu anaikiármia, tímiaja.
- 20 Kame Ujajmatáiniam chicháak: *"Nii pujútairisha itiáarak ajásmatai, yákesch pujúschati"* tu aármaitkuísha, aínsank: *"Chíkich nii takatrín akíntruktí"* nusha aarmáiti.
- 21 Tuma asamtai, Juánk Jesusan imiáimia nuyá, Jesús Nayáimpiniam wakamia tímianai, aents^u íjjaj irúnrar, tuke Jesusan nemariármia nu eakar',

Tur.1,22.

- 22 Jesusan nantákmiarín etserkat' tusar', chikíchik anaikiatniúitji - tímia, tímiaja, Kaya.
- 23 Jusé, Pársawa taman, tura Matíasan wainkiármia, tímiaja.
- 24 Nuyá anéntruiniak: - Uuntá, Ámeka aentsún anentái neka asam, ju jímiar íisam, ya wakéram, iniakmastá.
- 25 Jútaska nii pujustinriín weu asamtai, nii takatrin yaki akíinkiat' iniakmastá - tíarmia, tímiaja.
- 26 Yaki awakmakat' túsar, íisar, Matías nupétmaku asamtai, akátramú awajsarmía, tímiaja.

AKANKAMU 2.

Iwiáikratin taramu.

- 1 Ewej-nawe tsawant jeámtai, ashí mash' tuákar,
- 2 jeá pujuármia nuka, nékachma násea aínsank téter ajakí, Nayáimpinmaya winián antukarmía, tímiaja.
- 3 Ji, keá ániu wantíntiukar, ankant ankant púnak, tarurarmia, tímiaja.
- 4 Iwiaikrátiniuka tu nii anentáiín pimiútkaram, nii nekátairin susáram, ashí mash' chíkích chichaman chichasarmia, tímiaja.
- 5 Israer aents^u ashí nunkánmaya Jerusarénknum táar, íimiaru ásar matsamawarmia, tímiaja.
- 6 Nuna antúkar: - Warinkit ? - túsar, kaúnkar, ashí mash' nii chichámejaink Jesusan Akatrámurin anturkarmia, tímiaja.
- 7 Antúkar: - Aj! Chichainiána au Karireánmayanchuk áinia ?
- 8 Tuma aísha, urukamtai ankant ankant ii chichámejaink ántaj'?
- 9 Juínkia Partúnmaya, Mítiánmaya, Iramitiánmaya, Mesuputámianmaya, Jutéanmaya, Kapatúsianmaya, Puntunmáya_{asha} irúntsujik ?

Tur.2,10.

- 10 Tura Asiánmaya, Príjiánmaya, Panjíriánmaya, Ejíptúnmaya, Ripia Serene ayamchínmaya, nuyá Rúmanmaya, jutíu, jutíu-chu jutíusan nemarínia nusha matsatainiátsuk ?
- 11 Núnisarank, Krétanmaya, Arapianmayasha matsatainiájnia ju, ashí mash' Arutman túramuri ii chichámejaink shíir ántaji - tíarmia, tímiaja.
- 12 Nékachma turunamtai: - Jusha warímpiáit ? - túmam ajáarmia, tímiaja.
- 13 Antsu, chíkichkia: - Nampekú ainiáwai - túsar, wishikiármia, tímiaja.

Kaya chichakma.

- 14 Nuíkia Kaya Akatrámujaink jíinki, aa matsatáinian chicharáiniak: - Jutéanmaya aentsuá, atumsha íirar Jerusarénknum matsátrumna ju, yamáí warí uruká ? Nu nekátaj takúrmeka, esétrarum antuktárum.
- 15 - Nampekú ainiáwai - takurmínsha, káshik asamtai, nampekcháitji.
- 16 Antsu, Wáimiaku Juer tímia nu tsawant jeáyi.
- 17 Kame chicháak: *"Ukúnam tsawant jeámtai, wínia Iwiáikratniurun ashí aéntsnum akupkamtai, nii uchirí, nii nawántrisha Arútam taman etserkártatui; nátsaka iimiarártatui; úuntchisha karamrártatui.*
- 18 *Nu tsawantin wi shuáran iwiainiakármatai, Arutman túramurin impínmarártatui.*
- 19 *Yakí nunkasha aents-tujíntiamun najanáttajai.*
- 20 *Ti náatu Arutman tsawantri jeátsaink, tsawái nántuka kajínkiámtai, kashi nantusha numpamnáttawai.*
- 21 *Nuí ashí mash' Arútmán anéntruinia nu ewemrártatui, Arútam táwai"* tímia, tímiaja, Juér.
- 22 Israer aentstíram, anturtuktárum: Arútam, Jesusan atumí Úuntri awajas, níinini aents-tujíntiamun, ti pénker ana nunasha najanámiayi.

Tur.2,23.

- 23 Átum nu nekayátrum, yajáuch' aents^u paúnam ajintiáwar, maawarat' tusárum, Arútam yaúnchu tímia núnisrumek surukmiárme.
- 24 Játai níin penke nupétkachmin asamtai, waitsáink tusa, Arútam ataksha aneantmamtíkiámiayi.
- 25 Kame Tawit chicháak: *"Úntka wínia untsuruíni naka wajatra asamtai, sapíjmiatsjai.*
- 26 *Antsu ti waráakun naatmámíkkia asamtai, winia iniáshrusha titiú nákastatui.*
- 27 *Kame winia wakaniur jaka matsamtáiniam ikiukcháttame; iniáshrusha kauráink túsam iniaitiuscháttame.*
- 28 *Tuke iwiáku pujustin iniáktursam. amiín ti waramtikrústatme",* tímia, tímiaja, Tawit.
- 29 Yatsutíram, ii Úuntri Tawit jakamtai, ikusmarisha tuke awai, páant tájarme.
- 30 Kame wáimiaku asa, Arútam tíniu asamtai, nii shuarnumia atak nii chimpíriín ekémsatniun nekámiayi.
- 31 Utsúmkaka jaka aneánttsaink, níiniun aújmatuk: "Jaka matsámtainiam ikiútsuk, nii iniashísha kaurchámiayi" nuna aétake neka asa, tímiayi.
- 32 Nu Utsúmkaka Jesusáiti, kame ii aneántu wainkiáitji.
- 33 Nii Aparí nankámaku awájas, nii Iwiaikrátniurin susa asamtai, yamáí íinsha surámsajnia nu páant antúkrum, wainkiárme.
- 34 Núnisank Tawit Nayáimpiniam wechamia nusha paantáiti. Tumaitiat: *"Wínia Úuntur Úuntrun chicháruk:*
- 35 *Amé numásrumin nupetú ajáai, wínia untsuruíni pujustá",* tu ujajmamia, tímiaja.
- 36 Tuma asamtai, Israer aentstíram, páant nekatárum: Átum, Jesús Paúnam ajintiamármena nuna, Arútam Úunt Utsumka awajsáiti" - tímia, tímiaja, Kaya.
- 37 Nuna antúkar, kúntuts enentáimrar: - Ílisha warí itiurkatniuítiaj' ? - Kayan, mash' Akatrámunash tíarmia, tímiaja.

- 38 Kaya aéntsun chicharáiniak: - Nekás enentáimrarum, Jesús tímia núnisrumek ashí imiantiárum. Arútam Iwiáikratniun amásrum, atumí tunarin tsankurtamráttarme.
- 39 Kame atúmniasha, atumí uchiríniash, ashí mash' untsukármanash nii kakármarin súawai.
- 40 Atumsha tunamtikniúnmayá ewemratárum, wi wáimiaku asán, tájarme - tusa, Kaya ashí aéntsun ikiakáin áarmia, tímiaja.
- 41 Límiáruka, imiáimiu ásar, nu tsawanttin menáintiu-nupanti Jesús-Irunramúnam enkemawarmia, tímiaja.

Jesús-irúnramu juárma.

- 42 (Jesús-shuárka) Jesusan Akatrámurin anturkátaj-sar, tuke nekáptainiam tau áarmia, tímiaja. Níijai irúnrar, Jesús-yurúmak-ajasun sunáisar, métekrak anentrin áarmia, tímiaja.
- 43 Jesusan Akatrámuri Jerusarénknum ti núkap aents-tujíntiamun najanainiákui, ashí aents^u enentáimiam ajáarmia, tímiaja.
- 44 Ashí Jesús-shuar tuke irúnra pujúsar, nii takákmartin sunainiármia, tímiaja.
- 45 Mash' nii takákmartin, nii nunkénash surúkar, utsumainiána aun kuítian su áarmia, tímiaja.
- 46 Tuke tsawanttin ashí Úunt-Ayámtainiam ti warásar irúnrar, nii Jeénsha Jesús-yurúmak-ajasun sunáisar, tura péejchachia aínsarank wará warat métekrak yu áarmia, tímiaja.
- 47 Arútmán naatmámtikiar, ti anéamu ajasármatai, Arútam íimiarun ewemtikrátaj-sa ashí tsawant níijai irúrar, Jesús-Irúnramun ipiampaki wemia, tímiaja.

AKANKAMU 3.

Sumpenku tsuárma.

- 1 Kaya Juánkjai Tiúsan anentruátaj-sar, Úunt-Ayámtainiam weu áarmia, tímiaja.
- 2 Nuí, Shíram-wáiti tútainiam, aents^u sumpenku akinia kuítian seamí túsar, tuke tsawanttin apujin áarmia, tímiaja.
- 3 Kaya Juánkjai Úunt-Ayámtainiam enkemainiái, sumpenku kuítchin seámia, tímiaja.
- 4 Kaya Juánkjai wajás, esétar íis, chicháruk: - límsatá - tu tai,
- 5 imiátkinian surustatuápi tusa, ii awájeam,
- 6 Kaya sumpenkun chicháruk: - Yatsúchiru, kuítniasha, kúriniash penke takáksujai; antsu wi tákakeajna nuna amastajai - tía: - Nasaretnumia Utsumka Jesusan kakarmaríjaink wajákim, wekasatá, tájame - tía, tímiaja.
- 7 Tía iniáis, untsur ewéjnum achik, awajkímia, tímiaja.
- 8 Tura, nu chichámaik nii wanusesha, nii nawesha kakáram ajasármatai, nantén ajáak, wará warat wekás, Arútman yumínkias, Kayajai Juánkjáisha Úunt-Ayámtainiam wayámia, tímiaja.
- 9 Pénker wekás Arutman yumínkiun ashí aents^u wainkiármia, tímiaja.
- 10 - Nu, Shiram-wáitainiam kuítian seáu pujuya, núchakáit ? - tíar, pénker ajásmatai, íimiam íimiam ajáarmia, tímiaja.
- 11 Tsuamáruka Kayajai Juánkjáisha Sarumunk-sáankat tútainiam wajáa asármatai, tseke taríar, níijai irunrarmia, tímiaja.
- 12 Kaya aents^u irunrarmia nuna chicharániak: - Israertíram, urukamtai áinish íikrátearum ? Kame ii wáimiaku asar' íi kakarmaríjaink tsuarchamniáitji.
- 13 Antsu nekatárum: Piratu Jesusan ankant akupkataj takúisha, átum surítkiárum, maawarat' tusárum, surukmiárme.

- Tmaitkuísha, Apraam, Isáak, Jakup, atumí úuntrisha Arutman wainkiármia nu, Jesúsán nankámaku awajsámiayi.
- 14 Átumka imítmachu makúrum, mankártin ankant akupkamiárme.
- 15 li iwiákmarin neréntniuri máarmena nuna Arútam jakamúnmaya aneantmámtikia asamtai, iikia ti páant wainkiáitji.
- 16 Íimiaru asakrin, Jesuska ju aents^u sumpenkun tsuarái. Kame íimiaru ainiána au, ju aents^u tsuamaru wainkiármena aínsarank, Jesusan kakarmarijajink tsuakrataniáwai.
- 17 Átumka , atumí úntriya aínsarmek nékachu asárum, Jesús maamarme.
- 18 Arútam yaúnchu waimiakúnmani: *"Utsumka waitsatniuíti"* tíniu asamtai, átum turamiárme.
- 19 Tuma asamtai, ii tunarin japirtamratái tusárum, enentáimrarum, atumí yajáuchiri iniaisatárum. Turawákrumin, Arútmaka yaúnchu tímia núnisank Utsumkan akuptúrmakrum,
- 20 tarímtanam iwiaitmaktátrume.
- 21 Nu Utsumka Jesusáiti. Yaúnchu waimiakúnmani tíniua núnisank, aneánttin tsawant jeámam, Nayáimpiniam pujústatui.
- 22 Kame Muisés chicháak: *"Arútmaka wiya núnisank Wáimiakun akupkamtai, shíir anturkatárum.*
- 23 *Anturainiátsna au irunramúnmaya jíinkiar, yumínkramu áartatui"* tímia, tímiaja.
- 24 Núnisarank Samuernumia ashí wáimiaku ju tsawantan etserkármiai.
- 25 Arútmaka chichaman najana, Apraáman chicháruk: *"Amííya jíinia nuníni, ashí aents^u usukruámu áartatui"* tíniu asamtai, átum wáimiakun uchirí asárum, nu chícham najánamu atumniáiti.
- 26 Atum tunamchakrumka, Arútam iniantkimia nuna pénkeri átumea átumea achíktátrume - tímia, tímiaja, Kaya.

AKANKAMU 4.

Kaya Juánkjai epenmia.

- 1 Aéntsun chicharú pujuiniái, Wea, Úunt-ayamtain wáinin áarmia nuna Úuntrisha, tura Satuséusha tariármia, tímiaja.
- 2 Kaya Juánkjai: - Jesús nantakin asamtai, ashí aents^u jákaru aneantártatui - tu jintíntiainiákui, suíran kae ajatkiármia, tímiaja.
- 3 Achíkiar, kíaa asamtai, epenin ikiukiármia, tímiaja.
- 4 Arutman chichamen antukarmia nu, íimiaru ajásar, ewej-nupanti kawenkarmia, tímiaja.
- 5 Kashín tsawármatai, Uúnt, Wéasha, Unuíkiártiniash Jerusarénknum pujuármia nu, irunrarmia, tímiaja.
- 6 Anasha, wean úuntri Kaipasha, Junatánkash, Arejántrusha, ashí mash' tímiau wéasha pujuármia, tímiaja.
- 7 Akatramun untsúkar, chicharáiniak: - Warí urukamtai aitkiárum ? Ya akuptamkáitrum ? - tíarmia, tímiaja.
- 8 Tuiniákui, Kaya wáimiak chicharáiniak: - Israéran Uuntriyá, atumsha mash' Uuntíram,
- 9 áíshmank sumpenku yana kakarmaríjají pénker ajasma nu nekátaj-sa wakera asákrumin, ashí aents^u nekawarat' tusan, páant tajai:
- 10 "Nasaretnumia Utsumka Jesús, átum paúnam ajjintiárum, maamármena nuna, Arútam jakamúnmayá aneantmámtikia asamtai, aya nii kakarmaríjajínk ju aents^u tuke sumpenku yamáí juí ti pénker tsuámar, wajaáawai.
- 11 Kame jeamín: "Ju numi yajauchíti" túsar, Jesusan ajapawarmatáisha, ju numi jean paúri ajásmiayi.
- 12 Nekás tájarme: "Aya Jesuskete Ewemtíkkiartin; ashí nunkánam chíkich ewemtíkkiartin penke atsawai" - tímia, tímiaja.
- 13 Kaya Juánkjai íirar, unuímiarcha ainiayat tímiatrus chichainiákui, enentáimsar juakarmia, tímiaja.

Tur.4,14.

- 14 Aents^u tsuamaru nuí ayam pujá asamtai, kajérsuk arantukarmia, tímiaja.
- 15 Tura, aa jíiki akúpkar, númtak mai jíánai ajáarmia, tímiaja.
- 16 Númtak chicháiniak: - Nekás aents-tujíntiamu najánamun ashí Jerusarénknum nekawaru asamtai, ju aéntsja*í* itiurkáttaja ?
- 17 Jesusnan étsertsuk, nii turamuríniash chíkich irutkamún mash iwiainiakaráink tusar', kakantrartái - tíarmia, tímiaja.
- 18 Ataksha untsúkar, chicharáiniak: - Jesús pachíkrum penke unuiniaráirap - tíarmia, tímiaja.
- 19 Tuiniákui, Kaya Juánkja*í* aímiainiak: - Arútam amírtsuk, átum amírkatin penkeráshit ? Nu enentáimsakua !
- 20 Kame ii wainkiáitjia, ii antukuítjia nuka étsertsuk pujuschamniáitji - tíarmia, tímiaja.
- 21 Tuiniakuísha, aents^u ti untsurí irúnrar pujúinia asamtai, ishámainiak, kakántrar, ankant akupkarmia, tímiaja.
- 22 Aents^u aíntiuk-nawe uwí tákaku tsuamaru asamtai, ashí aents^u Arutman yumínksar, naatmamtikíarmia, tímiaja.
- 23 Kaya Juánkja*í* ankant juákar, nii shuárnum wakétkiar, Wean Úuntri, ashí Wéasha tíarmia nuna etserkarmia, tímiaja.
- 24 Nuna antúkar, ashí mash' métek anéntruiniak: - Uuntá, ame nayáimp', núnkasha, éntsasha, ashí mash' írúnna nusha najankáitme.
- 25 Ame, wáimiaku Tawítniúmani chicháakum: "*Urukamtai ashí nunkánam kajértukar, penke nankamín chichaman jurutáinia?*"
- 26 *Kame ashí nunkan úuntri irúnrar, Úunt Utsumka ajasún kajérkatniun, chichaman najanainiáwai*" timiáme.
- 27 Tíniu asakmin, ju irutkámunam Erútes, Punsiu Piratu, apach', Israer aéntsush Jesusan, Utsumka awajsamiámna nuna kajerkármiai.
- 28 Kame, ame ashí tujíntcha, ashí neka asam, timiámna núnisarank turawármatai, nuka aminkíáiti.

Tur.4,29.

- 29 Yamáisha kajértamainiákrinsha, ishám^{ts}suk amé chichámrum etsérkatin, yainkratkatá.
- 30 Jesusnúmani tsuákratram, aénts-tujíntiamu najánam, amé kakármaram iniakmastá - tíarmia, tímiaja.
- 31 Anentrasúa amíkiar, uurkamtai, nuí pujuármia nuka wáimiakar, Arutman chichamen ishám^{ts}suk páant etserkarmia, tímiaja.

Métek sunáiyamu.

- 32 Jesús-shuar untsurí asarsha, chikíchik enentáijajink irúnrar pujú áarmia, tímiaja. - Wi tákakeajna nu winiachuíti, antsu mashiniuíti - túsar, mash' nii takákmarin sunáin áarmia, tímiaja.
- 33 - Jesús aneántai - túsar, Akátramun etseriármia nuna, Arútam aénts-tujintiamujáish páant awajsamtai, ashí mash' nekasáiti túsar, warásar pujú áarmia, tímiaja.
- 34 Nii nunkén, nii waríriniaash surúkar, sunáinia asármatai, utsúmainiaash atsú áarmia, tímiaja.
- 35 Kame, ashí aents^u nii kuítrin Akatramun susármatai, nu kuítjajink utsumainiána aun yain áarmia, tímiaja.
- 36 Rewí-wea, Jusé náartin, Chipri nunkánam akinia, nuna tura asamtai, Akatrámuka "Pernapé (ikiakáin tama)" anaikiár-miayi.
- 37 Kame nii nunkén suruk, Akátramun kuítian susarmia, tímiaja.

AKANKAMU 5.

Anánkkartin Ananías, Sapírasha.

- 1 Ananías, nii nuarí Sapírajaj chichás, nii nunkén surukmia, tímiaja.
- 2 Kuit achíkman máshikia Akátramun sútsuk, akának, újumek susamia, tímiaja.

Tur.5,3.

- 3 Turamtai, Kaya chicháreak: - Ananíasá, urukamtai emésak amiín enkematin iniáisam ? Urukamtai kuít nakákam ikiusiátmesha, Iwiáikratin anankátaj-sam wakéram ?
- 4 Kame, ya suruktá turammiam ? Surúkam, urukamtai mash' ujuakachmam ? Warí enentáimsam jútikiam ? Kame aents^u anankachume, antsu Arútam anánkame - tímia, tímiaja.
- 5 Ananíaska nuna antuk, jaka iniánkmatai, chíkich aéntska nuna wáinkiar, ti sapijmiakarmia, tímiaja.
- 6 Jakamtai, uchi natsa pujuármia nuí, nii iniashín jáanchjiaj penuárar, iwiarsarmia, tímiaja.
- 7 Jakan nuarí nékachu asa, arum tamia, tímiaja.
- 8 Támatai, Kaya chicháruk: - Nékasenk kuit amasúrumna núnisrumek nunka surukúram ? -
- 9 Ee takui: - Urukamtai Iwiáikratin anankátaj-srum, chícham najanáitrum ? Íímsakia, amé áishrumin ikiuwaru winínia au, amínsha ikiurmauwártatui - tímia, tímiaja.
- 10 Tu tai, nu chichámaik Sapírasha jaka iniánkmatai, jakan ikiuwaru táar, nunasha júkiar, áishrijai métek iwiarsarmia, tímiaja.
- 11 Jesús-Irúnramu, tura ashí mash' wainkiármia nusha, ti sapijmiakarmia, tímiaja.
- 12 Akatrámuka aents-tujíntiamun ashí irutkámunam najanin áarmia, tímiaja. Ashí Jesús-shuar Uunt-Ayámtainiam, Sarumunkan sankatri tutáiniam, métek irunin áarmia, tímiaja.
- 13 Chíkich níijai irúnratniun nakítianiakuísha, chíkichkia shíir awajiármia, tímiaja.
- 14 Tumainiákui, áishmank, nuásha íimiaru ajásar, tuke tsawanttin Jesús-Irunramúnam kawenarmia, tímiaja.
- 15 Kaya nankámak nii wakanínkish antínkiam tsuamararat' túsar, ja áarmia nuna peákjai aa jíin áarmia, tímiaja.
- 16 Aíntsank chíkich irutkamúnmayá untsurí jáinian, waweámunash Jerusarénknum itiármatai, mash' tsuáuya, tímiaja.

Akátramun ataksha kajérkamu.

- 17 Untsurí aents^u Akátramun nemarainiákui, Wean Úuntri, tura Satuséusha akásmatkar,
18 achíkiar, epeniármia, tímiaja.
19 Turuiniakuísha, Arutman Pasukri kashi tariar, jíikiar, chicharáiniak:
20 - Úunt-Ayámtainiam werum, ashí aents^u lwiakmámtikin-Chícham ujaktárum -.
21 Tákui, núnak amíkiar, Úunt-Ayámtainiam wayáwar, tsawáakui unuínian pujursarmia, tímiaja. Nuí pujuiniái, Wean Úuntri nii aéntsríjaj, tura Israéran Uuntriájishá irúnrar, Akátramun epeniármia nuna itiarat' túsar, akupkarmia, tímiaja.
22 Nankirtin nú jeáwar, wáinkiachar, wakétkiar etsérainiak:
23 - Wáiti epénianum, wáinniusha wajataniámunam uráir', wáinkiachar - tíarmia, tímiaja.
24 Nuna antúkar, nankirtinian úuntri, wean úuntrisha: - Nusha urukawaráik ? - túsar, enentáimias juakarmia, tímiaja.
25 Tu pujuiniái, aents^u tseke ta, chicháak: - Átum epeni apujsamármia nuka, Uunt-Ayámtainiam aéntsun jintintiániak pujuiniáwai - tu etserkamia, tímiaja.
26 Nuíkiá nankirtinian Uuntri nii yáinriájink wéar: - Aéntska Akátramun ayámruiniak kayajaj tukurmararáij' - túsar, asútsuk itiarármia, tímiaja.
27 Israéran Úuntri irunramúnam itiarármatai, wean Úuntri jíákar, chicharáiniak:
28 - Nuík chicháakur', "Jesús pachíkum unuikiarturáirap" tíchamkaj' ? Tamaitiátrum, ashí Jerusarénknun nii náari pachíkum, nii jakámunam íin makurmátasa wakérame - tíarmia, tímiaja.
29 Kaya ashí Akatrámujaj chichániak: - Aents^u tuiniakuísha, Arútam amirkatniúti.

- 30 Arútam yaúnchu ii úuntrin wantintiukarmia nu, Jesús paúnam ajintiá maamámena nuna aneantmamtekiámiayi.
- 31 Tura, Israer aents^u enentaimrármatai tsankurarat' tusa, nii Úuntri, nii Ewemtikkiartin awajas, náatmamtik, Nayáimpiniam nii kakármarin susámiayi.
- 32 Ii, tura Iwiáikratin, Arútam nii amírniurín súana nusha, nu wainkiáitji - tíarmia, tímiaja.
- 33 Nuna antúkar, ti kajérkar, máataj-sar wakerukarmia, tímiaja.
- 34 Tumainiákui, unuíkiartin, pariséu ashí aents^u arántukma, Kamarier náartin, irunramúnam wajakín chicháak: - Ju aents^u ishíchik aa jíikiartárum - tímia, tímiaja.
- 35 Jíikiármatai, chicháak: - Yatsurtíram, ju aéntsjai warí itíurkat'-sa wakérum, aneartárum.
- 36 Kame, nuík Téutas náartin ta, úunta núnisank untsurí aéntsun irur ewekamkuísha, nuna maawármatai, nii aéntsrinkia mash' pisárar, menkarármiai.
- 37 Aíntsank, ashí aents nii náari péeamunam, Kariréanmayá Jutas untsurí aéntsun irursha, nii jakamtai, ashí mash' menkakármiai.
- 38 Tuma asamtai, ju aents^u ankant iniaisatárum. Kame nii túramuri aentsnaitkiúnka, níinki amukáttawai.
- 39 Antsu, nii túramuri Arutmanuitkiuínkia, áantrarum Arútmajai mániakrum, penke amukcháttarme - tímia, tímiaja.
- 40 Nunak antúkar, Akátramun untsúkar, asútrar: - Jesús Ewemtikkiartiniáiti penke tírap - túsar, akupkarmia, tímiaja.
- 41 Jesusa aínsarank asutramu ásar, warásar, irunramúnmayá jíinkiármia, tímiaja.
- 42 Tura, ashí tsawanttin Uunt-Ayámtainiam, jeánmasha "Jesús Utsumkáiti" túsar, tuke etserin áarmia, tímiaja.

AKANKAMU 6.

Imiákratin awajsarma.

- 1 Jesús-Irúnramu ti pampármatai, Israer-aents^u kriáku-wajen pénker yainiainiáchkui, kriáku-aents^u israer-aéntsjaí tunainiármia, tímiaja.
- 2 Tumainiákui, Akátramu Jesús-shuaran irúrar, chicharáiniak: - Átum warítrum ? Utsumainiána au yáinktáj-sar', Arutman chichame iniáisatin penkerkáit ?
- 3 Íikia nu iniáisachmin asakrin, utsumainiána aun yainkiarat' tusárum, atumíya tsenken aents^u wáimiaku, esétar pujú, ti nékau eaktárum.
- 4 Kame íikia ti anentruar', aya Arutman chichame etserkáttaji - tíarmia, tímiaja.
- 5 Jesús-shuársha ayú túsar, Estépankan, Jiripin, Prúkurun, Níkianúran, Timiúnkan, Parménasan, tura Antiukíanmaya Nikiurásnasha, íimiaru, wáimiaku asármatai, anaikiármia, tímiaja.
- 6 Nuna itiármatai, Akatrámuka anéntruawar, nii ewején awantsarmia, tímiaja.
- 7 Tura, Arutman chichame pampaki wéakui, Jerusarénknumka Jesús-shuar ti untsurí ajasármatai, yaúnchu wéasha íimiaru ajasarmia, tímiaja.

Estépankan túramuri.

- 8 Estépank, wáimiaku ti kakáram asa, aents-tujíntiamun najana, ti pénkeran iniákmauya, tímiaja.
- 9 Aents^u “Ankántmamu” tama, tura Sirenénmaya, Arejantríanmaya, Sirisiánmaya, Asiánmayash ayámtainiam páchitkia áarmia nusha, Estépank jiaktái túsar, tariármia, tímiaja.

Tur.6,10.

- 10 Estépankka, Iwiáikratin níinini chicháa asamtai, únta núnisank, nékauwa aínsank chicháakui, nupetkataj tukamá, tujíntkiármia, tímiaja.
- 11 Nekás chichaman antúktinian nakítiainiak: - Muisésnansha, Arútmanunsha yajáuch' aújmatui - tu tsanumrarat' túsar, aéntsun akikiármia, tímiaja.
- 12 Túrawar, mash' aéntsun, úntnash, unuikiártinniash akájkar, nékachma achíkiar, náamka matsámtainiam jukiármia, tímiaja.
- 13 Nuí aents^u anánkkartin Estépankan tsanúmruiniak: - Ju aents^u Uunt-Ayámtain, Arútam awemámunash kajérewai.
- 14 Kame: "Nasaretnumia Jesús Únt-Ayamtain yumpuár, Muisés íin ikiurtamkímiaj' nunasha yapajiáttawai" tu chicháa ántaji - túsar, tsanumrurarmia, tímiaja.
- 15 Tuiniákui, náamka matsatáiniaka Estépankan íyaj' tukamá, Pásuka aínsank ajasun wainkiármia, tímiaja.

AKANKAMU 7.

- 1 Wean Úntri Estépankan chicháruk: - Ju tuiniána nu nekaskáit ? - tu iníasmia, tímiaja.
- 2 Tu tai, chicháak: - Yatsurtíram, atumsha Uunttírimesha, anturtuktárum. Ii Aparí Apraam Jarank nunkánam jeátsaink, Mesuputámianam Arútam wantíntiuk, chicháruk:
- 3 *"Amé nunkem, amé shuármesha ikiukim, wi nunkan iniaktustátjamna nuí wetá"* tímia, tímiaja.
- 4 Tu tai, Kartéa nunkan ikiukí, Jarank nunkánam pujúsmiayi. Tura, nii aparí jakamtai, átum yamáí matsátrumna juí Arútam akupkámiayi.
- 5 Turayat, nunkan ishíchkisha sútsuk, uchirín takakchakuísha: *"Amé uchirmín nunkanka mash' susáttajai"* tímia, tímiaja.
- 6 Nuyasha chicháruk: *"Amé tiránkrumka chikíchan nunkeén pujúsar, áintiuk-washím uwí takákmamtíksamu, ti kajérkamu áartatui.*

Tur.7,7.

- 7 Tumaitkuísha, wi nii numasrin kajerkármatai, ankant juákar, ju nunkánam winia nampertusártatui" tímia, tímiaja.
Nuyá Apraámjaj shunín nuápchirin tsupírkatniun chichaman najanámiayi.
- 8 Tuma asamtai, Apraam nii uchirí Isáak akiniámtai, shuníchirin nuapén tsupírkámiayi. Aíntsank Isáaksha nii uchirí Jakupan turámiayi. Jakupsha ii nawe-jímiar weátrijaj aítkiámiayi.
- 9 li weátrisha nii yachí Jusén kajérainiak, Ejíptunam surukarmatáisha, Arútam níijaj tuke pujumia, tímiaja.
- 10 Kame itiurchatnumia ewémtikiar, ti nékau awajsamtai, Úunt Paraúnk ti anéak, ashí Ejíptunam nii Yáinri awájas, nii jéensha wáinin anaikiámia, tímiaja.
- 11 Nuyá, Ejiptu nunkánam, Kaná nunkánmasha tsukamnamtai, ii úntrisha ti tsukáin waitsarmia, tímiaja.
- 12 Jakup, Ejíptunam yurúmak awai taman antuk, nii uchirín éemka akupkamia, tímiaja.
- 13 Ataksha akupkamtai, Jusé: "Wiyáitjai atumí yachín" tusa, Paraúnkain yaruákar, nekamtikiámia, tímiaja.
- 14 Tura, nii aparín, níi shuar tsénken-nawe-ewej áarmia nunash itiarat' tusa, akupkarmia, tímiaja.
- 15 Turamtai, Jakup Ejíptunam ta, pujús, nú ashí mash' nii uchiríjaj jakarmia, tímiaja.
- 16 Apraámka Sikem nunkánam jaka-iwiártain Amuran uchirín kuítjai sumakmia nú iwiarsarmia, tímiaja.
- 17 Arútam Apraámjaj chichaman nájanuk, "nunkan amástatjai" tímia nu tsawant jeatemamtai, Ejíptunam nii uchirí ti pamparármia, tímiaja.
- 18 Chíkich Paraunk Jusén nékachu, ta,
- 19 Israer aéntsun kajérkar, pampararáink tusa, uchi yama akiniawarun maamtikiármia, tímiaja.
- 20 Tumaitkuísha Muisés akinia, Arútam yáinkiam, menáintiu nantu nii jéen tsakatmarmaúyayi.

Tur.7,21.

- 21 Ajapawarmatáisha, Paraúkan nawantri nii uchiriya nútiksank tsakatmarmia, tímiaja.
- 22 Tuma asamtai, Muiseska Ejiptun nekátairin achik,
23 nii chichámejaj, nii turamurijáisha kakarmáuyayi. Aíntiuk-nawe uwí takús, Israernumiá yachín wainkiátaj-sa wakerukmia, tímiaja.
- 24 Israer aéntsun waitkiainiákui, ayamrúktaj-sa Ejiptu aéntsun máamia, tímiaja.
- 25 Níinini Arútam ayamrúktaj-sa wakerakuísha, Israer aents^u nekacharmia, tímiaja.
- 26 Chíkich tsawanttin númtak kajerainiákui, Muisés tariar, chicharániak: *"Númtak yatsúmja_{ink} manikchatniuítrome"* tímia, tímiaja.
- 27 Takui, katsúmkarta chicháak:
28 *"Ya aminsha iin akuptamín, tura iin makúkratin anaitiamkamam ? Ejiptu aents^u yaú máamamna nútiksamkek mantuátaj-sam wakérutam ?"* tímia, tímiaja.
- 29 Muisés nuna antuk, Matián nunkánam pisar, nuí nuátak, jimiara uchin akiámia, tímiaja.
- 30 Aintiuk-nawe uwí nankamásmatai, Sinaí náintnium, tserup keámua ániunam Arútam wantíntiúk^umia, tímiaja.
- 31 Nuna íistaj-sa jeámtai, Arútam chicháruk:
32 *"Wiyáitjai Arútman. Apraam, Isáak, Jakupsha wainkiármia nuítjai"*. Tu tai, Muiseska sapíjmiak, íistinian tujintkiámia tímiaja.
- 33 Ataksha Arútam chicháruk: *"Nunka wajamna nu Arútmanu asamtai, nawénam uwetai ukuínkiatá."*
- 34 *Israer wáitiainiak, uutainiámun anta asán, ayamrúktaj-san winiájai. Yamáikia iwiáiniakjam Ejiptunam akúpeajme"* tímia, tímiaja.
- 35 *"Ya aminsha iin akuptamín, iin makúkratin anaitiámkamam?"* túsar, nakitrarmia nuna, Arútam Muisesan tserépnium wantíntiuk, iwiáiniak, nii Úuntri awajas, Ewemtíkiartin atí tusa, akupkamia, tímiaja.

Tur.7,36.

- 36 Turamtai, Israer aéntsun j̄ikiártaj-sa, Ejíptunam, Kapaku nayántsanam, nunka itiaránmasha, ántiuk-nawe uwitin untsurí aents-tuj̄intiamun najanamia, tímiaja.
- 37 Muiséssha Israéran páant chicharániak: *"Arútam atumíya Wáimiaku wiya ániun akupturmaktátrume"* tímia, tímiaja.
- 38 Nunka-itiárkanam ii weátrij̄aj̄i pujús, Sinaí náintniumsha níinini Arútam chichásmatai, atumnia iwiakmámtikin-chichaman achíkmiayi.
- 39 Tumaitkuísha, Muisesan umírkatniun nakítrar, Ejíptunam wakétkitniun wakerukarmia, tímiaja.
- 40 Kame, Áarunkan chicharániak: *"Muisés Ejíptúnmayá j̄irmákmiáj' nu menkaka asamtai, iin jintíntrámratin arútam najánam, sukartustá"* tíarmia, tímiaja.
- 41 túsar, wakan uchirín najánawar, "arutmáiti" túsar, íikmakan súsar, nii ewej̄ej̄aj̄ink najánamun ij̄iamturarmia, tímiaja.
- 42 Turawármatai, Arútam ikiukiáram, nánkamsar yáan tekémrurar, ij̄iamturarmia, tímiaja. Tuma asamtai, Arútam yaúnychu waimiakúnmani chicháak: *"Israer aentsuá, nunka-itiárkanam aintiuk-nawe uwítin wekaimiármena nú, wínia warí íikmak maa surusmárum ?"*
- 43 *Antsu, Murukan ayámtairi ampákrum, Repánkan yáari najánarum, tekémruru asákrumin, Papirunia nunkánam ajapamiájrume"* tíniu asamtai, Ujajmatáiniam tu aarmáiti.
- 44 Arútam Muisesan iniaktusmia núnisarank nunka-itiárkanam ii úuntri ayámtaichin takusarmia, tímiaja.
- 45 li úuntri ayámtaichin itiar, Jusué útsuam, Arutman kakarmarij̄aj̄ink chikíchan nunkén atánkiar, Tawit tamanúmsha nuna takusarmia, tímiaja.
- 46 Tawit, Arútam Jakupan uchiriín ayamrat' tusa, ti úunt ayamtai jeám-tiasa, wakerúkmiá, tímiaja.
- 47 Tawit jakamtai, nii uchirí Sarumunk nuna jeámmia, tímiaja.
- 48 Tumaitkuísha, Arútmaka aents^u jeámmanum pujuchuíti.

Tur.7,49.

- 49 Kame Waimiakúnmani chicháak: - *Nayáimp' winia chimpir asamtai, nunkasha winia tarímtair asamtai, warí jéaya jeatrittiárum ? Tuit wi pujusan ayamrátniussha ?*
- 50 *Wi ashí mash' najanachukáitiaj ?* - tímia, tímiaja.
- 51 Tamaitiátrum, atumí úntriya aínsarmek Iwiáikratin antúrtsuk, tsupirnakuitiátrum, atumí anentái katsúram awájsarum, atumí kuíshisha epenkamiárme.
- 52 Atumí úntri, ya wáimiakuna kajerkacharmia ? Kame Imítmachu tátinian etsérniun, maachármakia ? Antsu átumka yamáisha nu Imítmachu anankárum, máamrume.
- 53 Atumsha Pasuknúmani Arútam akupkamu achíkiuitiátrum, amíkcháitrome - tímia, tímiaja, Estépank.
- 54 Nuna antúkar, suíran kakirit ajatkiármia, tímiaja.
- 55 Estépank wáimiak, Nayáimpiniam Ashí Nankámaku Arútmán, tura nii untsurírini Jesús-nasha wáiniak, chicháak:
- 56 - *Nayáimpin kinkiaríin, Arútmán untsurínini, Arútam-aents-ajasú puján wáinjai* - tímia, tímiaja.
- 57 Nuna antúkar, kuishín epénkar, chará ajátkiar, máataj-sar aá jukiármia, tímiaja.
- 58 Tura, nii pushírín áikiar, natsach' Sáuru náartin wajámunam ikiúiniak, kayajai tukurarmia, tímiaja.
- 59 Turamaitiat, Estépank anéntrak: - *Jesusá, winia Uuntrú, wakaniur achírtuktá* - tusa,
- 60 *tikíshmar: - Uuntá, aitkiarainiána ju makuaráip - kakántar tinia, jakamia, tímiaja.*

AKANKAMU 8.

Sáuru Jesús-shuaran kajerín.

- 1 Sáuru Estépankan maawármatai: - *Penkeráiti* - tímia, tímiaja.
Nu tsawanttin Jerusarénknum: - *Jesús-Irúnramu amuktái* - túsar, apapéktinian juarkiármia, tímiaja. Ashí Jesús-shuar

Tur.8,2.

Jutéanam, Samaríanmasha pisarármatai, aya Akátramuk juakarmia, tímiaja.

- 2 Aents^u pénker Estépankan iwiársar, anénak, ti kúntuts pujuármia, tímiaja.
- 3 Antsu, Sáuruka Jesús-Irúnramun jatek, ashí jeánam wayá, áishmankan nuánash achir, wáittiai-jeánam utsamia, tímiaja.

Jirip' Etsérin.

- 4 Tumaitkuísha, pisararmia nuka. tuí jeawarmia nuí, tuke Arutman chichamen etseriármia, tímiaja.
- 5 Jirípsha, Samaría irutkámunam we, Jesusan túramurin etsérkatniun nankamamia, tímiaja.
- 6 Ashí aents^u Jiripin antúrkar, aents-tujíntiamun najanman wainkiátaj-sar, kautiármia, tímiaja.
- 7 Kame untsurí aéntsnum wáwek pujúarmia nuka kuyá tiár, jíiniainiákui, sumpeáru, shutuápsha tsuamararmia, tímiaja.
- 8 Tuma asamtai, nu matsatkámunam ti warásar, pujuármia, tímiaja.

Semunk Uwishín.

- 9 Tura, nu irutkámunam uwishín Semunk náartin pujúyayi. Nuka: - Wi imianuítjai - tusa, Samaríanmayá aéntsun anankniúya, tímiaja.
- 10 Tuma asamtai, ashí aents^u, úuntash, uchisha emámkesar íisar: - Juka Arutman kakarmarínti - tíniu áarmiayi.
- 11 Kame, untsurí uwitin nii najánmarin iniákmasar: - Ayáwá, aúsha timianuítia ! - tumámtikin áarmia, tímiaja.
- 12 Tumaitkuísha Jirip' ta, Arútam-Irúnramun, Jesús nansha ti pénker chichaman étserkui, áishmank nuásha imianiármia, tímiaja.

Tur.8,13.

- 13 Semúnkash íimiar, imiánin, tuke Jirípijaink wekás, aents-tujíntiamun, timiatruámunash najankui, enentáimiu pujúmia, tímiaja.
- 14 Akatrámusha Jerusarénknum pujuármia nu, Samaríamaya aents^u Arutman chichamen amírainiáwai taman antúkar, Kayan Juánkjai akupkarmia, tímiaja.
- 15 Nuka táar, Iwiaikrátniusha tarat' túsar, anentruawarmia, tímiaja.
- 16 Kame Samaríamaya aents^u aya Jesusan pachísar imianiaruitiat, nuna achikcha áarmia, tímiaja.
- 17 Tuma asamtai, nii ewején aéntsun awantsármatai, Iwiaikratniun achikiármia, tímiaja.
- 18 Akatramu ewején awántsar Iwiaikratniun suiniákui, Semunk nuna wáiniak:
- 19 - Wisha ewejrun awantsamtai, Iwiaikratin tarat' tusárum, nu kakáram surustárum - tusa, kuítian iniaktiármia, tímiaja.
- 20 Takui, Kaya chicháruk: - Ániumka, kuítrumjaink amutumkatniuítme. Kame Arutman kakarmari kuítjai sumatainkiáit ?
- 21 Nusha nekachu asam, nu kakáram penke achikchamniáitme.
- 22 Arutman kakármarin kuítjai sumaktin yajáuch' asamtai, enentaimratá.
- 23 Kame amé anentáim yajáuch' asa, tunamtikrámeawai -.
- 24 Tu tai, Semunk chicháak: - Arútam yuminkruráink tusárum, wait aneasrum winia seatritiárum - tímia, tímiaja.
- 25 Kaya Juánkjai Arutman shíir umírkar, nii chichámenash páant etsérkar, Jerusarénknum wakétainiak, chíkich Samaría irutkamúnmasha Jesús-shuar awajsarmia, tímiaja.

Jirip' Itiupía aentsjai.

- 26 Arutman Pasukri Jiripin chicháruk: - Nantu tutupniármatai Jerusarenknumiá jintia Kásanam jeána nuí aents^u atsámunam wetá - tímia, tímiaja.

Tur.8,27.

- 27 Tu tai, wesa, Etiupíanmaya aentsun wainkiámia, tímiaja. Nuka, Etiupían úntrin, Kantase náartinian takárniuríyayi. Ashí mash' nii kuítrin wainniúyayi.
- 28 Níisha Jerusarénknum Arutman anentrasúa amik, nii wekataireín enkemá, wáketuk, Isaías aárman aújki wemia, tímiaja.
- 29 Iwiáikratin Jiripin chicháruk: - Pe ajakim, aents^u wea nu amanianktá - tímia, tímiaja.
- 30 Jirip' amaniank, Isaías aárman aújun antúrak, chicháruk: - Aújeamna nu nékamek ?
- 31 Tu tai: - Yaki jintíntruat' ? Wíkish itiúr nekátjak ? - tusa, wekatáiniam enker, jukimia, tímiaja.
- 32 Aújmia nuí tu aarmáuyayi: - *Tankua aínsank mantamnámiayi. likmak maam tsea tseá ajáatsna núnisank chichakchámiayi.*
- 33 *Wáitkiasar, ayámruksuk nii iwiákmarin atankiármatai, nii shuarsha ikiukiármiai -.*
- 34 Nuna aújas, Jirípin chicháruk: - Wáit aneásam turuttiá: "Isaías juna aák, yánanak aujmatea ? Níiniunkek. turútskesh chikíchnanak ta ? -
- 35 Tu tai, Jirip' nu aarmanumiá jukí, Jesúsnum ejemia, tímiaja.
- 36 Jintiá wésar, entsan wáinkiar, ltiúpia aents^u chicháruk: - Juí entsa ája ! Urukamtai wisha imianchamniáitiaj ? - tímia, tímiaja.
- 37 - Nekás íimiaruitkiúmka imianminiáitme - Jirip' takui: - Ee, Utsumka Jesús nekás Arutman Uchirinti, tajai - tímia, tímiaja.
- 38 Tura, nuí setúrar, akáikiar, Jiripkia imiáimia, tímiaja.
- 39 Entsayá jjíinkimtai, Iwiáikratin Jiripin jukimia, tímiaja. Jirip' menkakamtai, ltiupiánmaya aents^u warás waketkímia, tímiaja.
- 40 Jirípkia, Asutu irutkámunam Iwiáikratin ikiukím, ashí irutkámunam Jesús-shuar awajki, Sesaréa nunkánam jeámia, tímiaja.

AKANKAMU 9.

Sáuru Jesusan wáiniui.

- 1 Sáuruka Jesús-shuaran amúktaj-sa wakera asa, kajérak apapeniármia, tímiaja.
- 2 Tamaskúnmayá Jesús-shuar áishmankan nuánash achir, Jerusarénknum epenin matsástaj-sa, Wea-úuntrin weántuk, papín seámia, tímiaja.
- 3 Tamasku Irutkámunam we, nuntúmsai, aya anéachma etsaya anin Nayáimpinmayá ta, amuámia, tímiaja.
- 4 Nunká iniárai, chícham chicháruk: - Saurú Saurú, urukamtai imiá kajértam ? -
- 5 Takui: - Amesha yáitiam, Uuntá ? - tímia, tímiaja.
Tu tai: - Wítjai Jesús, ame imiá kajéramna nuítjai.
- 6 Nantakim, irutkámunam wetá. Nuí ame najánatniun turamiártatui - tímia, tímiaja.
- 7 Sáurun aísha, chichaman antuiniayat, aéntsun wáinkiachar, íimia wajaármia, tímiaja.
- 8 Sáurusha nantátakin, iimiayat, penke wáinmachkui, ewéjnum achíkiar, Tamáskunam jukiármia, tímiaja.
- 9 Kusurú asa, yurúmstsuk, úmutsuk, menáint tsawant ijiárma pujusmia, tímiaja.
- 10 Tamáskunam Jesús-shuar, Ananías náartinian Arútam wantíntiuk: - Ananíasá ! - takui: - Uuntá, juí pujajai - tímia, tímiaja.
- 11 Tu tai: - "Naka" jíntianam weme, Jútasán jeén wáyam: "Tarsúnmayá aents^u, Sáuru náartin, anéntrak pujana nu, juí pujátsuk ?" tu aníntrustá.
- 12 Kame níisha, aents^u Ananías náartin ta, íímsat' tusa nii ewején awántman mesékranam wainkiáyi - timia, tímiaja.
- 13 Takui, Ananías chicháruk: - Uuntá, nu aéntska Jerusarénknum amé aéntsrumin ti waitkiáawai, taman ántajai.

Tur.9,14.

- 14 Yamáisha amé náarmin páchinia aun wáittiai-jeánam epeni apujsártaj-sa, Wean Úuntri akúpkam tayi - tímia, tímiaja.
- 15 Arútam ayáak: - Ju aents^u, Jutíu, jutíuchusha, nii úntrisha winia nekarawarat' tusan, ti kakáram awájsan, akupkáttajai.
- 16 Kame, winia ayamrúteak ti waitsáttana nuna iniaktústatjai - tímia, tímiaja.
- 17 Ananías we, jeá wayá, nii ewején awantas, chicháruk: - Yatsurú Sáuru, jintiá winiámin Uunt Jesús wantíntiúrmakma nu: - ataksha íimias, lwiakrátniunsha achikiat' - tusa, amiín akuptukái - tímia, tímiaja.
- 18 Túram, nu chichámaik, j̄iniúmiá séejka ánin iniántram, páant wáinmak, nantaki, imiánmia, tímiaja.

Sáuru túramuri.

- 19 Tura, yurumá, kakáram ajás, Sáuruka Tamáskunam ishíchik tsawant Jesús-shuárjaink pujusmia, tímiaja.
- 20 Wárik ashí israéran ayamtairiín: - Jesuska nekás Arutman Uchirínti - tu etsermia, tímiaja.
- 21 Ashí mash' anturiármia nuka, aya enentáimsar, chicháiniak: - Entá, Jerusarénknunm Jesusan páchinian amúktaj-sa, apapema nuchakáit ? Yamáisha wea Uuntriín yaruáktaj-sa, tama, nuchakáit ? - tíarmia, tímiaja.
- 22 Tumaitkuísha, Sáuruka sapíjmiatsuk, ti kakáram ajás: - Jesús nekás Arútam Utsumkáiti - tu unuínar, Tamáskunam Jutíun nupetniúya, tímiaja.
- 23 Turukí wéakui: - Maatái - túsar,
- 24 kashi tsawáisha jintiá akírainian, Sáurusha nekamia, tímiaja.
- 25 Nii aentsri ewemtikrátaj-sar, kashi Sáurun chankínnium enkéawar, wenuknúmani itiárar, akupkarmia, tímiaja.

Sáuru Jerusarénknun.

- 26 Jerusarénknun jeá, Jesús-shuárj*ai* irunrátaj-sa wakerakuísha, Jesús-shuarcháiti túsar, ishamkarmia, tímiaja.
- 27 Nuínkia Pernapé Sáurun jukí: - Jintiá Úunt Jesusan wáiniak, nii chichamen antuk, Tamáskunam ishámstuk nuna ayamrúkmiayi - tusa, Akátramun matsátmanun itiámia, tímiaja.
- 28 Tura Sáuruka níij*ai* pujús, Jerusarénknun ishámstuk Jesusnan páant etsermia, tímiaja.
- 29 Jutíuka kriáku-chichaman chicháu jianainiákui, máataj-sar wakeruiniákui,
- 30 Jesús-shuar nekáwar, Sesaréanam júkiar, Társunam akupkarmia, tímiaja.

Kaya irasma.

- 31 Jesús-Irúnramun tarímtanam pujús, mash' Jesús-shuarka Jutéanam, Kariréanam, Samaríanmasha Jesúsnum nekás íimiaru ajásar, Iwiáikratin shíir yainkiáram, ti untsurí ajakí weármia, tímiaja.
- 32 Kaya ashí irutkámunam wekás, iyá iyakua, Rítianmasha Jesús-shuáran iyuwarmia, tímiaja.
- 33 Nuí aents^u, Enéas náartin, yarush' uwí penke wekáicha, peáknun tepán wainkiámia, tímiaja.
- 34 Kaya chicháruk: - Eneasá, Jesús tsuármawai; nantákim, peákrum iwíaratá - tu tai, wárik nantatakia, tímiaja.
- 35 Ashí aents^u Rítianmaya, Sarunknúmiasha nuna wáinkiar, Jesús-shuar ajasarmia, tímiaja.
- 36 Jesús-shuar, nua, Tawitia náartin (Japa tu tai) Jupe irutkámunam pujú, ti pénker yáinkratin asa, nekáp márchamnia aéntsun yáinniúya, tímiaja.
- 37 Nu tsawánttin sunkuran jatémak, jakamtai, nii iniashín nijíárar, peáknun awaasarmia, tímiaja.

Tur.9,38.

- 38 Rítiaka Júpejai tíjiuch pujá asamtai, Jesús-shuar: - Kaya Rítianam pujawai - taman antúkar: - Wárik tatí - túsar, jimiara aéntsun akátrar, akupkarmia, tímiaja.
- 39 Káyaka ujákam, níijaink wárik tatasarmia, tímiaja. Tawítia tepámunam ejeniármatai, untsurí waje, Tawítia iwiaku pujús tarachin awantamia nuna iniáktusar, wá wá ajáarmia, tímiaja.
- 40 Kaya, ashí wajen aá jíikiar, tikishmá anentrasúa amik, jakan chicháruk: - Tawitiá, nantaktiá - .
- 41 Tu tai, Jín urái, Kayan wáiniak, pujusmia, tímiaja. Kaya ewéjnum achik, awáiki, Jesús-shuáran, wajesha pujuármia nuna untsúkar, aneántun iniaktusarmia, tímiaja.
- 42 Júpenam ashí nuna nekawármatai, untsurí Jesús-shuar ajasarmia, tímiaja.
- 43 Káyaka Júpenam, nuapén-sukúa Semunkai, untsurí tsawant pujusmia, tímiaja.

AKANKAMU 10.

Kurniriu imiáimiu.

- 1 Sesaréa irutkámunam Kurníriu náartin, Itaria-nankírtinian uuntriníáuaya, tímiaja.
- 2 Pénker asa, níí shuárjai Arútman umírkar, utsumainiána aun yáinkiar, tuke anentrin áarmia, tímiaja.
- 3 Nantu ayantantai aí, Arutman Pasukri wantíntiuk, chicháruk: - Kurníriuá ! -
- 4 Tu tai, esétar íis, sapijmiayat: - Urukaya, uuntá ! - tímia, tímiaja. Takui: - Amé anéntram, suamúrmesha Arútmanam jeawármatai, Arútam yáintmawai.
- 5 Tuma asamtai, Semúnk, Kaya taman, itiarat' túsam, Júpenam aéntsrum akupkartá.
- 6 Nuka, nuapén-sukú Semunkai, nayantsan yantamriín pujawai - tímia, tímiaja.

Tur.10,7.

- 7 Pásuk menkakamtai, Kurníriu jímiar takárniurin, chikíchik nankírtiniash untsúkar,
- 8 pénker asármatai, wantínkiamun ujákar, Júpenam akupkarmia, tímiaja.
- 9 Kashín tsawárar, irutkámunam jeástatuk ajasarai. Nantu tutupni etemra aí, Kaya anentruátaj-sa, yakí jean utsaimiuriín wakamia, tímiaja.
- 10 Tsukamá asa, yurumkan iniarainiái, karamramia, tímiaja.
- 11 Nayáimp' uránmianum tampua ániu tarun wainkiámia, tímiaja.
- 12 Nuí inít, ashí yajasma, kuntíniash, yutai yuchatáisha chumpimiármia, tímiaja.
- 13 Chichamtin chicháruk: - Kayá, wajakím, máam, yuatá - tímia, tímiaja.
- 14 Tu tai: - Tsej, uuntá, páuskartinniash itiúrkanak yuataj ? - tímia, tímiaja.
- 15 Ataksha Chichamtin chicháak: - Arútam najánamu, pauskartiniáiti, tip - tímia, tímiaja.
- 16 Nunak menáintiu awáinkí, urum nayáimpiniam jukí, emenkakmia, tímiaja.
- 17 Nush warinkit ? Tu enentáimia wajái, Kurníriu akupkárma Semúnkan aníntruiki táar, wáitiniam untsuármia, tímiaja.
- 18 Tura aníntruiniak: - Juí Semunk, Kaya tama, pujátsuk ? - tíarmia, tímiaja.
- 19 Káyaka nunak enentáimia pujái, lwiáikratin chicháruk: - Menáint aents^u eatmainiáwai.
- 20 Akáikim, wi akupkamu asármatai, níijaink ishámstusuk wetá - tímia, tímiaja.
- 21 Kaya akaikí, chicharáiniak: - Wítjai eármena nuka, warí wakérarum ? -
- 22 Tu tai: - Uunt Kurníriu, aents^u pénker, juiu anéamu, Arutman umirín asamtai, Arutman Pasukri wantíntiuk: "Kaya amé jemiín itiam, anturkatá" tíniu asamtai, winíji - tíarmia, tímiaja.

Tur.10,23.

- 23 Nuínkia awáyáwar, ikiánrar, kashín tsawármatai, níjajai wenakui, Jupenmáyasha Jesús-shuar nemariármia, tímiaja.
- 24 Kurníriuka níí shuáran, níí aneámunash irur, Sesaréanam nákamai, Kaya tamia, tímiaja.
- 25 Kaya wayakui, Kurníriuka tsékenki werí, tikishmatramia, tímiaja.
- 26 Káyaka awajkí, chicháruk: - Wísha aentsuítjai, wajaktiá ! - tímia, tímiaja.
- 27 Tura níjajink chichasúa amik, wayá, untsurí aents^u irúnrar matsatáinian chicharániak:
- 28 - Atumsha nékarme: Jutíu aéntsti jutíuchujajai íruntsuk, níí jeénsha wáichuitkurnísha, Arútam chichártak: "Ashí aents^u métek asármatai, níjajai iruneákmesha páuskartin ajascháttame"
- 29 Túrutkui, átum untsurkákrumin, arántasuk winíjai. Tuma asamtai, urukamtai untsurkárum ? -
- 30 Tu tai, Kurníriu chicháruk: - Wínia jeáruí pujusan, nántusha ayantántai aí anéntrakun pujái, aents^u wincharpátniun entsáru wantíntiurkama nu, aíntiuk tsawant nankamasái.
- 31 Nu aents^u chichártak: "Kurníriuá, ame anéntramun, utsumainiána yayámunash Arútam nekártamayi.
- 32 Tuma asamtai, Semunk Kaya taman itiarat' túsam, Júpenam amé aéntsrum akupkartá. Nuka nuapén-sukú Semunkai, nayantsan yantamriín pujáwai", tímia, tímiaja.
Nuna antukan, itiarmarat' tusan, akupká asamtai, amesha wáit anéntrusam, wárik tarutniúme.
- 33 Yamáikia íisha irunrar', aminíni Arútam tana nu anturkar', amirkátaj-sar' wakérají - tímia, tímiaja.
- 34 Tuma asamtai, Kaya chicharániak: - Wísha yamáí nekájai: Arútam ashí aénts^u métek íiniáwai.
- 35 Kame ashí mash' imítmachu amíiniána aun, urukú áinia nuna íitsuk, anénawai.
- 36 Nii, Utsumka Jesusnúmani, mash' nérentin asamtai, Israer aénts^u tarímtanam iwianiakármiai.

Tur.10,37.

- 37 Juank imiakrátmiatai, Kariréanam juárki, ashí Jutéanam urukamia nu atumsha nékarme.
- 38 Kame, Arútam Nasarenumia Jesusan nii Iwiáikratniurin susa, nii kakármarin utsúkmiayi. Nuka, Arútam níijaink pujá asamtai, pénger najana, ashí mash' waweámunash tsuarármiai.
- 39 Ashí mash' Jutíu nunkánam, Jerusarenknumsha turamia nu, ii páant wainkiáitji. Nuna najanaitkuísha, numíniam ajintiáwar, maawármiai.
- 40 Turawarmatáisha, Arútam menáint tsawántnum aneántmamtik, aéntsun wantintiumtikiámiayi.
- 41 Kame, ashí aéntsun wantíntiutsuk, aya íiniak, nii Akátramu asakrin, wantíntiurmakar', jakamúnmaya aneántuitiat, íijaink pujús, yurumámiayi.
- 42 Tura: "Wiyáitjai jákarun, iwiákunash makuártinian, Arútam apújsamun !" tinia, nuna ashí aents^u nekawarat' tusa, akuptamkáitji.
- 43 "Jesuska iimiárunka ashí nii tunarin japirainiáwai" ashí yaúnchu Wáimiaku tíniu áarmiai -
- 44 Káyaka nuna chicháa pujái, antú pujuármia nuna Iwiáikratin tarurarmia, tímiaja.
- 45 Jesús-shuar Kayajai táarmia nu, nuna wáinkiar, chicháiniak: - Urukakua, Arútam Jutíu-aéntschanasha nii Iwiáikratniurin suínia? -
- 46 Kame untsurí chichámjai chichásar, Arutman nampérainian antukarmia, tímiaja.
- 47 Tuiniákui, Kaya chicharáiniak: - Íiya núnisarank Jesusan Arútmarin achikiáru asármatai, ya imiáichminiáit ? - tinia,
- 48 Imiainiarat' tusa, akupkarmia, tímiaja. Tura imiáimiuka, Kaya ishíchik tsawant níijaink pujusat' túsar, seawarmia, tímiaja.

AKANKAMU 11.

Kaya ayamrúmakma.

- 1 Akátramu, Jesús shuársha Jutéanam pujuármia nu, "Jutíu-aéntscha Arutman chichamen amírainiáwai" taman antukármia, tímiaja.
- 2 Kaya Jerusarénknun támatai, Jutíu-Jesús-shuar níijai tunáiniar, jíiniak:
- 3 - Ámeke Jutíuchu ainiámunam, nii jeén wayam, níijai yurumáitme - tíarmia, tímiaja.
- 4 Tuiniákui, Kaya ashí mash' turunamun emánkemas etserkamia, tímiaja.
- 5 - Jupe irutkámunam pujusan, anéntrakun pujái, mesékranma aínsank, nayáimpinmayá tampua ániu tarútramai.
- 6 Esetra íisan, nuí init ashí yajásman, napíniash, kuntínniasha wainkiámjai.
- 7 Chichamtin chichártak: "Kayá, wajakim, máam, yuatá" túrutun antúk:majai.
- 8 Takui: "Tsej, Uuntá, pauskártinniash itiúrkanak yúataj?"
- 9 Tu tai, ataksha Chichamtin chichártak: "Arútam najánamu pauskartiniáiti tip - turutmai.
- 10 Nunak menáintiu awáinki, urum nayáimpiniam jukí, emenkakmai.
- 11 Nu chichamáik, menáint aents^u, Sesareánmayá akupkarma, winia eárkataj-sar tarutiármiai.
- 12 Iwiáikratin chicartak: "*Ishámstsuk níijai wetá*" túrutkui, ujuk Jesús- shuárjai Kurníriun jeén wayamjai.
- 13 Kurníriusha chichártak: "*Arutman Pasukri winia jeáruí wantíntiurak: Kayan itiarat' túsam, ame aéntsrum Júpenam akupkartá.*
- 14 Kame níisha ame, tura amé shuársha ewémratniun turámtiatui" tu ujatkamai, timiayi.

Tur.11,15.

- 15 Yama chicháakun wajái, Iwiáikratin yaúnchu iin tarutrámramiajnia aínsank níiniash tarurarmai.
- 16 Turunamtai: "*Juank entsájaink imiakrátmiayi, antsu átumka Iwiaikrátniunam imiáimiu átatrume*" Jesús tímia nuna enentáimramjai.
- 17 Jesús Utsúmkanam íimiarar, íiya núnisarak nii Arútmarin achikiáru ásarmatai, wísha Arútam wakéramun najanamjai - tímia, tímiaja, Kaya.
- 18 Nuna antúkar, shíir enentáimsar, Arutman naatmamtíkiáiniak: - Arútam Jutiúchu áinia aúnnash nekás untsúkar, uwemtikiainiáwai - tíarmia, tímiaja.

Antiukíanam Jesús-Irúnramu nánkamma.

- 19 Nuí Estépankan maawármatai, Jesús-shuar kajérkamu ásar, pisararmia, tímiaja. Pinísia nunkánam, Chipri nunkánmasha, tura Antiukía irutkamúnmasha weármia, tímiaja. Nuí jeáwar, aya Israer-aéntsnaK Arutman chichamen ujakarmia, tímiaja.
- 20 Antsu chíkich Jesús-shuar, Chipri nunkánmayá, tura Sirini nunkánmayásha ásar, Antiukíanam jeáwar, Kriáku aéntsnaKha Jesusan túramurin ujakarmia, tímiaja.
- 21 Jesús níijai pujá asamtai, untsurí aents^u íimiarar, Jesús-shuar ajasarmia, tímiaja.
- 22 Jerusarénknum Jesús-Irúnramu nuna antuk, Pernapén Antiukíanam akupkamia, tímiaja.
- 23 Níisha jeá, Arutman pénkerin wáiniak, warás chichárkar, Jesusjái irunra pujústinian ikiakararmia, tímiaja.
- 24 Ti pénker, nekás íimiaru, ti wáimiaku asamtai, untsurí aents^u Jesús-shuar ajasarmia, tímiaja.
- 25 Nuyá, Pernapé, Sáuru Társunam puján untsúktaj-sa, wemia, tímiaja.
- 26 Wáiniak, Antiukíanam jukí, nuí chikíchik uwí pujúsar, Jesús unuimiárman untsurí aéntsun ujakarmia, tímiaja. Nuí Jesusjái

Tur.11,27.

- irunin áarmia nuna, "Jesús-shuar" tu anáikiatniun nankamawarmia, tímiaja.
- 27 Nu tsawanttin Jerusarenknumia Antiukíanam wáimiaku jeawarmia, tímiaja.
- 28 Akapu náartin, níjai pujúmia nu, lwiáikratin ujákam, chicháak: - Ashí nunkánam tsuka átatui - tímia, tímiaja. Tsuka tímia nu Uunt Kráutiu pujámunam áakui,
- 29 Jesús-shuar, Jutéa nunkánam akupkátaj-sar, ankán ankán nii waririn irúmrar,
- 30 Sáuru Pernapénmani wean akuptukarmia, tímiaja.

AKANKAMU 12.

Akátramu kajérkamu.

- 1 Uunt Erútes Jesús-shuáran waitkiástaj-sa wakerimia, tímiaja.
- 2 Tuma asa, Santiákun, Juánkan yachín, kuchíjai maamtikiámia, tímiaja.
- 3 Jutíu nuna wakeruiniákui, "karíntichu-yurúmak" tsawant jeá asamtai, Káyash emetawarat' tusa, akupkarmia, tímiaja.
- 4 Tura, wáittiai-jeánam epeni apujas, áintiuk wáitiniam áintiuk nankírtinian awájtus, ikiúkmia, tímiaja. - Kame Uunt Námper nankamásmatai mantamnat' tusan, jíiktiájai - tu enentáimmia, tímiaja.
- 5 Káyaka epenmia pujái, Jesús-Irúnramuka maawaráink tusa, ti anentrú pujumia, tímiaja.
- 6 Erútes jíiátsaink, Káyaka jirujai jinkiámu, nankirtin wajainiámunam kaet atema kanú tepái, chíkich nankirtin wáitiniam wajatiármia, tímiaja.
- 7 Aya aneáchma Arutman Pasukri wantíntiuk, jeá tsáapin awajsamia, tímiaja. Káyan antink, ishíntiar, chicháruk: - Wárik nantaktiá - tu tai, jinkiámusha níinki atiniawarmia, tímiaja.

- 8 Ataksha Pásuk chicháruk: - Eménmamam, nawénam-uwétai ewekatá - tu tai, Kaya núnisank turamia, tímiaja. Turamtai: - Awankémrum apújsam, nemartustá - .
- 9 Tu tai, Kaya ukúnam patatukí wesa: - Imiajnichuapítia ! Antsu mesekranmapi júniaja ! - tu enentaimsamia, tímiaja.
- 10 Jimiará wáitiniam nankírtiniash wajainiámunam nankamárkutak ajasar, aá jjinmanum wáiti jirujaj asakámusha imiá níinki uránmiatai, arant ajásar, núí Pásuk menkakamia, tímiaja.
- 11 Káyaka níinki juak, kurat shintiar, chicháak: - Yamái nekás nekajai: Erutesnumia, jutiunmayasha ewemtikrúrtasa, Arútam nii Pasukrin akupturkái - tímia, tímiaja.
- 12 Nuíkia Jintian wáiniak, Marín jeén, Juánkan, Markus taman nukuríin, anentrú pujuármia núí jeámia, tímiaja.
- 13 Wáitiniam wajás, untsumkui, nuach' Rute náartin uráitij-sa, we,
- 14 Kayan chichamen antúrak, urátsuk, wará warat tseke waketkín: - Kaya aá wajáawai - tímia, tímiaja.
- 15 Tu étserkui, chicharáiniak: - Waurkachukáitiam ? - tamaitiat: - Nekás Kayáiti - takui: - Nuíkia Arutman Pasukrinchuáshit ? - tu enentaimsarmia, tímiaja.
- 16 Káyasha tuke untsumu wajáakui, urái, íyaj tukamá wáinkiar, chichátsuk juakarmia, tímiaja.
- 17 Uwíjjar, takamatsármatai, itiur Úunt Jesús uwemtikramia nuna etserkamia, tímiaja. Tura: - Sántiak, mash' Jesús-shuársha ju ujaktárum - tinia, níinki chíkich nunkánam wemia, tímiaja.
- 18 Káshik tsawármatai, nankirtin Kayan wáinkiachar: - Chua urukakua menkaka ? - túsar, chará chará ajáarmia, tímiaja.
- 19 Erúteska: - Eaktárum - tusa, akúpkar, wainkiachármatai, nankírtinian makuar, maawarmia, tímiaja. Káyaka Jutéanmaya jjiní, Sesaréa irutkámunam ta, núí pujusmia, tímiaja.

Tur.12,20.

Erutes jakamu.

- 20 Tiru nuyá Sitúnk Erútesjaj kajérnaik pujuiniayat, nii yurúmkarin sumáinia ásar, níinki jeáwar, Prastu kuítian-juu asamtai, níijaink chicháasar, Erútesjaj nawamnaikiármia, tímiaja.
- 21 Tsawant tesamu jeámtai, Erúteska úunt entsatáijaj iwiármamar, chimpínium ekémas, aéntsun chicháarmia, tímiaja
- 22 Shíir chicháakui, ashí aents^u chicháiniak: - Juka aentscháiti, antsu Arutmáiti - tu naatmamtikiármia, tímiaja.
- 23 Arutman naatmámtiktsuk nankámantu ajasú asamtai, nu chichámaik emésak Arútam akúpkam, akármantik, ajakrámia, tímiaja.
- 24 Arutman chichámenka ti núkap pampakí wemia, tímiaja.
- 25 Pernapé Sáurujaj, nii takatrin amúkar, Juánkan, Markus taman, júkiar, Jerusarénknum waketkiármia, tímiaja.

AKANKAMU 13.

Papru akupkamu.

- 1 Antiukíanam, Jesús-Irunramúnam, wáimiaku, etsérniusha Pernapé, Simiúnk Mukusa tama, nuyá Sirinínmayá Rusiu, Manaenk Erútesjaj muntsun jímiartukmia nusha, tura Sáurusha pujú áarmia, tímiaja.
- 2 Ayamtai tuámun jaténak, ijiárma pujuiniái, Iwiáikratin chicharáiniak: - Pernapén, Sáurunash wi akupkamun najanawarat' tusan utsukaru asamtai, akankárum, akupkatárum - tímia, tímiaja.
- 3 Takui, ijiármawar, anéntruawar, ewején awántsar, akupkarmia, tímiaja.

Tur.13,4.

Paprun túramuri.

- 4 Iwiáikratin akupkamu ásar, Seréusia nunkánam táar, kanujai nayants ajapent, Chipri nunkánam jeawarmia, tímiaja.
- 5 Nuí Saramina irutkámunam, Juank yáinkiam, Jutíun ayamtairiin Arutman chichamen etserkarmia, tímiaja.
- 6 Chiprin katítkiar, Pajus irutkámunam wawékratin jutíu, Par-Jesús taman, wainkiármia, tímiaja.
- 7 Nuka Úunt Serjiu Páurun takarniúya, tímiaja. Serjiu Páuru aents^u pénker asa, Arutman chichamen antúktaj-sa, Pernapén, Sáurunash untsukmia, tímiaja.
- 8 Antsu, nu wawékratin, Irímias (uwishín) tama, nii Úuntri íimiaru ajasáink tusa, nakítmia, tímiaja.
- 9 Túmakui, Sáuru (Papru tama) wáimiak, íitia ajás, chicháruk:
- 10 - Ániumsha, yajauchí, anankartiniá, emeskan uchiríya, pénkeran kajerniuá, urutái Arutman jintí eméseam, jush iniáisattam ?
- 11 Yamáik, Arútam yuminkramramtai, jimi kusúrmatai, tsawáisha káshisha wáitmatsuk, untsurí tsawant pujústatme - tímia, tímiaja. Nu chichámaik kiritin amuam, yákesh jurukít tusa, takárkut wéaku ajámia, tímiaja.
- 12 Úunt nuna wáiniak, Arutman chichame ti penkerapítia tusa, iimiármia, tímiaja.

Papru Ásianam.

- 13 Papru nii ajjai kanujai Pajusnumia jjiinkiar, Perje, Panjiria nunkánam páchítkia nuí jeáwar, Juank níiya kanakí, Jerusarénknum waketkimia, tímiaja.
- 14 Chíkichkia Perje nunkánmaya jjiinkiar, Antiukía, Pisítia nunkánam páchítkia nuí jeawar, Saké tsawanttin ayamtainiam wayá ekemsarmia, tímiaja.

Tur.13,15.

- 15 Ujájmatain aujsármatai, Ayámtain úuntri chicharáiniak: - Yatsurú, aents^u jintintiátaj-srum wakerakrumka, páchitsuk chichaktárum - tíarmia, tímiaja.
- 16 Papru wajakí, ewején takuí, chicháak: - Israéran uchiritíram, atumsha Arútam amirniutírmesha, antuktárum:
- 17 Arútam, ii úuntrin untsukmia nu, Israer-Irúnramun Ejíptunam ipiámpar, untsurí aénts-tujíntiamun najana, chíkich nunkánam jukímiayi.
- 18 Aíntiuk-nawe uwí nunka-itiárkanam jukí,
- 19 Kanaánnum tsénken matsátkamun amuk, nii nunkén susamiayi.
- 20 áintiuk-washím-ewej-nawe uwítin, Wáimiaku Samuer táatsaink, jintintiawarat' tusa, Makúkratniun apujsámiayi.
- 21 Wáimiaku Samuer támatai, Israer aents^u nii úuntrin takústaj-sar wakeruniákui, Saúran, Sisan uchirín, Penjamín shuaran anáik, áintiuk-nawe uwítin apujsámiayi.
- 22 Nuyá, Saúrnaka nakitiar, Tawítian apujsámiayi. Kame Arútam chicháak: "Aents^u wi ti anéamun, Tawítian Jesén uchirín, wi wakéramun najánatniun wainkiájai" tímiayi.
- 23 Yamáikia nekatárum: Tawit shuarnumiá, yaúnchu tímia núnisank Ewémtikniun Arútam akuptúrmakji; nuka Jesusáiti.
- 24 Nu táatsaink, Juank, Israer-aents^u enentaimrarat' tusa, aya entsajai imiakrátmiayi.
- 25 Juánksha, nii tsawantri amuwakui, chicháak: - *Wikia átum nákarum nucháitjai. Antsu winia ukúnmarui ti nankámaku winiáwai; aujájinkia wikia ti peejchachítjai* -.
- 26 Apraam-shuartíram, atumsha Arútam umirniutírmesha, nekatárum: Arútam ashí mash' uwémratniun iin akuptúrmakji.
- 27 Jerusarenknumiá aents^u, nii úuntrisha nékachu aínsarank Jesusan makuármatai, yaúnchu wáimiaku aárma, tuke Saketin aújrumna nu, amínkiámai.
- 28 Tunártinchan waininiayat, Piratu máat' túsar, susármiai.

Tur.13,29.

- 29 Yaúnchu wáimiaku aárma aminkíámtai, Paúnmaya akákiar, iwíarsármiai.
- 30 Tumaitkuísha, Arútam jakamúnmaya aneantmamtikiámiayi.
- 31 Tura, nuna etserkarat' tusa, núkap tsawanttin Kariréanmaya níijai Jerusarénknum jeawarmia nuna wantintiukármiai.
- 32 Tuma asamtai, ii úuntrin tímiania nu, yamá íísha itíáaji.
- 33 Jesusan aneántmamtik, Arútam yaúnchu ii úuntrin tíarmia nu, yamá níi uchirí asakrin, íiniu amínkiái. Kame: "*Ame winia uchíruítme, yama akínia*" tu Ujajmatáiniam aarmáiti.
- 34 Aíntsank ataksha jakáink tusa, aneantmámtikia asa, chicháak: "*Ashí nekás pénkerun Tawitian súsatniun takakúyajna nuna, amastátjarme*" tíniu asamtai, nuka amínkiái.
- 35 Aíntsank: "*Wáimiaku kaurat' túsam, iniaisáip*" tíniu asamtai, amínkiái.
- 36 Kame Tawit, Arutman umírak jaka, Arútam-shuárjai irunramtai, nii iníashí kaúrmiayi.
- 37 Tuma asamtai, nii iníashí kaúrcha chikichítí; nuka Jesús Arútam aneantmámtikia nuíti.
- 38 Nuíkiá, yatsutíram, aya níinini atumí tunari tsankúrnarum, Muisés chichamjai iwíarnarchamiárum nusha iwíarátarme.
- 39 Ya Jesúsnum íimiaru áinia au, nii tunariya tsankúrnar, ewemráttawai.
- 40 Yaúnchu wáimiaku tíarmia nu, atumiín aminkíáink, aneartárum.
- 41 Nuka chicháiniak: "*Atum Arútam wishíkniutíram, ishámkarum menkatumratárum; kame nu tsawanttin penke tsúumain, ujamsha nekásáiti tíchamnian turáttajai*" nuna etserkármiai - tímia, tímiaja, Papru.
- 42 Papru Pernapejai jíinkiar, wenakui, chíkich Saketin nunak jintiawarat' túsar, seawarmia, tímiaja.
- 43 Antasúa amíkiar, untsurí Jutíu, nuyá Arutman amírniusha, Papru, Pernapenash nemarki weármia, tímiaja. Pápruka

Tur.13,44.

- níijai chichás, Jesusan Iwiaikrátniurin emenkakaráink tusa, ikiakáin áarmia, tímiaja.
- 44 Chíkich Saketin untsurí aents^u írúnrármatai, Papru, Jesusan túramurin nekawarat' tusa, ésaram chicharkármiai
- 45 Untsurí aents^u Paprun anturainiákui, Jutiu akasmatáiniak, Paprun kajérkar, katsekiármia, tímiaja.
- 46 Nuíkia Papru Pernapejai kakántar chicharáiniak: - Atumíniá atumíniá Arutman chichame etserkatniuitkiurnisha, átum ántutsuk yumínkramu átaj-srum wakera asákrumin, yamáikia aya jutíuchunam wétatji.
- 47 Kame Arútam chichártameak: *"Ashí aents^u ewemrarat' túsam, ashí nunkánam nii tsáapniri atá" túramji* - tímia, tímiaja.
- 48 Jutíuchuka nuna antúkar, warasármiai. Ii Úuntrin chichamen nekáwar, tuke iwiáku pujustin áarmia nu, íimiármia, tímiaja.
- 49 Nuíkia nu nunkánam Arutman chichame pampanki wemia, tímiaja.
- 50 Túmakui, Jutíuka, nua Arutman amirniun, tura áishmank náatun ipiáwar, Paprun Pernapejai kajérkar, nu nunkánmaya jíiki akupkarmia, tímiaja.
- 51 Juka wénak: - Atum íirmastárum - túsar, Ikiúniu irutkámunam weármia, tímiaja.
- 52 Tumaitkiuísha Jesús-shuárka Iwiáikratniun achikiú ásar, warásar, juakarmia, tímiaja.

AKANKAMU 14.

Papru Ikiúniunam.

- 1 Aíntsank Ikiúniunam Papru Pernapejai jutíun ayamtairiin enkemáwar, ti pénker chichainiákui, untsurí jutíu, kriákusha íimiaru ajasarmia, tímiaja.
- 2 Jutíu íimiarcha, jutíuchun útsukar, Jesús-shuáran kajeriármia, tímiaja.

Tur.14,3.

- 3 Tumaitkuísha, Papru Pernapejaji nuí ti núkap tsawant pujúsar, ishámstuk kakáram Chichaman etsérkar, íimiaru asármatai, Arútam níinini aents-tujíntiamun najanniúya, tímiaja.
- 4 Nuíkia aents^u nakánaikiar, chíkich jutíujaji irunrármatai, chíkichkia Akatrámujaji irunrarmia, tímiaja.
- 5 Chíkich jutíu, jutíuchusha, nii úuntrijaji: - Akátramun kajerkar', kayajaji tukurtái - túsar, irunrarmia, tímiaja.
- 6 Nuna nekáwar, Akatrámuka Rikaúnia nunkánam, Ristra, Térpesha irutkámunam, ayam irúnmanumsha pisararmia, tímiaja.
- 7 Nuísha Pénker-Chichaman etsérkatniun nankamawarmia, tímiaja.

Rístranam, Térpenmasha pujusma.

- 8 Rístranam, aents^u-tunirun, wekáicha akinian wainkiármia, tímiaja.
- 9 Chíkich tsawanttin nu aents^u Paprun anturú pujús, íimiaru asamtai, Papru neká,
- 10 kakántar chicháruk: - Wajaktiá ! - tu tai, wajátakin wekasamia, tímiaja.
- 11 Aents^u nuna wáinkiar, Rikaúniu-chichamjaji charátum ajáiniak: - Arútam aents^u ajásar, tarútramji - tíarmia, tímiaja.
- 12 Pernapén Tiús anáikiar, Pápruka etserin asamtai, Ermés anaikiármia, tímiaja.
- 13 Wea Tiúsan ayamtáiriya wákan, kukújniasha jukí, irútkamun waitiriín pujumia nuí, Páprunun Pernapénunsha íikmak awajsátaj-sa wakerímia, tímiaja.
- 14 Akátramun nuna nekáwar, nii pushirín tséut jáakar, aéntsnum pachíniawar, kakántar chicháiniak:
- 15 - Yatsurú, urukamtai jusha aítkiarum ? Íisha átumea aínsarik aentsuíj*i*. Áantar-arútam iniáisarum, nekás-Arútam

Tur.14,16.

- nayáimpin, nunkansha, entsansha, ashí mash' ana nuna najana núí íimiarku tusar', étserji.
- 16 Nu Arútam, yaúnychusha ashí aents^u aya níiniunmak pujusarat' tusa, iniaisámiayi.
- 17 Antsu tuke wantíntiukar, nii pénderin suwíti. Nayáimpinmaya_a yutúmtik, mash' néremtik, ayúrawar, tuke waramtikiaiiniáwai - tíarmia, tímiaja.
- 18 Tu chichainiakuísha, aentska: - Nekasáshit ? - túsar, íikmakan sútsuk, nii jeén waketrarmia, tímiaja.
- 19 Ikiúniunam, aéntsun unuiniártaj-sar, núkap tsawant pujuiniákui, Antiukíanmaya_a tura Ikiuniúnmaya_a jutiu, Paprun, Pernapensha jíáktaj-sar, tariármia, tímiaja. Nu aents^u tsanúrar: - Wáitruiniáwai; antukáirap - tuiniákui, ashí atak íiksarank, kajerarmia, tímiaja. Túrawar, Paprun kayajají tukúrar, jakayi túsar, irutkamúnmaya_a aá jíikiar, ajapa ikiukiármia, tímiaja.
- 20 Tumaitkuísha, nii aéntsri irúnturam, Pápruka nantakin, irutkámunam wayá, kashinkia Pernapejají Terpe irutkámunam weármia, tímiaja.

Antiukíanam waketkimiu.

- 21 Térpenam ti untsurí aéntsun Jesús-shuar awájsar, ikiúiniak, ataksha Rístranam táar, Ikiúniunam jeáwar, Antiukíanam waketkiármia, tímiaja.
- 22 Jesús shuáran ikiakárar: - Arútam-Irunramúnam jeátin, ti waitsatniuítji - túsar: - tuke íimiaru atárum - tíniu áarmia, tímiaja.
- 23 Ashí Jesús-Irúnramu-iniakmámunam anéntruawar, ijjárma-war, nii ewején awántsar, Wea awajarmia, tímiaja. Tura: - líimiaru asákrumin Jesús yaintmaktárum - túsar, ikiukiármia, tímiaja.
- 24 Pisitia nunkánmani wéar, Panjíríanam jeawarmia, tímiaja.

Tur. 14,25.

- 25 Tura, Perje irutkámunam Arutman chichamen etsérkar, Atarian kanmatkariín jeawarmia, tímiaja.
- 26 Antiukíanmaya Arutman kakarmarijají chichaman etserkátaj-sar jìnkín ásar, nuí ataksha kanujají táarmia, tímiaja.
- 27 Táar, Jesús-Irúnramun irúrar, itiur Arútam níinini mash' najána nuna, tura, itiur jutíuchunash íimiaru awajsarmia nunasha, etserkarmia, tímiaja.
- 28 Nuí Jesús-shuárjají núkap tsawant pujusarmia, tímiaja.

AKANKAMU 15.

Jesúsán kakarmarijajink ewémeaji.

- 1 Chíkich aents^u Jutéanmaya táar, Jesús-shuáran chicharáiniak: - Ewemrataj takúrmeka, Muisés tímia núnisrumek tsupirnaktiniáitrome - tíarmia, tímiaja.
- 2 Jesús-shuar, nu chichaman antúkar, nekasáshit túmam ajainiákui, Papru Pernapejají, Jutéanmaya táarmia nujají, ti kakántar jianaikiármia, tímiaja.
Ti itiúrchat áakui, Antiukíanmaya Jesús-shuar, Jerusarénknum Akatrámuajají, weajáisha nuna iwiararat' túsar, Paprun Pernapejají, tura chikíchnasha, akupkarmia, tímiaja.
- 3 Jesús-Irúnramu útsukam, Jinisiánmani, Samarianmanisha nankamáiniak: - jutíuchusha íimiaru ajainiáwai - tu etserainiákui, ashí mash' ti warasarmia, tímiaja.
- 4 Jerusarénknum Jesús-Irúnramu, Akátramu, wéasha, wará warát awáyawaram, Arútam níinini najanamia nuna etserkarmia, tímiaja.
- 5 Pariséu aents^u, íimiaru áarmia nu chicháiniak: - Jutíuchusha tsupírnakar, Muisés awemamun amírkartiniáiti - tíarmia, tímiaja.
- 6 Nuíkiá Akátramu wéajajink nuna iwiarátaj-sar, irunrarmia, tímiaja.

Tur.15,7.

- 7 Chícham wankankí wéakui, Kaya wajakí, chicháruk: -
Yatsurú, yama nankámtaik, itiur Arútam atumiín tamia ? Nu
atumsha nékarme. Aíntsank wínia chichámrujají jutíuchusha
íimiaru ajasarat' tusa, wakerúkmiayi.
- 8 Arútmaka aentsun anentáin neka asa, íiya núnisank nii
Iwiaikrátniurin susármiai.
- 9 Aents^u uruku áinia nuna íitsuk, aya íimiaru asármatai, tunarin
tsankurármiai.
- 10 Tuma aísha, urúkamtai Arútam wakéramu nakitiárum ?
Urúkamtai yaúnchu akupkamu íi úuntri, tura íisha umíktin
tujíinkiámiaj' nuna, chíkích amikiarat' tusárum, wakérum ?
- 11 Kame, aya Jesusan kakarmaríjajink íisha, tura níisha
uwemráitji, nu páant nékaji - tímia, tímiaja.
- 12 Tura nuíkia mítiat ajásar, jutíuchu ainiámunam Arútam niinini
nii péneri susa, aents^u tujíntiamu najanamia nuna, Papru
Pernapejají etserainiákui, ashí mash' antukarmia, tímiaja.
- 13 Tuasúa amukármatai, Sántiak wajakí, chicháak: -
Yatsutíram, antuktárum.
- 14 Arútam yama nankámtaik jutíuchujají Jesús-Irúnramun
najánatniun juarkimia nuna, Kaya páant ujátmají.
- 15 Yaúnchu Waimiakusha nuna aarármiai.
- 16 kame: *"Tawitian jéen yumpunra nuna ataksha jeámatajají.
Yajáuchia nuna ashíran, péner iniantaittíajají.*
- 17 *Ashí aents^u, winia umpuntramú ajasarmia nu, Arutman
eakarát' tusan, turáttajají.*
- 18 *Yaúnchu tímiajna nu yamáí uminiawai, Úunt Arútam tawai"*
yaúnchu Wáimiaku tíarmiai.
- 19 Tuma asamtai, jutíuchu Arutman amírainia au itíurchat
awajsashtiniáitji.
- 20 Antsu áyatik áantar-arútman íikmak susámun yútsuk,
tsanírmatsuk, numpan yútsuk pujusarat' tusar', papí
akuptuktái.
- 21 Núnaka Muisés akupka asamtai, tuke Saketin ashí
irutkámunam wea etserainiáwai - tímia, tímiaja Sántiak.

Jerusarénknum chícham najánamu.

- 22 Nuí^ukia Akátram^u, wéasha, mash' Jesús-Irunrámusha, ya Antiukíanam Papru Pernapej^{ai} weártata túsar, eákar, Jutas, Parsapá taman, tura aents^u náatu Sírasan anaikiármia, tímiaja.
- 23 Nu aénts^{ai} papín akúptuiniak, aarármiayi: - Akátram^u, wéasha, Antiukíanam, Sírianam, nuyá Sírisianam jutíuchu pujármena nuna amíkmátmarme.
- 24 Juyá Jesús-shuar ii akupkachma atumiín jeáwar, itiúrchat ewekatmakuíttrumna nu nekaji.
- 25 Tura yamáikia nekar', ashí mash' irunrar', métek chícham jusar', Papru Pernapej^{ai} juyá aents^u akúpeaji.
- 26 Kame juka Jesúsnum tuke suruma ainiáwai.
- 27 Tuma asamtai, Jutas Sírasj^{ai} émamkes chícham najánamun ujatmaktátrume.
- 28 Ílisha Iwiaikrát^{niuj^{ai}} atumiín itiúrchat apújsatin nakitiáji.
- 29 Antsu, iikmak áantar-arútman susamu, numpasha yútsuk, tsanírmatsuk pujúsrum, nu pénker asamtai, amiktárum. Máketete - tu aararmia, tímiaja.
- 30 Akupkámuka ikiúiniak, Antiukíanam jeáwar, Jesús-shuáran irúrar, papín susarmia, tímiaja.
- 31 Jesús-shuarka nuna aújsar, ti warasármatai,
- 32 Jutas Sírasj^{ai} wáimiaku ásar, chichárkar, ikiakararmia, tímiaja.
- 33 Núkap tsawant pujusármatai, ataksha waketkiarat' túsar, akupkarmia, tímiaja.
- 34 Antsu, Siras juáktaj-sa wakérakui, Jutas níinki Jerusarénknum waketkimia, tímiaja.
- 35 Páprusha Pernapej^{ai}, chíkich aénts^{ai}, Antiukíanam pujúsar, Arutman chichamen etserú pujú áarmia, tímiaja.

Papru ataksha irasma.

- 36 Újume^k tsawant nankamásmatai, Papru Pernapén chicháruk: - Ashí irutkámunam Arutman chichame ujakármiajn^{ia} nu, itiúrak pujúinia iyutái - tímia, tímiaja.
- 37 Pernapeka Juank, Markus taman jukítiaj-sa wakérakui,
- 38 Pápruka chicháak: - Atsá, ijjai Panjírianam kanakmia nu, iin nemartamsáchmiajn^{ia} nu jukishtiniáitji - tímia, tímiaja.
- 39 Nuí^{ka} kajérnaikiar, kanakiármia, tímiaja. Pernapeka Márkusan jukí, Chípriniam wéakui,
- 40 Pápruka, Siras uyúsam, wéakui: - Arútam yaintmaktí - Jesús-shuar tíarmia, tímiaja.
- 41 Sírianam, Sirisiánmasha Jesús-shuaran ikiakárar, Jerusarénknum chícham najánamun sukí weármia, tímiaja.

AKANKAMU 16.

- 1 Pápruka Térpenam, Rístranmasha jeámia, tímiaja. Nuí Jesús-shuar Timiutéu náartin, nii nukurí jutíu-Jesús-shuaráuya, nii aparí kriakuya, nuna wainkiámia, tímiaja.
- 2 Rístranmaya, Ikiuniunmáya^asha Jesús-shuar: - Nuka penkeráiti - tuiniákui,
- 3 Papru nemartusat' tusa, jukí, nii aparí kriáku asamtai, jutíu nuí írunu kajerkaráink tusa, nii shuníchirin nuapén tsupirkamia, tímiaja.
- 4 Níjjai irutkamúnmani nankamáiniak: - Jesús Utsumkáiti - túsar, ishám^tsuk etsérkar, Jerusarénknum Akátram^u wéajai chícham najánamun amikiarat' túsar, sukí weármia, tímiaja.
- 5 Ashí irutkámunam Jesús shuar, ti kakáram ajásar, chikíchnasha ímiaru awajainiákui, Jesús-Irúnramu pampankí wémia, tímiaja.
- 6 Iwiáikratin: - Ásianam Arutman chichame etserkáirap - takui, Príjjánmani, Karasiánmani íirkutak, Mísianam nuntumsarmia, tímiaja.

Tur. 16,7.

- 7 Nuyá: - Pitínianam jeatái - tuiniakuísha, Iwiáikratin surítkiam,
- 8 Misiánmani Trúasnum jeawarmia, tímiaja.

Papru Eurúpanam we.

- 9 Nuí kashi Masetuniánmayá aents^u: - Juí tame, yaintkiatá - taun, Papru mesékranam wainkiámia, tímiaja.
- 10 Shintiar étserkui: - Masetúnianam Arutman chichamen etserkarat' tusa, Jesús untsúrmaji - tímiaji.
- 11 Truasnumiá kanujá jĩinkir', Samutrasíanmani weri, kashín Neápurisnum jeámji.
- 12 Nuyá, Masetúnianam ti úunt irútkamu, Jirípius tama, Rúmanam pachítkia, nuí jear', újumek tsawant pujúsmiaji.
- 13 Sakétin jutíu anentruátaj-sar, entsá yantam irunrachártimpiash tusar', wémiaji. Nuí pujusar', nua kaunainiákui, chicharkármiaji.
- 14 Tiatíranmayá nua, Rítia náartin, Arútam amirín, ipiákon súnak pujúmiayi. Paprun anturú pujái, Arútam iimiaru awajsámiaji.
- 15 Níi shuárjaj imiánar, chicháak: - “Nekás Jesúsnum iimiaruíti” takúrmeka, jeáruí winítíarum - takui, wémiaji.

Papru Jirípsunam emetamu.

- 16 Anentruátaj-sar' wéarin, nua emeskan kakarmaríjaj mayáirutak, nekáchminian neká, ti núkap kuítian ayásmak, nii úuntrin suúya nu tarutrámniaji.
- 17 Ukúnam patak winís: - Juka ashí tujintcha Arutman takárniuri ásar, ewémratniun jintian iniakmainiáwai - tusa, chará chará ajámiaji.
- 18 Tuke tsawanttin itít wekáakui, Papru ayantátar, emeskan chicháruk: - Jesús Utsumka jĩintiumkitiá, túramui - tu tai, nu chichámaik nuánmayá emésak jĩinkímiayi.
- 19 Nuan úuntri: - Yamáikia kuit ayasmakcháttaji - túsar, Paprun Sírasjaj achíkiar, makútainiam jukiármia, tímiaja.

Tur.16,20.

- 20 Makúkratniun chicharáiniak: - Ju aents^u jutíu ásar, ii irutkamuriín itiúrchat awajainiáwai.
- 21 Ii Rúmanu asar', unuiniána au penke umikchamniáitji -
- 22 Aents^u niin kajerainiákui, makúkratin chicháak: - Pushiri áikiárum, asutratárum - tusa, akupkarmia, tímiaja.
- 23 Asú asutiniákua, epeni apújsar: - Pénker wainkiatárum - epenmian-wáinniun tíarmia, tímiaja.
- 24 Akupkármatai, init awántiuawar, nawen jirujai jinkiatrarmia, tímiaja.

Papru ewemtíkramu.

- 25 Kashi ajámpek Papru Sírasjai anentruiniákui, mash' antú pujuármia, tímiaja.
- 26 Aya anéachma uurkamtai, jeášha jakúkar, wáitisha uranramtai, aents^u jirujai jinkiámusha, ashí mash' atíniakarmia, tímiaja.
- 27 Epénmian-wáinin, wáiti uranran wáiniak: - Aents^u pisakarái - tusa, maamámtaj-sa kuchín achíkmia, tímiaja.
- 28 Papru chicháruk: - Áantram maamamáip; ashí mash' juí pujaji - tímia, tímiaja.
- 29 Epénmian-wáinniuka shiripkin ekémak, Papru Sírasjai pujámunam tsekenkí jeámia, tímiaja.
- 30 Aá jjiikar, chicháruk: - Uuntá, ewemrataj tusan, itiurkatniúítiaj ? -
- 31 Takui, chicharáiniak: - Jesús Utsúmkanam íimiartá. Túram, ame, amé shuármijai ewemráttarme - tíarmia, tímiaja.
- 32 Tura, níin, nii shuárnasha, Arutman chichamen ujakarmia, tímiaja.
- 33 Nuyá nu káshik júkiar, tsupirmárinkia nijjá nijjá amájsar, nii shuárjai mash' imianiármia, tímiaja.
- 34 Nii jeén júkiar, ayura, íimiaru asa, níí shuárjai ti warasarmia, tímiaja.

Tur. 16,35.

- 35 Káshik tsawármatai, makúkратin chicháak: - Epénmian ankant akupkatí - tu chichaman akuptukmia, tímiaja.
- 36 Epénmian-wáinniuka Paprun chicháruk: - Makúkратin ankant akupkartá túrutkui, yamáikia j̄inkírum, wará warat wetárum.
- 37 Tu tai, Papru chicháak: - Atsá; ii rúmanu árinink penke nánkamin asutiamrar', áantar epeni apujtamsar', yamáikia úukar akuptamainiáji. Nuka nakítiáji. Antsu níinki j̄irmaktái - tímia, tímiaja.
- 38 Makukrátiniuka nuna antúkar, rúmanu asármatai, ti ishamkarmia, tímiaja.
- 39 Nuíquia weríar, chicharáiniak: - li nékachu asakrin, tsankurkarturtárum - t́nia - ii nunkeya j̄inkírum itiúrchat apujturkartusáirap - t́sar, ankant akupkarmia, tímiaja.
- 40 Papru Sírasj̄ai j̄inkiar, Ritian jeén jeáwar, nuí Jesús-shuáran wáinkiar, ikiakárar, ikiukiármia, tímiaja.

AKANKAMU 17.

Tesarúnikianam itiúrchat wainkiámu.

- 1 Papru Sírasj̄ai Anjipurisnúmani, tura Apuruniánmani wéar, Tesarúnikianam, jutíu ayamtain takú áarmia nuí jeawarmia, tímiaja.
- 2 Pápruka, tuke túrin asa, menáint Saketin níij̄ai chichasarmia, tímiaja.
- 3 Ujajmatáiniam: - *Utsumka jakaitiat, ataksha aneantiniáiti* - nuna aújas: - Nu Utsumka, Jesúsáiti - tímia, tímiaja.
- 4 Chíkich aents^u, tura untsurí kriáku jutíuj̄ai irunrarmia nu, núasha ti náatu íimiarar, Papru Sírasj̄ai irunrarmia, tímiaja.
- 5 Jutíu nuna akásmatáiniak, aents^u naki, manin aármia aun irúrar, irutkámunam itiúrchat apújsar, Paprun Sírasj̄ai maku-krátiniunam jukitiái t́sar, Jasunkan jeén tariármia, tímiaja.

Tur.17,6.

- 6 Wáinkiachar, Jasunkan, tura chíkich Jesús-shuárnasha achíkiar, makukrátñiunam ejénia: - Ashí aéntsnum itiúrchatan apujáinia nu juí táar, itit ewekatmainiáji.
- 7 Jasúnksha nii jeén awayawármatai, "Uunt Sésarnan aantráiti; aya Jesúsak nankamakuíti", tuiniáwai - tu chará chará ajáarmia, tímiaja.
- 8 Nuna tíar, charátum ajainiákui, makúkratin: - Aents tuiniána au nekasáiti - túsar:
- 9 - Ankant wétaj takúrmeka, akíkmaktiniáitrome - Jasunkan tíarmia, tímiaja.
- 10 Jesús-shuárka kashi Paprun Sírasjaj Peréanam akupkáram, jeáwar, jutíun ayamtairiín wayawármia, tímiaja.
- 11 Ju jutíuka, Tesarunikianmayansha iniánkas, pénker ásar, Arutman chichamen pénker antukarmia, tímiaja. - Papru tana nu Ujajmatáiniam áwash ? - túsar, tuke tsawant eáu áarmia, tímiaja.
- 12 Untsurí jutíu, kriáku, áishmank, nua náatusha íimiaru ajasarmia, tímiaja.
- 13 Tumaitkuísha, Tesarunikiánmaya jutíu: - Papru Peréanam Arutman chichamen étsereawai - taman antúkar, itiúrchat apujtustái túsar, weriármia, tímiaja.
- 14 Turawármatai, Jesús-shuarka Paprun nayántsmanmani akupkármatai, Síras Timutéujaj juakarmia, tímiaja.
- 15 Paprun nemariármia nuka Aténasnum ejénia, ikiúiniak, Peréanam wakétkiar, Siras Timutéujaj wárichik Páprujaj inrunrarat' túsar, akupkarmia, tímiaja.

Papru Aténasnum.

- 16 Papru Aténasnum nakaa pujús, irutkámunam untsurí áantar-arútman wáiniak, kúntuts enentaimsamia, tímiaja.
- 17 Ayámtainiam jutíujaj, Arutman amírniujáisha, tura irutkámunam aents^u wainmajáisha chichasarmia, tímiaja.

Tur. 17, 18.

- 18 Jesusan pachís, "aneantiniáitji" tu étserkui, Ipikiúreu, Estúikiu enentáimin áarmia nu: - Jush warí túsank tu chicháa weká ?
- tuiniákui, chíkichkia: - Nékashtai-arútman etsérniuíti - tíarmia, tímiaja.
- 19 Nuíkia Paprun achíkiar, iruntai-jeánam, Ariúpaku támanum júkiar: - Yamáram chicham jintíamna ju nekamniakáitjaj' ? - tíar,
- 20 - Ame aushá-chicham jintiámna nu, páant awajsái tusar', wakérají - tíarmia, tímiaja.
- 21 Kame ashí Atenasnumiá aents^u, apachsha, aya yamáram chichaman antúktaj-sar, wakérin áarmia, tímiaja.
- 22 Nuíkia Papru wajakí, chicháak: - Atenasnumiá aentstíram, nekás iimiaruítrume.
- 23 Kame, atumí irutkamuriín irá wekasan, untsurí Arutman nakumkámuri irúnmanum, chíkíchik Arútam náartichun wáinkíámjai. Tuma asamtai, átum náarisha nekachiátrum tekemrármena nuna etserkátaj-san winiájai.
- 24 Arútam nunkan, tura nuí írunna nunasha najanka, nayáimpin nunkansha nérentniuri asa, aents^u jeámmanum pujuchuíti.
- 25 li Iwiákmarin, ii mayáiriniash, ashí mash' súramea asa, ii najanámurin utsúmtsui.
- 26 Ashí aéntsun nu numpak najana, ashí nunkánam pujusarat' tusa, nii nunkénash susámiayi.
- 27 Niinki Arutman eákar, warínmankesh wainkiarat' tusa, wakerímiayi.
- 28 Arútam nekás yajaka pujatsui, kame niinín pujáji, niinín muchítiaji, tura niinín iwiákeaji. Tuma asamtai, atumí úuntri: - Nii shuaráitji - tiniu áarmiayi.
- 29 Nekás níi shuar asar', ashí mash' kurijají, kayajají aents^u najánamu, "Arutmáiti" tíchatniuítji.
- 30 Arútam yaúnchu aents^u nékachu unuukarmia nuna kajínmatki, yamáikia ashí aents^u enentaimrarat' tusa, wakérawai.

Tur.17,31.

- 31 Nii Anaikiamurini aentsun makurártasa, nii tsawántri apújsamun tákakeawai. Nii Anaikiámurin aneantmámtikkia asa, nekás turáttawai - tímia, tímiaja, Papru.
- 32 Aents^u aneantártatui taman antúkar, Paprun wishíkrar: - Mámete, atak anturkátjame - tíarmia, tímiaja.
- 33 Tuma asantai, Papru ikiukiármia, tímiaja.
- 34 Tumaitkuísha, Ariupakúnmaya_a Tiunísiu, tura nua Támaris náartin, chikíchsha íimiarar, níijai irunrarmia, tímiaja.

AKANKAMU 18.

Papru Kuríntiunam.

- 1 Nuyá Papru Aténasnumia_a jíinkí, Kuríntiunam jeámia, tímiaja.
- 2 Nuí Jutíu aents^u, Akíria náartin, Púntunam akínian wainkiámia, tímiaja. Úunt Kráutiu jutíun jíiki akupkármatai, níisha nii nuwéjaink Prisíriajai, Itariánmaya_a tamia, tímiaja.
- 3 Páprusha nu takátnak najanin asa, níijai irúnar, áak awántamun najánawar, súrin áarmia, tímiaja.
- 4 Tuke saketin jutíu, kriákusha íimiaru ajasarat' tusar, ayámtainiam jintintin áarmia, tímiaja.
- 5 Antsu, Siras Timiutéujai Masetuniánmaya_a táarmatai, Pápruka, Jesús nekás Utsumkáiti tiarat' tusa, tuke tsawanttin jutíun jintintniúya, tímiaja.
- 6 Jutíuka, nekascháiti túsar, katsékeam, Pápruka yumínkrar, chicharáiniak: - ltiúrchat akuínkia, átumek íirmastárum; kame wíkie aya jutíuchunam wéajai - tímia, tímiaja.
- 7 Aents^u, Títíu náartin, imítmachu tama, tuke Arutman umirín, nii jeé ayamtai ayámach' pujá asantai, nuí wemia, tímiaja.
- 8 Jutíu-ayámtain úuntri, Krispu náartin, níí shuárjai, tura untsurí Kuríntiu-aéntssha Paprun chichamen antúkar, íimiaru ajásar, imianiármia, tímiaja.

Tur.18,9.

- 9 Kashi, Arútam Paprun wantíntiuk, chicháruk: - Sapijmiakáip ! Pénkeshá itiatkáip ! Ishámstúk etserkatá.
- 10 Kame, ju irutkámunam untsurí winia ajasártatui. Wikia ámijaí pujá asamtai, penke itiurtamkachártatui - tímia, tímiaja.
- 11 Tuma asamtai, nuí chikíchik uwí, ujuk nantu, Arutman chichamen etseruu pujumia, tímiaja.
- 12 Akayan úuntri Kariún asamtai, jutíuka ashí mash' útsukar, Paprun achíkiar, Makukrátniunam júkiar, chicháiniak:
- 13 - Ju aents^u, turáchminia nuna Arútam wakérawai, túramji - .
- 14 Pápruka chicháktaj tai, Kariún chicháak: - Jutíutíram, itiurchat, mankártuamu tákurmínkia, anturkáintjiarme.
- 15 Antsu, atúmniak pachia asákrumin, makuchminiáitjai - ,
- 16 Tínia, jíiki akupkarmia, tímiaja.
- 17 Nuíkia kriáku aents^u, ayamtain úuntri Sústenesan, nuí asutiainiakuísha, Kariún pachíschamia, tímiaja.

Epísiumam Arutman chichame.

- 18 Pápruka núkap tsawant Kuríntiunam pujús, Jesús-shuáran ikiúiniak, Prisiria Akíriajaí uniusam, kanujaí Siriánmani we, Arútam yáinkma asa, Sénkreanam jeá, intiashín tsupíkmia, tímiaja.
- 19 Epísiu irutkámunam jeá, nii aín ikiúak, saketin ayámtainiam wayá, jutíujaí tunáimia, tímiaja.
- 20 Nii aíri: - juí pujustá - tuiniakuísha, Papru nakitramia, tímiaja.
- 21 Antsu, chicharáiniak: - Arútam wakerakuínkia ataksha tarítjiarme - tusa, ikiúkiar, entsak wemia, tímiaja.
- 22 Sesaréanam jeá, Jesús-shuáran amíkmawar, Antiukíanam wemia, tímiaja.
- 23 Nuí pujús, Jesús-shuáran ikiakártaj-sa, ataksha Karásianam, Prijiánmasha wemia, tímiaja.
- 24 Epísiumam jutíu aents^u, Apuru náartin, pénker chicháu, Ujájmatain ti neka, Arejantriánmaya tamia, tímiaja.

Tur.18,25.

- 25 Aya Juank imiáimiu asa, Jesusan jintín ishíchik nekayat, nii chichamen ti pénker jintíniúya, tímiaja.
- 26 Jutíun ayamtairiín wayá, ti pénker chicháakui, Akira Prisíriajaj antúkar, júkiar, Jesusan jintín pénker unuiniararmia, tímiaja.
- 27 Apuru Akáyanam wetaj takui, Jesús-shuar papín aárar: - Pénker ístárum - tu akuptukarmia, tímiaja. Nuí jeá, ti nékau asamtai, iimiárusha nu arant nekawarmia, tímiaja.
- 28 Ujajmatáiniam: - Jesús nekás Utsumkáiti - tu aárma asamtai, nuna Apuru étserkui, jutíuka nekascháiti títinian tujíntiármia, tímiaja.

AKANKAMU 19.

Papru Epísiunam.

- 1 Apúruka Kuríntiunam pujái, Pápruka náintnium irútkamun iyá iyákua, Epísiunam jeá, wárumak Jesús-shuáran wainkiámia, tímiaja.
- 2 Nuna aníntruiniak: - Ímiaru ajasmárum nuí, Iwiáikratin achíkmakárum ? - takui: - Atsá, íikia Iwiáikratin achikminiáitji támakesha antukcháitji - tíarmia, tímiaja.
- 3 - Nuíkia, itiur imianmiárum ? - Papru tu tai: - Juank imiakrátmiyajaj imiaimiúitji - tíarmia, tímiaja.
- 4 Nuíkia Papru chicharáiniak: - Juánkka aya enentáimratniun imiákrati, "ukúnam winiána aí iimiartárum", tímiayi. Nuka Jesusáiti -.
- 5 Nuna antúkar, Jesusan imiakrátmarin achíkiármia, tímiaja.
- 6 Nuyá Pápruka ewején awántsar, umpúakui, Iwiáikratin taruráram, chíkich chichámnash chichásar, íimiarar, etserkarmia, tímiaja.
- 7 Nu aents^u nawe-jímiar áishmank áarmia, tímiaja.
- 8 Pápruka, Arútam-Irúnramu nekasáiti tíarat' tusa, ayámtainiam menáint nántutin esétar jintintiwármia, tímiaja.

Tur.19,9.

- 9 Chíkichkia íimiaru ajátsuk, nii anentái kátsuram ajásmatai, kajérkar, aújmatu wekainiármia, tímiaja. Tuma asamtai, Pápruka kanakí, aya Jesús-shuáran Tiranun unuúmiatairín irur, tuke tsawanttin, nantu tutupin jeástatuk aíya juarkí, ayantántai timianái, unuiniúya, tímiaja.
- 10 Jimiará uwitin tura asamtai, Asiánmaya Jutíu Kriákusha, Arutman chichamen antukarmia, tímiaja.
- 11 Arútmaka Páprunmani aents-tujíntiamun najanniúya, tímiaja.
- 12 Kame aents^u jáinia, waweámusha nii entsatáirin antínkiar, tsuámarar, wawéknasha jikiármia, tímiaja.
- 13 Israer uwíshniuka, íikratin ásar, Jesusan kakarmaríjají wáwek jikiái túsar, waweámun chicharáiniak: - Emeská, jinkitiárum; Jesusan Papru páchiana nuna kakarmaríjají tájarne - tíarmia, tímiaja.
- 14 Jutíu wea, Esewa náartinian uchirí jeánam enkemáwar, nuna turawarmia, tímiaja.
- 15 Tu tuiniái, emesak chicharáiniak: - Jesús nékaji, Páprusha nékaji; antsu átum yatsukáitrum ? - tíarmia, tímiaja.
- 16 Tuiniákui, nu aents^u waweámu uwíshniun kajérkar, emeskan kakarmaríjají ti kakáram katsúmkar, misú ipísrarmia, tímiaja.
- 17 Episiu irutkámunam jutíu kriákusha nuna nekáwar:
- Ayawá ! - tíar: - Nekás Jesús ashí nankamakuíti - tíarmia, tímiaja.
- 18 Ti untsurí íimiaruka: - Uwíshniun áantran untsukuítjají - páant tuiniákui,
- 19 uwíshniusha nii papirín irúmrar, ashí iimiainiámunam ekemakarmia, tímiaja. Nu papí sumakma, ewej-nawepanti kuit áarmia, tímiaja.
- 20 limiáruka Arutman kakármarin iniakmainiákui, chíkich aentssha íimiaru ajákiar, pampánki weármia, tímiaja.

Epísiunam itiúrchat ama.

- 21 Nuyá Pápruka Iwiáikratin ujákam: - Masetuniánmani, Akayanmanisha Jesús-shuáran íirkutak, Jerusarénknum pujusan, nuyá Rúmanam wetajai - tímia, tímiaja.
- 22 Nii yáinri Timiutéun Erástujai Masetúnianam akúpak, níinkia Ásianam wárum tsawant juákma, tímiaja.
- 23 Jesusan jintí étsermanum itiúrchat ámia, tímiaja.
- 24 Aents^u Temítriu náartin, Artemisan nakumkámurin najának, surur, kuítian mantumniúya, tímiaja.
- 25 Nuka ashí mash' nuna najánniun irur, chicharáiniak: - Yatsutíram, atumsha páant nékarme: íikia jutikiar' kuit mántumji.
- 26 Antsu Epísiunam, Asiánmasha Papru wekás: "Aents^u najánamu aantráiti, Arutmachuíti" tusa, ashí aéntsun anentáin yapátiawai.
- 27 Aya ii takatrínkikia itiúrchat ewekátmatsji; antsu Ásianam, mash' nunkánmasha ashí Artemisan tekemruiniána nusha menkakármatai, nii ayamtáirisha amukáttawai - tímia, tímiaja.
- 28 Nuna antúkar, ashí mash' kajékar, charátum ajáiniak: - Ipsiun Artemísari ti nankamakuíti - ajáarmia, tímiaja.
- 29 Nuyá ashí mash' aents^u níijai irúnrar, chará chará ajákiar, Masetúnianmaya Kayun Aristárkujai, Paprun nemarkin áarmia nuna achíkiar, irúntai-jeánam jukiármia, tímiaja.
- 30 Tumainiákui, Pápruka chicharkátaj-sa wakerakuísha, nii aéntsri suritkiármia, tímiaja.
- 31 Nii amíkriha, Asian úuntri, chichaman akúptuiniak: - Charátum ajainiámunam áantram wayawáip; amek surumakáip - tíarmia, tímiaja.
- 32 Charátum mai chichá ajainiakuísha, untsurí aents^u itiúrkatin irunrarmia nunasha nekacharmia, tímiaja.
- 33 Arejántru, Jutíu aents^u ikiakam, ewején takuí, chichástaj-sa wakerimia, tímiaja.

Tur. 19,34.

- 34 Antsu ashí aents^u: - Juka jutiuwáiti - túsar, ti charátum ajákiar: - Epísiun Artemísari ti nankamakuíti - ti núkap tíarmia, tímiaja.
- 35 Ukúnam irutkámunam papín-aáin chicharáiniak: - Episiu Artemísan nunkente, nii nakumkámuri nayáimpinmaya taráiti, ya nuna nékatsu ? - tía, aéntsun itiatmamtikiármia, tímiaja.
- 36 Aents^u itiatkármatai: - Tájana nu nekás asamtai, nu arant ajáirap.
- 37 Ju aents^u itiarumna ju, yajáuchínkia najanacharai; ii arutmaríniash katsekkácharai.
- 38 Timítriu nii ajjái itiúrchatan takakainiákka, makukrátniunam wéar, iwiartí.
- 39 Antsu, chíkich chichaman takakainiakuínkia, irunramúnam iwiartí.
- 40 Kame, nekás enentáimsamka, aantrar' jutikiámunam ii timiá makumu aminiáitji -
- 41 Tu tía, nii jeén akupkarmia, tímiaja.

AKANKAMU 20.

Papru ataksha Masetúnianam.

- 1 Nu itiúrchat aminkíamtai, Pápruka Jesús-shuáran ikiakar, ikiúiniak, Masetúnianam wemia, tímiaja.
- 2 Nu nunkánam wekás, Jesús-shuáran ikiakáak, Arutman chichamen etsersúa, Krésianam wemia, tímiaja.
- 3 Núí menáintiu nantu nakamásmatai, entsak Sírianam wétaj tai, Iwiáikratin: - Jufíu mantamawártatui - takui, Masetuniánmani waketkimia, tímiaja.
- 4 Asiánmaya_u wéai, Peréanmaya_u Súpratu Pirun uchirí, tura Aristarku, nuyá_u Tesarunikiánmaya_u Sekunt, Térpenmaya_u Kayu, tura Timiutéusha, Asiánmaya_u Tíkikiu, Trújimusha níjjái weármia, tímiaja.

Tur.20,5.

- 5 Nuka éemka wéar, Trúate irutkámunam nakarmásmiaji.
- 6 Íikia Yurúmak-karíntichun namperi amukar', Jirípsunam kanu achikiar', ewej tsawanttin Trúatenam jear', níijai irunrar', tsenken tsawant nuí juákmiaji.

Trúatenam líkmak-tuamu.

- 7 Yurúmak-Nántar jatértaj-sar', ayamtai tsawanttin irunrar', pujúsmiaji. Pápruka kashinkia wetin asa, jintíntramkur', chichá chicháakua, kashi ajámpek ejemia, tímiaja.
- 8 Yakí utsáimiumam untsurí shirípi ekemarar', irunrar' pujumji.
- 9 Uchi natsach', Eutíkiu náartin, yakí winiánkmanum eketu, Papru chicháa pujái, karí mankim, akáiki iniar, jakamia, tímiaja.
- 10 Papru akátuki, tsumtsumruá, achik, chicháak: - Kúntuts enentaimsáirap; kame ataksha aneántai - tímia, tímiaja.
- 11 Ataksha yakí waka, líkmakan najana, yuá, chichá chicháakua, tsawármatai, wemia, tímiaja.
- 12 Uchi iniármia nunasha iwiaku itiármatai, ashí mash' ti warasarmia, tímiaja.
- 13 Tura Pápruka nunkak wéakui, íikia níijai Ásunam inkiunaiktiái tusar', kanujai wémiaji.
- 14 Nuí inkiunaikiar', kanujai métek Mitirene nunkánam jeámji.
- 15 Chikíchki kanarar', kanu achikiar', Kius irutkámunam jear', chíkích tsawanttin Samus írkutak, nuyá Trujíríúnknum pujusar', Mirétunam jeámji.

Episiúnmaya Úunt-Wea ikiúamu.

- 16 Pápruka Jerusarénknum Pentekustés tsawanttin tásaij tusa, Ásianam núkap pujútsuk,
- 17 Mirétunam puják, Ipisiúnmaya Úunt-wean untsukarmia, tímiaja.

Tur.20,18.

- 18 Táarmatai, chicharáiniak: - Ásianam yama támiaj nuyá itiu
atumjai pujúsmiaj nu, atumsha nékarme.
- 19 Jutíu-aents^u kajertuiniakuísha, péejchach' ajasan,
úuteaknasha, Arutman tuke amírkamjai.
- 20 Sapíjmiatsuk atumín yainkmájrumna nu nékarme.
Irunramúnam, jeánmasha etsérkan, jintintiámjarme.
- 21 Jutíu, kriákusha ímiaru ajásar enentaimrarat' tusan,
Jesúsnan etserkamjai.
- 22 Yamáikia, lwiáikratin jinkiam, warí urukataj, nunash nékatsuk
Jerusarénknum wéajai.
- 23 Ashí irutkámunam lwiáikratin chichártak: - Waitkiármasar
epetmiártatui - túrutui.
- 24 Tumaitkuísha winia iwiákmarui enentáimtsuk, akupkamu
asán, aya Jesúsnan etserkan, amúktaj-san wakérajai.
- 25 Atumiín Arutman chichamen etserkaitkuísha, atakka
waitkiashtátrumna nuna yamáikia páant nékajai.
- 26 Nuíkia atum menkakúrmeka winia makurírap, tájarme.
- 27 Kame tuke Arútam wakera nuna ujakmájrume.
- 28 Pénker pujúsrum, Jesús-Irúnramu Jesusan numpejai
sumakma asamtai, pénker wainkiatárum. Kame, lwiáikratin
nuna úuntri awajtamsamiárme.
- 29 Wi wematáinkia, aents^u, úunt yawá núnisarank, Jesús-
Irúnramun arantukchártatui.
- 30 Atumíniak anánkkartin aents^u, wáit chichaman etsérkar,
Jesús-shuárnasha yaruakártatui.
- 31 Tuma asamtai, aneárum pujúsrum, wi menáintiu uwitin,
kashi tsawáisha neá neájai, ankant ankant
chicharkamájrumna nu, kajínmatsuk enentaimsatárum.
- 32 Yamáikia wi atumnian Arútmán susamtai, Chichamtin
lwiáikratniun itiana nu apampátmarum, Arútam-shuárjai
irutmartárume.
- 33 Wíikia aéntsun kuítrin, kuririn, entsatáirínkisha penke
wakerukcháitjai.

Tur.20,34.

- 34 Atumsha nékarme; wíkiá aya winia takátrujáink wi utsúmamun, aírnanash sumarkaruítjai.
- 35 Kame, Jesús chicháak: - Suiniána au achíniajáinkia imiá warainiáwai - nuna tíniu asamtai, íisha íiniu takusar', utsumainiána aúsha yáinktin, warínmankesh takakmasti-niáitji; nuna ununiarmájrume - timia, tímiaja, Papru.
- 36 Tuasúa amik, níjají tikíshmar, anentruámia, tímiaja.
- 37 Ashí mash' miniákar, mejéasar, utiármia, tímiaja.
- 38 Atakka waitkiashtátrume tiniu asamtai, kúntuts enentáimrar, uniúsar, kanúnam ikiuwarmia, tímiaja.

AKANKAMU 21.

Jerusarénknum waketma.

- 1 Nuí ikiúiniakur', kanujají nákak Kus nunkánam jear', kashín tsawanttin Rútasnum tarí, nuyá Pátaranam jeámji.
- 2 Nuí, kanu Písianam wéakui, enkemrar', wémiaji.
- 3 Chíprikia menánmani ikiúakur', Sírianmani wémiaji. Warínchun ikiúktiaj-sa, kanu Tírunam penkámiai.
- 4 Nuí Jesús-shuar wainkiar', tsénken tsawant pujúsmaiji. Nu aents^u Iwiáikratin ujakáram, Papru Jerusarénknum wéenk túsar, chicharkarmia, tímiaja.
- 5 Tamaitiat, nu tsawant nankamasar', wémiaji. Ashí mash', nuártiuk, uchírtiuk nemartámsakrin, kanmátkanam tikishmarar', anentruámji.
- 6 Nuyá ikiunaikir', nii jeén waketainiákui, íikia kanúnam enkemrar', wémiaji.
- 7 Tírunmayá Turemáitianam jear', entsa ikiúkmiaiji. Nuí Jesús-shuar amikmar'. chikíchik tsawant juákmiaiji.
- 8 Nuyá Sesaréanam jear', Jiripin jeén wayar', kanármiaiji. Kame Jiripsha, tsenken Imiákratin áarmia nu asa, Jesusan chichamen etserniúya, tímiaja.

Tur.21,9.

- 9 Nii áintiuk nawantri antínkchamu asarmatai, Arútam níinini chichaúya, tímiaja.
- 10 ÚjumeK tsawant nuí pujarin, wáimiaku Akapu Jutéanmaya tarutrámiaji.
- 11 Paprun emenmamtáirijai nii ewején, nawénash jinkiar, chicháak: - Iwiáikratin tawai: "Juna neréntniurin jutiu aents^u jútikiawar, jinkiárar, apáchnum surukártatui" - tímia, tímiaja.
- 12 Nu antukar', íisha, Sesaréanmaya aéntsush chicharkur': - Paprú, Jerusarénknum wéep - tímiaji.
- 13 Tákurin, Papru chichártamkur': - Urukamtai áantrarum eánteakrum waitkiarárum ? Kame wikia Jesusan ayamrúktaj-san, aya jinkiatawarat' tátsujai; antsu Jerusarénknum jakamniáitjai tajai - túrammiaji.
- 14 Ántachkui, tu tu iniaisar': - Arútam wakéramu atí - tímiaji.
- 15 Nuyá, ii warínchuri iwiarar', Jerusarénknum wémiaji.
- 16 Sesaréanmaya Jesús-shuar nemartamkiar', Chiprínmaya Nasunk, yaúnchu Jesús-shuar ajásmia nuna jeén ejetámiakrin, nuí pujúsmiaji.

Papru Jerusarénknum.

- 17 Jerusarénknum jeáwakrin, Jesús-shuar ti warasármiayi.
- 18 Santiákun jeén ashí mash' wea irunainiákui, kashín tsawarar', nuí Páprujai wémiaji.
- 19 Pápruka amíkmár, jutíuchunam ashí mash' Arútam níinini najanamia nuna aújmatkui,
- 20 nuna antúkar, Arutman naatmámतिकार, chicharáiniak: - Jutíuka, untsurí nupanti íimiaru ajásar, Muisés tímia nuna tuke amirainiáwai.
- 21 Antsu jutíu jutíuchunam pujuiniána au, Muisesan amirkaráink, nii uchirín shuníchirin tsupírkaráink, nii úntriya aínsarank pujusaráink tusa, jintínkráteawai, turamainiáwai.

Tur.21,22.

- 22 Amé támarmin nekatin ásar, ashí mash' jutíu irúnrar kajertamkártatui. Tuma asamtai, warí itiuirkataj' ?
- 23 li tájiniá nu turatá. Juí áintiuk áishmank Arutman tíarmia nuna amírkartin ainiáwai.
- 24 Níijaink irúnram, páuskaram japíram, nii intiashín tsupikiarat' túsam ame akiktá. Turawakmin: "Áantar tuiniáwai; kame níisha Muisés awemamun amíawai" turamiártatui.
- 25 Antsu, iikmak áantar-arútman susamun numpén júrtsuk tankun, númpanash yuawaráink, tura tsanírmatsuk pujusarat' túsar', iikia jutíuchu, Jesús-shuar ajásaru papí aátramji - tíarmia, tímiaja.
- 26 Tura nuíkia, Pápruka kashí tsawanttin áintiuk áishmankan jukí, páuskarin japír, urutái iikmakan susártiniúya nuna nekátaj-sa, úunt ayámtainiam wayámia, tímiaja.

Papru ayámtainiam achikma.

- 27 Tsenken tsawant jeástatuk ajasai, Ásianmaya jutíu Papru ayámtainiam puján wáinkiar, itiuírchatan apújsar, aentsun charátum awajiármia, tímiaja.
- 28 Tura Paprun achíkiar, emétawar, chará chará ajáiniak: - Israertíram, atumsha yaimkiatárum; kame ju aents^u ashí nunkánam jutíun, Muisés awemámun, úunt ayámtainiash katsékak, unuínia wekáawai. Núnisank kriáku-aéntsun úunt ayámtainiam awayá, Arutman jéen páuskartin awajsáiti - tíarmia, tímiaja.
- 29 Kame nuik Páprun, Epísiunmaya Trújimujai irutkámunam wáinkia ásar, nuna úunt-ayámtainiam awayawáiti, tu enentaimsarmia, tímiaja.
- 30 Ashí aents^u kajérkar, irúnrar, Paprun achíkiar, japírkutak ayámtainimaya jíikiar, wáitin epetiármia, tímiaja.
- 31 Paprun máataj-sar pujúrainiai: - Jerusarénknum itiuírchat áwai - taman nankírtinian úuntri neká,

Tur.21,32.

- 32 Wárichik nankírtínjaj aents^u irúnmanum winiákui, wáinkiar, Paprun awatú pujuiniayat, iniaisarmia, tímiaja.
- 33 Nankírtinian úuntri weántuk: - Papru achíkrum, jírujaj jinkiatárum - tía: - Ju aents^u yáit ? Warinia najana ? - tu iníasármia, tímiaja.
- 34 Tamaitiat, chará chará ajainiákui, iwiárachmin asamtai: - Wenúknum jukitiárum - tímia, tímiaja.
- 35 Aents^u Paprun awátki wenakui, nankirtin yakáinium awantkar, jukiármia, tímiaja.
- 36 Turuiniákui, aents^u charátum ajáiniak: - Maatárum, maatárum ! - ajákiar, patatiármia, tímiaja.
- 37 Wenúknum enkémainiai, Papru kriáku chichamjaj chichákматаi: - Kriáku nekamjánta ! - nankírtinian úuntri tía:
- 38 - Amechukáitiam Ejiptúnmayá aents^u iin nankin jurútramkir', aíntiuk nupanti nankírtínjaj nunka-itiárkanam pisarmia nua ? -
- 39 Tu tai, Papru chicháak: - Atsá, wíkiá Sirísianam Tarsu irutkamúnmayá jutiuítjai. Wait-neásam aéntsun chicharkataj, tsankatruktá - .tímia, tímiaja.
- 40 Ayu, tu tai, Pápruka ewején iniákmas, mitia ajásmatai, jutíu chichamjaj chichakmia, tímiaja.

AKANKAMU 22.

Papru jutíun chicháarkamu.

- 1 Yatsurtíram, apártírmesha, wisha ayamrútmakun tájana ju anturtuktárum.
- 2 Jutíu chichamjaj chichákматаi, nuyá takamátsar, antú ajáarmia, tímiaja.
- 3 Pápruka chicháak: - Wikia jutiuítjai; Sirísianam, Tarsu pujana nuí, akíniáitjai. Tumaitkuísha, ii úuntri awemamun amíktinian Kamariéran unuimiatairiín unuimiaruítjai. Átum Arútam umireármena aínsanak, wisha umirniúyajai.

- 4 Wikia Jesusan pachiniána aun kajérkan, amúktaj-san, áishmankan nuánash jinkiáran, wáittiai-jeánam enkenúyajai.
- 5 Nuna wean úuntri, tura uuntan irunramurisha nekainiáwai. Kame nuík: Jesús-shuáran achikiar', itiar', Jerusarénknum waitkiastái" túsar, papín surúsar, Tamáskunam akuptukármatai, nu irutkámunam wémiajai.
- 6 Nantu tutúpniara aí, Tamáskunam jeástatuk ajásai, aya aneáchma cháarpia aínsank iniantrúrmiai.
- 7 Turunamtai, akaikí iniárai: "Sáuru, Sáuru, urukamtai kajértam?" taman antúkmiakai.
- 8 Turútkui: "Amesha, Uuntá, yáitiam ?" tu tai: "Wikia Nasaretnumiá Jesús, ame kajéramna nuítjai" turútmiai.
- 9 Winia nemartiármia nusha cháarpia ániun wainiainiyat, chichaman untukchármiai.
- 10 Wi chicháakun: "Uuntá, warí ituurkat' túsam, wakéram ?" tu tai: "Nantakím, Tamáskunam wetá. Nuí ame najánatniun turamiártatui" turútmiai.
- 11 Tura, jírun ukústura asamtai, ajr enkérkiar, Tamáskunam jurukiármiai.
- 12 Nuí aents^u, Ananías náartin, Muisés awemámun tuke amirín, jutíu anéamu, íirsataj-sa, tarútmiai.
- 13 Tura chichártak: "Yatsurú, Saurú, ataksha íimtiá" túrutkui, nu chichámtaik pénker íimmiakai.
- 14 Nuíkaa chichártak: "Arútam ii úuntri wáinin áarmia nu, wi wakéramun nekat', Imítmachu Jesusnasha wainkiat', nii chichamen anturkat' tusa, untsurmakái.
- 15 Yamáikaa ame wáinkiam, anturkáitmena nuna ashí aents^u nekawarat' túsam, etserkatniúitme.
- 16 Tuma asamtai, warí nákam ? Nantákim, amé tunárum japirtin, nii náari pachíkiar, imiantia" turútmiai, Ananías.
- 17 Jerusarénknum waketkin, úunt-ayámtainiam anentrú pujusan, waimiákmiai.

Tur.22,18.

- 18 Nuí Arútam chichártak: "Wárichik Jerusarenknumia j̄inkitiá; kame winia etserkumnísha, anturtamkachártatui",
- 19 Túrutkui, chicháarkun: "Wi Ayámtainiam wayán, amiín iimiararun asutran, wáitiai-jeánam enkenúyajna nuna ashí mash' nekainiáwai.
- 20 Ame akupkamu Estépankan mainiákui, wisha penkeráiti túsan, máinian pushirín takusan, útsukarmiajai" .
- 21 Tamaitiat, Arútam chichártak: "Jutíuchu íimiaru ajasarat' túsam, yajá nunkánam wetá" turútmiayi - tímia, tímiaja, Papru.
- 22 Nuna takui, chará chará ajáiniak: - Juka ti yajáuch' asa, jarumkatí ! Kame iwiáku pujumainchuíti - tíar,
- 23 nii pushirín tséut jáarar, nuncan yakí nankimiármia, tímiaja.
- 24 Nuíkia nankírtinian úntri chicháak: - Wenúknum enkeárum; warí urukámtaiya charátum ajáinia ? Nu nekátin asutiatarum - tímia, tímiaja.
- 25 Asútsattuk awájsam, Papru chicháak: - Rumánmaya aéntsun makútsuk, áantar asutiamniakáit ?
- 26 Nuna antúkar: "Ju aents^u Rúmanu asamtai, itiurkáttaj' ?" túsar, nuna anintruiniákui,
- 27 nankírtinian úntri weántuk, chicháreak: - Turuttiá; wátsek, ame nekás rúmanukáitiam ? - tu tai: - Ee, rúmanuítjai - tímia, tímiaja.
- 28 Takui, úunt chicháak: - Wikia Rúmanu ajástaj-san, ti núkap akikmakuítjai - tu tai: - Wikia Rúmanu akiniáitjai - tímia, tímiaja, Papru.
- 29 Nu chichámaik asutiátaj-sar pujuriármia nuka iniaisármatai, nankírtinian úntrisha rúmanun jinkiámtikia asa, ti sapíjmiákmia, tímiaja.
- 30 Kashí tsawanttin warí urukamtai Paprun makuármia nuna nekátaj-sa, wean úntrin, mash' jutíun úntriniasht Jutíun makutairín irúrar, Páprun nuí itiámia, tímiaja.

AKANKAMU 23.

Papru jutíun úuntri irunramúnam.

- 1 Pápruka irúnar matsatun íitia ajás, chicharáiniak: - Yatsutíram, wikia tuke Arútam wakera nuna nájanjai - takui,
- 2 Wean úuntri Ananías, wenénam awatit' tusa, aéntsun akupkamia, tímiaja.
- 3 Túram, Papru chicháak: - Ániumsha, anentái kaushá, jútiksank aminsha Arútam asuttiamáttawai. Makútaj-sam chimpínium pujayátmesha, urukamtai awemamu amírtsuk, awattíá túsam, akuptúream ? - tímia, tímiaja.
- 4 Taman antúkar, nuí ayámach' pujúiniaka chicharáiniak: - Urúkamtai wea, Arútam akupkámusha katsékeam ? - tuiniákui,
- 5 Papru chicháak: - Yatsurtíram, wíkie aútsuk Úunt-weayáitia, tájak ? Kame: "Amé úntrum katsekkáip" tu aarmáiti - tímia, tímiaja.
- 6 Nuí pariséu satuséujai irunra asármatai, Papru chicháak: - Yatsurtíram, wikia pariséun uchirí asán, pariseuwáitjai. Tumaitiátan, jaka nantaktin ainiáwai tusan, nákakui, átum makúrearme - .
- 7 Tu chicháakui, pariséu satuséujai tunáiniar, nakanararmia, tímiaja.
- 8 Kame satuséuka: - Íwianch' atsáwai; Pásuk atsáwai; jákarush nantakchártatui; tuiniáwai. Antsu pariséuka: - Nu mash' áwai - tuiniáwai.
- 9 Charátum ajainiákui, unuíkiartin, pariséu ásar, chicháiniak: - Papru aantrar' makuchminiáitji; kame iwiánchish, pásukash chicharka nu nékatsji - tíarmia, tímiaja .
- 10 Nu arant charátum ajainiákui, nankírtinian úuntri Paprun maawaráink tusa: - Wenúknum jukitiárum - tusa, nii aéntsrin untsúkar, akupkarmia, tímiaja.

Tur.23,11.

- 11 Kashi Úunt-Jesús Paprun wantíntiuk, chicháruk: - Kakartá; Jerusarénknum winia ayamrútkamna aínsamek Rúmanam turatniuítme - tímia, tímiaja.

Papru maatái tama.

- 12 Kashi tsawaráiniak, Jutíu-aents^u irúnrar: - Papru máamam, yurúmstuk, úmutsuk pujustái - túsar, chichaman najanawarmia, tímiaja.
- 13 Aíntiuk-nawe aents^u nuna turawarmia, tímiaja.
- 14 Wean úntrin, úntrnasha weríar, chicharáiniak: - Nekás Papru maachkurkia, penkesha yurumashtatji.
- 15 Yamáikia átum nankírtinian úntri werírum: "li Papru pénker anintrústaj-sar' wakérají - tusárum, inímkieurmin, íikia jintiá nákar', táatsaink máattaji - tíarmia, tímiaja.
- 16 Paprun umáin uchirí nuna neká, wenúknum ujáktaj-sa wemia, tímiaja.
- 17 Papru nuna antuk, nankírtinian chicháruk: - Ju uchi chichaman ujakat' túsam, úuntnum jukítiá - tímia, tímiaja.
- 18 Nankirtin jukí, úuntnum ejé, chicháruk: - Papru chichártak: " Ju uchi chichaman etserkat' tusam, úuntnum jukítiá" turútkui, itiájai - tímia, tímiaja.
- 19 Uunt uchín akankí: - Warí títiáj-sam wakéram, ujakatá - .
- 20 Tu tai, chicháreak: - Jutíuka: "Papru Sanetrínnum ejéniakmin, pénker anintrustái" túsar, kashín seatmártatui.
- 21 Tumaitkuísha "ayú" tip; kame aintiuk-nawe aents^u: "Papru maachkurkia penkesha yurumashtái" tinia, itiat' túsar nakarmainiáwai - tímia, tímiaja.
- 22 Uunt uchín chicháruk: - Penkesha etserkáip - tinia akupkamia, tímiaja.
- 23 Nuyá úunt, jimiará akupniun untsuk, chicharáiniak: - Ju kashi ajámpek Sesaréanam wetin, jimiará-washím nankirtin, nuyá ujuk-nawe kawáinium ekétrainia, nuyá jimiará-washím yáimniusha iwiaratárum.

Tur.23,24.

- 24 Aíntsarmek kawái iwiárarum, Papru ekentka jukírum, pénkerak, iwiákuk, úunt Jéris ejetitiárum - tímia, tímiaja.
- 25 Tura papín aátuk:
- 26 - Kráutiu Rísias, nankámaku Jérisan amíkma, juna ujáawai:
- 27 Jutíu ju áishmankan achíkiar, máataj-sar pujúrainiai, nankirtínrujaj jeán, rúmanu asamtai, atáimjai.
- 28 Warí itiúrka asamtai, makúinia nuna nekátaj-san, Jutíun makutáiriín jukimjai.
- 29 Nuí: "Muisés awemamun amíatsui" tusar, makurarmatáisha, enkemainchuíti, maamainchuíti tímiajai.
- 30 Nuyá jutíu máataj-sar wakéruinian neka asán, amiín akúpeakun: "Aí werúm makutárum" tímiajai. Mákete; pujumatá - Tu aármia, tímiaja.
- 31 Nankírtinkia nunak umíkiar, nu káshik Antipatris irutkámunam Paprun jukiármia, tímiaja.
- 32 Kashi tsawármatai, nankín-juu wakétainiai, aya kawáijaj áiniak, Paprun jukiármia, tímiaja.
- 33 Nuka Sesaréanam jeáwar, Jérisan Paprun papíjaj susármia, tímiaja.
- 34 Papín aújas: - Tuyampáitiam ? - tu tai: - Sirisianmayáitjai - tímia, tímiaja, Papru.
- 35 Takui: - Ame makurmáinia táarmatai, anturkátjame - tínia: - Erútesan jeén wainkiatárum - tusa, nankirtinrin akupkarmia, tímiaja.

AKANKAMU 24.

Papru úunt Jérisjai.

- 1 Ewej tsawant nankamásmatai, wean úuntri Ananías, chíkich úuntjaj, tura ayámkartin Térturu náartinjaj Sesaréanam jeáwar, úunt Jérisjai irunrar, Paprun makúarmia, tímiaja.

- 2 Paprun untsukármatai, Térturu makúak, chicháak: - Nankámaku Jerisá, ame mash' itíúrchatsha ti pénker iwiáreame.
- 3 Nu ashí mash' neka asakrin, yumínksamu atá.
- 4 Nu arant itit amajkáijiam tusan, wáit aneásam, esétram anturtuktá.
- 5 Ju aents^u ti yajáuch' asa, ashí nunkánam jutíunam itíúrchatan apújeawai. Kame Nasaret-irúnramun uuntrinti.
- 6 Aíntsank úunt-ayamtain páuskartin awajkui, achíkiar', epénmiaji. Muisés awemámujaj makutái tusar', pujurin,
- 7 úunt Rísias atankí, jukímiayi.
- 8 Nuyá chicháak: "Makúrtaj takúrmeka, úunt Jérisnum wetárum" túrammiaji - tímia, tímiaja..
- 9 Jutíu núí pujúármia nusha: - Tana nu nekasáiti ! - tíarmia, tímiaja.
- 10 Nuíkia úunt Jeris Paprun chicháruk: - Amesha warítiam ? - Tu tai, chicháak: - Ame ti untsurí uwitin ju matsatkámunam úunt pujá asakmin, arántutsuk ayamrúmakun, títiatjame.
- 11 Amek nekamniáitme. Wi Jerusarénknum anentruátaj-san wémaj nu, nawe-jímiar tsawántkesh nankámatsui.
- 12 Nuí, úunt-ayámtainiam, jutíun iruntairiínish, irutkamúnmasha aéntsajai jianáikian, itíúrchat apújainkia, waitkiacharuíti.
- 13 Tuma asamtai, penke nankámniaka makúrchamnia áiniáwai.
- 14 Antsu, ii úntri Arútmán amírainiána nuna, wisha yamáram-irunramúnam amírkui: "Aushá kanakiaruíti" áantar turutainiáwai. Kame Muisés, tura mash' wáimiaku aararmia núí iimiaruítaj, nekás tájame.
- 15 Arútam "aents^u pénker, yajáuchisha jákarun aneantmamtikiawártatui" tuiniána nuna, wisha nákejai.
- 16 Tuma asamtai, Arútam makuráink tusan, aentsjáisha tuke pénker pujajai.
- 17 Núkap uwí nankamásmatai, íikmakan maan, wi shuáran yainkiártaj-san, támajai.

Tur.24,18.

- 18 Uunt-ayámtainiam Muisés tímia núnisnak páuskarun japíakun pujai, waitkiármiania nuísha itiúrchatkesha atsúmiayi.
- 19 Antsu Asiánmaya jutíu kajertuiniákka, makúrtinian juí taartiniáiti.
- 20 Tainiachkuínkia, wi jutíun makutairín pujáakui, warí mankartuámun wainkiárma nuna tíartí.
- 21 Kame: "Aents^u jákaru aneantártatui" kakantran tímiaj nuíniash makuráinia ? - tímia, tímiaja, Papru.
- 22 Jériska yamáram-irúnramun neka asa: - Úunt Rísias támatai, pénker nekámij - tusa, tsurink, iniaisámia, tímiaja.
- 23 Tura yáimniun chicháruk: - Papru pénker wáinkiam, ankant iniáisam, níí shuársha támatai, surítkiáip - tímia, tímiaja.
- 24 Chíkich tsawant Jéris nii nuwé Trusíriajai támia, tímiaja. Nii nuwé jutíu asamtai, Paprun untsuk, Jesúsnan chicharkat' tusa, iniaisamia, tímiaja.
- 25 Papru chicháak: - Imitmaun, yajáuch' wakéramun najainainiána aun Arútam makuártatui - tu tai, Jéris taman antuk, sapíjmiak, chicháruk: - Yamáikia wetá; atak untsuktajme - tinia, akupkamia, tímiaja.
- 26 Kuítian surusat' tusa, tuke Paprun untsuk, aujniúya, tímiaja.
- 27 Jimiará uwí nankamásmatai, Jérisan yapájainiak, Pursiu Jestu taman anaikiármia, tímiaja. Jéris, jutíu kajertukaráink tusa, Paprun jíitsuk, nuínk ikiúkmia, tímiaja.

AKANKAMU 25.

Papru úunt Jéstujai.

- 1 Jestu matsatkámunam jeá, menáint tsawant nankamásmatai, Sesaréanmaya Jerusarénknum wemia, tímiaja.
- 2 Nuí wean úuntri, jutíun úuntrisha ataksha Paprun makurarmia, tímiaja.

Tur.25,3.

- 3 Paprun jintiá máataj-sar wakera asar, Jestun anánkainiak: - Wáit aneásam, Jerusarénknum itiatá - tíarmia, tímiaja.
- 4 Tumaitkuísha Jestu chicharáiniak: - Pápruka Sesaréanam epénmia pujá asamtai, aí wárichik wétatjai - tinia:
- 5 - Úunt ainiána au wijai Sesaréanam wíniar, nu aents^u yajáuchin najanaitkiuínkia, makurartí - tímia, tímiaja.
- 6 Jéstuka Jerusarénknum pujús, nawe tsawant jeátsaink, Sesaréanam wemia, tímiaja. Nuí chíkich tsawanttin chimpínium ekémas, Paprun untsukmia, tímiaja.
- 7 Támatai, jutíu Jerusarenknumiá taármia nu téntakar, ti núkap penke áantar makurarmia, tímiaja.
- 8 Páprusha ayamrúmak, chicháak: - Muisés tana nuna imítmakchaitjai; ayámtainiash wishikrachuítjai; Ruman úntriníash katsekkachuítjai - tímia, tímiaja.
- 9 Tura Jéstusha jutíu kajertukaráink tusa, Paprun chicháruk: - Jerusarénknum jeawakmin, wi pujái makurarat' túsam, wakéramek ? -
- 10 Tu tai: - Atsá; Sésaran makukrattairín pujájai; juínk makurartí. Amesha nékame: jutíun penke itiúrchat awajkachuítjai.
- 11 Jatai tunán imítmakuitkiuínkia, páchitsuk mantuawartí. Antsu imitmakchaitkiuínkia, yákesh jurukí surutkachminiáiti. Tuma asamtai, úunt Sésar makuratí - tímia, tímiaja.
- 12 Nuyá Jestu nii aéntsrijai chichaman ejé, Paprun chicháruk: - Sésar makurat' túsam seátu asam, Sésarnum wétatme - tímia, tímiaja.
- 13 ÚjumeK tsawant nankamásmatai, úunt Akripa nii umái Perenísejai, Jestun amíkmátaj-sa Sesaréanam tamia, tímiaja.
- 14 Nuí untsurí tsawant pujá asamtai, Jestu Páprunun ujáak, chicháak: - Juí áishmankan Jeris epeni ikiúkmiá nu pujáwai.
- 15 Jerusarénknum pujái, wean úntri, tura jutíun úntrisha makúrar, maatá túsar, seatiármiai.

Tur.25,16.

- 16 Turutainiakui, chicharáiniakun: "Rúmanutíkiá, aents^u ayamrumatsáink, makurar' surichuítji".
- 17 Níisha wijai táarmatai, wárichik chimpínium ekémsan, nu aéntsun untsúkmiájai.
- 18 Makuiniakuísha, wikia yajáuchinkia wainkiáchmiájai.
- 19 Áyatik nii iimiármarin chichásar, "Jesús jakamia nu iwiákui" Papru tu etsérmanum makurármiai.
- 20 Wikia itiúrkatajak tusan, chicharkun: "Jerusarénknum makurarat' túsam, wetaj támek ?"
- 21 Tu tai: "Atsá, antsu Sésar makuratí" tau asamtai, Sésarnum akupkáta-j-san, epenin tákakjai - tímia, tímiaja.
- 22 Úunt Akripa chicháruk: - Wisha nu aéntsun anturkáta-j-san wakérajai - takui: - Kashín anturkatá - tímia, tímiaja.
- 23 Kashín tsawármatai, Akripa Perenisejai inchímrusar, nankírtinian úuntri, tura irútkamun úuntrisha irúntainiam enkemawármatai, Jestu Paprun untsukmia, tímiaja.
- 24 Tura chicháak: - Uunt Akripá, atumsha juí pujatírmesha, ju aents^u wainiármesha juna "maatá" túsar, ashí mash' jutíu Jerusarénknum, tura juísha charátum turuttiármiai.
- 25 Jatai-tunán najánachu asamtai, maamainchuíti tímiajai. Tura níinki chicháak: - Sésar makuratí - tau asamtai, akupkáta-j-san pujurjai.
- 26 Wikia Sésaran warínia aatrataj, nuna nékachu asamtai, átum íisrum, turuttiárum.
- 27 Kame, warí itiurkáit nu tútsuk, epénmia akupkachminiáiti - tímia, tímiaja, Jestu.

AKANKAMU 26.

Papru úunt Akripajai.

- 1 Akripa Paprun chicháreak: - Ayamrumaktaj takumka, titiá - tu tai, ewején takuí, chicháak:

- 2 - Uunt Akripá, áantar jutíu makuráinia asamtai, ayamprumáktaj-san ti waráajai.
- 3 Ame nekás nii urukú áinia, nu neka asam, wáit aneásam katsúntsam, anturtuktá.
- 4 Ashí jutíu wi itíur pujúsmiaj nuna nekainiáwai; kame tuke Jerusarénknum pujuwítjai.
- 5 Nii wakeruiniákka, wi pariséu asán, ii iimiármarin ti esétran uminiúyaj nuna turamiarminiáiti.
- 6 Arútam ii úuntri timia nuna nákakui, makurainiáwai.
- 7 Nawe-jímiar jutíu-irúnramu nuna achíktaj-sar, Arutman kashi tsawáisha tuke anentruiniána, nunasha wisha nákakui, makurainiáwai, uuntá.
- 8 Kame átumka, Arútam jákarun aneantmamtikiachminiáiti, urúkamtai tárum ?
- 9 Wisha yama nankámtaikkia, átumea aínsanak, Jesusnan amúktaj-san wakerímjai.
- 10 Wean úuntrin umirkan, Jerusarénknum Jesús-shuáran epénran, wisha "maatárum", tímiajai.
- 11 Ahí mash' jutíu-ayamtairín, apachin-irutkamuriínsha kajekan wekasan, íimiaru ajasaráink tusan, ti waitkiaúyajai.
- 12 Nuna túratin akátramu asan, wean úuntri akupkámujai Tamáskunam wémiajai.
- 13 Uuntá, nantu tutupin ajásainia aí, jintiá étsanash iniánkas tsáapin amuta, winia aír'nasha amuwármiai,
- 14 Turutmawakrin, ashí iniarármiaji. Tura jutíu chichamjai: "Sáuru, Sáuru, urúkamtai kajértam ? Penke nankamín ijumaktatiátam, wéame" winia túrutun antúkmiajai.
- 15 Takui, chichárkun: "Amesha, uuntá, yáitiam ?" tu tai: "Wikia Jesusáitjai, ame kajéramna nu !
- 16 Yamáikia esétram antuktá: Ame wainkiámna, tura ukúnam wainkiáttamna nu etserkái tusan, wantintiúkjame.
- 17 Wi tuí akúpeajmena nuí, jutíu, jutíuchusha kajertamainiákui, tuke ayamruktátjame.

Tur.26,18.

- 18 Ame kirítniúm_{ma} tsáapninium jeawarat' túsam, emeskán_{ma} Arútmanam ejéem, íimiaru awájsakmin, nii tunárin tsankú_{ra}ran, Arútam-shuár_{ja}i irurártat_{ja}i" turútmiayi.
- 19 Nu turutmia nuyá, úunt Akripá, nuna nakitiájai penke ticháit_{ja}i.
- 20 Antsu éemka Tamasku aénts_{un} ujákmiájai. Nuyá Jerusarén_{kn}um, Jutéan_{ma}sh etserkan, wárichik jutíuchun_{ma}sh etserkáit_{ja}i. "Enentáim_{ra}rum, Arútmanam jeatin nekás atumí yajáuchiri ajapatniuí_{tr}ume" tu jintintiwármiájai.
- 21 Nuna turakui, jutíu ayámtainiam emettuáwar, mantunkiasá_{rm}iyai.
- 22 Tumaitkuísha, Arútam yáintiu asamtai, uchíchiniash úuntnasha ujáktaj-san, iwiáku pujajai. Muisés, nuyá waimiá-kusha tíniu áarmia nuna iniáitsuk, nunak jintiájai.
- 23 Utsumka jakayat, niá niá aneant, níi shuáran, tura chíkich aénts_nasha tsáapniun jintintiwártatui, tímiajai.
- 24 Tu ayamrúmakui, Jestu kakántar chicháruk: - Papruá, wáurtsumek ? Amé nekámuram nekachu awaj_tamsái ! -
- 25 Tu tai: - Wikia, nankámaku Jestú, wáurkaka ajaschajai, kame wi tájana nuka páant nekasáiti.
- 26 Akripasha nuna neka asamtai, páant tajai. Nekás nékawai; kame nuka úukmachuíti.
- 27 Uunt Akripá, waimiákunam íimiaruchukáitiam ? Wikia "nekás iimiaruítme" tajai.
- 28 Tu tai, Akripa chicháruk: - Ju újumaik chichartúkme_{ka}, Jesús-shuar awaj_tústatme - tímia, tímiaja.
- 29 Pápruka chicháruk: - Núkap, tura ishíchkisha chichaakuísha, aya amincha, antsu ashí mash' anturainiána aun, Arútam jinkiátsuk wiya aínsarank awájsarka, mak ainti - tímia, tímiaja.
- 30 Nu chichámaik úunt Akripa, tura úunt Jestu, nuyá Perenísesha, ashí mash' pujuá_{rm}ia nusha nantákiar, jjiin_{rm}ia, tímiaja.

Tur.26,31.

- 31 Jjinkí wénak, númtak aujmátainiak: - Ju aents^u imítmachu asa, jamainchuíti, epenmainchuíti - tíarmia, tímiaja.
- 32 Akrípasha Jestun chicháruk: - "Sésar makuratí" tíchaitkiúnka, ankant juáku aáyí - tímia, tímiaja.

AKANKAMU 27.

Papru Rúmanam wema.

- 1 Itárianam wetin jeámtai, Paprun, nuyá chíkich epenmia áarmia nunasha jukiarat' túsar, Akustu-nankírtinian úuntri, Júriu náartinian susármia, tímiaja.
- 2 Pápruka Tesarunikiánmayá Aristárkujai Atrumítiúnmayá kanúnam Asiánmani wémiayi.
- 3 Chíkich tsawanttin Sitiúnknum jeawakrin, Juriu pénker asa, Papru nii aéntsrin iisarat' tusa, tsankatkámiayi.
- 4 Nase ti kakáram umpuákui, kanujai Chipri ayámak, wémiayi.
- 5 Sirisia, tura Panjiria nayántsánmani charúrkutak, Miria, Rísianam pujana nú jeámiaji.
- 6 Núi Arejantríanmayá kanu Itárianam wéakui, úunt núi enkétmar', juramkímiaji.
- 7 Untsurí tsawant yáitmataik sereer ajá ajaakuar', Kinitiu jear', nase ti kakántar umpúak, péemkachmin ajáakui, Kreta yantámak weri, Sarmunk wainkiámiaji.
- 8 Núi ti itiúrchat tunikiar', irútkamu Rásea ayámach', Pénker-Káanmatak támanum peemkámiaji.
- 9 Núkap tsawant sereer ajá ajaakuar', ljiármatai-námper nankamásmatai, tsúummainium jeámiaji.
- 10 Nuíkia Papru chicháak: - Yatsurú, kanujai eemkir' wetin ti itiurchatáiti. Weákrikia aya warinchu kanúkeka emenkakcháttaji, antsu ii iwiákmarish emenkáktatji - tímiayi.
- 11 Takuísha, úuntka Paprun antúrtsuk, kanun neréntniurin antúrmiayi.

Tur.27,12

12 Kame núí micha iniármatai, itiúrchat átatui túsar, "Kretan kaanmatkariín, Ájrihia inkiúasmak Jénis támanum, míchaka nankamastái" mash' tíarmiayi.

Nase tukúmram, jakéamu.

13 Mayai nunkayaa umpuákui, nekás jeamniáitji tu enentáimsar, jinkiámun atiáwar, Kreta yantámak weármia, tímiaja.

14 Tura árumtak Krétanmayaa nase ti kakáram, Éuru-akirún tama, tukumrarmia, tímiaja.

15 Nase kanun tukúmar, yajá ajapamia, tímiaja.

16 Káuta ayámach' weakur', papánkach' anúnkmiaji.

17 Núí chumpiar', pénker jinkiarar', Sirten naikmiriín shushunkar', emettai tsupíkiakrin, nase sererkasá juramkímiaji.

18 Nase ti kakáram tukumrámkurin, chíkich tsawanttín warinchu utsankmiaji.

19 Menáint tsawant nankamásmatai, takákmau kanun winiánkriniash urárar, ajapawármiai.

20 Núkap tsawanttín te ajásmatai, étsasha, yáasha wainchakur', násesh mijíáteachkui, amukattajiápi tu enentáimmiaji.

21 Ti núkap tsawant yurúmtsuk pujakrin, Papru chicháak: - Aíkiu junikiáij' tusan, Krétanam juaktái tímiaja. Nu turaitkiúrkia, warinchu emenkarchaáji.

22 Antsu yamáikia kakartárum; kame kanu emenkakákrinsha, chikíchkish penke jakáshtatui.

23 Winia Uúntrun, Arutman amíreajna nuna Pasukri kashi wantíntiurak,

24 chichártak: - Papruá, sapíjmiakáip ! Kame Sésarnum jeatin asakmin, Arútam yáintmak, ámijai wena nunash ewemtikráttawai - turutyi.

25 Tuma asantai, yatsurú, kakartárum ! Arútam túrutna nu aminkiáttawai.

26 Tumaitkuísha, aya nunka tsurakúnam ijiúktatji - tímiayi.

Tur.27,27.

- 27 Nase náwe-áintiuk tsawant Atriátiku nayántsanmani jurámkurin, takákmau nunka shushústatuk ajásmanum nekawármiai.
- 28 Tura, entsan initrin nekápmarar, menáint-nawe-tsenken nekapmawármiai. Atak nekápmainiak, jimiará-nawe-tsenken initrin nekapmawármiai.
- 29 Shushumkáij' túsar, kanun senkaríyank aintiuk eméttajai init awántukar, tsawarat' túsar, aya enentáimtik nákasarmia, tímiaja.
- 30 Takákmau pisartái túsar: - Papank entsá ajúnkar', kanu nujíniam emettai apujsatái - tíarmiai.
- 31 Tumaitkuísha, Papru nankírtinian, tura nii úntriniasch chicháruk: - Ju takákmau wenakuíntia, átumka ewemrashtátrume.
- 32 Tu tai, pisararáink túsar, nankírtinkia papankan chapíkrin tsupírkar, ejekrármiai.
- 33 Tsawarat' túsar, nákeiníakui, Papru chicharáiniak: - Nawe-áintiuk tsawant wáitsarum, yurúmtsuk pujá asárum,
- 34 iwiáku pujustaj takúrmeka, yurumaitiárum; kame yákesh jakáshtatui - tímiayi.
- 35 Nuna tía, yurumkan achik, ashí iimiainiámunam Arutman yuminkias, púuk, yurumawármiai.
- 36 Turamtai, ashí mash' warásar, yurumawármiai.
- 37 Máshikia jimiará-washim-tsenken-nawe-ujuk aents^u áarmia, tímiaja.
- 38 Yurumsúa amíkiar, kanu wampu ajasat' túsar, yurumkan utsankarmia, tímiaja.
- 39 Tsawármatai, káanmatkan wáinkiar, nu nunka nekainiachiat: - Kanu anunktái - tíarmia, tímiaja.
- 40 Emmattain utsánkar, ejátkan nenáwar, chapikian tsupíkiar, kaanmatkánmani naka weármia, tímiaja.
- 41 Tumaitkuísha, kanu náikmin shushunk, nuji akuná, senkarinkia tsáikmia, tímiaja.

Tur.27,42.

- 42 Nuí kía nankírtinkia epenmia pisararáink túsar, máataj-sar wakeriármia, tímiaja.
- 43 Antsu nii úuntri, Paprun ewemtikrátaj-sa wakera asa, surítiak, chicháak: - Ya yukumín áinia nu yukuákar, kaanmátkanam jjinrartí.
- 44 Antsu, chíkichkia kanu tsainiárunam péemrar, katinkiertí. Turar', ashí mash' iwiáku jeartaji - tímia, tímiaja.

AKANKAMU 28.

Nunka tsurakú, Marta náartin.

- 1 Nuí ewemra pujusar', nunka tsurakú Marta náartin nekámiaji.
- 2 Nu nunkánmaya tarímiat-aents^u ti shíir awajtamsar', yútak, ti micha ajáa asamtai, jínia ikiámkar, ashí mash' yaintmakármiaji.
- 3 Pápruka jinia irúmar ekemákmatai, wakénmaya napi jjiniki, ewéjnum esái, nemarámiaji.
- 4 Túramtai, númtak tarímiat-aents^u chicháiniak: - Ju aents^u nekás ti yajauchiajanta ! Kame entsaya ewemrámtaisha, Arútmaka jakat' tusa wakérawai - tíarmiaji.
- 5 Pápruka nápinkia pear, jinium epeá, penke najaimiáchmiaji.
- 6 Jáachkui, najaimiáchkui, tarímiat-aents^u anentáin yapájiawar: - Ju aents^u nekás Arutmáiti - tíarmiaji.
- 7 Nunkan úuntri, Púpriu náartin, nii jée arántchich' pujakui, juramkir', menáint tsawant ikiatmármiaji.
- 8 Nii aparí tsuemujai, ijiájai pujá asamtai, Papru nii ewején awantas, anentruá, tsuármiaji.
- 9 Túramtai, ashí mash' jaa pujuármia nu nekáwar, táarmatai, tsuarármiaji.
- 10 Tuma asamtai, ashí mash' ti pénger yaintmakar', ii wétinri jeámtai, warinchun amás akuptamkármiaji.

Tur.28,11.

Papru Rúmanam tama.

- 11 Menáint nantu nuí pujusar', Arejantriánmayaa kanu, Tiúskurun wakanín tákaku, míchanam nákamia nuí enkemrámiaji.
- 12 Serakúsanam jear', nuí menáint tsawant pujúsamiaji,
- 13 Nuyá yantámak yantámak Réjiunam jeámiaji. Kashí tsawanttin nase nunkayaa umpúakui, jimiará tsawanttin Putsúuriniam jeámiaji.
- 14 Nuí Jesús-shuar wainkiar', chikíchik atsákamu níijai pujusar', tuma tumakuar', Rúmanam jeámiaji.
- 15 Jesús-shuárka ii tátinrin neka ásar, Apiu-irúntainiam, tura Menáint-Aáknum táar, inkiuntmakármiaji. Papru nuna wáinkiar, Arutman yuminkias, kakármiaji.
- 16 Rúmanam jeawakrin, úuntka epénmia áarmia nunaka nakírtinian úuntrin susármatai, Pápru chikíchik nankirtin íisma, nii jeén pujusat' tusa, tsankatkámiayi.

Papru Rúmanmayaa jutíujai.

- 17 Menáint tsawant nankamásmatai, Papru jutíun untsuk, chicharániak: - Yatsurú, wi jutíun kajérachu aínk, ii úuntri tiniu áarmia nunasha tuke amírai, Jerusarénknum áantar achírkar, Rúmanun surutkármiaji.
- 18 Níisha iníntrusar, jatai-tunán najánachu asamtai: "Ankant akupkatái" turutiármiaji.
- 19 Tumaitkuísha, jutíu kajertukarmatáisha, wi kajérsuk: "Sésar makuratí" tímiajai.
- 20 Israer tuke nákasmia nuna etserkátaj-san, jinkiámu wáitiakun, atumín íisan, chichástaj-san untsúkjarne - tímiaji.
- 21 Tu tai: - Íikia penkesha Jutéanmayaa papí amin turámainia achikchamji. Yákesh amin kajertamáinia nuna ujatmakcháitji.

Tur.28,22.

22 Tumaitkuísha, amé irunrámuram ashí nunkánam kakerkamuitkuísha, amesha warítiam, nu nekátaj-sar' wakérají - tíarmiayi.

Rúmanam Papru étserma.

23 Tsawantan tesawarmia nuí, Papru pujámunam untsurí jutíu kautkarmia, tímiaja. Pápruka Arútam-irúnramun jintintiáwar, Muisés awemamúnmaya, tura yaúnchu waimiakúnmaya juárki, Jesúsnum íimiaru ajasarat' tusa, kashiknumiá chichá chicharkua, kíarai amuúya, tímiaja.

24 Nuna antúkar, chíkichkia íimiaru ajainiákui, chíkichkia iimiarcharmia, tímiaja.

25 Amuámunam númtak jutíu tunainiákui, Papru chicharániak: - lwiáikratin wáimiaku Isaiasnúmani atumí úuntrín tímia nu nekasáiti.

26 kame chicháak: *"Irukámunam weme titiá: Antákrumesh nekashtátrume; iyákrumsha wainkiashtátrume.*

27 *Ju aéntsun anentái kátsuram ajásmatai, kuíshin akírawar, jíiniash epenkarai. Jín kuishíjaj epéntsuk, nii wakaní enentaimtikiainiakuínkia, wi yainkiaráintjai"* tímiayi.

28 Tuma asamtai, atúmsha nekatárum: "Jutíuchu ju chichaman antúkar, ewemrártatui" - tímia, tímiaja, Papru.

30 Pápruka nuí, jea ikiamsámunam, jimiará uwí pujakui, íistaj-sar tainiakuísha, nankirtin surítchamia, tímiaja.

31 Arútam-irúnramun étserak, Jesús nansha ti kakáram etserkamia, tímiaja.

PAPRU AÁRMA

Cartas de Pablo



PAPRU RUMAN AÁTRA.

Carta a los Romanos

AKANKAMU 1.

- 1 Papru, Utsumka Jesusan takárniuri, Arútam Akatrámu asa, Arutman chichamen etsérkatin untsukmàiti.
- 2 Pénker-Chichaman yaúnchu wáimiaku Ujajmatàiniam aararmia nuka,
- 3 Arutman Uchirí, Tawitniúmi_a iniashtin akiniá, nuna étserui.
- 4 Nuka Iwiaikratníúnmani jakamúnmay_a aneànt, Arútam nii kakármarin utsúkmatai, Arutman Uchirín ajasuíti..
- 5 Ii Úuntri Utsumka Jesúsak, ashí jutíu-aéntscha íimiaru ajàsar, naatmamtikrukarat` tusa, nii pénkerin surùs, Akatramu awajtùsmiayi.
- 6 Nuka atumiín, Jutíuchu Rúmanam matsátrumna núí akuptúkmiayi.
- 7 Atumsha, Arútam anéamu asákrumin, Utsumka Jesuska wáimiaku ajasuk tusa, untsúrmarme. Ii Ap_arí Arútam, tura ii Úuntri Utsumka Jesussha, tarímtanam wáimiaktin nii pénkerin amastárum, tájarme.

Papru irastaj tama.

- 8 Átum nekàs íimiaru asàrum, ashí nunkànam ti náatu ajasú asákrumin, Utsúmka Jesusnúmani Arutman yumínkiajai.
- 9 Tuke tsawant anéntrakun, atumín anentaimtájrome. Wi nii Uchirín Pénker-Chicháman étserkun anéntrajna nuna Arútam nékawai.
- 10 Nii wakerakuíntia, atumiín jeátniun yaintkiat` tusan, tuke tsawant seáajai.

Rum.1,11.

- 11 Arutman kakarmarijaj*í* ikiakartájrum tusan, atumín wáinkiatniun ti wakèrajai.
- 12 Mash` íimiaru asar`, nui irunrar`, métek ikiakanáiramij` tájarme.
- 13 Yatsurtíram nekatárum: - Atumiín winitiaj tayatan, setúkar setúkar ajáajai. Kame Jutíuchunam itiúrkamaj, aìtsanak atumiínsha pénker ana nuna wainkiátaj-san wakérajai.
- 14 Ma, wikia Kriákun, aushá aétnasha, unuimiaràrun, unuimiararchàrunash íistiniáitjai.
- 15 Tuma asán, atúmniash Rumanmayatirmin Pénker-Chichaman ujáktaj-san wakèrajai.
- 16 Pénker-Chichamka ashi mash` íimiarun ewentikrátaj-sa, Arutman kakármarin sua asamtai, wikia natsámstusuk èemkaka Jutiun, nuyá Kriákun ujàajai.
- 17 Kame, Ujajmatàiniam chicháak : - *Imitmáchuka nii iimiarmarijaj*í* iwiáku pujústatui* - tana aìntsank, Pénker-Chichamka itiur Arútmaka aentsun nii iimiarmariíni iwiáku, imítmachu awajea nuna étserui.

Aents^u tunamín.

- 18 Tuma asamtai, aents^u nii yajauchirijaj*í* nekàs chichaman najatainiákui, Arútam Nayáimpinmayank ashí mash` yajàuch' ana nuna makúrtinian ujátmaji.
- 19 Ashi mash' Arútmannun nekarnia nuka, nísha Arútam ujakma ásar, nekainiàwai.
- 20 Arútam wainkiachminiaitkiúnsha, ashi mash` najana asamtai, nii najanámmuri íisar': - Tuke pujuwíti, ashi tujinchàiti, nekás Arutmàiti - taji. Nuna nekainiayat:- Arútam atsawai - tùinia au tsankurnarchàrtatui.
- 21 Arutman nekainiayat yuminksachàrmiayi, pénkesha naatmamtikkiachármiai. Aya chichá chicháakua, nii yajauchirijaj*í* kusurú ajasármiai.

- 22 - Wi nékajai - ta takua, netse ajasármiai.
- 23 Kame Arútam ashí tujintcha tuke pujuwitkuísha, aèntsua aniun, chinkia aniun, yajasma aniun, náapia aniun áantar-arutman najanawármiai.
- 24 Turawàrmatai, Arútmaka penke yáítsuk, nii wakerámurin najanawarat` tusa iniáisaram, nii iniashín yajàuch' awajsármiai.
- 25 Nekàs Arùtam tuke náatu ana nuna wáit chichamjai yapàjjar, niin naatmàmtiktuk, aya nii najanamuríniak tekemrurármiai.
- 26 Nuna turawàrmatai, Arútmaka iniáisaram, tuná natsánmain najanawàrmiai. Kame nii nuweshá aíshrijai tsanítsuk, nùmtak nuak tsanirmawármiai.
- 27 Núnisank àishmanksha nuwejai tsanítsuk, nùmtak àishmankak tsanirmawàrmiai. Áakratkar, tsanirmawaru àsar sunkurmakàrmiai.
- 28 Turawármatai, nekàs Arútmaka nakítrar, nii anentáiin chichártsuk, ti yajàuch' ajasarat` tusa, iniaisàrmiai.
- 29 Túramu àsar, ti imitmau, tunartin, suri, yajàuch', akásmá, mankartin, manin, anànkartin, yajàuch' enentàimin, nuyá aujmàtkartin ajasármiai.
- 30 Nuyá tsanumìn, Arutman kajerin, wáantu, inchímrin, atsanmin, tunámtikin, nii ùuntrin kajerin ajasármiai.
- 31 Enentàimcha, amichu, anénkratcha, wait anénkartichu ajasármiai.
- 32 Arútmaka mash' túruinia nuna makurtatui. Nuna nekainiyat, chíkich yajàuchin najánainiàkui: - Penkeràiti - tuiniàwai.

AKANKAMU 2.

- 1 Aents^u makuàkmeka tsankurnarchamniáitme. Kame amesha nu tuná najanaitiátam chíkich makuàkmeka, amek makumáame.

- 2 Arútam yajàuchin najanainiàna nuna makùakui penkeráiti..
- 3 Antsu ámeká nu tuná najanaitiátam aents^u makùram: -
Wíniaka Arútmaka makuráshtatui - tátsumeash ?
- 4 Ame enentáimramnium tusa, Arútmaka ti núkap anént-
mak, wait anéntramas nákarma aink, àmeká neká-
matsme.
- 5 Kame yapajniachkumka, anentáim katsùram
awájeakmeká, ame makumàrtiniak irúmkim wèame. Kame
arumái Arútmaka makúkratin ajás, nekás makúrmattui.
- 6 Nuka ii najanàmurin íis, ankant ankant akìrmaktatji.
- 7 Tuke naatkataj tusar, itiurchatnumsha katsúntrar, pènkeran
najanawárunka, tuke iwiaku pujústinian susàrtatui.
- 8 Antsu nekàs chichaman nakítrar, imìtmau ajàinia nùnaka
kajèrkar makurártatui.
- 9 Ashi mash' jutíu, kriákusha, yajáuchin najanáinia aúka
itiúrchatnum pujúsar, ti waitsártatui.
- 10 Antsu Arútmaka, ashì mash' pènkeran najanawárunka,
éemka Jutiun nuyá Kriákun, náatkatniun, warástinan,
tarímtanam pujústinan, susártatui.
- 11 Kame Arútmaka aéntsun íimtinrin iyatsui.

Arútam awemamu

- 12 Ya Muisés awemamun nèkachu asa, tunàn najana
nuka, nu awemàmujaj makuntràshtatui. Antsu awemamun
nekayat tunamea nuka, nu awemàmujaj makurma àtatui.
- 13 Nu awemamun antùkar aminiátsna au, imìtmau ainiàwai.
Antsu antùkar umìrainia au, nekàs imìtmachu ainiàwai.
- 14 Jutíuchu Muisés awemamun takakainiàchkusha, nu
awemamu tana nuna najánainiak, nu awemámujaj niinkì
akuptumainiàwai.
- 15 Nuíkia nu awemamun nii anentáiín tákakman páant
iniákmasar, aya nii anentái makuártatui..

Rum.2,16.

- 16 Wi Pénker-Chichaman etsèreajna nuka :- Makurtin tsawantin Arútam, Utsumka Jesusnúmanì, ashì aènts^u nii anentaiín awemamun tákakainia nujai makurártatui - tawai.
- 17 Ámeka: - Jutiúítjai, Arútam awemamun tákakjai - túsam - Arútmanam náatjai - tame.
- 18 Ámeka: - Awemamun neka asán, Arútam wakéramun nekan, pénger ana nuna najanjai - tame.
- 19 Ámeka: - jì kusurún jintíntiajai; téenam wekáinian tsaapnirintjai - tame.
- 20 Ámeka: - Arútam awemamúnmani ashí mash' neka asán, nékachun jintintian, uchíniash unuiniauwaitjai - tame.
- 21 Pai, wats chíkich unuiniauwaitiátmesha, urukamtai amek jintínmamtsum ? Kasamkashtiniáiti tayátmesha, urukamtai kasámeam ?
- 22 li nuwe anankashtiniáitji tayátmesha, urukamtai anánkeam ? Áantar-arutman nakitniúítjai tayátmesha, urukamtai nii ayamtairiín nakúmkamu írunush yarúmeam?
- 23 Arútam awemamun tákakjai túsam, warayátmesha, urukamtai Arútam umírtsuk, yajáuch' awájeam?
- 24 Tuma asakmin, Ujájmatai chicháak : - *Átum imítmaku asákrumin, ashì nunkánam “ Arútam yajauchiti “ tuiniáwai* - túramji.

Tsupírnakma

- 25 Arútam awemamu umirkuminkia, tsupírnakma penkeráiti, antsu amirchákminkia, penke aantráiti.
- 26 Tsupírnakchaitiat, Arútam awemamun amírea nuka, tsupírnakua aintsankete.
- 27 Tsupírnakchiat Arútam awemamun amía nuka, tsupírnakuitiátam amíachu asakmin, makúrmattui.
- 28 Iniáshnum tsupírnakmajáinkia nekás Jutiu ajáatsui.

Rum.2,29.

29 Antsu, Iwiaikrátniujai nii anentái wakéramun tsupiniána au, nekás Jutiu ainiáwai. Nuna aents^u nekainiachkuísha, aya Arútmak nékawai

AKANKAMU 3.

Susataj tama.

- 1 Jutiu-aents^u tsupirnákmajai, warí pénkernak achikiármia ?
- 2 Ti pénkeran achikiármiai. Kame Arútmaka nii chichamen níiniak susármiai.
- 3 Nuna amíkcha asarmatáisha , Arútam Jutiun tímiania nuna iniaisátpiash ?
- 4 Atsá. Aents^u amichu ainiakuísha, Arútmaka penke anankkartichuíti. Kame Ujajmatáiniam chicháak :- *Makurmataj tuiniakuísha, nekás wáitrichu asam, tuke nupetmáktatme* - tawai.
- 5 Ii yajáuchiri Arutman pénkerin iniakmakuínkia, Arútam yajáuch' ana nuna makúakui: - Arútam yajauchíti - tíminkiáitiaj` ? -
- 6 Atsá. Arútam nuna turachminiaitkiúnka, itiúrak tunán makurminiáit ?
- 7 Tsanumín chicháiniak: - Wáit chichamjai nekás ana nuna páant awajsan, Arútmán naatmamtekiáisha, urukamtai tunartiniáitme túrutea ?
- 8 Pénker ana nu páant awajsátaj-sar` yajauch' ana nu najanatniuíti - tuiniáwai. "Papru tu jintiáwai" turutáinia au makuntrártatui.

Mash` tunartiniáitji.

- 9 Nuíkia íikia tunartinchakáitiaj` ? Atsá, Jutiu Jutíuchusha, ashí mash` tunartiniáitji.

Rum.3,10.

- 10 Kame Ujájmatai chicháak :
- 11 - *Ashí mash` tunartin ainiáwai. Tunártincha chikíchkisha penke atsawai. Chikíchkisha enentáimin Arútman eáu, atsawai.*
- 12 *Ashí mash` imítmakar, yajáuch` ajasármiai. Chikíchkish pénkeran najanú atsawai.*
- 13 *Nii weneya kaúru j̄j̄iniui. Nii chichámejai anankkartuiniáwai.*
- 14 *Napin tseásriya ániun tákaku ásar, aéntsun katsékkar, waitkianiáwai.*
- 15 *Mankartuátniunka wari ainiáwai.*
- 16 *Ashí mash` emésrar, itiúrchatan itiainiáwai.*
- 17 *Tarímtanam pujústinian nekainiátsui.*
- 18 *Ishíchkisha Arutman ishamainiátsui - tawai.*
- 19 Ujajmatáiniam tana nuka, Arútam awemamun takakáinia nu: - tunartincháitjai - tiaráink tusa, nunan tawai.
- 20 Kame awemámuka ewemtíkiatsui; aya warí tunayáit nuna iniákmawai.

Íimiaru ewemrártatui.

- 21 Yaúnchu awemamun , wáimiakusha tíarmia nuna íitsuk, Arútmaka yamáikia imítmachu, wáimiaku awájtamji.
- 22 Ashí mash' Jesúsnum íimiaru ajasárunka imítmachu awajainiáwai.
- 23 Kame ashí mash` tunamka àsar, Arútmamam wéchamnia ainiáwai.
- 24 Tumaitkuísha, Utsumka Jesúsnum Arútmaka áantar imítmachu awajainiáwai.
- 25 Jesús íikmak ajás, jarutramka asakrin, Arútmaka, íimiarun tunarin Jesusan numpéjaink japiáwai. Tu Arútam imítmachu awájtamji.
- 26 Yaúnchuka aents^u tunamainiakuísha, Arútmaka penkesha pachíschármiai. Antsu yamáikia Jesúsnum íimiaru ainiána aun imítmachu, wáimiaku awajainiáwai.

limiármajaj ewemma

- 27 - Wi awemamun umía asán, náatjai - tichamniáitji. Kame awemamu umiámujaj ewemrachminiáitji. Antsu ii iimiarmárinini ewemráttajai. Aya awemamun amiiniána au ewemrártatuak ? Atsá.
- 28 Íikia awemamu amiámujaj waimiakúitji tátsuji. Antsu ii iimiarmarijaj waimiakúitji taji.
- 29 Aya awemámujaj ewemramniaitkiurinkia, Arútmaka aya Jutíunuk ainti. Atsá , nunischáiti.
- 30 Kame ashi mash` aéntsun iimiarmarijaj ewémtikin asa Jutiun, Jutíuchunash Arutmarinti; chikich Arútam atsawai.
- 31 Nuíkiá Arutman awemámuri amirkashtinkiátiaj ? Atsá, ii iimiarmarijaj nu awemamu amíajai.

AKANKAMU 4.

Apraámka íimiarun uuntrinti.

- 1 Apraám, íiya nunisketiat, warí pénkernak najanawáit ?
- 2 Nii najanámurijajink imítmachu ajasuitkiúnka, aya aéntsnumak naatkamniáiti, antsu Arútmanam naatkachminiáiti.
- 3 Kame Ujájmatai warítuia ? - Apraámka íimiaru asamtai, Arútam wáimiaku awajsámiayi, tátsuk ?
- 4 Yákesh takakmámtiksar`, yaintkái túsarik akíaj` ? Atsá, tumashítjai tusar`, akíajai.
- 5 Antsu ya íimiaru ajás, nii najánmarin iniákmatsuk :- Arútam tunártinnish yáiniawai - tana, nuna Arútmaka wáimiaku awájeawai.
- 6 Kame Arútam aéntsun najanámurin íirtsuk náatmamtikia asamtai, Tawit chicháaK:

Rum.4,7.

- 7 - Arútam atumí tunarin íirtsuk tsankuramutíram warastárum .
- 8 Aents^u tunartiniaitkusha, Arútam makúrchamu warastí - tawai.

Tsupírnakma íischamu.

- 9 Nuíkia juna takun, aya tsupírnakunakek taja ? Atsá, tsupírnakchárunash tajai.
- 10 Kame Apraámka tsupírnakcha aink, ti íimiaru asamtai, Arútam iwiainiákmiayi.
- 11 limiármanum waimiákmi nu páant ajasat` tusa, tsupírnákmiayi. Tsupírnakcha ainiána aúsha, juní íimiaru waimiakarat` tusa, Apraámka íimiarun aparí ajasuíti.
- 12 Aíntsank tsupírnákuka, Apraám tsupírnatsuk iimiaruya anis ainiána, aúnash aparínti.

Aéntsun aparí anáikiamu.

- 13 Apraám awemamun amía asamtai, Arútmaka chicháruk: - nunkan amastátjame – tichámiai. Aúka íimiaru asamtai: - amástatjai - tímiayi.
- 14 Tuma asamtai, yamáisha awemamu amiámunam nu achikminiaitkiúrkia, ii iimiarmarinkia penke aantráinti.
- 15 Kame awemámuka makúkratniun itia asamtai, amiiniátsna au makumu áartatui.
- 16 Tuma asamtai, aya nii iimiarmarijai achiiniáwai. Aents^u Arutman kakármarin áantrar achiiniáwai. Kame Apraámka, ashí mash`aents^u Arútam timia nuna takusarat` tusa, aya nii iimiarmarijai achikiú asa, awemamun takakáinianash, takakcháinianash aparí ajasuíti.
- 17 Apraámka íimiaru asa, chicháak: - *Arútam ii iwiákmarin*

Rum.4,18.

nerentniurinti; aya nii chichámejaink ashí mash`
atsamúnmayá najankáiti - tiniu asamtai, Ujajmatáiniam: -
Ashi aéntsun aparíntme - tu aarmáiti.

Apraáman, tura Jesús-shuárnasha iimiármari.

- 18 Apraámka íimiaru asa, itiurchatnumsha : - *Arútam tímia nuna nekás amíktatui* - tiniu asamtai, Arútmaka: - **tí núkap kawénkam, ashí aéntsun aparí ajástatme** - tímiayi.
- 19 Ti uuntchitiat, washím uwin takakiat, nii nuwé Sara káa-nuaitkiuísha, tuke iimiarúyayi.
- 20 Antsu Arútam: - *Uchírtin ajástatme* – tu tai , nurant íimiaru ajás, Arutman naatmamtikiámiayi.
- 21 Kame : - Arútam ashí tujincha asa, nekás turáttawai - tiniu asámtai,
- 22 Arútmaka nii iimiármarin íiras, tímia nuna áantrank susámiayi.
- 23 Nu Ujájmatai aya níiniunak tatsui, antsu íiniunash tawai,
- 24 Kame íisha íimiaru asar` : - Arútam Utsumka Jesusan aneantmamtikiámiayi.
- 25 Nuka ii tunarín japírtaj-sa jakámiayi. Nuyá, aéntsun tunártincha awajás, yaruáktaj-sa aneátmiayi – íimiaru asar', taji.

AKANKAMU 5.

Arútmajai nawámnaikma.

- 1 Utsumka Jesusnúmani ii iimiarmarijaj Arútmajaj nawámnaikia asar`, shíir pujaji.
- 2 Aínsarik níinini ii iimiarmarijaj wáimiaku ajasú asar`, Arútmamam jear` náatkatin náakaji.

Rum.5,3.

- 3 Nu arantcha itiurchatnumsha waráaji ; kame núnini katsúntratin unuímiaiji.
- 4 Kantsuntrar`, kakáram ajasar`, náka*ji*.
- 5 Aantrar` náka*tsji*. Kame Arútam anetma asar`, nii Iwiaikrátniurin suramsámiaiji.
- 6 Íikia ti tunartin asákrinsha, Utsumka Jesús jarutramká*miaiji*.
- 7 Wats, shuar ti pénker aéntsun uwentikráta*ji*-sa, jarukcháintiuash ? Yajáuchia nunan penke jarukcháttawai.
- 8 Antsu Utsumka Jesús, ii ti yajáuch`árinink jarutramka asar', iin ti anéntmajnia nuna páant iniaktúrmaj*ji*.
- 9 Nuna turamtai, nii numpej*ai* nekás tunártincha awájsamu asar`, makúrchamu átat*ji*.
- 10 Arutman numásri ayatar`, nii Uchirí iin jarutramka asakrin, Arútmaj*ai* shiir nawamnáik*iaiji*. Nuíy*a* imiánkas nii iwiakmaríj*ai*nk ewémra*ji*.
- 11 Nuyásha, Utsumka Jesusnúmani Arútmaj*ai* nawamnáik*ia* asar`, ti waráaji.

Atank, Utsumka Jesusj*ai*.

- 12 Yama nankámtaik chikíchik aents^u tunamka asamtai, ju nunkánam tuná, nuyá*a* játaisha enkemá*iti*. Nuikia, ashi mash`nu tuná achímiaku asar, mash` jakártatui.
- 13 Awemámuka atsámunmak, tunaka ámiayi. Tuma asám-taisha, awemamu atsámunam áantar makurchamniá*iti*.
- 14 Tumaitkiuísha, ashí mash` aéntska tunamka ainiachiat, Atanknumi*a* juarkí, játaik játaik Muisés awemamun itiamia nui jeawármia*yi*. Tumasha chíkich Atank tatiniúy*ayi*.
- 15 Nu yamáram Atanknúmani Arútman pénkeri támiayi. Kame aya Atank tunamka asamtai, ashí mash` jakaruitkiuísha, aya Utsumka Jesusnúmanink ti núkap Arutman pénkeri achikiaruít*i*.

Rum.5,16,

- 16 Arutman pénkeri yaúnchu tunamkamun japíruíti. Kame yaúnchu chikíchik aents^u tunamkámunam makúntratin tamiayi. Antsu yamáí Arutman pénkerinkia untsurí aents^u tunamkarun uwemtíkiawai.
- 17 Aya chikíchik aentsnúmani tuná tawitkuinkia, nuíya aya Utsumka Jesusnúmanink ii iwiákmari imiánkas tatiniáiti.
- 18 Aya chikíchik tunamka asamtai, ashí mash`mankurmáitji. Aíntsank chikíchik ewemtikramra asakrin, iwiákma achikiuítji.
- 19 Núnisrik, aya chikíchik umikcha asamtai, ashí mash`umichu ajasuítji. Aíntsank, aya chikíchik umín asamtai, ashí mash`imítmachu ajasuítji.
- 20 Awemamu ámanumank, ti núkap umichu ajasármiai. Núnisank tuná ámanumank, ti núkap Arutman pénkeri tamiayi.
- 21 Tuná ámanum játai tamia nui, Utsumka Jesús tuke iwiáku pujústinian itiámiayi.

AKANKAMU 6.

Akíntiai-Nántar.

- 1 Wats warí títiatjik ? Arutman pénkeri tatí tusar`, tunánum pujustinkiáitij`? Atsá.
- 2 Tuná ajápati, tunánum pujuschamniáitji.
- 3 Kame Akíntiai-Nántárnum imiáimiuti, Utsumka Jesusj*ai* tunanumi*a* métek jakámiaji.
- 4 Imiáimiunam Jesusj*ai* jakar`, entsánam iwiarsamuitiátar`, ii Aparí Jesusan aneánmamtik, náatu awajsa asamtai, íisha ataksha níij*ai* aneantar`, yamáram iwiákma achikiuítji.
- 5 Kame níiya aínsarik jaka asar`, níiya aínsarik aneántatji.
- 6 Tuma asamtai, tunártincha atái tusar`, Jesusa aínsarik ii tunartin-iniashí ajjintiáitji.

Rum.6,7.

- 7 Tunartin-iniash` jaka nuka ataksha tunámeatsui.
- 8 Nuíkia Utsumka Jesusjaj jakaitkiúrkia, níijaj tuke iwiáku pujústatji taji.
- 9 Jesuska jakamúnmayá aneant, játain nupetka asa, atakka penke jakáshtatna nu nékaji.
- 10 Nii jakamurijaj tunán tuke maa asa, Arútmanu tuke iwiáku pujawai.
- 11 Tuma asamtai, atumsha: - Tunanumiá jakaji - tusárum , Utsumka Jesúsnum irúnrarum, Arútmanu tuke iwiaku pujustárum.

Imítmachu ajastin.

- 12 Atumí iniashí wakéramu nupétkarum, penke tunamkáirap. Tunartin-iniash` jaka nu, tuná susáirap.
- 13 kame, nii iniashín tunán súinia au, tunán takárniuri ajainiáwai. Antsu átumka: - Jakar' aneántji – tusárum, Arutman takárniuri ajastárum.
- 14 Átumka Arutman pénkeri achikiú asárum, awemamu iyachu asakruminsha, tuná penké nupettamkashtátrume.

Tunanumiá ewémramu

- 15 Nuíkia, awemamu íitsuk, Arutman pénkeri tákaku asar` : - tunamkamniáitji - timinkiáitiaj` ? Atsá.
- 16 Aéntsun takárniuri ajasuitkiúmka, úuntrum umíreame. Aíntsamek tuná umirkumka jakáttame. Antsu Arútam umirkumka, imítmachu ajástatme.
- 17 Atumsha Arútam yuminksatárum. Kame yaúnychuka tunán takarniurintiátrum, yamáikia pénker jíntianam sunasu asárum, warásrum umíreame.
- 18 Tuná iniáisa asárum, aya pénker ana nu amirín ajasuítrume.

Rum.6,19.

19 Júnaka tujíntia asákrumin, tájarme: - Yaúnychuka atumí iniashijai tuná najánarum, yajáuch` ajasuitkiúrmesha, yamáikia atumí iniashijai pénker najánarum, imítmachu ajastárum.

Pénker nájanma, nuyá tuná nájanma.

20 Yajáuchin takárniuri auyármena nuínkia: - pénker ana nuna amirkatniuíjtai - tu enentaimcháuyarme.

21 Yamái natsamármena nu najana asárum, warí penkerá achikiúram ? Aya jatai achikiúrme.

22 Yamáikia tuná iniáisarum, aya Arútam umirea asárum imítmachu ajásrum, tuke iwiáku pujustin achíarme.

23 Kame tunaka játaijai akírmaji, antsu Arutman pénkerinkia Utsumka Jesúsnum tuke iwiáku pujústinian akírmaji.

AKANKAMU 7.

Jesús-shuar Jutíun awemámurin tákakeatsui.

1 Átumka yatsuchí, nékatsrumek ? Aya aents^u iwiáku pujai, awemamuka akúpeawai.

2 Aíntsank nuasha, awemamu tana núnisank, nii áishrijai tsanínk pujustiniáiti. Tura áishri jakamtai, ankant ajáawai.

3 Núaka, áishri iwiákaink chíkich áishmankan iniúmeakka, tsanírmawai. Antsu áishri jakamtai, chíkichan iniúmeakka, tsanírmatsui.

4 Núnisrumek yatsurú, yaúnychunam jakárum, Utsumka Jesusan muchítmari ajasú asárum, yaúnchu awemamu tákakeatsrume. Antsu Arútmamu núkap nerektin, Jesús Utsumkan nantákmiania nuna ajasurme.

5 Yaúnchu awemamu takúmiaj` nújainkia, ii iniashí wakéramu nupéttsuk, jakámunam jeátin wémiaiji.

Rum.7,6.

- 6 Antsu yamáikia jakar`, yaúnchu awemamu tákakcha asar`, awemamu aárma nu íitsuk, Iwiáikratin iinín tana nu najáneaji.

Awemamu itiúrawa .

- 7 Nuíkia yaúnchu awemamu yajauchiti titiájiash ? Atsá, warí awemámuka tunán ti páant awájeawai. Awemámuka: - Tsanírmamu tunáiti - tau asamtai, nuna nékajai. Nuna tichakuinkia, nekachájai.
- 8 Tura, nu awemamun anentáimtakui, winia anentáirui tuná ana nu yajáuchin ti wakerumtikrímiayi. Kame awemamu atsakuínkia, tunan ti enentaimticháintjai.
- 9 Yaúnchuka awemamun nékachkun, nánkamsan enentaimniúyajai. Tura awemamun nekanka, tunán unuimiármajai.
- 10 Tuma asamtai, awemamu iwiákman itiartiniúya nuna amíreachu asamtai, aya játain itiartiyi.
- 11 Kame tunaka nu awemámujai anankrua , aya mantuáyi.
- 12 Tuma asamtai awemámuka yajauchkiáit` ? Atsá, yajauchichuíti, antsu ti penkeráiti.
- 13 Nuíkia awemamu penkeraitiat, winia játair ajatrusukáit ? Atsá , awemamu penkeraitkiuísha, tuná winia makurátaj-sa, nuna achikiuíti. Kame awemamu: - tuná ti yajauchiti - túramji.

Jímiar wakéramu.

- 14 Awemámuka iniashniúmiánchu winiána nu nékaji. Antsu, wikia iniáshtin asán, tunánnum surukmáitjai.
- 15 Wikia penke nekámatsjai; kame wakérajna nuna najántsuk, wakératsjana nuna najanjai.

Rum.7,16.

- 16 Nakítiajna nuna najánkunka: - Awemámusha penkeráiti - tajai.
- 17 Kame páant íismaka, wikia najántsujai; Antsu tuná winín pujá asa, nuna túrawai.
- 18 Wiki nekámajai: ishíchkish winia iniáshrui pénker atsui. Tuma asamtai, pénker ana nuna wakerayatan, najánatniun penke tujíntiajai.
- 19 Nuikia pénkeran wakérajna nuna najántsuk, yajáuchin nakítiaj nuna najáneajai.
- 20 Tuma asamtai, nakítiaj nuna najánkunsha, wikia nuna najáneatsjai; antsu tuná winín pujana nu najáneawai.
- 21 Awemamu ana nuna páant nékajai. Pénkeran najanataj takuisha, aya yajáuch` winiáwai.
- 22 Tura, nuka Arutman awemamurinti tusan , winia anentáirui ti waráajai.
- 23 Tumaitkiuísha, winia iniáshrui chíkich awemamun wáiniajai. Anentáirui awemamun nakítia asa, tunánun ajuntui.
- 24 Ma, ti waitiájai. Yaki winia iniáshur wakéramun ajakra, nuna ajapa ewemtíkrura ?
- 25 Ii Úuntri Utsumka Jesusnúmani ii Aparí Arútam yuminksatái. Wiyáitjai winia anentáirjai Arútam awemamun umirín, tura iniáshrujai tuná awemamun amírniua !

AKANKAMU 8.

Iwiáikratin.

- 1 Utsumka Jesúsnum pujuiniána au, penke makurma achártatui.
- 2 Kame Iwiáikrátniuka Utsumka Jesúsnum nii iwiákmarin susa, tunanumiá, nuyá játainmayash ewemtíkiawai.

Rum.8,3.

- 3 li iniashí awemamun amíreachkui, awemámuka ewemtíkratniun tujintkiámiayi. Tuma asamtai, Arútam nii Uchirín íijai iniashimkiat' tusa akupka asa, ii iniashín tunarín makuruíti.
- 4 Nuíkiá, awemamu tana nu tuke amírkatin, ii iniashí wakéramu iniaisar`, Iwiáikratin wakéramu najáneaji.
- 5 Tuma asamtai, nii iniashí wakéramun najanainiána aúka, aya iniáshik ainiáwai. Antsu iwiáikratniun amirainiána aúka, wáimiku ainiáwai.
- 6 li iniashinkia jakátniunam júramji. Antsu iwiáikrátniuka tarímtanam iwiákman súrameaji.
- 7 li iniashí Arutman nakitia asa, umírtnanash umírtsui. Arútam awemamun ishíchkish amirkátniunash tujíntiawai.
- 8 Tuma asamtai, iniashín amirea nuka, Arutman anéatsui.
- 9 Atumiín Iwiáikratin pujá asamtai, iniashniachuítume; antsu Arutmanuítume. Utsumka Jesusan Iwiáikrátniurin tákakcha ánia aúka, Jesusnachuíti.
- 10 Antsu Utsumka Jesús atumiín pujakuínkia, atumí iniashí tunamka asa, jakaitkiuísha, Iwiáikratin atumín tunarin japir, nii iwiákmarin amáarme.
- 11 Iwiáikratin, Utsumka Jesusan aneantmamtikiámia nu atumiín pujakka, atumí iniashinsha aneantmatikiáttawai.
- 12 Nuíkiá yatsurú, iniáshniachu asar`, nu umirkashtiniáitji. Kame atumí iniashí umireakrumka jakáttarme.
- 13 Atnsu Iwiáikratniun kakarmarijají atumí iniashí wakeramu nupétkarum, iwiáku pujústatrume.

Iwiáikratin Arutman uchirí awájeawai.

- 14 Iwiáikratin jintintiámu ánia au, Arutman Uchirí ainiáwai.
- 15 Kame, Arutman takárniuri átasa, Iwiáikratin achikcháitume. Antsu, Ishámstuk :- Apachirú ! – títiása, Iwiáikratin Arutman uchirí awajtamsarme

Rum.8,16.

- 16 Nu lwiáikratin ii wakanijai tsanink pujá asamtai, nekás Arutman uchiríntiajnía nu nekámaji.
- 17 Arutman uchirintkiúrkia , Jesusjai métek Arutman pénkeri achíktatji. Kame Jesúsjaínk métek wáitsa asar`, níiya aínsarik naatmamtíkiamu átatji.

Naatmamtíkiamu átatji.

- 18 Tinkiás yamá ju nunkánam wáitiajnía nu , atak Nayáimpinam warástatjinía nujai apatka íismaka, pénke aantráiti.
- 19 Ashí najankámuka, aents^u Arutman uchirí páant ajasarat` túsa, ti nákwai.
- 20 Kame nu najankámuka tunámkatniun nakitiakuísha, chíkich tunánum ajuármiai.
- 21 Tuma asa, níisha tunanumiá uwémar, Arutman uchirí naatkártatna nuí pachinkíátaj-sa, nákwai.
- 22 Aínsank yamáram ajástaj-sa, nua jatema wáitia núnis ti najáimiawai.
- 23 Tura nuka níinkikia wáitiatsui. Antsu íisha, lwiáikratin takakiatar`, ii iniashí pénker awájsatin, ii anentáin wáitai.
- 24 Kame páant wáiniajnía nuka nákwatsji, antsu wáintsujnía nu nákwai. Tuma asamtai, ii uwemrátiniuri paantchaitkiuísha nákwastiniáitji.
- 25 Waintcha asar`, katsuntrar` nákwastiniáitji.
- 26 Ii tujintia asakrin, lwiáikrátiniuka yáintmaji. Ii pénker seátin nékachu asakrin, lwiáikrátiniuka kakántar tinia, úutchim seátramji.
- 27 Ashí mash` úukman neka nuka, lwiáikratin wakéramun nékwai. Kame lwiáikrátiniuka aya Arútam wakera nuna seatrútmaji.

Rum.8,28.

li ewemrátniuri.

- 28 Arútmaka, nii untsukma anéamu asa, nuna tuke yáiniana nu nékaji.
- 29 Arútmaka, nii Uchirinkia untsurí yachin iwiáiri atí tusa, aents^u akiniainiátsaink nekawarmia nunasha, nii Uchiriya aniútaku ajasarat` tusa, achíkiármiai.
- 30 Achikiármia nunasha untsukármiai. Untsukarmia nunasha makuchármiai. Makucharmia nunasha naatmamtikiármiai.

Arútam anénkratin.

- 31 Nuikia warí timiniáitiaj`?. Wats Arútam íijai pujakuínkia, yaki nupettámkattaj`?
- 32 Arútam nii Uchirín surímstusuk, íikmak awajturmásniaj` nu, níinini ashí mash` surámstusujik ?
- 33 Yaki Arútam untsukarman makurarat`? Kame aya Arútmak ewemtikniuíti
- 34 Yaki iin makúrmattaj`? Jesús Utsumka íin jarutrámak , nantakí , Arutman untsurini pujá, iin seatrútmajnia núash makúrmattaj`?
- 35 Yaki Utsumka Jesús anéajnia nuna akantamkítitiaj`? Waitiámuash ? Sapijmiámuash ? Kajertamámuash ? Tsukáash ? Utsumámuash ? Itiúrchatash ? Mesétash ?
- 36 Ujajmatáiniam chicháak: - *Ame wakéramu najanea asakrin, tuke tsawant ajakramainiáji; íikmak máatniua aínsank iirmainiáji* - tu aarmáiti.
- 37 Tu aarmaitkiuísha, Anétmajnia nu yáintma asakrin, tuke nupétmaji.
- 38 Tuma asamtai, jatai, iwiákmasha, Pasuk, Úuntsha, yamáish, urúmkeshe, mash' akúpniusha,
- 39 nayáimpisha, tunkurúash, ashí najánkamush, Arútam ii Úuntri Utsumka Jesusnúmani nii aneámurin iniakturmájnia nuyá akantamkicharminiáitji.

AKANKAMU 9.

Jutiu íimiarcha.

- 1 Utsumka Jesúsnum nekás wáitratsjai. Iwiáikratin winín pujana nusha: - waitrichuítme - túruteawai.
- 2 Kúntuts enentáimsan, winia anentáirui ti waitiájai.
- 3 Jutíu, wi shuar asármatai, ewemrarat` tusan, wi Jesusnumiá kanakín, yumínkramu ajásnaka mak aintjai.
- 4 Kame Arútmaka jutíu aéntsun naatmamtikiátaj-sa, niijai irúntramun najanátaj-sa, nii awemámurin susátaj-sa, tuke waimiakarat` tusa, nii pénkerín susátaj-sa, nii shuar awajsármiai.
- 5 Aíntsank Utsumka Jesús, Arútam ti nankámaku asa, niinín akiniátaj-sa, jutíunam nii weátrin apujásamiayi. Tuma asa, tuke túkesha yumínksamu atí.

Arútmaka waitrichuíti.

- 6 Arútam timia nu: - aminkiachuíti - tichamniáiti. Kame Israéran uchirí, ashí mash` nekás jutíu ainiátsui.
- 7 Aíntsank Apráaman uchirí asarsha, mash' nekás nii uchirí ainiátsui. Aya Isáakan uchirí nekás jutíu ainiáwai.
- 8 Aya iniashnumiá akiniawarmia nuka, Arutman uchirí ainiátsui. Antsu Arútam tímia nú akiniawarmia Apráaman uchrí ainiáwai.
- 9 Kame, Arútam Apráaman chicháruk: - *Wi waketkin támatai, Sara kaa nuaitiat, uchín takústatui* - tímia nu aminkíamiayi.
- 10 Aíntsank **Reweka**, ii úuntri Isáakan nuweshá, uchín jimiamrámiayi.
- 11 Nu uchi akiniainiátsaink, pénkeran pénkerchanash najanainiátsaink, Arútam chicháaK: - *Iwiáirinkia patáin amirkatí* - tímiayi.

Rum.9,12.

- 12 Kame Arútam nu uchin túramurin íirtsuk, nii wakéramun najanámiayi.
- 13 Nunan Ujajmatáiniam chicháaK: - **Esaún** nakitran, **Jakupan** wakerúkmajai - tu aarmáiti.

Arútam makurchamniáitji.

- 14 Nuna tura asamtai: - Arútam yajauchíti - timinkíaitiaj` ?
Atsá , penke tichamniáitji.
- 15 Kame Muisesan chicháruk: - *Yana tsankúreaj nuna, tsankuráttajai; Yana wáit anénteaj nuna, wáit anentráttajai* - tímiayi.
- 16 Tuma asamtai, ii wakéramu, ii najanámussha íirtsuk, nii wáit anenkrátmari achiktiniáitji.
- 17 Kame Ujajmatáiniam, Arútam Jaraúnkan chicháruk: - *Amínini winia kakármaman iniákmasan, tura ashí nunkánam winia nekarawarat` tusan, úunt awajsamájme* - tímiayi.
- 18 Nuíkia, Arútmaka nii wakera nuna wáit anéntar, nakitia núnaka wáit anéntatsui.
- 19 Nuíkia turutcháttarpash: - Urukamtai, ii wakerámurin najánatin iniáisachmin árinsha, kajértamaj` ? -
- 20 Tse umpá, amesha ya asamea ! Arútmasha: - Nu túrame – tímíniáitiam ? Wats ichínkian: - Urukamtai junísh najátam ? - tímíniáshit ?
- 21 Wats, nuwen-takakmau nu nuweja_i ichínkian pénkeran, tura yajáuchiniash, najanachminkíait`.
- 22 Arútmaka, aents^u yajáuch' makúnratin ainiakuísha, nii pénkerin, nii kakarmaríniash iniakmástinian ti katsuntrámiayi.
- 23 Aíntsank nii náatmarin iniakmástaj-sa, wáit-anémtmain aéntsun najanámiayi.
- 24 Nuna túratin, ashi mash`, jutíunmaya_a jutiuchunmay_asha, untsukmáitji.

Rum.9,25.

- 25 Kame Arútam, wáimiaku Useasnúmani chicháak: - *Wi shuárchan: “Wi shuárchiru” títiatjai. Anajmarmachunsha: “Anajmármaru” títiatjai.*
- 26 *“Wi shuarcháitrumé” tímiania nuink: “Iwiáku Arutman uchiríntrume” tíartatui - tímiayi.*
- 27 Núnisank Arútam, wáimiaku Isaiasnúmani Israéran chicháak: - *Israer aents^u náikmia aínsarank núkap ainiakuísha, aya ishíchik ewemtíkramu áartatui.*
- 28 *Kame Arútmaka wáitrutsuk ju nunkánam nii chichámen wárichik amíktatui - tímiayi.*
- 29 Núnisank, Isaías ataksha chicháak: - *Arútam, nii iwiákmarin ikiurtamchakrínkia, Sutuma, Kumura aínsarik ajasántji - tímiayi.*
- 30 Nuíkia waríttiajik ? - *Jutíuchuka imítmachu ajástinian enentaimiainiachiat, íimiaru ajásar waimiakármiai - titiájash ?.*
- 31 Antsu Israer aéntska: - *Awemamu umirkar', imítmachu ajástatji - tu pujúsar, awemámun umikchármiai.*
- 32 Nusha urukámtaink ? *Enta, íimiarcha ásar, aya nii turamuríjaj wáimiaku ajástaj-sar wakérukar, tujinkiármiai. Tuma ásar, Kaya tukúmkatin apújsamunam tukúmkar iniarármiai.*
- 33 Kame Ujajmatáiniam Arútam chikáak: - *Tukúmkar natsararat` tusan, Siúnknum Kayan ikiúajaj. Antsu: “Nu Kaya Utsumka Jesusáiti” tuinia au, tukumkachártatui - tawai.*

AKANKAMU 10.

Aya Arútmak Ewemtíkiartin.

- 1 Yatsurú, jutíusha uwemrarat` tusan, ti wakera asán, Arutman tuke anéntrajaj.

Rum.10,2.

- 2 Arutman ti anénaksha, nekás urukuit nuna pénker nekainiátsui, tájarme.
- 3 Arútam urukuit, nuna nékachu ásar, Arutman wakerámurin najántsuk, aya nii wakeramuríniak najanawármiai.
- 4 Kame awemámujai Jesúsnum íimiaru ajasar', imítmachu ajáaji.

Muisés Arútam awemamun etserin.

- 5 Muisés chicháak: - *Ya awemamun amía nuka, iwiákman achíktatui* - tawai.
- 6 Antsu íimiaruka chicháak: - *Yaki nayáimpiniam waka, Utsumka Jesusan itiamniáit ?* - tu enentáimiui.
- 7 Aíntsank: - *Yaki tunkuruánam we, Utsumka Jesúsán jakamúnmayá iwiakminiáit ?* - tu enentáimiui.
- 8 - Kame Arutman chichame étserjinia nuka, amé anentaimiín, amé wenemiín pujáwai - tu enentaimiui.
- 9 Amé wenemjai: - Jesús mash`nerentniurinti - tusam, nuyá íimiaru ajásam: - Arútam Utsumka Jesusan jakamúnmayá aneantmamtikiámiayi - tákumka, ewemráttame.
- 10 Nii anentaiín íimiaru ajainiána au, nekás imítmachu ajainiáwai. Aíntsank nii wenejai Jesusnan etserainiána au, ewemrártatui.
- 11 Kame Ujajmatáiniam Arútam chicháak: - *Ashí mash` íimiaru ainiána au: "unúukajna" penke tichártatui* - tawai.
- 12 Utsumka Jesús, jutíun, tura jutíuchunash, ashí mash` nérentniuri asa, anentruiniána aun nii pénkerin suiniáwai.
- 13 kame ashí mash` Úunt Jesusan anentruiniána au uwemrártatui.

Rum.10,14.

- Makuchmáitjai - tichamniáiti.

- 14 Íimiaru ajascharuitiátsha, itiúrak Utsumka Jesusan untukarat` ? Nii chichamen antukcharuitiátsha, itiúrak íimiarush ajasarat` ? Ujáchmasha, itiúrak antukarat` ?
- 15 Akupkachma ainiaýátsha, itiúrak etserkarat` ? Tuma asamtai, Ujájmatáiniam Arútam chicháak: - *Pénker-chichaman etserkátasa wena nuka, ti pénker ainiáwai - tawai.*
- 16 Tumaitkiuísha máshikia Pénker-Chichaman anturkachármiai. Kame wáimiaku Isaías chicháak: - *Uuntá, ya ii étserman antukaruít ? - tawai.*
- 17 Nuíkia ii íimiármari etsermanumiá winiáwai; etsérmasha Utsumka Jesusnumiá winiáwai.
- 18 Tuma asamtai juna tajai: - étserman antukchármakia ? Ee páchitskea antukármiai. Kame ashí nunkánam nii chichámenka jeáyi; nunka nankatkamúnmasha antukármiai -.
- 19 Wats anintrájume: - Israer aéntska nuna nekachármakia ? Muiseska chicháak: - *Wi Israer shuárchan anéakui, átumka: "Ániun anea !" tusárum, akásmakrum kajerkáttarme - tímiayi.*
- 20 Núnisank Isaías chicháak:- *Eatkachármia nu waitkiármiai; winia aujmatcharmia nuna wantintiukármiajai - tímiayi.*
- 21 Antsu Israer aéntsun chicháaruk: - *Aents^u umichun, kajénnasha tuke tukesha yainkiármiajai - tímiayi.*

AKANKAMU 11.

Israer ishíchik ewémraru.

- 1 Wats anintrájume: Arútam Israer-shuáran nakitrármakia ? Atsá. Kame wisha Apraamnumiá, Penjaminknumiá winiá asán, israer aentsuítjai.

Rum.11,2.

- 2 Arútmaka nii shuar awajsarmia nuna nakitrachuíti. Antsu Irías Israéran kajérak, Ujajmatáiniam Arútman chicháaruk:
- 3 - *Uuntá, wáimiaku ame akupkamun kajénkar, iikmatáirminiash utsánkar, winiásha mantuátaj-sar nakarainiáwai. Tuma asán, aya wiki ámijai juákjai - tímia nu nekátsrumek ?*
- 4 Nuna takui, Arútam warítmia ? - *Tsenken-nupanti aents^u áantar-arútam **Páaran** tekemrurcharmia nuna achíkmiajai - tímiayi.*
- 5 Núnisank yamáisha, Israernumiá aents^u Arútam jukimiu, ishíchik juáwai.
- 6 Áantrank achíkma ásar, nii túramuri írnatsuk juunkármiai. Nii túramuri írnas juunkaruitkiuínkia, áantrank untukma acharayi.
- 7 Nuikia Israer-aents^u eármiania nuna wainkiármakia ? Atsá. Aya Arútam júukma áarmia nuke wainkiármiai. Antsu, nii anentái kátsuram awajsarmia nuka, wainkiachármiai.
- 8 Kame Ujájmatái étsereak: - *Arútmak enentáimchatai anentáin , wáintmashtai jíniasha, tura ántushtai. kuíshniasha susármiai - tawai. Tana nu yamáisha nuniskete.*
- 9 Aíntsank **Tawítsha** ujájmak: - *Nii waimiatáiri chinia, timpia, tura tukúmtai-kaya ajasármatai, nuí iniáaru aartí.*
- 10 *Nii jíisha kusúrar, íschamnia ajasartí. Tura kijinian tuke entsaku wekainiartí - tu tímiayi.*

Israer iwiáramu.

- 11 Ataksha juna aniájrume: - Israer-shuar penke nantakchátniunak tukumrármia ? Atsá. Jutíu akasmátkatin nii tukumrármuri jutíuchu ewémratniun itiámiai.
- 12 Nii tukumrármuri ashí aéntsnum Arutman pénkerin itiaruitkiuínkia, nii ewemrármuri imiá itiáttui.

Rum.11,13.

- 13 Atumín jutiuchutirmin tájarme: - Wikia jutíuchunam akupkamu asán, ti núkap takákmaajai.
- 14 Jutíu jutíuchun akásmatkar, újumkesh ewemrarat` tusan, ti pénker takákmaajai.
- 15 Arútam Jutíu-aéntsun iniáis, jutíuchun nawamkaitkuínkia, Jutíun ewemramurinkia jakamúnmayá nantáktinia aintsáiti.

Israérka tuke Arutman shuarinti.

- 16 Éemka usukruámu, mash' usukruámu juáwai. Kankap penkeraitkiuínkia, numisha penkeráiti.
- 17 Kunchái kanawe tsupíkmanum ámeke núí péemkam, nuna kankapen iwiák mari achíayátam, chíkich kanawe nakitrashtiniáitme.
- 18 Tura, chíkich kanáwejai nankámantu enentaimtumasáip. Kame amechuítme kankap iwiákma súam, antsu amesha kankapén iwiák mari achíame.
- 19 Turasha chicháakum: - Wi péemkatin, chíkich kanawe tsupínkiármiai - tichattámeash ?
- 20 Ee, nekasáiti. Níinkia íimiarcha ásar tsupínkiármiai. Antsu ámeke íimiaru asam, anujnakuítme. Túramu asam, wáantu ajátsuk, aneartiniáitme.
- 21 Kame Arútam nekás numin kanawen tsankurachusha, amíniash tsankurtamrat` ?
- 22 Nekatá, Arútmaka tsankaitiat makukratniuíti. Kame tunamkarmia nuna makúrar, ame pénker pujáakmin, tsanka ajasuíti. Túrasha yajáuch` ajasakminkia, kanawen tsupíkma núnisank, aminsha tsupirmáktatui.
- 23 Antsu, Arútmaka ashí tujincha asa, kanawe tsupíkma áarmia nusha íimiaru ajainiakuínkia, ataksha íkiankártatui.
- 24 Tuma asamtai, ame chíkich numin kanawetiátam, tsupínkiam pénker numíniam íkiankákminia nu, pénker numín kanawe tsupíkma, ataksha íkiaktin imiá yupichuchíti.

Israer enentáimramu.

- 25 Yatsurtíram, nankámaku ajasáirum tusan, ju nekatárum: - Ashi mash` Israércha Jesús-irunrámunam enkémam, Israérka enentáin kátsuram awajsártatui.
- 26 Nuíkia Israer aéntssha ewemrártatui. Kame Ujajmatáiniam Arútam chicháak: - Siunknumia Ewemtíkkiartin tátatui; Jakupan tunarín japírattui.
- 27 Wi nii tunarín japiran, níijai irúnramu najanáttajai - tawai.
- 28 Átum Ewémratniun Israérka Pénker-Chicháman nakitiainiá-wai. Tumaitkuísha, Arútam, yaúnchu nii weátrijai nankama asa, níinsha anéawai.
- 29 kame nii pénkerin susamia nuna atánteatsui. Untsukmia nuna pénke ajápeatsui.
- 30 Átumka yaúnchu Arútam kajerkaitkiurmínsha, yamai Israer amiáchmanum, Arútmaka wáit anentramrarme.
- 31 Atumín wáit anentramra asamtai, Israérka niin kajerkariat, níisha ataksha wáit anénramu áartatui.
- 32 Kame Arútmaka wáit anentrártaj-sa, ashí mash` aents^u umichu ajasarat` tusa, iniaisármiai.

Arútam nampersamu.

- 33 Arutmá, warírtin, nékau, imítmachu asakmin, ame wakéramu, amé jintímsha, penké nekachminiáiti.
- 34 Wats, ya nii anentáin neka ? Ya niin jintintniuit ?
- 35 Túrutskesha, ya nii pénkerin achíktaj-sa akikmia ?
- 36 Kame, ashí mash` najánkamu niiniya jiiinkin ásar, niinín mash` waketkiártatui. Tuma asamtai nii tuke tukesha naatmamtíkiamu atí. Nuke atí.

AKANKAMU 12.

Nekás wáimiaktin

- 1 Yatsurú, juna seájrum: - Arútam anénkratin asamtai, imítmachu ajásrum, íikmaka aínsarmek surumaktárum. Kame júti nekás ii waimiatáirin, Arútam wakérana nu - tájarme.
- 2 Yamáiyá aents^u yajáuch` pujuíniána aínsarmek, pujuírap. Antsu atumí anentái yapajárum, Arútam wakéramu nekárum, nekás pénker ána nu najanatárum.

Anenaisar` yainiaiktiniáitji.

- 3 Arútman pénkeri achikiú asán, atumín ankant ankant tájarme. - Wíkítiajtai - tu anentaimtúmatsuk, antsu íimiaru asárum , ashí mash`ankant ankant: - Arutman pénkerin achikiúitjai - tusárum, pénker takakmastárum.
- 4 Kame ii iniashisha chikichkitiat, núkap muchítman tákakeawai. Tura, nu métekrak muchitiainiásui.
- 5 Aínsarik íisha untsuritiatar`, Utsumka Jesúsnumka chikíchik iniashintji. Nii muchítmari asar` métek yainiaiktiniáitji.
- 6 Ankant ankant Arutman pénkeri achikiú asar`, ii takatri najanatniúitji. Wáimiaku ajásuka nii iimiármarin etserkartí.
- 7 Imiákratin nii takatrin najanatí.Unuíkiartin pénker unuiniartí.
- 8 Ikiakáinkia aéntsun ikiakartí. Yáinkratin tsanka ajastí. Wéaka esétar jintintiatí. Atsánkratin warás yainkratkatí.
- 9 Wáitrutsuk, anénkratin atárum. Yajáuch` nakítrarum, pénker ana nu eaktárum.
- 10 Mai anenai ajáakrum: - Wijáinkia chíkich imiainkasáiti - titiárum.
- 11 Ishíchkisha kajínmattsuk, atumí takatri pénker najanatárum. Nekás Úuntnum surúmakrum, tuke umirkatárum.

Rum.12,12.

- 12 Warásrum, nakastárum. Itiurchatnúmsha katsuntratárum. Tuke túkesha anentrú pujutárum.
- 13 Jesús-shuar utsumainiána au yáinkrum, ashí mash` írar atumi jeén ikiantratárum.

Numásrumsha aneté.

- 14 Kajertámrumna nu yumínksarum, penke yuminkráirap.
- 15 Waránia nujai warásrum, uutainiána nujai uuttiárum.
- 16 Chikíchik anentáijai irúnrarum, náatu ajátsuk, péejchach`ajastárum. - Wi ti unuimiaruítjai - tírap.
- 17 Yajáuch`awájtamna nu yapajkiáip, antsu pénkerum susatá.
- 18 Aéntsun akankáij tusam, ashí mash` nawamkartá.
- 19 Átumka yapájsuk, Arútam yapajkiat` tusárum, iniaisatárum. Kame Ujajmatáiniam Úunt chicháaK: - Wi yapájkieran, ashi mash` ankant ankant nékasenk akikiártatjai - tawai.
- 20 Antsu numásrum tsukamáakui, ayuratá. Kitiamáakui, aartá. Turakmínkia, nii jinium wáitsatniunak irumkí wéawai.
- 21 Yajáuch` nupettukat` túsam, iniaisáip. Antsu ameá ameá pénker najanmármijai nupetkatá.

AKANKAMU 13.

Úunt anaikiárma umirma.

- 1 Úunt anaikiárma pénker jintintramainiájnia nu, ashí mash` amirkatárum. Kame Arútam apújsamu asármatai, nii akúpmari Arutmánmayá wininiáwai.
- 2 Tuma asamtai, nii úntrin kajérkar amirainiátsna au, Arútmán amirainiáchu ásar, yumínkramu ainiáwai.
- 3 Imítmachua au, yajáuchin najanacha ásar, nii úntrin ishankachartiniáiti. Antsu imítmau, yajáuchin nájanea

Rum.13,4.

ásar, ishamkartiniáiti. Kame: - Úuntrun ishamkáij - takumka, aya pénger najanató. Turawákminkia, warartámsattui.

- 4 Ámin pénger jintintrámatin, Arútam apujsamuíti. Nuíkia yajáuch` pujákmeka, ishamkatá. Kame áantranka nankin takakainiátsui. Antsu yajáuch` pujuiniána aun makuar, wáitkiastin Arútam apújsamu ainiáwai.
- 5 Tuma asamtai, aya ishamakur` umírtsuk, antsu nekás enentaimsar` umirkatnuítji.
- 6 Kame nuka Arútam apújsamu asármatai, kuitian seainiána nuna páchitsuk susatárum.
- 7 Ashí mash` susátniua nuka ankant ankant nékasenk akíktárum. Umirkatniua nuka umirkatárum. Arantúktinia nuka arantuktárum.

Anénkratin mash' akupkamun amíawai.

- 8 Tumashnaikiárap. Atumí tumáshrinkia anenaiyamua nuíti. Kame ya aéntsun anea nuka, ashí mash` awemamun amikiái.
- 9 Ya aéntsun níiya núnisank anea nuka, ashí mash' awemámunash amíawai. Kame tsanírmatsui, mankártatsui, kasámeatsui, akásmattsui.
- 10 Nekás anénkratea nuka, aéntsun yajáuch` najáneachu asa, nekás ashí mash` Arútam awemamun amíawai.

Tsáapniun uchirí.

- 11 Atumsha, warí tsawantá pujáj`, nu nékarme. Shintiartárum; ii íimiaru ajásmiaj` nuyá ii ewemrátniuri nuntumtúrmasji.
- 12 Kashi amunatékmatai, tsawant jeástatuk ajasái. Nuíkia Kirítiniunam nájanma iniaisar`, tsáapniun nankirí achíktái.
- 13 Tsawái wekajnia aínsarik pénger pujusar`, núkap

Rum.13,14.

yurúmtsuk, nampétsuk, tsanírmatsuk, wáurtsuk,
kajérnaitsuk, akásmattsuk pujustái.

14 Antsu ii Úuntri Utsumka Jesusa aínsarmek ajásrum,
atumí iniashín wakerámuri nupetkatárum.

AKANKAMU 14.

Péejchach` anetá

- 1 Péejchach` ishíchik íimiaru ainiána aújai tunáitsuk,
yainkiartá
- 2 Kakáram ashí mash` yurumámnia ainiakuísha,
péejchachikia aya íjiun yuámnia ainiáwai.
- 3 Mash' yua nu, yúatsna nuna kajerkashtí. Núnisank
yúatsna ausha, mash' yúan kajerkashtí. Kame mai
Arútmanu ainiáwai.
- 4 Nuíkia amesha yáitiam, nii takárniuri makúrtinsha ?
Pénkerash pujá, yajáuchiash pujá, nuna aya nii úuntri
iistiniáiti. Nii Úuntri, ashi tujíntcha asamtai, yajáuchiniam
iniáarchattui.
- 5 Chíkich: - Tsawant pénker, pénkerchasha ainiáwai -
tuiniáwai; tura chíkichkia: - Tsawant métek ainiáwai -
tuiniáwai. Tuma asamtai, tunáitsuk, ankant ankant nii
enentáimsamun takusartí.
- 6 Tsawantan íiniána au, yurumáinia au, yurumainiátsna
ausha, Arútmanun takakmainiákka, Arútman yuminkiai-
niáwai.
- 7 Kame yákesh níiniunak iwiáku pujuschatniuíti. Aínsank
yákesh níiniunak jarumakchatniuíti.
- 8 Iwiáku pujákrikia, ii Úuntri Jesusna iwiáku pujaji. Tura
jáakrishá, tuke níiniu jáaji. Kame iwiáku pujákriша,
jáakrishá, tuke aya Utsumka Jesusnáitji.
- 9 Kame Utsumka Jesús jakarun tura iwiákunash Úuntri
ajástaj-sa, jaka, aneántmiayi.

Rum.14,10.

- 10 Nuíkia Arútam makúrmartin árinsha , urukamtai ame yatsumsha kajérkam makúam ?
- 11 Kame Arútam Ujajmatáiniam chicháak: - *Nekás nekás tájarme: ashí mash` aents^u tekémrustrar, ashí mash` chichamjai nii turámurin etsertukártatui* - tawai.
- 12 Tuma asamtai, atumsha ankant ankant atumí najanámuri Arútam iniaktustátrume.
- 13 Nuíkia númtak makunáitsuk, ii yachish tunamtikkiashtái.
- 14 Wi nekás Jesusnumsha páant nékajai. Ashi mash` pénker ainiakuísha, yajáuch` enentaimiainiána au yajáuch`awajainiáwai.
- 15 Nuíkia yúchatai-yurúmak yúakum, yátsum waitkiákmeka, penke anéatsme. Kame ame yúchatai-yurúmak yuam, Jesús nu aentsun jarúkmania nu, emenkatkáip.
- 16 Ashí mash` yuátin penkeráiti takumsha, chíkich yajáuch` chichasaráink túsam, yuawáip.
- 17 Kame Arútam-Irunrámuka entsa úmajnia, yurúmak yúajnia nucháíti. Antsu wáimiaku ajasar`, lwiiaikrátniunam imítmatsuk wará-warát tarímtanam pujustiniá nuíti.
- 18 Nuíkia, ya Jesusan umirea nuka, Arútam tura aéntssha naatmamtíkiamu átatui.
- 19 Tuma asamtai, mánitsuk, shíir eemkarat` tusar`, takakmastái.
- 20 Yúchatai-yurúmak yuataj, tu pujúsam, Arutman takatri emesráip. Kame, ashí mash` yurúmak penkeraitkiuísha, chíkich: - Nu yuchatáinti - tuiniákui, yuawáip.
- 21 Chíkich tunamkaráink, namank, sawe, tura chíkichsha yúashtin penkeráiti.
- 22 Ímiarú asam, esétram Arútam wakéramu najanató. Tuma asamtai, Arútam nuna wakérawai tusa, nájanea nuka warastí.
- 23 Antsu yurúmak penkeráshit túshim yúakka, níinki makúmawai. Kame ni anentái tana nuna najanainiátsna au, tunamainiáwai.

AKANKAMU 15.

- 1 Kakarmatíkiá péejchach` áinia: - Tunamainiáwai - tiaráink tusar`, ii niayámuri katsuntratniúitji.
- 2 Antsu pénger anentáin achikiarat` tusar`, ashí mash` níijai tsanka ajastiniátji.
- 3 Ma, Utsumka Jesussha nii niayámurin najanáchmiayi. Kame Ujajmatáiniam Arútam chicháak: - *Ashí mash` katsekramkarmia nuka, winia katsekrúkarmiayi* - tawai.
- 4 Yaúnchu aárma nuka ii katsuntrar`, itiurchatnúmsha warasar` nákastinian unúitiamji.
- 5 Arútam katsúntratniun, warástínniasha nii kakármarin surámjinia nu, ashí mash` Jesusan Iwiaikrátniuriín chikíchkiá aínsarank ajasarat` tusa, tsankatramkatárum.
- 6 Nuíkiá ashí mash` métekrak, Arútam, ii Úuntri Untsumka Jesusan Apárí, naatmamtikiatárum.

Irúnra pujustárum.

- 7 Ashí mash` Arutman naatmamtikiarat` tusárum, Jesús pénger awajtamsamiármena aínsarmek, atúmsha shíir awajnisatárum.
- 8 Kame Utsumka Jesussha, Arútam Jutiun weátrin timia nu aminkiat` tusa, wáitruitsuk takakmásmiayi.
- 9 Aínsank Jutíuchusha, Arútam wáit anéntkartin asamtai, yuminksártatui. Kame Ujajmatáiniam : - *Jutíuchunam amin yumínksan, tuke naatmamtikkiáttajme* - tu aarmáiti.
- 10 Aínsank: - *Jutiuchutíram Jutíujajsha máimtek warastárum* - nusha aarmáiti .
- 11 Ataksha: - *Ashí mash` jutiuchutíram, atumí Úuntri nampersatárum; ashí mash` aentstírmesha, Arútam naatmamtikiatárum* - nusha aarmáiti.

Rum. 15, 12.

Isaiassha chicháak : - *Jesé shuarnumiá akinia, jutíuchun Úuntri átatui. Jutíuchuka: “Nuka iin Ewemtikkiartiniáiti” tíartatui – tawai.*

- 12 lin Ewemtikkiartin waramtikrámsarum, tarímtanam iwaiit-maktárum. Iwiáikratniun kakarmarijaj*í* íimiaru ajásrum, nu nakastárum.

Paprun takatri.

- 14 Yatsurtíram, átum pénker anentái tákakearme. Ashí mash´ nékarme. Núnisrumek pénker jintintniáiyatin unuimiaruírumna, nunasha nékajai.
- 15 Tumaitkiuísha, wi Arútam akupkamu asán, atumín enentaimtikrátaj-san, páant aatramájrume.
- 16 Kame Arútmaka jutíuchu susamun warás achikiat´ tusan; Iwiaikrátniusha pénker awajsat´ tusan; Pénker-Chichaman etserkataj tusan, Wea awájnasan, Utsumka Jesusan takárniuri asán, jutíuchunam akupkamuítjai.
- 17 Arutman takárniuri ajasú asán, Utsumka Jesúsnum ti waráajai.
- 18 Jutíuchusha íimiaru ajasarat´ tusa , Utsumka Jesús winíni takákmasu asamtai, aya núnak timiniátjai.
- 19 Kame, Iwiáikratniun kakarmarijaj*í* aents-tujíntiamun iniákmasan, Jerusarenknumiá juárkin , ashí irutkámunam Utsumka Jesusan chichamen etserkin, Iriríkionam ejemjai.
- 20 Chíkich etserkarmia nuna arántukan, aya Jesusan nekacharmia nuí etserka asán, waráajai.
- 21 Kame Ujajmatáiniam Arútam chicháak : - *Penke ujákchamu áarmia nu wainkiártatui; antukcharmia nusha nekawártatui - tawai.*

Papru irasma.

- 22 Nu takátan najáneakun, atumiín jeátniun tujinkiámjai.

Rum.15,23.

- 23 Juí takatron amukú asán, atumiín winítniun tuke wakerú pujajai.
- 24 Nuí, Espánianam wéakun, íittiájrume. Atumjai ishíchik tsawant warásan pujústatjai. Nuyá wéakui, jintia nekapruteákrum, uniutusmíntrum tusan, wakérajai.
- 25 Yamáikia Jerusarenknum jesús-shuaran yainkiártaj-san wéajai.
- 26 Kame Masetúnianmaya, Akáyanmaya aéntska, Jerusareknumia jesús-shuar utsumainiána aun yainkiártaj-sar, nii kuítrin irumrarai.
- 27 Kame, Jutíuka íimiártin yáintma asakrin, íisha ii warírijai yainkiartiniáitji tusar, nekás yáinktaj-sar wakerukármiai..
- 28 Nuíkia atakmasármia nuna súsan, amikian, atumín íirkutak Espánianam wétatjai.
- 29 Tinkás atumiín jeáttajna nui, Utsumka Jesusan pénkerin ejetitiájrume.
- 30 Yatsurú, lwiáikratniun anenkrátmari wijai pujusat' tusárum, Utsumka Jesusnum seatritiárum, tájarne.
- 31 Jutea aents^u íimiarcha ainiamúnmaya uwémratin, tura Jerusarenknumia jesús-shuar kuítian pénker achikiarat' tusárum, Arútam seatritiárum, tájarne.
- 32 Arútam wakerakuínkia, atumiín wara warat jeán, ishíchik tsawant ayamráttajai.
- 33 Arútam tarímtanam lwaitmármena nu atumjai pujustí. Nuke atí.

AKANKAMU 16.

Ikiúkma.

- 1 li umái Jepe, Imiákratin asa Sénkreasnum takakma asamtai, pénker yainktárum.
- 2 Jesús-shuar itiur pujúinia aínsarmek, Jesusna asamtai, wáit aneásrum, pénker achíkrum, utsumámunam

- yaintárum. Kame níinkia untsurí aéntsun yáinkiar, winiásha yaintkiáiti.
- 3 Priska, nuyá Akírasha , Jesusan takatriín winia yáintin asármatai, amikmatruatárum.
 - 4 Kame níinkia jakátniunmash ishámstsuk winia ayamrutkármiai. Aya wiki yumínkiainiátsjai, antsu ashí mash' jutíuchu Jesús-irúnramun najánainia nusha, yuminkiaiiniáwai.
 - 5 Jesús-Irúnramu nii jeén irunea nusha, amikmatruatárum. Epénetu, wi ti aneamu, Ásianmaya niá niá Jesús-shuar ajasú asamtai, amíkmaktruatárum.
 - 6 Marí, atumín ti núkap yaintmakmiárumna nusha, amíkmátárum.
 - 7 Aíntsarmek wi shuar Antrúnikiu, tura Juníasha, wáittiai - jeánam wijai pujuármia nu, amikmatárum. Kame wi Jesús-shuar ajátsaink, níinkia akatramu ti náatu áarmiai.
 - 8 Ampriátu, Jesúsnum ti anéajna nusha, amikmatruatárum.
 - 9 Urpanu, wijai Jesusan takárniuri asamtai, amikmatárum. Núnisrumek, wi anéamu Estakiu, amikmatárum.
 - 10 Aperes, Jesusan ayamrin asamtai, aínsarmek Aristúpuru-shuar amikmatárum.
 - 11 Aínsarmek, wi-shuar Erutiunk, tura Narsisu-shuar Jesús-shuar asármatai, amikmatárum.
 - 12 Tripena , Tripúsasha, Jesusnan takákmasu asármatai, amikmatárum. Núnisrumek wi anéamu Pérsit, ti núkap Jesusnan takakmasmia nusha, amikmatruatárum.
 - 13 Jesús untsukma Ruju, nii nukurisha, winia nukurtaku asamtai, amikmatruatárum.
 - 14 Asínkritiu, Juerkunk, Ermes, Patrupas, Ermas, nuyá Jesús-shuar níijai pujuiniána nusha, amikmatárum.
 - 15 Jirúruku, Juria , Neréusha nii umáijai, aínsarmek Urimpias, tura ashí mash' Jesús-shuar níijai pujuiniána nusha, amikmatárum.

Rum.16,16.

16 Aíntsarmek atumsha númtak shíir amikmanaiyatárum.
Kame ashí mash' Utsumka Jesusan Irúnramuri
amikmatmarme.

Ékesank aáru.

17 Yatsutíram, aents^u yajáuch' aushá chichaman itiar,
itiúrchatan apújainia aújai irunráirap, tájarme.

18 Kame nu aéntska Utsumka Jesusan takárniuri ainiátsui.
Antsu, warirtin ajastin, penkera aínsarank chichásar,
péejchachin anankainiáwai.

19 Atumí imiármarin ashí nunkánam nekáinia asármatai, ti
waráajai. Tumaitkuísha, yajáuch' najántsuk, aya pénker
najanin atárum.

20 Turakruminkia, Arútam tarímtanam iwiáitmakrum, eméskan
wárichik najámtikramráttarme. Tura ii Úuntri Utsumka
Jesusan pénkeri, atumjai pujustí.

21 Timutéu wijai takákmana nu, tura wi-shuar Rusiu, Jasúnk,
Susipátrusha, amikmátmarme.

22 Wi, Tersiu, Paprun chichamen aáteakun, Úunt Jesusjai
pujusan, amikmájrume.

23 Káyusha amikmátmarme. Kame ashí mash' Jesús-
shuaran, tura winiásha, nii jeén íkiatui.

24 Aínsank irútkamun kuítrin-juu Erastu, tura ii yachi
Kuártusha amikmátmarme.


Impínmarma.

25 Utsumka Jesús, Pénker-Chichaman winíni suramsámiajnia
nu, ikiakatmákrumin naatmamtikiatárum. Atsúnmaya
chicham, Arútam tuke túkesha úukman takúmiania nuna,

26 yamáikia ashí aents^u íimiarar amirkarat' tusa, Jesús-
irunrámunam etsernakuíti.

Rum.16,27.

27 Nekás Arútam ashí nékau, Utsumka Jesusnúmani tuka túkesha naatmamtikiamu atí. Nuke atí.



PAPRU KURÍNTIUN ÉEMKA AÁTRA.

1ª Carta a los Corintios

AKANKAMU 1.

Éemkari.

- 1 Papru, Arútam wakerukú asamtai, Utsumka Jesusan akatrámuri ajasat' tusa untsukma, tura nii yachisha Sústenes, aátramrume.
- 2 Jesús-Irúnramu kuríntiunam pujatíram, Utsumka Jesúsnum wáimiaku ajastin untsukmatíram, ashí mash' ii Úuntri, atumí Úuntrisha asamtai, Utsumka Jesús anentratírmesha,
- 3 ii Aparín, Utsumka Jesús nasha pénkeri atumjijai tarímtanam pujustí.
- 4 Arutman pénkeri Jesusnúmani achikiú asákrumin, tuke Arutman yumínkiajai.
- 5 Kame, Niinín ashí mash' chichamsha, nekámusha achíkrum.
- 6 Jesusa aínsarmek ajakí wemiarme.
- 7 Ii Úuntri Utsumka Jesusan tátinri naka asárum, ashí mash' Arutman pénkeri tákakearme.
- 8 Jesusan tsawantriín tunártincha jeátin, ii Úuntri Utsumka Jesús ikiakátmarme.
- 9 Kame Utsumka Jeusjai irúnratin untsúrmaku asákrumin, Arútmaka wáitrutsuk atumjijai tuke pujústatui.

Jesús-shuar kajernáiyamu.

- 10 Yatsurtíram, Úunt Utsumka Jesusnúmani nakanáitsuk irunra pujusmíntrum tusan, seájrume. Kame áantrarum

Kuri.1,11.

- kajérnaitsuk chícham najánarum, chikíchik anentái achiktárum.
- 11 Krue shuar chichártuiniak: - Nakanáir pujuiniáwai - turutiáрмаi.
 - 12 Kame chíkich: - Wikia Paprunuítjai; chíkich: - Wikia Apurunuítjai -; chíkich: - Wikia Kayanuítjai -; chikichsha: - Wikia Utsumka Jesusnáitjai – tuiniáwai.
 - 13 Nekatárum. Utsumka Jesús nukapkáit ? Papru paúnam ajjintiámu jarutramkamárum ? Papru náarijai imianmiárum ?
 - 14 Aya Krispun, Káyunsha imiáin, atúmniaka penke imiáichu asán, Arútam yumínkijai.
 - 15 Tuma asamtai, yákesh: - Papru náarijai imiaimiúitjai - tichatniúitrame.
 - 16 Chi ! kajinmáteajai. Kame Estépank shuárnasha imiáimjai. Chikíchnaka penke imiáichmajai.

Paun jintí.

- 17 Utsumka Jesuska: - Imiakratiá - tusanka, akuptukchamai. Antsu: - Pénker-Chícham etserutá – turútmiayi. Tuma asamtai, Paun jintí áantar ajasáink tusan, nékauwa aínsanak chichaschatniúitjai.
- 18 Kame tunkuruánam jeátin pujuiniána au: - Paun jintí yajauchiti – tuiniakuísha, Arútmanam jeátin ainiána aúka: - Paúnmani Arutman kakármari winiáwai – tuiniáwai.
- 19 Ujajmatáiniam tu aarmáiti: - *Nékaun nekámurin eménkatran, nii enentaimiarinsha unuuturártatjai -*.
- 20 Ju nunkánam nekás nekau, nekás unuúmiaru, nekás nákak jintín atsawai. Kame Arútam juyá nekátain yapajjá, emenkámiayi,
- 21 Aents^u nii nekamurijai ashí nékau Arúman nakitia asármatai, Arútmaka Paun jintí etsermarijai aya íimiaru áinia aun ewentikrátaj-sa wakerúkmiayi.

- 22 Jutíuka aents-tujíntiamun seainiákui, kriákuka nii nekátairin eainiáwai.
- 23 Tumaitkuísha, íikia Utsumka Jesús Paúnam ajjintiámu étsereaji. Tuma asamtai, jutíuka. - nu chícham natsantmáinti - tuiniáwai; kriákusha: - nu chícham wáurun chichamente - tuiniáwai.
- 24 Tuiniakuísha, jutíu kriákusha Arútam untsukma ainiána au: - Utsumka Jesús Paúnam ajjintiámu Arutman kakármarin, nii nekátairinsha páant iniaktúrmaji – tuiniáwai.
- 25 Kame Arutman waurtáiriri aéntsun nekamurínsha nankáawai. Aíntsank Arutman tujintiámuri aéntsun kakarmarínsha nankáawai.
- 26 Enentaimsatárum, yatsurú. Untsukmatíram ti nekau, ti nankámaku, ti kurintniukáitrum ? Atsá, aya peejchachítrume.
- 27 Kame Arútam ti nékaun iniatsártaj-sa, nekáchuchin untsúawai. Núnisank kakarman nupétkatin, kakármachun untsúawai.
- 28 Arútmaka ajapamu, nakitramu, muíjkiamu írunna nuna achik, nujai mash' nankámantun amúawai.
- 29 Tuma asamtai, aéntska Arútam pujámunam: - Nankamakuítjai - tíchamniáiti.
- 30 Arútmaka, atumí nekátairi, atumí waimiátairi, atumí ewémtairi atí tusa, Utsumka Jesúsnum irutmarme.
- 31 Tuma asamtai, Ujájmatatai tana aínsarmek: - *Yákesh náatea nuka Arúmanam naatniuíti* – titiárum.

AKANKAMU 2.

- 1 Wikia, yatsurú, atumiín jeámiaj nuí, unuímiaru, nékawa aínsanak Arúتمانun chichaschámiájai.

- 2 Antsu, atumjaj̄i pujakun, Utsumka Jesús Paúnam ajjintiámun nekátaj-san wakerimiajai.
- 3 Wikia nekayatan, kakármachu, natsámashim, sapíjmiashim jearmiájrume.
- 4 Nékawa aínsanak awakmaktaj taumat chicháchmiajai. Antsu lwiáikratniun kakarmarijaj̄i páant jintintiamiájrume.
- 5 Kame aéntsun nekamurijaj̄i enentáimtsuk, aya Arutman kakarmaríjaj̄i íimiaru ajasuk tusan, tu jintintiamiájrume.

Iwiáikratin nii nekátairin amaji.

- 6 Íikia íimiarun nekátairi taji. Tura aéntsun nekátairi, juyá úuntan nekátáirisha , amukí wena asamtai, nuka tátsuji.
- 7 Yama nankámtaik Arutman nekátairi ii náatkatniun amásmiajnía nu, úukma, nekachmin akuísha, nu étsereaji.
- 8 Ju nunkánam Arutman nekátairi nekachármiai. Kame nekáiniakka, Úunt ti náatu Jesusan Paúnam ajjintiacharaj̄i.
- 9 Ujájmatai warítuia ? - *Arútam nii aneamuriniun iwiamia nuna aéntska wainkiachármiai, antukchármiai, enentaimsachármiai* - tawai.
- 10 Antsu lwiáikratin Arútmanam pujana nu mash' neka asa, íinsha ujátmaji.
- 11 Kame lwiáikratin aéntsnum pujá asa, mash' aéntsnan nékawai. Tura Arútmanam pujá asa, mash' Arutmanunsha nékawai.
- 12 Íikia aéntsun anentáinkia achikcháitji. Antsu Arútam nii pénkerin suramsámiajnía nu nekatin, lwiáikratin achikiuítji.
- 13 Arutman pénkeri iyáshtichu, wáinkiachmin asamtai, aéntsun chichámejaj̄i étsertsuk, aya lwiáikratniun chichámejaj̄ink étsereaji.
- 14 Tuma asamtai, aéntska lwiáikratniun chichame nékachusa: - Nekachminiáiti – tusa, ajápeawai. Kame aéntska aya lwiáikratniun kakarmaríjaj̄ink nuna nekamniáiti.

- 15 Antsu aents^u íimiaru ashí mash' Arutman chichámejaj makúakui, níinkia yakesh makurchamniáiti.
- 16 Kame ya Úunt Jesusan anentáimmarin neká jintintiamniáit ? Íikia Utsumka Jesús anentáimia aínsarik anentáimji.

AKANKAMU 3.

Jesús-Irúnramun takárniuri.

- 1 Wikia, yatsurú, aents^u íimiarua aínsanak chichátsuk, aents^u íimiarcha, Utsumka Jesúsnum yama akíniua núnisnak, chicharkámjarme.
- 2 Átumka uuntan chichame nékachmin asákrumin, uchichia aínsanak yupichúchijaj jintintiámjarme. Núnisrumek yamáisha uuntan anentái achiátsrume.
- 3 Kame iniash' wakéramu najáneakrum, númtak akasmanáikiarum kajernaiyátsrumek ? Tuma asárum íimiarcháitrume.
- 4 - Wikia Paprunuítjai, wikia Apurunuítjai – tuiniána au, iniash' wakéramun najánainiak, íimiaru ainiáwak ?
- 5 Yáit Apuru, yáit Páprua ? Arutman pénkerin achíkiar, atumín íimiaru awajtámsartin, takakmainiána nu ainiáwai.
- 6 Wi aramjai, Apuru entsan ukatramai, tura Arútam nekás tsakatmamtikramai.
- 7 Arákmana, entsán ukáteana nusha aantráiti. Antsu atsapea nu, Arútam asa, ti nankamakuíti.
- 8 Arakma nu, entsa ukatea nusha métek takárniuri asármatai, Arútam akinkiártatui.
- 9 Tuma asamtai, íikia Arutman takarniurintji. Átumka Arutman nunké, Arutman jeéntrume.
- 10 Wi Arútam unuiniárma, pénker jeamín asán, éemka Paun ukuámjai. Chíkich nu Paúnmank jean jeamiartiniáiti.

- 11 Kame Pau wi apújsamu Utsunka Jesús asantai, yákesh yapajiashtiniáiti.
- 12 Nu Paúnam kurijai, puju jirujai, kaya wincharpátniujai, numijai, kenkujai, kampánkajáisha jeamminiáiti.
- 13 Jeamín ankant ankant awantamu penkeráshit ? Nuna nekatin, ju nunka meséakui jinium epenná, páant awajnástatui.
- 14 Nii awantamu jinium epeamaitiat esachkuínkia, núkap akikma átatui,
- 15 Antsu awantamu esakuínkia, jeamín wáitsattui. Tumaitkuísha jiniúnmani ewemráttawai.
- 16 Nékatsumek ? Átum Arutman ayámtairi asákrumin, Iwiáikratin atumiín pujawai.
- 17 Yákesh Arutman ayámtairin emesainiána au, yumínkramu áartatui. Kame nu ayantai umpuntramu atumétrume.

Jesús-Irúnramu akankáirap.

- 18 Atumek anankmamawáirap. Mash' nékajai tana nuka, nekás nekatin, péejchach' ajastiniáiti.
- 19 Kame aéntsun nekátairi Arútmajai iismaka aantráiti. Ujajmatáiniam chicháak: - *Nékau "nekasáiti" tuiniakuísha, Arútmaka "unúukame" tawai.*
- 20 *Núnisank nékaun anentaimmiarinsha "nekascháiti" tawai - túramji.*
- 21 Nuíkiá: - Aents^u ti nekau tákakeaji - tírap. Kame mash' atumniáiti.
- 22 Kame Papru, Apuru, Kaya, nunka, iwiákma, jatai, yamá ana nu, urum átatna nusha, mash' atumniáiti.
- 23 Tura átum Utsumka Jesusnáitrume. Núnisank Jesussha Arutmanuíti.

AKANKAMU 4.

- 1 Núnisank: - Jesús Utsumkan takárniuri ásar, Arutman pénkerin amainiáji - turamiartiniáitume.
- 2 Tuma asamtai, takárniuti pénker takakmastiniáitji.
- 3 Nuíkia átum makúrkurmin, juyá makúkratin makurainiakuísha, wijáinkia penke aantráiti. Kame wíkisha makumarchamniáitjai.
- 4 Winia anentáir makureachkuísha: - Penkeráitjai – tátsujai. Winia makurin aya Jesusáiti.
- 5 Jesús táatsaink áantrarum makukratírap. Kame nii mash' úukman páant awajas, nekás pénker ainiána aun ankant ankant naatmamtikkiáttawai.
- 6 Chikíchikijaink pujustin, chíkich kajerkáirap. Wáantu ajastin: - Wi Paprunuítjai, Apurunuítjai - penke tichamniáitume, yatsurú.
- 7 Ashí mash' achikiú asam: - Winia íirsarat' - tip. Kame achikiúmna nu áminiu awájsam, naatkáip.

Nankámantu ajasáirap.

- 8 Átum kuítrintin, úuntriya aínsarmek ajasú asárum, ii pujachkuínkia pénker pujárme. Tumaitkurminkia íisha úunt ajasáintji.
- 9 Antsu akatramutinkia Arútam ukúnam apujtamsar', tura jakarat' tusa, ashí mash' wáiniajnia, wáintsujnia nusha wishíkrarat' tusa, akuptamkáitji.
- 10 Nuíkia, ii Utsumka Jesús nemaru asar', wauruítji, antsu átumka ti nekáitume. Íikia penke kakarmachuítji, antsu átumka ti kakarmáitume. Núnisank átumka naatmamtikiamuítrume, antsu íikia muijkiamuítji.
- 11 Íikia tuke, yamáisha, tsukamaji, kitiamaji, entsartin utsúmaji. Awatnarar', ajapamuítji.

- 12 li ewejejai takáakur', ti pimpíaj*i*. Katsekramainiákrinish usúkraj*i*. Kajertamainiákrinish katsúnteaj*i*.
- 13 Tsanumrutmákrinsha kajératsj*i*. Íkia tuke, yamáisha, íikramu asar', tsuáta aínsarik ajapamuítj*i*.
- 14 Júnaka atumín iniatsártaj-san aateátsjarme. Antsu winia uchir ti anéamu asákrumin, jintintiátaj-san aateájrum*e*.
- 15 Kame átumka Utsumka Jesúsnum ti untsurí unuúkiartin takakuítkurminsha, atumí aparí núkap ainiátsui. Aya wiki Arutman chichámejaiink Utsumka Jesúsnum akiámjarme.
- 16 Nuúkia wiya aínsarmek ajastárum.
- 17 Tuma asán, ashí mash' Jesús-Irunramún*am* unuúniajna nuna enentaimtikrarat' tusan, winia uchir ti anéamu Timutéu, tuke Jesusan amirín asamtai, akuptájrume.
- 18 Chíkíckia: - Papru iinín jeashtatuápi - túsar, wáantu ajasarai.
- 19 Tumaitkuísha, Arútam wakerakuínkia, atumiín wárik jeán, wáantun chichamen antúrtsuk, nii túramurin nekarawártatj*ai*.
- 20 Kame Arútam-Irúnramu áantar chichamjai iniákmaatsj*i*, antsu ii najanamurijai iniákmaaj*i*.
- 21 Atumsha tuá wakérum ? Kame wikia numijai, turútskesha shíir anentáijai atumín jeamniáitj*ai*.

AKANKAMU 5.

Tuwa jíkmia.

- 1 Atumiín Arutmán awemámurin umírtsuk pujana, taman ántaj*ai*. Kame chikíckik Jesús-shuárcha turushtáiniash iniánkas, nii aparí nuwejai tuwamna pujaw*ai*.
- 2 Tumaitkuísha átumka útrum jíiki ajáptsuk, métek níijai waráa pujarme.
- 3 Wikia nú pujachíatan, pujawa aínsanak yaúnchu makurj*ai*.

- 4 Ashí mash' winia anentáir achíkrum, Jesusjai irúnrarum, nii kakarmaríjai,
- 5 Arutman tsawantriín nii wakaní ewemrat' tusárum, nu áishmank emésak susatárum.
- 6 Níijai warasáirap. Kame yajáuch' karín ishichkitiat, mash' yajáuch' awajchakáit ?
- 7 Tuma asamtai, pénger ajastin yajáuch' karín ajapatniuítrume. Kame Utsumka Jesús íikmak ajasú asamtai, nu karín takuschatniuítrume.
- 8 Nuíkia yajáuch' karín tunamtíkkiartin asamtai, Úunt Nampérnum iniáisarum, pénger anentái achíkrum nampermatárum.
- 9 - Yajáuchijai irunráirap – nuik tu aatrámjarme.
- 10 Jesús-shuarcha tsanirmau, suri, kasa, áantar-arutman tekémruinia aúnk tíchamjai. Kame atumsha ju nunkánmaya jjiinkichminiáitrum.
- 11 Antsu Jesús-shuar, yatsurú tuiniayat, tsanirmau, suri, áantar-arutman tekemrin áinia aujáisha penke irúntsuk, nijjámchikish umutnairáirap, timiájrum.
- 12 Kame Jesús-shuarchan wikia makurchamniáitjai. Antsu atumsha Jesús-Irunramúnam pujuiniána au makurchamnia-káitrum ?
- 13 Jesús-Irunramúnam pujuiniátsna aun Arútam makurartí. Átumka nu jesús-shuar, tunamtíkkiartin asamtai, jjiiktiárum.

AKANKAMU 6.

Makukrátniunam jukírap.

- 1 Atumiín itiúrchat aakuínkia, makúkratin, jesús-shuarcha asamtai, nuí iwiártsuk, Jesús-Irunramúnam iwiaratniuítrume.

- 2 Nékatsrumek ? li jesús-shuartí ashí nunkánam makurtiniáit-jinia nua ! Tura ashí mash' makurminiaitiátrumsha, itiúra yúpichuch' ana nu makurchamniáitrum ?
- 3 Nékatsrumek ? Eméskasha makurtiniáitrum. Tumaitiátrumsha, itiúra ju nunkánam itiúrchat ana nu iwiarachminiáitrum ?
- 4 Itiúrchat áakui, Jesús-shuárka unuimiarchaitiátsha iwiaramniáiti.
- 5 Penke natsaran tajai: - Iwiáratin atumiín aents^u nékau átsuk?
- 6 Kame warí urukamtai númtak makúnairum, jesús-shuárchanam wéarum ?
- 7 Númtak makúnairtin yajauchiti. Titiú pujustin, urukamtai kasarkamuitiátrum, itiúrchat apujtusmaitiátrum katsuntrach-miniáitrum ?
- 8 Antsu átumka númtak yachinniuitiátrum kasarnáikiarum, itúrchat apujtunáiyarme.
- 9 Nekátsrumek ? Itiúrchat apujainiána au Arútam-Irunrámunam jeachártatui. Ananknaiyawáirap: yajáuch' enentáimin, áantar-arutman tekemrin, tsanirmau, inchimrin, aákratin,
- 10 kasa, suri, nampén, katsékkartin, mankártinsha Arútam-Irunrámunam jeachártatui.
- 11 Atumíya yaúnchu tuma áarmia nu, yamáí Utsumka Jesúsnum Arutman Iwiaikratniurijai tsankúramu, nijjárma, iwiáiniakma ainiáwai.

Nuatnáitsuk túramu.

- 12 Ashí mash' turamniáitjai. Tumaitkuísha mash' yáinttsui. Kame penke nupétnatsuk ashí mash' tsankamkamniáitjai.
- 13 Yurúmkaka wakenuíti, tura wákeka yurumkanuíti. Tumaitkuísha Arútam mai emésrattui. Antsu ii iniashijai tsanirmashtiniáitji. Kame ii iniashí Jesusnáiti, Jesussha ii iniashiniuíti.
- 14 Arútmaka ii Úuntri Jesusan aneantmámtikin asa, íinsha nii kakarmaríjaiink inianttamkítiaji.

- 15 Nekátsrumek ? Atumí iniashí Utsumka Jesusan muchitmarin-chukáit ? Tuma aísha nankamsar' nuan muchítmari ajasmin-káitaj' ? Atsá.
- 16 *Kame nii tsanirijai iniashimiainiána au, níjajink chikíchik iniash' ajainiáwai.* Ujajmatáinmasha tu aarmáiti.
- 17 Antsu Jesusjaj iniashimiainiána au, wáimiaku ajainiáwai.
- 18 Nuatnáitsuk penke turawáirap. Kame chíkich tuná iniáshnium pujuiniátsui; antsu nuatnáitsuk tura nu, nii iniashín yajáuch' awájeawai.
- 19 Nekátsrumek ? Atumí iniashí atumniachuíti. Kame lwiáikratin atumiín pujá asamtai, atumí iniashí nii ayamtairínti.
- 20 Ti núkap kuítjaj sumakma asárum, atumí iniashijaj Arútam naatmamtikkiatárum.

AKANKAMU 7.

Antínkchamu pujustin.

- 1 Átum aatrurmármena aínsanak, áishmank nuájaj pujúschatin ti penkeráiti, tajai.
- 2 Tumaitkuísha, áantar turawaráink, áishmank nii tarímtarin takusartí. Nuásha nii áishrin takusartí.
- 3 Áishmankka, nii áishri asa: - Turutatá – takui, tarímtari amirkatniuíti. Núnisank nuásha, nii tarímtari asa: - turataj – tama, nii áishri amiktiniáiti.
- 4 Kame tarímiat nii iniashín nerentniurinchuíti, antsu nii aishriniuíti. Aínsank áishmanksha nii iniashín nerentniurinchuíti, antsu nii tarimtariniuíti.
- 5 Númtak suritnaikiáirap. Antsu anéntruatin ishíchik kanáakrum, írshimp' anankramawáij' tusárum, wárichik tsaninktárum.
- 6 Nuatnáitsuk pujustin timiájrumna nuka awemamuchuíti. Antsu áyatik penkeráiti, tájarne.

- 7 Ashí mash' wiya núnisarank nuáttuk pujusarat' tusan wakerakuísha, Arútam ankant ankant nii pénkerin suiniáwai.
- 8 Tumaitkuísha natsatíram, atumsha wajetírmesha, wiya aínsarmek pujákrumka, penkeráiti, tájarme.
- 9 Antsu katsúntratin jeachkúrmeka, páchitsuk nuatnaikiatárum. Kame: - Tsaniram pujuj' - takurninkia, nuatnáikiatin imiá penkeráiti.

Nuatnáikiaru kanákchamnia.

- 10 Jesús akupka asamtai, nuatnáikiarun wisha tajai: Nua nii áishrin ajapashtí.
- 11 Ajapaitkiúnka, chikichan niniúmtsuk, nii áishrijáink pénker iwiar, waketkití. Áishmanksha nii tarímtarin ajapashtí.
- 12 Jesús tíchamun wi tajai: Jesús-shuárka jesús-shuárchan nuátak, tarímiat níijáink pénker pujústaj-sa wakérakui, ajapashtiniáiti.
- 13 Aínsank jesús-shuar jesús-shuárchan niniúmak, nii áishri níijáink pénker pujústaj-sa wakérakui, ajapa ikiukchatniuíti.
- 14 Kame nuatnaikiámunam jesús-shuar jesús-shuárchan iwiáiniawai. Tuma asa, ni uchirisha tunanumiá akínsuk, wáimiaku akiniainiáwai.
- 15 Nuatnaikiámunam Jesús-shuárcha kanáktaj-sa wakérakka, kanakminiáiti. Turamtai jesús-shuar ankant juáwai. Kame shíir pujustin Jesús untsukmáitrume.
- 16 Tarimta: - Winia áishur kanákmiá nuna ewentikraájai - tichamniáitme. Amesha aishriyá: - Winia tarímtarun ewentikraájai – tichamniáitme.
- 17 - Jesús-shuárka itieurá Arútam untsukmáit, núnisank pujustí - tu ashí Jesús-lrunrámunam akúpeajai.
- 18 Tsupírnaku untsúkmake, tuke tsupírnaku atí. Antsu tsupírnakcha untsúkma, tuke tsupírnakcha atí.

- 19 Tsupírnaku, túrutskesh tsupirnakcháshit ? Nu íischatniuíti. Antsu Arútam awemamun umírkatin íistiniáiti.
- 20 Itiurá Arútam untzukmáit, núnisank pujustí.
- 21 Chikichan takárniuri asam Arútam untzukmaitkiúmka, ankant ajastin enentaimsaíp. Antsu jesús-shuara aínsamek takák-mastin enentaimsatá.
- 22 Kame Arútam untúkumaka chikichan takarniurintiat, ankant takák-mawai. Antsu ankant pujá untúkumaka, Utsumka Jeusan takárniuri ajáawai.
- 23 Ti kuítjai sumakma asárum, aéntsun takárniuri ajasáirap.
- 24 Nuíkia, yatsurtíram, itiurá Arútam untzukmáitrum, tuí pujárum nuí Arutman takárniuri atárum.

Nutnáikiaru, nuatnaikiacháruša.

- 25 Nuatnáikiashtin Arútam awemamun takáktsujai. Tumaitkuísha, wikia Arútam apújsamu asán, tájarme.
- 26 Ti itiúrchatnum pujá asakrin, aya júnisrik, nuátsuk pujustin penkeráiti.
- 27 Nuatkaitkiúmka nuwém ikiukip. Natsaitkiúmka, nua eakáip.
- 28 Antsu, nuatkaitkiúmka tunámeatsme. Nuásha niniumkaitkiún-ka, tunámeatsui. Tumaitkuísha itiúrchatnum pujusartin asam-tai, wikia nuna nakitiájai.
- 29 Yatsurtirmin tájarme. Ju nunkánam wárum tsawántchik pujústatji. Tuma asamtai, nuatka nuka, nuátkachu nunis pujustí.
- 30 Úutea nuka, úuteachua nunis pujustí. Waráa nuka, waráachua nunis pujustí. Sumáa nuka, sumakcha nunis pujustí.
- 31 Ju nunkánam mash' tákakna nuka, utsuma nunis pujustí. Kame ju nunkánam mash' ana nu amuwawai.
- 32 Wikia waitsáirum tusan, nakitiájai. Nuátkachuka Jeusan takatrin najáneak, tuke Jesús wakéramun amírewai.

- 33 Antsu nuátkaka nii nuwén shíir enentaimtik^sátaj-sa, ju nunkánmayá enentáimtawai.
- 34 Nuíkia, jimiará enentáimmarin tákaku asa, kanakuíti. Nua natsa niniúrtutsuk, aya Jesusan wakerámurin najana, wáimiaku, antinkchamu ajástaj-sa wakérawai. Antsu niniurtúkaka nii áishrin shíir enentaimtik^sátaj-sa, ju nunkánmayá enentáimtawai.
- 35 - Kanátsuk, Jesusjaink irunra pujúsminrum - wáitrutsuk, anánktsuk yáinktaj-san, tájarme.
- 36 Natsach' nii anajmármarin tákakea nu, nuatnaikiátaj-sa wakérakka, tunámeatsui.
- 37 Antsu natsach' tuke ankant pujústaj-sa, nii anajmarmarijaj tsanítsuk pujakka, ti pénker najáneawai.
- 38 Nuíkia ya nii anajmármarin nuátea nuka, penkeráiti. Antsu nuáttsuk pujustin imiá penkeráiti.
- 39 Niniurtúkaka nii áishrijaink tuke pujustiniáiti. Antsu nii áishri jakamtai, ankant ajás, nii wakera nuna eak, ataksha pénker nuatnaikiamniáiti.
- 40 Antsu niniúrtutsuk pujakka, imiá shíir pujústatui, wisha wáimiaku asán, tajai.

AKANKAMU 8.

Áantar- íikmak.

- 1 Enentáimin asar', áantar-íikmak yuashtiniáitji, nu mash' nékaji. Túrasha, unuimiárma wáantu awajámkurin, anenkratáinkia pénker awájtamji.
- 2 Kame: - Ti nekáitjai – takunka, nekás nekátniua núnaka unuimiarcháiti.
- 3 Antsu Arutman anéana nuka Arutman nékawai.
- 4 Nuíkia, áantar-íikmak yuamniakáitiaj' ? Atsá; kame Nekás-

- Arútam aya chikíchik pujá asamtai, áantar-arútam penke atsawai.
- 5 Kame, nayáimpiniam, nunkánmasha untsurí arútam, ankant ankant níiniun neréntniuri ainiáwai, tuiniakuísha,
 - 6 íikia, Nekás-Arútam aya chikíchkiti taji. Nuka íi Aparinti. Niiniya mash' wininiákui, íisha niinini wéaji. Aíntsink ii Úuntrisha chikichkiti: Utsumka Jesusáiti. Ashí mash' neréntniuri asa, íinsha nerentniurínti.
 - 7 Máshikia nuna nekainiátsui. Kame chíkichkia yaúnchu áantar-arútmajaj enentáimin ásar,yamáisha áantar-íikmakan yuáwar, nii anentáin páuskartin awajainiáwai.
 - 8 Nu yurúmkaka Arútman weámtiktsui. Yuákrikia yuáchkursha nuke átatji.
 - 9 Yuátin wakerákmeka, ankantáitme. Túrasha ishíchik íimiaru ainiána au tunamtikiáip.
 - 10 Kame, ame íimiaru asam, áantar-arutman ayamtairín áantar-íikmak tunámstuk yu pujamin, ishíchik íimiaru ainiána au waitmakarka, níisha tunámkar yuiniáwai.
 - 11 Nuíkia, ame tunamchakminsha, amé yatsumka, Utsumka Jesusan játairijaj ewémramu, tunámeawai.
 - 12 Yatsum ishíchik íimiaru tunámtikia asam, Utsumka Jesusnúmiq kanakniúme.
 - 13 Nuíkia, yurúmak winia yatsurún tunamtikkiamtáinkia, núnaka penke yuáshtatjai.

AKANKAMU 9.

Papru jintiámu.

- 1 Wi ankantchakáitij ? Wi Akatramuchukáitij ? Ii Úuntri Utsumka Jesusan wainkiachukáitij ? Atúmniasha Jesúsnum irurchakáitij ?
- 2 Chíkichkia: - Akatramuchuíti – turutainiakuísha, átum nu

tichamniátrume. Kame wínini Jesús takakmasú asamtai, atumsha Jesús-shuar ajasuítrume.

- 3 Tsanumrutniuítumna nu antuktárum:
- 4 Íisha yurumar', umartin ankantchakáitiaj' ?
- 5 Chíkich Akátramua aínsarik, Jesusan yachía aínsarik, tura Kaya aínsarik, ii umáijai wekasachminkiaítaiaj' ?

Wea akiktin.

- 6 Aya wiki Pernapejai, áantrar' takakmastinkiaítaiaj' ?
- 7 Atsá; kame nankín-júusha akikmáiti. Ya arakma nuka, nuna nerén yúawai. Ya sakin-yuun wáinia nuka, nuna muntsurí úmawai.
- 8 Wiki enentáimsan núnaka tátsujai. Antsu Ujajmatáiniam aarmáiti.
- 9 Kame Muisés chicháak: - *Yawá eamkamtai, páchitsuk ayuratniuítji* – tawai. Arútmaka yawánunak ta ?
- 10 Atsá; nuka íiniun tawai. Kame takáana nuka júuktaj-sa takáawai. Nusen pakártinian yáimia nuka, ishíchik jurumkítiasa yáimui.
- 11 Nuíkia, íisha atumiín Arutman chichame araakuitkiúrkia, utsumajnia nu atumiya achikchamniakáitiaj' ?
- 12 Kame atumí takárniuri akiakrumka, íinsha imiá akirkartuktiniáitume. Tumaitkuísha íikia nu seamcháitji. Pénker-Chichaman, Úunt Jesús tana nuna nakitraráink tusar', utsumákrisha katsuntrar', takákmaji.
- 13 Nekátsrumek ? Jatérmanum jatemtíkkiartin ayuramuíti. Íikmakan mainiána aúka, íikmakan yuiniáawai.
- 14 Aínsank: - Pénker-Chichaman étserea nuka, ayúramu atiniáiti – tu Úunt Jesús akupkámiai.
- 15 Tumaitkuísha, wikia nuna penke achikcháitjai. Aínsanak nuna seámтияj-san aárchamjai. Kame winia takátrujai tuke yurumá asán, seámтsuk jakanka mak aintjai.

- 16 lirsarat' tusan Pénker-Chichaman etserkashtiniáitjai. Kame nuka winia takátur asamtai, etserkatniuíťjai. Nuna etserchátnaka ti sapíjmiajai.
- 17 Winia anentáirjaiink etséreaknaka, páchitsuk: - Akirkatárum – timiniáitjai. Antsu akupkamu asán, áantrankesh takakmastiniáitjai.
- 18 Nuíkia, itiúra akíkmak ataj ? Pénker-Chichaman áantranak wara warat étserkun, nújaiink akikma aintsanketjai.
- 19 Ankantaitiátan, ashí mash' Jesús-shuar ajasarat' tusan, nii takárniuri ajasuítjai.
- 20 Jutíu-aents^u Jesús-shuar ajasarat' tusan, níya aínsanak ajasan, nii awemámurin takakchiátan, nii awemamurinsha amíajai.
- 21 Jutíun awemámurin takakeáchkunash, Jesús-shuar ajasarat' tusan, wikia Jesús Utsumkan awemámurin takakiátan, takakcha aínsanak pujájai.
- 22 Jesús-shuar ajasarat' tusan, peejcháchijai peejchach' ajasan, ashí mash' nawamainiájai.
- 23 Pénker-Chícham nuna takui, wikia tana nuna takústinian, tu wéajai.

Íimiaruti katsuntratniuíťji.

- 24 Untsurí aents^u tsékenkiar, mash': - Wikia awakmáktatjai – tuiniáksha, aya chikíchik awákmaawai. Núnisrumek atumsha Jesusan jintíni tsekénkrum, atumí itiúrchatrí nupetkárum, awakmaktárum.
- 25 Nakurin tawásap mamúrtinian iwiasmáktaj-sa, ashí mash' itit awajtínk tusa, ikiúawai. İisha penké mamuchu tawásap iwiasmáktaj-sar', katsuntratniuíťji.
- 26 Nuíkia wikia iwiarnachiátan tsekentchatniuíťjai; ijushtitiátan mánikchatniuíťjai.
- 27 Antsu iniash' wakéramun jinkiáran, nupetkatniuíťjai. Kame

1Kuri.10,1.

nupetchiátan: - Atumsha nupetkatárum – takunka, natsanmai juájai.

AKANKAMU 10.

Israéran turunámuri.

- 1 Yatsurú, yaúnchu ashí mash' íi úuntri yuránkmin apápekar, nayants tsurákматаi, katiarármiayi.
- 2 Ashí mash' yuránkmijai, nayántsajai imiániar, Muisésna ajasármiayi.
- 3 Ashí mash' nayáimpinmaya_a yurumkan yuawármiayi.
- 4 Ashí mash' kayánmaya_a entsa jíinmia nuna umarármiayi. Kame nu káyaka Utsumka Jesusáuyayi.
- 5 Tumaitkuísha, núkap Arutman amírkachar, nunka itiárkanam jakármiayi.
- 6 Nuka íinsha jintíntramji. Kame íisha níiya aínsarik yajáuch' wakerukchatniúftji.
- 7 Níiya aínsarmek áantar-arutman tekemruráirap. Kame Ujájmatai chicháak: - *Aents^u áantar-arutman namper-máiniak, yurumáwar, umárar, wasurkármiayi* – tawai.
- 8 Níiya aínsarmek tsanirmawáirap. Kame chikíchik tsawántnum jimiará-nawe-menáint-nupanti jakármiayi.
- 9 Niya aínsarmek Arútam nekapsáirap, kame napi esáimiu jakármiayi.
- 10 Níiya aínsarmek Arútam tsanumráirap, kame emésak amukármiayi.
- 11 Juka, amúkatin tsawántnum pujajnia nuna jintinramátنيون aarmáiti.
- 12 Nuíkia tunámstuk pujana nu: - iniaaráij - tusa, aneartí.
- 13 Íirshimp' nupetkamniáitrome. Kame íirshimpin nupétkatin Arútam nii kakármarin amáarme. Tuma asamtai, íirshimp'

1 Kuri.10,14.

kakarmaitkuísha, Arutman kakarmarijaj páchitsuk
nupetkamniáitrame.

Áantar-arútam tekemruráirap.

- 14 Tuma asamtai, yatsurtíram, áantar-arútam weantukáirap.
- 15 Atumsha nekátsrumek ? Wi tájana nu nekaschakáit ?
- 16 Sawe umpúnteajnia nuka, Jesusan numpejaj irútmatsjik?
Aíntsank yurúmak púuajnia nuka, Jesusan iniashijaj
irútmatsjik ?
- 17 Íikia, untsurí asarsha, métek nu yurúmkak yuakur', chikíchik
ajáaji.
- 18 Israer shuársha íikmakan yuáwar, Arútmajaj pachintkia-
chármakia ?
- 19 Antsu, áantar-íikmak íikmakcháiti. Aíntsank áantar-arútam
Arutmachuíti.
- 20 Nuíkia Jesús-shuárcha Nekás-Arútmajaj enentáimtsuk, aya
eméskajaj enentáimsar íikmakan máiniákui, eméskajaj
irunráirum tusan, nakitiájaj.
- 21 Átumka Jesusan numpé umárum, eméskajaj irunrach-
miniáitrame.
- 22 Turárum, Úunt Jesús akajkátaj-sa wakérmek ? Íisha nii
nankakakáitaj' ?

Iwiartunáiyamu.

- 23 Mash' turamniáitji, tumaitkuísha mash' turashtiniáitji. Mash'
turamniáitji, tumaitkuísha mash' pénker awatámtsuji.
- 24 Yákesh aya níiniunak enentáimtutsuk, chikíchniasha
enentáimtustí.
- 25 Ashí mash' suruiniána nu: - Tunamtíkranjash ? - íitsuk ,
páchitsuk yuamniáitrame.
- 26 Kame mash' najánkamu Arutmanuíti.

1 Kuri.10,27.

- 27 Jesús-shuarcha ipiatma ayurtámkurmin: - Tunamtíkrámeaji - tútsuk, mash' yuatárum.
- 28 Antsu: - Nu áantar-íikmak asamtai, yuawáip - turamkur-minkia, nuna tunamtikiáij tusárum, yuawáirap.
- 29 Tumaitkuísha: - Tunachuíti – takunsha, chíkich: -Tunáiti – takuínkia, winia enentáimmiarun ajapatniukáitij ?
- 30 Chíkich - Yajauchiti - tuiniakuínkia, wi Arutman yuminksan yuamniakáitij ?
- 31 Nuíkia umákrumsha, yurumeákrumsha, átum mash' najánkuram, Arútam náatmamtíkiatin turatárum.
- 32 Antsu jutíu, kriáku, Jesús-Irunramusha tunamtíkiáirap.
- 33 Wiya aínsarmek átum wakéramu eátsuk, mash' ewemrarat' tusárum, nawamkatárum.

AKANKAMU 11.

Nuán entsármari.

- 1 Wi Utsumka Jesusa aínsanak ajajna, aínsarmek atumsha wiya núnisrumek ajastárum.
- 2 Wi jintintiamájrumsa núnisrumek amiákrumin, yumínkjarme.
- 3 Tumaitkuísha nekatárum: Arútam Apa Utsumka Jesusan akúpeawai. Aínsank Utsumka Jesús áishmankan akúpeawai. Tura, áishmankka nuan akúpeawai.
- 4 Áishmank muukén nukuk anentruá, Arutman chichamen etserkunka, nii Úuntrin úumrawai.
- 5 Aínsank nua muukén nukútsuk anentruá, Arutman chichamen etserkunka, intiash' tsupirma aínsank ajás, nii úuntrin úumrawai .
- 6 Nuíkia, nua muukén nukúktinian nakítiakka, intiashín tsupirtí. Antsu tsupimiártinian natsámakka, nukumaktí.

- 7 Áishmank Arutman nakumkámuri asa, nii muukén nukukchatniuíti. Antsu núaka áishmankan nakumkamurinti.
- 8 Kame áishmank nuánmaya winiátsui. Antsu núaka aishmanknumiá winiáwai.
- 9 Nuíkia áishmankka nuánu najanachmáiti. Antsu nua áishmankna najanamuíti.
- 10 Tuma asamtai, núaka: - Amirniúítjai – tusa, Pásuk iyam, muukén nukuktiniáiti.
- 11 Tumaitkuísha, nua aishmankjáiinchu pujuschamniáiti. Aíntsank áishmank nuáchujai pujuschamniáiti.
- 12 Kame Arútam aishmanknumiá nuán najanawaitkuísha, áishmank nuánmaya akiniáiti. Tuma asa, Arutmánmaya mai wininiáwai.
- 13 Átum warítrum ? Nua muukén nukútsuk, Arutman anentruamniakáit ?
- 14 Aishmanktí intiashrúrtin natsamchakáit ?
- 15 Antsu nua intiash' ajakín penkerchakáit ? Kame muukén nukuktin intiash' susamuíti.
- 16 Wátsek, aents^u tuke umíktinian nakítiakka, nekatí: líkia, tura Jesús-irunrámusha páchitsuk amírkat' tusa,wakérawai.

Yurúmak-Nantar.

- 17 Nuna tájarne. Kame atumí irunrámuri pénker awájtamtsuk, yajáuch' awájtamearme.
- 18 - Irúnrar kajernainiáwai - tu ujatkarmia nu, nekasáshit tajai.
- 19 Atumiín nekás-iwiarín páant ajasarat' tusan, tuke aushá chicham atiniáiti.
- 20 Jesusan iniashí yuatin irúntsurme.
- 21 Kame Jesús-Irunramúnam chíkichkia nii yurúmkarin yuáwar nampenawai; chíkich tsukarín waitiainiáwai.
- 22 Atumí jeén yurumárum umarchamniakáitrum ? Jesús-Irúnramu emésrarum, utsumainiána au iniatsártaj-srum

- wakéarmek ? Turakruminkia: - Penkeráiti - timinkiáitiaj ?
- Atsá, yajauchiti - tajai.
- 23 Kame Utsumka Jesús jintintruámia núnisnak, wisha jintintjiarme. Kame nu kashi, niin makuiniátsaink, ii Úuntri Jesús yurumkan achik,
- 24 Arutman yuminkias, púuk, chicháak: - Juka winia iniashruíti, atumnia suna nu. Atumsha winia enentáimtusarum, ju najanatárum – tímiayi.
- 25 Núnisank yurumá amuk, sawen achik, chicháak: - Juka winia numparuíti tuke aéntsun íruna nu. Tuke winia enentáimtusarum umartárum.
- 26 Kame Utsumka Jesús támm, ju yurúmak yúakrum, ju sawe úmakrum, nii jakámuri etséearme.
- 27 Ya nii tunarin ajáptsuk, ju yurumkan yua, ju sawen uma, Jesusan iniashín, nii numpeénsha tunámeawai.
- 28 Nuíkia ashí aents^u ju yurumkan yútsuk, ju sawen úmutsuk, nii anentáin iwiaratniuíti.
- 29 Kame, ya enentáimtusuk Jesusan iniashín yua, nii numpensha uma, nuka nii amuánkrin yúawai.
- 30 Tuma asamtai, atumiín untsurí aents^u jáinia, pimpiraru, jatansha jákaru ainiáwai.
- 31 Íik makumakrínkia, yákesh makurmarcháintji.
- 32 Kame: - Yajáuch' aéntsjai makurma áaraink - tusa, Úunt Jesús iin iwiartamrátasa makúrmaji.
- 33 Tuma asamtai, yatsurú, Yurúmak-Nantárum irúnratin nákanaistarum.
- 34 Tsukamákrumka, makurma aij tusárum, atumí jeén yurumatárum. Chikíchnaka atumiín jeáttajna nuí jintintiátjarme.

AKANKAMU 12.

li takátrijai irunma.

- 1 Yatsurú, lwiáikratin ashí mash' aéntsun súana nu nekaku tusan, enentaimtíkjiarme.
- 2 Átum Jesús-shuarchaúyarumna nuínkia, áantar-arútam chichachu, iwiákcha tekemrurmiárme.
- 3 Kame yákesh lwiáikratniun takaku: - Jesús yajauchiti - tíchamniáiti. Aíntsan lwiáikratniun tákakcha: - Jesús ii untrinti – tichamniáiti.
- 4 lwiáikratin chikichkitiat, untsurí pénkerin ankant ankant amáaji.
- 5 Úunt Jesús chikichkitiat, ankant ankant wea awájtamji.
- 6 Untsurí takat ainiakuísha, aya chikíchik Arútmak ashí aéntsnum takákmawai.
- 7 Ashí mash' yainiaikiarat' tusa, lwiáikratin nii pénkerin ankant ankant suáwai.
- 8 Kame, aya lwiáikratin chikichan enentáimin awájeawai; chikichan nékau awájeawai;
- 9 chikichan íimiaru awájeawai; chikichan tsuákratin awájeawai;
- 10 chikichan aénts-tujíntiamun najanín awájeawai; chikíchnaka wáimiaku, iwiánchin nekau, untsurí chichaman chicháu awájeawai; chikíchnasha nu chichaman etserin awájeawai.
- 11 Kame aya chikíchik lwiáikratniuk nii wakera nuna ashí aéntsun ankant ankant súawai.

Jesús-Irúnramu iniashia aniuíti.

- 12 li iniashí chikichkitiat, untsurí muchítmarin tákakeawai. li muchitmarisha untsurí ainiayat, chikíchik iniash' ainiáwai.

1 Kuri.12,13.

- 13 Aínsarik íisha, jutíu, kriáku, akupín, takárniusha, imiáimiam nam chikíchik lwiáikratin achikiú asar', Jesúsnum chikíchik iniash' ajasuítji. Kame ashí mash' nu lwiáikratin achikiuítji.
- 14 Iniashkia chikíchik muchitman takútsuk, untsurí tákakeawai.
- 15 Kame, náweka: - Ewejcha asán, iniashcháitjai – takusha, iniashkéte.
- 16 Kuishisha: - Jícha asán, iniashcháitjai - takusha, iniashkete.
- 17 Iniash' aya jiyaitkiúnka, itiúrak antukat' ? Aínsank aya kuishkitkiúnka, itiúrak nekaprat' ?
- 18 Tuma asamtai, Arútmak ii iniashiín untsurí muchítmarin apujsáiti.
- 19 Chikíchik muchítmajai iniash' aminkiaít ?
- 20 Atsá. Kame aya chikíchik iniash', untsurí muchítmarin tákakeawai.
- 21 Tuma asamtai, ji: - Ewején utsúmatsjai - tichamniáiti. Aínsank múuksha: - Nawén utsúmatsjai - tichamniáiti.
- 22 Kame, muchitma penke áantar ainiátsui.
- 23 Antsu muchitma natsántmai awajtámeajnia nu, shíir wáinkiar', nukúaji.
- 24 Kame, muchitma nasantcha awajtámeajnia nu, nukúatsji. Arútmaka iniashín najana, nii muchítmari imianchaitkuísha, imiáu awajsámiayi.
- 25 Ashí mash' iniashín muchítmari kanátsuk, pénger yainiaikiarat' tusa, tu najanámiayi.
- 26 Kame, chikíchik muchitma najaimiákui, mash' najamainiáwai. Aínsank chikíchik muchitma waráakui, mash' warainiáwai.
- 27 Atumsha Jesusan iniashí asárum, ankant ankant nii muchitmaríntrume.
- 28 Nuíkia, Jesús-Irunramúnam Arútam juní apujsámiayi: Éemka Akátramun, nuyá Wáimiakun, nuyá Unuikiártinan apujsámiayi. Nuyanka ju wininiáwai: Aénts-tujíntiamun

1Kuri.12,29.

- najanín, tsuákratin, yáinkratin, akúpkartin, nekashtai-chichaman chicháu ainiáwai.
- 29 Nuíkia mash' Akátramu áinia ? Mash' Wáimiaku áinia ? Mash' Unuíkiartin áinia ? Ashí mash' aénts-tujíntiamun najanainiáwak ?
- 30 Ashí mash' tsuákratin ainiáwak ? Ashí mash' nekashtai-chichaman chicháu ainiáwak ? Ashí mash' nekáshtai-chichaman jintín ainiáwak ?
- 31 Atsá. Átumka Arútam éemka apujsamia nu achíktaj-sa wakeruktárum. Tumaitkuísha, wikia nuna nankakan iniaktustátjarme.

AKANKAMU 13.

Anénkratma.

- 1 Ashí aéntsun chichamen, Pasukan chichámensha chichayatan, anenkratcháknaka, tuntuí, shakap meserma aínsanak áantran chicháajai.
- 2 Arutman chichamen etseriátan, mash' úukman, tura ashí aéntsun nekámurin nekayatan, iimiármajai náintian umuchiayatan, anenkratcháknaka penke aantráitjai.
- 3 Ashí wi tákakman utsumáinia aun suayátnak, shíir awajsátasa jinium esayatan, anenkratcháknaka áantran túrajai.
- 4 Anenkrátniuka katsuntniuíti; tsankáiti. Anenkrátniuka akásmateatsui, atsánmatsui, wáantu ajatsui.
- 5 Anenkrátniuka natsanmai ajáatsui; inchimrincháíti; kajechuíti, kajerkamuitiat kajinmáteawai.
- 6 Waitruámunam waráatsui, antsu nekás támanum wararui.
- 7 Itiurchatnumsha menkáatsui; mash' tuiniána aun ántawai; pénker ana nuna nákwai, ashí mash' katsúnteawai.

1 Kuri.13,8.

- 8 Ju nunka amukamtai, nekashtai chicham atsuttui; aéntsun chichamsha atsuttui; nii nekámurisha atsúttui. Antsu ii anenkrátmari penke amukáshtatui.
- 9 Kame ju nunkánam nekashtai chicham, tura aéntsun nekamurisha aya ishíchik nékaji.
- 10 Antsu ju nunka mesérmatai, mash' nekawákrin, ishíchik nekamu menkarattui.
- 11 Wikia uchi asán, uchia áintsanak chichaúyajai; uchia aínsanak enentáimniúyajai. Tura, uunt ajasan, nuna iniaisáitjai.
- 12 Núnisank yamáikia ashí mash' mushátma wáinji. Ukunma núí páant wainkiáttaji. Yamáikia ishíchik nékajai. Antsu ukunma núí winia nékarea aínsanak páant nekáttajai.
- 13 Yamáikia ii iimiármari, ii nákamuri, ii anenkrátmari ainiáwai. Tumaitkuísha ii anenkrátmari imiá nankamakuíti.

AKANKAMU 14.

li pénkerijai takákmamu.

- 1 Anénkratin ajastin eaktárum. Núnisrumek ashí mash' Arutmá pénkeri wakeruktárum. Antsu etsérkartin ajastin imiá wakeruktárum.
- 2 Kame nekáchmin-chichaman chichá nu, Arúmajai chichás, atsúnmayá chichaman étserkuisha, ii nekachminiáitji.
- 3 Antsu etsérkartin Arutman chichamen páant étserak aents^u pénker, kakáram, waráu awájeawai.
- 4 Aínsank nekachmin-chichaman chicháaka, níinki pénker ajáawai. Antsu etserkártinkia Jesús-Irúnramun pénker awajui.
- 5 Ashí mash' nekáchmin-chíchaman chichásuk tusan wakérajai. Tumaitkuísha, Etsérkatin ajasuk tusan imiá

- wakérajai. Antsu Jesús-Irúnramun pénker awájsatin, nekáchmin-chícham jintiak^u tusan, wakérajai.
- 6 Yatsurú, wi atumiín jeán, nekáchmin-chichaman chicháakui, átumka atsúnmaya chícham, tura Arutman chichame nekawáintrumeash ?
- 7 Aínsanak pinkiuín, tumánknasha nánkamsan tuntuiyakui, warinia tuntuíyaj nuna, ya nekamniáit ?
- 8 Aínsanak tuntuín nánkamsan tuntuiyakui, urukamtai tuntuíyaj nuna, ya nekamniáit ?
- 9 Aínsarmek atumsha nánkamsa chicháakrumin, warí chicháarum nuna yaki nekat' ? Chichármena nuna nekainiachkuínkia, pénke áantrarum chicháarme.
- 10 Ju nunkánam untsurí chícham irunkuísha, ankant ankant nii chichamen nekainiáwai.
- 11 Aents^u nii chichamen chicháakui, wikia chíkich chichaman chicháa asán, níijai anturnaikiachminiáitjai.
- 12 Tuma asamtai, Arutman pénkeri wakerakrumka, Jesús-Irúnramun yainiána au seatárum.
- 13 Nuíkia, nekáchmin-chichaman chicháa nuka, nuna jintiátin Arutman seatí.
- 14 Kame nekáchmin-chichamjai anentráknasha, enentáimtsuk anéntrajai.
- 15 Antsu chichámrujai anéntrakun, enentáimsan anéntrajai. Ujajmáknaka, enentáimsan ujájmajai.
- 16 Irunramúnam nekáchmin-chichamjai Arútam naatmam-tíkiákmin, nu chichaman nékachu, itiúrak nekasáiti tití ?
- 17 Nekáchmin-chichamjai naatmámtikma penkeraitiat, nu aéntsun ikiakáatsui.
- 18 Wikia atumín nankáakan, nekáchmin-chichaman chicháa asán, Arutman yuminkjai.
- 19 Tumaitkuísha Irunramúnam ashí mash' nekawarat' tusan núkap nekáchmin-chichamjai chichástinian aantráiti. Antsu aya ishíchik nekáinia-chichamjai chichastin, penkeráiti tajai.

1 Kuri.14,20.

- 20 Yatsutíram, úchia aínsarmek enentaimsáirap. Antsu úunta aínsarmek enentaimsatárum. Aya yajáuchiniam úchia aínsarmek atárum.
- 21 Ujajmatáiniam Arútam chicháak: - *Yajaya aéntsjaí, nekáchmin-chichaman chicháa, nujaj páant chichaakuísha, penke anturtukchártatui* - tawai.
- 22 Kame íimiarcha enentaimsarat' tusa, Arútam nekáchmin-chichaman súrameaji. Antsu, íimiaru enentaimsarat' tusa, Arútam páant etsértamji.
- 23 Jesús-Irúnramunam ashí mash' nekáchmin-chichaman chichainiákui, Jesús-shuárcha nuna wáinkiar: - Wáurka ainiáwai – tiarminkiáit ?
- 24 Antsu, Jesús-Irúnramunam ashí mash' Arutman chichamen páant chichainiákui, Jesús-shuárcha nuna antúkar: - Tunamkáitjai - túsar, enentáimin ajainiáwai.
- 25 Tura, nii anentáiín tákakainia nu nekáram: - Arútam atumiín pujáwai - túsar, Arutman tekemrurártatui.

li pénkerijai itiurkatniúitaj' ?

- 26 Ayu, nunisáiti, yatsurú. Átum irúnkuram, Jesús-Irúnramu pamparat' tusárum, ashí mash' ankant ankant nii anéntrijai, nii nekamurijai, nii etsermarijai, nekáchmin-chichamjai, tura chichaman jintiamurijai takakmastí.
- 27 Nekáchmin-chichamjai aya jímiarchik, menáintiuchik ankant ankant chichasartí. Tura chíkich nuna jintiatí.
- 28 Jintíntiartin atsákui, Irunramúnam penke chichakchartí; aya níinki Arútmajai chichasartí.
- 29 Wáimiaku áinia au, jímiar, menáint chichainiákui, chíkichkia nekasáshit túsar, íisartí.
- 30 Antsu, nu chichámaik wáimiaku ajás chicháakui, éemka chicháa nuka itiatkatí.

1 Kuri.14,31.

- 31 Waimiakutíram, ashí mash' neká, kakáram ajasarat' tusárum, ankant ankant chichasminiáitume.
- 32 Wáimiaku tuiniána aun chíkich wáimiaku iisartiniáiti.
- 33 Kame Arútmaka pachíniak chicháatsui. Antsu manikiaráink tusa, chikíchik chichámnak chicháawai.
- 34 Ashí Irunramúnam urukáinia aínsarmek ajastárum. Núaka Jesús-Irúnramun jintiáchminiáiti. Antsu Ujajmatáiniam tana núnisank chicháatsuk, amirkatniuíti.
- 35 Antsu pénker nekatsa wakérakka, jeánam nii áishrin inintrustí. Kame núaka Jesús-Irunramúnam chichaktin tsankatkachmáiti.
- 36 Arutman chichame atumiya j̄j̄inkink, turútskesha aya atumíínk enkemawáit ?
- 37 Nuíkia wáimiaku, nekás Arutman chichamen achikiármia nuka, tájana nuna nekás Arútam awemámuíti, tiartatui.
- 38 Nuna táchakka, waimiakcháiti.
- 39 Amúakun, yatsurú, tájarme. Wáimiaku ajástaj-sa wakerakrumsha, nekáchmin-chícham surimkiáirap.
- 40 Antsu, ankant ankant pénker irunra pujustárum.

AKANKAMU 15.

Aéntsun aneántmari.

- 1 Yatsurú, Pénker-Chichaman etsérkamij nuna enentaimtík-jjarme. Átumka nu achíkrum: - nekasáiti - tárume.
- 2 Wi timiájrumna núnisrumek umiakrumka, ewemráttarme. Antsu umiachkúrmeka, áantra iimiaruítrume.
- 3 Kame wi achíkmij nuna páant ujakmiájrume. Utsumka Jesús Ujajmatáiniam tana núnisank, ii tunarin japírtaj-sa jarutrámkamij.
- 4 Aínsank Ujajmatáiniam tana núnisank, iwiarsamuitiat, menáint tsawant kanar, aneántmiayi.

- 5 Nuyá, Kaya taman wantíntiuk, nii akatramurínsha wantintiukármiai.
- 6 Nuyá, ewej-washim Jesús-shuáran wantintiúkmiayi. Nuka ishíchik jakármatai, untsurí iwiáku pujuiniáwai.
- 7 Nuyá, Santiákun wantíntiuk, tura nuyá ashí nii akatrámurin wantinkiámiayi..
- 8 Tura ukúnam, wi yajáuch' aínk, wantintiurkámiayi.
- 9 Kame wikia Jesús-Irúnramun kajerka asán, Akatramún-maya imiancháitjai: - Akatramuítjai - tichamniáitjai.
- 10 Tumaítkuísha, Arútam wakera asamtai, Akatramuítjai. Nii pénkerin achikiú asán, nii pénkerijai ti takákmasan, ashí Akátramun nankáajai.
- 11 Nuíkia wi níijai métek etsérekakrin: - Nu nekasáiti – tírum, iimiarmiárme.
- 12 Tuma asamtai: - Jesús jakamúnmayá aneántmiayi - takurnisha, urukamtai chíkichkia: - Jákaru aneantchártatui - túinia ?
- 13 Jákaru aneantainiachkuínkia: - Jesussha aneantchámiayi - titiniáitji.
- 14 Jesús aneantchaitkuínkia, ii etsérmari, ii iimiarmarísha penke aantráiti.
- 15 Jákaru aneantainiachkuínkia, waitriniáitji. Kame Arútam Jesusan aneantmamtíkiachu: - Aneantuíti - taji.
- 16 Jesús aneantchaitkuínkia, jakárusha aneantchártatui.
- 17 Jesús aneantchaitkuínkia, ii iimiármari penke áantar asamtai, ii tunari japircháitji.
- 18 Nuíkia Jesúsnum jakarmia nusha, amukaruíti.
- 19 Aya ju nunkánam pujústin Jesúsjai iruneákrikia, ti waitnentmáitji.
- 20 Antsu nucháiti. Kame ashí mash' jákaru anentarat' tusa, Jesús éemka aneántmiayi.
- 21 Aya chikíchkinink ii jatáiri ta asamtai, aya chikíchkinink ii aneánttinri táawai.

1 Kuri.15,22.

- 22 Aya Atanknúmani ashí aéntsti jáaji. Núnisrik aya Jesusnúmani ashí aneántatji.
- 23 Tumaitkuísha, métek aneantcháltaji. Antsu éemka Jesús aneántmatai, ukúnam atak nii páant táakui, Jesús-shuársha aneántártatui.
- 24 Ju nunka amukamtai, Jesuska ashí mash' ju nunkan úuntrin, kakarman, akúpniunsha nupétak, nii Aparí ashí mash' úuntri atí tusa, Arútam-Irúnramun susáttawai.
- 25 Kame, Arútam Apā nii numasrin nupetkat' tusa aya Jesúsna^k ju nunkánam apujsámiayi.
- 26 Tura, Jesuska nii numasrin nupétak, ukúnam ii jatáirin amúktatui.
- 27 Arútam Apā ashí mash' nii tarimtáiri aarat' tusa, Jesusan apujsa asamtai, Jesuska aya nii Aparín nankakachminiáiti.
- 28 Antsu, Jesuska ashí mash' nupétak, **nii Aparí Arutman ashí úuntri ajasmati niisha**, amírkattui.
- 29 Tumachuitkiuínkia, jaka nantákchatin ainiakuínkia, urukamtai aénts^u jakanun imiánainia ? Kame jaka aneántchakka nuna utsúmatsui.
- 30 Íisha urukamtai itiurchatnumsha Arúmanu takákmaaj' ?
- 31 Yatsurú, nekás tájar^{me}, atumnian ii Úuntri Utsumka Jesúsnum takákma^{stin}, itiurchatnum pujajai.
- 32 Epísiunam aents^u kajén yawá ániujai maníkmiaj nuísha, warinia awakmákmiaj ? Kame jaka aneantchartiniaitkiuínkia: - Tuke tsawant yurumatái, umartái, kame kashín amukáttaji - titiniáitji.
- 33 Anankmamawáirap. Kame tunamtíkkartin penker ana nuna emesainiáwai.
- 34 Aneartárum. Tunamkáirap. Kame Arutman chichamen penke nékachu atumiín pujuiniáwai. Nuka natsararat' tusan, tájar^{me}.

Urukú aneantiniáitiaj' ?

- 35 Chíkich chicháiniak: - Jákaru urúkuk aneantarát' ? Warí iniashijink aneantarát' ?
- 36 Nekachuá ! Arákmamna nu, tsapáitiaj tusa, jakatniuíti.
- 37 Numi tsapáana nu, jinkiáiya nunischáiti.
- 38 Kame Arútmaka jinkiáin ankant ankant tsapamtik, métekrak nu numik awajtsui.
- 39 iniash' metekcháiti. Kame aéntsun iniashí, yajasman iniashichuíti. Aíntsank yajasman iniashí, chinkín iniashichuíti. Núnisank chinkin iniashí, namakan iniashichuíti.
- 40 Yakiyau iniash' awai. Nunkayau iniashsha awai. Tumaitkuísha métek tsáapin awajainiátsui.
- 41 Etsan tsáapniri, nantun tsáapniri, yaan tsáapniri métek ainiátsui. Aíntsank yaan tsáapniri chíkich yáajai metekcháiti.
- 42 Núnisank jaka métek aneantainiátsui. Kame kaú arakma, kaúchu aneánteawai.
- 43 Muíjmiai arakma, náatu aneánteawai. Kakármachu arakma, kakáram aneánteawai.
- 44 Iniash' jau arakma, jáacha aneánteawai. Kame iniash' jau ana, aíntsank jáacha iniashsha awai.
- 45 Ujajmatáiniam aárma chicháak: - *Atank éemka najánamu, antinkmin-iniash' iwiaku takakuya* - tawai. Antsu ukúnam Atank antinkmincha-iniash' iwiaku takústatui.
- 46 Antinkmin-Iniashín iwiákmari éemka winiáwai; antsu antínkmincha-iniashín iwiákmari ukúnam winiáwai.
- 47 Kame aénts^u éemka tamia nuka nunkanmayáiti. Antsu ukúnam tamia nu nayáimpinmayáiti.
- 48 Nuíkia nunkánmayá tamia iniashín ashí aénts^u nunkánam takakainiáwai. Antsu, nayáimpinmayá tamia iniashín ashí mash' nayáimpiniam takakainiáwai.

1 Kuri.15,49.

- 49 Yamáikia nunkánmaya aéntsua aniuítiatar', nuyá nayáimpinmaya aéntsua aínsarik átatji.
- 50 Pénger anturtuktárum, yatsurú. Ii namanké numpéntin asa, Arútam-Irúnramunam enkemachminiáiti. Aínsank kaúruka kaúshtainiam wayachminiáiti.
- 51 Yaúnchu úukma nu yamáí nekatárum. Ashí mash' jakáshtatji. Tumaitkuísha ashí mash' yapajniáttaji.
- 52 Amuámunam nékachma kachun umpuármatai, wárichik ashí jákaru aneantármatai, iwiáku pujatisha yapajniáttaji.
- 53 Kame ii iniashí kaú, kaúchu ajastiniáiti. Aínsank ii iniashí jau, jacha ajastiniáiti.
- 54 Nuíkie iniash' kaú, kaúchu ajásmatai, tura iniash' jau, jacha ajásmatai, Ujajmatáiniam tana nu aminkiáttawai. Kame chicháak: - *Jatai nupétkamu asa, amukayi.*
- 55 *Játaiya, tuí awakmakum ? Játaiya, ijiútairmesh tuí pujá ? – tawai.*
- 56 Kame, jatain ijiútairi tunáiti. Awemámuka tunán imiá kakáram awajsámiayi.
- 57 Tumaitkuísha Arútam ii Úuntri Utsumka Jesusnúmani jatáinmaya ewémtikramra asakrin, tuke yuminksatái.
- 58 Nuíkie, ti anéamu yatsurú, ishámstuk, natsámstuk, nakás kakáram ajásrum, ii Úuntri Jesusan takatri pénger najanatárum. Kame nu takat aantrachuíti.

AKANKAMU 16.


Ikiunáiyamu.

- 1 Karasiánmaya Jesús-Irúnramun tímiajna, aínsarmek atumsha Jesús-shuar yáinktin, suámunam atumí kuítri apujsatárum.

- 2 Tuke Ayamtai-tsawanttin ankant ankant atumsha ampirma irúmrarum, wi jeátaj nuí surustárum.
- 3 Wi jeán, átum ankant ankant apújsamun Jerusarénknum jukiarat' tusan, aénts anáikiamun papíjaj ataksan akupkáttajai.
- 4 Antsu: - Ameksha wetá – turutkurminkia, níisha wijai winiártatui.
- 5 Masitiuniánmani atumiín jeáttajai. Masitiúnianam juakcháttajai.
- 6 Antsu, yumi nankámam atumiín pujúttajai. Nuyá atumsha tuá wétataj nu nekaprutatárme.
- 7 Arútam wakerakuínkia, atumiín wárik nankámatsuk, untsurí tsawant pujústaj-san wakérajai.
- 8 Epísiunam Pentekustés tsawantan nankámastatjai.
- 9 Kame, untsurí numásur ainiakuísha, juínkia Jesusan takatrí ti shíir takastin awai.
- 10 Timutéu jeakuínkia, ishámstsuk natsámstsuk takakmasat' tusárum, ikiakartárum. Kame níisha wiya núnisank Jesúsnum takákmeawai.
- 11 Yákesh nakitraráink. Antsu, wi yatsurjaj irunran naka asamtai, pénger wará warat waketkit' tusa yainktárum.
- 12 li yachi Apuru ii yachijaj wi atumiín akupkamuitiat, yamáí penke nakítiawai. Antsu ankant ajás jeáttui.
- 13 Kakáram ajastárum. Nekás íimiaru ajásrum, aneartárum.
- 14 Anenkrátmajaj mash' najanatárum.
- 15 Júnash tájarme, yatsurú. Estépanas nii shuarjaj, Akáyanam éemka Jesús-shuar ajásar, yamáí Jesús-Irúnramun ikiakainiáwai.
- 16 Nuka, níijaj takakmainiána nusha, atumsha umirkatárum.
- 17 Atumiya Estépanas, Jurtunatu, Akáikiusha winia iraiyármatai, níinini atumín enentáimsan shíir warásmajai.
- 18 Nuka winia atsánkrurar, atúmniash atsankrármarme. Tuma asamtai: - pénger ainiáwai – titiárum.

1 Kuri.16,19.

- 19 Asiánmaya Jesús-Irúnramu amikmátmarme. Aíntank Akira, Prískasha, Jesús-shuársha nii jeén irunainiána nusha, Úunt Jesúsnum amikmátmarme.
- 20 Ashí mash' Jesús-shuar amikmátmarme. Atumsha miniaknáikiarum, mai amikmanái ajatárum.
- 21 Wi Papru asán, júchiniak winia ewéjrujai aáran, amikmáajrume.
- 22 Úunt Jesusan nakitia nu, yuminkramuítí. Maran atha: Uuntá winitíá.
- 23 Úunt Jesusan pénkeri atumjai tuke pujustí.
- 24 Utsumka Jesúsnum mash' aneájrume.



PAPRU KURÍNTIUN ATAKSHA AÁTRA.

AKANKAMU 1.

Éemkari.

- 1 Papru, Utsumka Jesusan Akatrámuri Arútam apújsamu, yatsur Timutéujai, Kuríntiunam Jesús-Irúnramu, mash' Akáyanam Jesús-shuar matsatáinia nusha, amikmainiáji.
- 2 Ii Aparí Arutman, ii Úuntri Utsumka Jesús-nasha pénkeri atumiín tarímtanam pujustí.

Paprun waitsámuri.

- 3 Arútam, ii Úuntri Utsumka Jesusan Aparí, wáit-anénkratin, atsánkkartin asamtai, naatmamtikkiatái.
- 4 Kame chíkich atsánkratin, Arútam tuke ii atsankramuítji.
- 5 Iinín Utsumka Jesusan waitsámuri akuísha, Utsumka Jesussha ti imiá atsánktamji.
- 6 Waitiákrisha, átum atsankrar' ewentikrátaj'-sar', waitiáji. Ii atsankramuitkiúrkia, atumsha íiya aínsarmek waitiámunam atsánkramu átatrume.
- 7 Kame íijai waitiákrumka, íijai atsánkramu átatrume. Nu páant nékaji.
- 8 Yatsurú, Ásianam túrunamíaj' nu, atumsha nekatárum. Nuí ti waitsar', ii iwiakmarisha emenkánkiasmíaji.
- 9 Jakátasa pujá asar', íik enentáimtumatsuk, Arútam jákarun aneantmamtíkiattui nuí enentáimsamji.
- 10 Kame Arútam jakamúnmaya ewentikramra asakrin: - Nekás tuke ewentikramráttaji - taji.

11 Atumsha atumí anéntrijai yainkratkatarum. Untsurí anentrutramainiakuínkia, Arútam yáintmakrin, untsurí yumínksártatui.

Irastin yapájamu.

- 12 Ju nunkánam ii anentáijai Arútam wakéramu tuke najana asar', wáantu ajátsuk: - Arútam nii pénkeri amasuítji - túsar', ti waráaji.
- 13 Wáitrutsuk aáru asákrin, aárma nu aújsarum, nekás núti tusárum, tuke pénker nekatárum.
- 14 Iiyáitji átum waráamu ishíchik neka asákrumin, atumsha Úunt Jesusan tsawantriín ii waráamuri átatrume.
- 15 Tu enentaimsar', ataksha Jesusan pénkeri ejétaj-sar', éemka atumiín jeétaj-sar' wakerimji.
- 16 Nuyá Masetúnianam weri, Masetúnianmaya atumiín ataksha tari, Jutéanmani jintia nekapkártuak^u túsar', wakerimji.
- 17 Nuna enentáimtsukeash tímiaj ? Aya winia anentáirjai tiniu asán, jimiará enentáimmianash takúsmiaj ?
- 18 Atsá. Antsu Arutman chichame átum etserkámiaj' nuka, jimiará enentaimmiachuíti.
- 19 Kame Arutman Uchirí Utsumka Jesús, wi, Sirwanu, Timutéusha etserkámiajnia nuka, jimiará enentáimmian takútsuk, chikíchik enentáimmianak takúsmiayi.
- 20 Ashí mash' Arútam timia nu Jesúsnum aminkia asamtai, Jesús tana nu nekasáiti túsar', Arútam naatmámtikji.
- 21 Utsumka Jesúsnum Arútam iin ikiakátmar', utsúrmakji.
- 22 Níisha, níiniu awajtamsar', ii anentáin lwiáikratniun pénkerin apujturmasuítji.
- 23 Nekás tájarme, Arútmash írui, atumín wáit-aneáknasha, Kuríntiunam winíchmiajai.

24 Kame nekás íimiaru asákrumin, atumiín nankámantu ajástinian nakitiájai. Antsu atumín waramtíksátaj-san wakérajai.

AKANKAMU 2.

Tunartin tsankúramu.

- 1 Kúntuts pujúsuk tusan, atumiín tacháitjai
- 2 Wi atumín kúntuts awajkuínkia, yaki winia waramtikrusat'? Aya wi nuik kúntuts awajsámiaj nuke waramtikrusminiáiti.
- 3 Wi atumiín jeámtai, kúntuts awajtusáirum; antsu atumjaj métek warasmij tusan, nuna aatrámjarme.
- 4 Kúntuts, útchim aatrámjarmena núnaka, atumín kúntuts awajsátaj-san aárchamjai. Antsu ti núkap aneájrumsa nu nekak^u tusan, aármajai.
- 5 Kame tunamkamiánia nuka aya winiákka itit awajtucháiti. Antsu atúmniasha itit awajtamsáitrume.
- 6 Tunamka Irunramúnmayá jíikrum, waitkiasmárumna nuka mákete.
- 7 Yamáikia, ti núkap waitsáink tusárum, tsankúrarum, ikiakartárum.
- 8 Nekás tájarme, shíir aneastárum.
- 9 Núnisnak, umíniawash tusan, aatrámjarme.
- 10 Tsankureárumna nuna wisha tankúreajai. Kame tsankuraitkiúnka atumini Utsumka Jesúsnum tsankurajai.
- 11 Emésak wakéramu neka asar', anankramawáij' tusar', tsankúrajai.

Papru irasma.

- 12 Utsumka Jesusan chichamen etsérkatin, Truat nunkánam jeámjai. Nuí pénker irúnrar anturtukarmatáisha,
- 13 winia yatsur Titu wáinkiachu asán, kúntuts enentáimran: - Pujú ajatárum – tinia, Masetiuniánmani wémiajai.
- 14 Arútmaka nupetmamtíkramu asakrin, tuke yumínksamu atí. Kame ashí nunkánam shirípkín kunkuámurí aínsank, íinini Utsumka Jesusan chichamen shíir nekamtíkiawai.
- 15 Jesús-líkmakan kunkuámurí asakrin, Arútmaka ewemainiána, tura ewemainiátsna nunasha, íinini Jesusan kunkuámurí ejéawai.
- 16 Nu kunkuámuka ewemainiátsna aun ajákeawai. Antsu ewemainiána aun iwiákman súawai. Nuna, yaki tura ?
- 17 lichuíitji. Kame Arutman chichámejají kuítrintin ajástaj-sar wakéruinia nucháitji. Antsu, Arútam akupkamu asar', Utsumka Jesussha íimiai, étserjiniá nuítji.

AKANKAMU 3.

Nekás wea.

- 1 li yáitíaj', ataksha timinkíaitíaj' ? Chíkích itíuráinia aínsarik nekarawarat' tusar', kuíship iniakmasminkíaitíaj' ? Atumí kuíshpiri iniaktursatárum timinkíaitíaj' ?
- 2 Atsá. Atumkétrume kuíship ii anentáin aárma, ashí aújsar nekamu.
- 3 Nekás iinini aárma Utsumka Jesusan kuishpiríntrume. Nuka suájají aarmachuítí. Antsu Arutman Iwiaikratniurijají aarmáiti. Kayánam aarmachuítí. Antsu atumí anentáin aarmáiti.
- 4 Tuma asar', Arútam íimiai, Utsumka Jesusnúmani timiniáitji.
- 5 Kame íichik nu túratin tujintia asar', aya Arutman kakarmarijají turamniáitji.

2 Kuri.3,6.

- 6 Niinki Yamáram-Irunramúnam wea atí tusa, papín amáatsuk, nii Iwiaikrátniurin amasuítji. Kame papí jatain itiakui, Iwiaikrátniuka iwiákman súawai.
- 7 Kame yaúnchu awemamu kayánam aárma nu, jatain itiaksha, tsáapin ajásmiayi. Muisésan yapín ti wincha awajsamtai, Israer aents^u íistinian jeachármiai.
- 8 Tumaitkuísha wea Iwiáikratniun itiaiiniána au, timiá tsáapin ajasártatui.
- 9 Yaúnchu wea makúkratniun itiamia nu naatkamtáinkia, yamáí wea imítmachu ajástinian itiaínia nuka, nuna nankáawai.
- 10 Nekatá. Wea yamáí itiaínia nu, ti náatu asa, yaúnchu wincha amia núnaka mushatmamtíkiawai.
- 11 Kame yaúnychuka wárum tsawant apujsamuitiat naatniúyayi. Yamái itiamu tuke túkesha apújsamu asa, nuna ti núkap nankáawai.

Yaúnchu úukma.

- 12 Yamái itiamujai warí nákaaj' ? Warínia súrameaj' ?.
- 13 Muiséska Israer-aents^u nii iisaráink tusa, nii yapín nukúyayi.
- 14 Tumaitkuísha, Israer-aents^u kusurú ajasármiai. Kame yamáisha yaúnchu chichaman aárman aújsar, nekatniun tujintiainiáwai. Núnini Jesúsnum ejératniun penke nekainiátsui..
- 15 Yamáisha Muisesan aármarin aujainiána nuka, nii anentáin nukuk takakainiáwai
- 16 Antsu Úunt Jesúsnum jeainiákui, nii nukúkmarí jurusmáiti.
- 17 Kame Úunt Jesús Arútam asa, nii Iwiaikrátniuri pujana núí, ankant awájeawai.
- 18 Tuma asamtai, íisha ii yapí nukútsuk, Jesusan íimtinri ajáaji. Kame Jesuska ni Iwiaikrátniurin úntri asamtai, tuke tsawanttin nii íimtinri ti wincha ajakí wéaji.

AKANKAMU 4.

Jesús weánmani tsáapniawai.

- 1 Arútam tsankátramak ii takátrin amasú asakrin, yawétsuk takáaji.
- 2 Kame: - natsámtság, wáitrusuk, emétság, Arutman chichamen etserkataj - taji. Antsu: - Nekasáiti - tiri, ashí aents^u - Nu nekasáiti tiarat' - tusar', Arútmanam étsereaji.
- 3 Ewémratin chícham ii étsereajnia nu paantáiti. Áyatik menkakátniunam wena nu: - Paantcháiti – tuiniáwai.
- 4 Kame Utsumka Jesús, Arutman nakumkámuritkuísha, emésak nunkan úuntri, íimiarcha awájsar, Pénker-Chichaman tsáapnirin iisaráink tusa, anentáin ukusturaruíti.
- 5 Íikia íiniu étsertsuji. Antsu Utsumka Jesús ii Uuntrinti taji. Íikia Jesusnúmani atumí takarniurintji.
- 6 Kame Arútam chicháak: - *Kirítzniunam tsáapin ajastí* – tinia, ashí aents^u Utsumka Jesusan tsáapniri nekawarat' tusa, ii anentáin tsáapin ajásmiayi.

Wean katsúntmari.

- 7 Weatí, ichínkian jakúrminia aniuítiatar', ti Náatu juaji. Tuma asar', nuka iiniya_a winiátsui. Antsu Ashí-Tujintcha Arutmánmaya_a winiá nu iniákmeaji.
- 8 Tuma asamtaí, wáitianmash katsúntji. Itiúrkajik takursha kakáaji.
- 9 Kajertamkurinsha, Arútam ikiúrmatsji. Awakkamuitiatar', amúwatsji.
- 10 Ashí nunkánam Jesusan nantákmiari atí tusar', ii iniashiín Jesusan jakátniuri juaji.
- 11 Kame iwiáku pujákrisha, tuke Jesusan iwiák mari júkitin, mantamnátniunam pujaji.

- 12 Nuíkia ii jáakrin, átumka iwiákma achíarme.
- 13 Ujajmatáiniam aármia nu: - *Íimiaru asán, chicháajai* - tawai . Ílisha núnisrik íimiaru asar', étserji.
- 14 Ya Jesusan aneantmamtikiámia nu, íinsha atúmniasha Jesúsjai aneantmamtikramrar', níijjai irutmártatji, nu taji.
- 15 Nujjai ti pénger ajastátrume. Arútmaka, núkap aents^u naatmamtikrukarat' tusa, ti núkap nii péngerin amáawai, nusha taji.
- 16 Tuma asamtai, yawéatsji. Kame ii iniashí mesekí weakuísha, ii wakaninkia kakáram ajaki wéawai.
- 17 Nekás enentaimsar', juyá waitiámu wárichik nankama nu, ti warástinian itiártamji.
- 18 Kame ju nunkánam írunea nu amúkatin asamtai íitsuk, amúkashtin tuke átinia nu íiaji.

AKANKAMU 5.

Nekás ii jee.

- 1 li iniashinkia ii jeenáiti. Nu amuwakuínkia, chíkich jea amúkachmin, Arútam najánamu, Nayáimpiniam tákakji.
- 2 Nu amúkachmin jea takurmastái tusar', juí nunká wáitiaji.
- 3 Kame, ya nekamniáit ? Nu tsawant, iniashtin, turútskesha iniáshtichuash pujuttaj' ?
- 4 Yamái, iniashtin pujá asar', wáitiaji. Tumaitkuísha, ii iniashí játsuk, yamáram iwiákman achik, jacha ajasat' tusar, wakérají.
- 5 Arútam nuna wakera asa, nii Iwiaikrátniurin suramsáitji.
- 6 Nujjai játsuk kakáaji. li iniashijjai pujákur', Jesús páant wainkiachminiaitji. Nu nékaji.
- 7 Kame yamá páant wáintsuk, aya ii íimiarmaríjjaink wáinji.
- 8 Juí pénger pujayatar', ii Úuntri Jesús páant wáinkiatin wetaj-sar', wakérají.

- 9 Tuma asar', ii iniashijai, ii wakanijáisha nii wakéramu najánatasa kakáaji.
- 10 Kame Utsumka Jesús makukrátuniunam ii najanámurin íis: - Penkeráiti, tumátskesha yajauchiti - tusa, ankant ankant akirmáktatji.

Wean takatri.

- 11 Kame Arútmaka ii anentáin neka asamtai, íisha nu nekama asar', enentaimrar', tunámkatín ishankatniúftji.
- 12 Líkia ataksha: - Penkeráitji - tátsuji. Antsu nii anentáin yajáuch' ainiayat: - Penkeráitjai - túsar, anankkartuiniána au pénger jintintiátin: - iín iikratsatárum - taji.
- 13 Kame éketrusrik turamaj' nuka, Arútam aneakur' túramji. Antsu atumiín enentaimsar' ti shíir jintiámji.
- 14 Kame Utsumka Jesús ti enéajnia nu iín jarutramka asakrin, niínin mash' jákarmiaji.
- 15 Lín jarutramka asakrin, mash' iwiakutí íiniu iwiáku pujútsuk, iín jarutrámak aneántmia nuna iwiáku pujustiniáitji.
- 16 Nuíkie, aéntsun inias' íirtsuk, Jesús Utsumka nekayatar', yamáikie aéntsnum wáinniuítji.
- 17 Kame Utsumka Jesúsnum pujá nuka, yaúunchunam pujútsuk, yamármanam pujawai.
- 18 Arútmaka, Utsumka Jesusnúmani tsankurtamra asar', tsankúkratin arat' tusa, umpuntramráitji.
- 19 Kame Arútmaka Utsumka Jesusnúmani nawámramkar': - Atumsha tsankúkratin atárum - tusa, akuptúrmakji
- 20 Nuíkie, Utsumka Jesús akupkamu asakrin, Arútam iinini tsankurtámrum. Tuma asamtai iinini: - Arútam tsankúramu atárum - Utsumka Jesus turámrum.
- 21 Arútmak iin tunártincha awajtamsátasa, Utsumka Jesusan makur, tunártincha asámtaisha tunartin awajsámiayi.

AKANKAMU 6.

Tsankúkrattai tsawant.

- 1 Arutman takárniuri asar', íinini Arutman pénkeri áantrarum achikiáirap, taji.
- 2 Kame Ujájmatái chicháak: - *Tsankatkámunam anturkám-jame, ewemtai-tsawánnum yáinkmiajme* – tawai. Nekátárum, yamáikia tsankátkatin, tura ewémratin tsawantáiti.
- 3 Ii takatrin wishikraráink tusar', pénker pujusar', itiúrchat apújeatsji.
- 4 Antsu: - Arútam akupkamuíti - turamtiái tusar', ju katsúntji: Itiúrchatnum, utsumámunam, waitiamúnmasha kakáaji.
- 5 Asuttiamainiákrin, epetmiákrin, arentmakrinsha kajéatsji. Pimpikir', kánutsuk, yurúmstsuk pujaji.
- 6 Tunámstsuk, pénker nekar', tuke pénker awájeaji. Iwiáikratin tákaku asar', ashí mash' anéaji.
- 7 Arutman kakarmarijái tuke wáitrutsuk chicháaji. Ayamrúmaktin, tura makutin nekás chicham taji.
- 8 Naatmamtikrámkurin wishikramkurinsha, tsanumrámkurin shíir awajtamkurinsha: - Waitruiniáwai – turamainiákrinsha, tuke nekás chicham chicháaji.
- 9 Ti nekamuitiátar' nekachmáitji. Jakaitiátar' iwiákji. Makur-maitiátar' maachmáitji.
- 10 Kúntuts pujayátar', tuke waráaji. Kuitrintchaitiátar' untsurí yáiniaji. Peejchachitiátar' ashí mash' tákakji.

Wéajai anturnáikiatin.

- 11 Kurintiúnmaya aentstirmin páant timiájrume. Ashí mash' winia anentáirui ana nuna iniaktájrume.
- 12 Wikia ashí mash' winia enentáimmiarun ujájrume. Antsu átumka atumí enentáimmiari úutrarme.

- 13 Atumsha, winia uchirua núnisrumek, atumí anentáiín ana nu páant ujatkatárum tájarme.
- 14 Ímiarcha áinia nujai irunráirap. Kame imítmachu imítmaujai irúneawak ? Tsáapin kirítñiujai irúneawak ?
- 15 Utsumka Jesús eméskajai irúneawak ? Ímiaru ímiarchajai warí anentáinia sunaisamniáit ?
- 16 Arutman ayamtairiín, áantar-arútam pujusminkiáit ? Íkia nekás Aturman ayamtairintji. Kame níinki chicháak: - *Niinín wi pujústatjai; niinín wi wekasáttajai. Wi níniu Arútam ajásmatai, nísha wi shuar ajasártatui.*
- 17 *Núikia imitmáunmaya jñinkírum, ikiuktiárum, Úunt asán, tájarme. Wijai irúnratin, tunártinjai irunráirap.*
- 18 *Wi atumí Aparí ajásmatai, átumka winia uchir, winia nawántur ajastátrume. Wi Úunt ashí tujintcha asán, tájarme – Arútam, ashí najánkamun neréntniuri nuna tímiayi.*

AKANKAMU 7.

Anentáin iwiáratin.

- 1 Yatsurú, Arútam nuna tiniu asamtai, ii iniashín ii wakanínsha páuskarí nijjar', nekás wáimiaku ajastin Arútam arantuktái.
- 2 Atumí anentáiín anenkartustárum . Kame yákesh katsekkachuítji; yákesh emesrachuítji; yákesh kasarkachuítji.
- 3 Atumín makútasa tátsujrume. Kame iwiákmanum, jakamúnmasha winia anentáirui ti anéamu pujarme.
- 4 Átumka ti naatniuítrume tusan, páant tájarme. Tuma asákrumin, itiurchatnumsha wará warát pujajai.

Masetúnianam wema.

- 5 Masetúnianam jear', titiú pujúschamji. Kame aéntsja*í* itiu^rchat wainkiar', ii anentaín sapijmiákmaji.
- 6 Antsu, Arútam péejchachin atsankin asa, Titun akuptúrmakar', atsanktámramji.
- 7 Titu támatai tsankurjai. Aíntsanak, nii ti pénker wainkiárum, winia enentáimtursarum, iirsátsa wakera asárum, tura átum wáitiamun Titu ujatkamtai, wi ti waráajai.
- 8 Papín nuik aatramájr*um*na nujai atumín kúntuts awajsaitkiúnka: - nu penkeráiti - tajai. Antsu átum nu aújsarum, ishíchik kúntuts enentáimra asákrumin: - yajauchiti – tajai.
- 9 Nu kúntuts enentaimrámu*ja* atumí anentái yapajiá asákrumin, yamá*í* waráajai; kame nu papijai pénker awajsájr*um*e.
- 10 Arútmanam kúntuts enentáimmiaka aéntsun anentáin yapajiá, ewem*t*ikiawai. Antsu tunán*um* kúntuts enentáimmiaka, aéntsun anentáin yapá*jt*suk ajákeawai.
- 11 Átum Arútmanam kúntuts enentáimra asárum, kajé*rt*utsuk: - Tsankurturtá - túrutrum, ishám*ts*suk makú*rt*suk: - lístaj-san wakérajme – turú*r*um*e*. Nu tura asárum, pénker turá*r*mena nu páant iniakmasú*r*me.
- 12 Kame makú*rt*inian, tura ayamrúktinian papí aár*ch*amjai. Antsu Arútmanam enentárm*e*na nu nekak^u tusan, aatrá*m*jar*m*e.
- 13 Kame nu ikiakátramai. Antsu Titu ikiakaru asákrumin, timiá waráajai.
- 14 - Átumka penkeráit*r*um*e* - Titun tiniu asán, natsár*ch*amjai. Kame átum Titu pénker wáinkia asákrumin, nu amink*í*am*í*.
- 15 Átum Títusha amírkarum, arántukrum, péejchachia aínsar*m*ek achikiú asákrumin, ti anént*m*ar*m*e.
- 16 Átum nekás anankkártichu asákrumin, ti waráajai.

AKANKAMU 8.

Utsuma yáinkma.

- 1 Yatsurú, Arútam nii pénkerin Masetúnianmaya Jesús-Irúnramun susamia nu nekamtikiátaj-sar' wakérají.
- 2 Nu Jesús-Irúnramu itiúrchatnum, utsumamúnmasha puja-yat, warás ti tsanka ajasuíti.
- 3 Jesús-shárka jeámujai, antsu nu nankámasar, ankant ankant kuitian apujsarmia nuna wi nékajai.
- 4 - Wisha Jesús-shuáran yáinktaj-san wakera asamtai, tsankatruktá - tuke turutiármai.
- 5 Ii enentáimmiansha iniánkasar, Arútam wakera asamtai, Úunt Jesúsnum íijai takakmástasa wakerármai.
- 6 Nuíkia Titu, atumiín kuítian júuktinian nankamamia asamtai, amukat' tusan, núnaka akatrajai.
- 7 Átumka íimiartin, Arutman chichame nekatín, nunkánmayasha mash' nekatín, winia anetin tuke nankamasú asárum, kuit apujtamasha nankamaktárum.
- 8 Wi akupeátsjarme. Antsu nekás yaimniuashítrum, nuna nekátaj-san wakérajai.
- 9 Atumsha nékarme. Ii Úuntri Utsumka Jesús warirtiniaiat, átum warirtin ajasuk^u tusa, warirtincha ajasuíti.
- 10 Atumeá atumeá nuik kuit júuktin nankama asákrumin, wi tájarme:
- 11 - Yamáisha núnisrumek atumeá atumeá kuit ápujma amastárum -.
- 12 Wará warat susátaj-sar wakeruiniána au, takákusha takákchaksha, nii jeámu suiniáwai.
- 13 Ti núkap susákrumin, atumnia tasarat' tusan tátsujai. Antsu ashí métek takusarat' tusan tajai.
- 14 Átumka ti núkap tákaku asárum, yamáí utsuma nu yayarme. Arumái átum utsuma ajasákrumin, níisha yaintmaktárum. Nuní métek ajástatji.

- 15 Kame Ujájmatai chicháak: - Núkap júukmia nuka ampirchámiayi. Aíntank ishíchik júukmia nuka utsumchámiayi – tawai.

Papru akátramu.

- 16 Wi atumín aneájrumna aíntank Titu atumín anéntma asákrumin, Arútman yumínksatárum.
- 17 Kame, wi takui, winítniun wakerímiayi. Antsu níinki wakera asa, wará warat winímiayi.
- 18 Aíntanak, yatsur Pénker-chichaman étserak, ashí Jesús-Irúnramunam náatu ajásmia, nujají atsankian akupkámiajai.
- 19 Ashí Jesús-Irunrámussha wijají kuítian júkitniun núnash anaikiáru asamtai, Arutman naatmamtikiarat' tusan, wisha warasan surúmakan, níijají takakmástatjai.
- 20 Ti núkap kuítian irúmratin asán, aents^u tsanumruraráink tusan, níijají wekátajai.
- 21 Kame aya Arútam íimmianum túrutsuk, aents^u iimmianumsha turatniuítajai.
- 22 Níijají chíkich yatsúrnash akupjai. Níisha Arutman takatrin takástaj-sa tuke ti wakera nuna nekás nékajai. Yamáikia atumín wakerutma asa, imiá pénker takakmástatui.
- 23 Títuka winia aír, antsu winia yáintin asa, atumjají pujawai. Chíkich yatsurka Jesús-Irúnramu akupkamu ásar, Utsumka Jesusan naatmamtikiainiáwai.
- 24 Nu aents^u aneásrum, pénker wainkiartárum. Turakrumka, wi atumnian ti shíir tímiaj nu Jesús-Irúnramun iniakmástátrume.

AKANKAMU 9.

Kuit júukma.

- 1 Jesús-shuar yáinktin kuit juuktárum, nuna aateátsjame.
- 2 Kame atumí tsankarín wi neka asán, wará warat Masetúnian chicháarkun: - Akaya uwí nankamásmiania nuyá kuítian júuk pujúruí - tu tímiajai. Nuna antúkar, níisha wará warat kuit júuktinian nankamawármiai.
- 3 - Tsanka ainiáwai - tímiaj nu: - Waitiáiti - tiaráink tusan, yatsurun akupainiájai.
- 4 Kame wi Masetunia aéntsjai atumiín jeán, kuit súsatin timiármena nuna iwiarachman wáinkian, natsaráij tusan, tura atumsha natsaráirum tusan, akupainiájai.
- 5 - Surímstuk, wará warat núkap susáttaji - timiárumna nuna irumú ajaarat' tusan, winia yatsurun éemka akupainiájai.

Áantar súinia akikma.

- 6 Páant tájarme: - Ya ishíchik arakma nuka, ishíchik juáwai. Antsu ya núkap arakma nuka, ti núkap juáwai.
- 7 Tuma asamtai, ankant ankant nii wakéramun surímstuk, wará warat susatí. Kame Arútmaka wará warat sua nuna anéawai.
- 8 Arútam ashí tujintcha asa, utsumírum, antsu ampírum yáimin ajasmíntrum tusa, nii pénkerin surámrum.
- 9 Ujájmatai chicháak: - *Utsumáinian susamia nuka, tuke túkesha akikma átatui* – tawai.
- 10 Nii arakrin, nii yurúmkarin sua nuka tsanka ajasat' tusa, nii ajarín ipiampáawai.
- 11 Átumka warirtin asárum, winini núkap surustátrumna nujai utsumainiana au yáinkma ásar, Arutman yuminksártatui.

- 12 Kame ju suamu Jesús-shuánakka yáiniak Arútmanash ti núkap yumínksarat' tusa itiáwai.
- 13 Yáinkma áinia au Arutman yumínksar, átum nekás Utsumka Jesusan chichame amirkárum, ashí Jesús-shuárjaj*ai* irunra pujárumna nuna nekawártatui.
- 14 Arútam atumín ti tsanka awajtamsa asákrumin, yáinkma atumín anéntrutmak, nii aneámurin iniakturmastátrume.
- 15 Arútam nii pénkerin suramsa asakrin, tuke yumínksamu atí.

AKANKAMU 10.

Ayamrúmakma.

- 1 Wats: - Papru íijaj*ai* pujak, péejchach' ajáawai. Tura yajá pujakka, kakáram chicháawai – turutkurminsha, Utsumka Jesús kajechu, wáit-nénkartin asamtai, seátjar*me*:
- 2 - Pápruka itiúrchatnum pujústinian nakitia asa akupkartincháiti - áantar turutáinian nakitiáknasha, wi winiákun nuna nekás kakantráttaj*ai*.
- 3 Kame nunkáy*a* aentsuitiatar', aéntsua nunisar' mániatsji.
- 4 li kakarmarij*ai* penke mániatsji. Antsu Arutman kakarmarij*ai*ink mániaji. Nii kakármari ashí tujintcha asa, wenúknash yumpuáwai. Wáit chichaman páant awájeawai.
- 5 Ashí aents^u wáantu Arutman chichamen emesainiána aun nupéteawai. Nii kakarmarij*ai*ink, ashí mash' nunkánmay*a* anentái ana nu yapájt*ui*ar', Utsumka Jesusan amirkarat' tusar', jintíaj*i*.
- 6 Aínsarik, nekás umín ajasarat' tusar', umíchuka kakantrar', umimtikkiáttaj*i*.
- 7 Aya aéntsun íimtinri iisáirap. Ya: - Utsumka Jesusnáitj*ai* - ta nuka enentaimsatí. Kame níisha Utsumka Jesusnaitkuínkia, íisha nuketj*i*.

- 8 Naatmameáknasha, Arútmaka atumín eméstsuk, antsu yáintmaktin nii kakármarin suramsa asakrin, natsámstsuk tájarme.
- 9 Nuíkia atumín sapijmiamtikiátaj-san, papín aatrachmájrume.
- 10 Kame: - Nii aármari ti kakáram chichártamkuísha, nii iniashí peejcháiti, nii chichame timiancháiti - turutainiáwai.
- 11 Tumaikuísha, atumiín jeán, aárma tana aínsanak ti kakáram ajástatjai.
- 12 Antsu: - Wi imiá penkeráitjai - tuínia nujai metekcháitji. Kame chikichan íitsuk, aya níinki iimiainiána au, netse ainiáwai.
- 13 Íikia áantrar' naatmamtíkiatsji. Antsu ii nekámatin Arutman chichame iisar', atumiín jeátin nii wakéramu najáneaji.
- 14 Atumiín nánkamsar' jeáchmiaji. Kame Utsumka Jesusan chichame etsérkatin jeámji.
- 15 Chíkich takasmánum íikia, wáantu enentaimtúmasar': - li takatrinti – tátsuji. Antsu atumí iimiarmarijai kakáram ajakí weákrumin, íisha atumiín kakáram ajáaji.
- 16 Íikia chíkich takasma: - liniuíti - tútsuk, chíkich nunkánam Pénker-Chichaman etserkátasa wéaji.
- 17 Ya náatmamea nu, Arútmanam naatkatniuíti.
- 18 Kame níinki naatmámeana nu penkercháiti. Antsu Arútam naatmámstikia nu penkeráiti.

AKANKAMU 11.

Papru náatmamka.

- 1 Wi wáurua núnisnak chichastaj-san wakera asamtai, katsúntrarum, anturtuktárum.
- 2 Nua antinkchamu nuátcha aínsarmek aya Utsumka Jesúsnum atumín iruru asán, akasmatájrume.

- 3 Napi Ewán anankamia núnisank atumniásha anankramamtai, Jesusnúmiḡ kanakírurum tusan, tsuutájrume.
- 4 Kame, wi Utsumka Jesusnan etserkamiaina nuna yapajiá etserainiakúisha, chíkich Iwiáikratniun suiniakuísha, chíkich Pénker-Chichaman etserainiakúisha, átum: - Nekasáiti - tárume.
- 5 - Íikia Akátramu nankamakuítji - tuiniakuísha, wi nuna nankáiniajai.
- 6 Kame ti pénker chicháktinian jeachkunsha, wi ti nékaj nuna páant iniaktúsjarne.
- 7 Atumín naatmamtíkkiatin, Arutman chichamen áantranak ujakmájrurnu nuí, péejchach' ajasan, makúmarjak ?
- 8 Áantranak atumín yáinktín, wi yurumátasa chíkich Jesús-Irúntramun kuítrin ementúkarjai.
- 9 Atumiín pujusan, utsumáknasha, seachmiájrume. Antsu Jesús-shuar Masetúnianmaya táar, yaitkiármiai. Kame atumín seachmiájrume, nekás penke seashtátjarne.
- 10 Utsumka Jesús winín pujá asamtai, wara warat seámstusuk pujústinian Akaya suritrúkchattui.
- 11 Urukamtai ? Atumín aneátsjarneash ? Aya Arútmak nékawai.
- 12 Wi túraj núnak tuke turú wétatjai. - Papru túrana núnisrik íisha túraj - tuínia nuna tiaráink tusan, turáttajai.
- 13 Kame nuka, anánkkartin ásar: - Íisha Utsumka Jesusan Akatramurintji – áantar tu yujainiáwai.
- 14 Eméskasha anánkkartin asa, tsáapninium Pásuka aínsank iniakmámeawai.
- 15 Tuma asamtai, nii takarniurisha anánkkartin ajásar, wea aínsarank takakmainiáwai. Tumaitkuísha nii turamurijáink makurma áartatui.

Papru waitsámuri.

- 16 - Waurkáiti – turutkurminsha, wáurka aínsanak naatmámeajai.
- 17 Tájarmena nu ii Úuntriya winiátsui, antsu winiya winiáwai. Tumaitkuísha wáurka aínsanak tájana nu nekás naatmamtíkrawai.
- 18 Kame chíkichkia naatmamáinia asamtai, wisha náatmamjai.
- 19 Átumka nekau asárum, wáurka katsúntearme.
- 20 Núnisrumek áantrar takakmamtikrárumna, atumín takatrin yuiniána, kasartámrumna, muijtiámrumna, yapíniám awattámrumna nusha katsúntearmek ?
- 21 Natsarjai, kame aya íichik tujintia ajásmiajai. Tumaitkuísha, chíkich arantkártichu asármatai, wisha wáurka aínsanak chicháakun, arantukcháttajai.
- 22 Jutíu ainiakuínkia, wisha jutiúítjai. Israéran aéntsri ainiakuínkia, wisha Israer aentsuítjai. Apraáman uchirí ainiakuínkia, wisha Apraáman uchirintjai.
- 23 Utsumka Jesusan takárniurink áinia ? Wi wáurua aínsanak takun, níin nankainiájai. Kame takakmámunam, wáttiai-jeánam, núkap asutrámunam, untsurí janinksámunam wi nankainiájai.
- 24 Jutíuka ewej emétuawar, menáintiu-nawe-usumtai asuttuawármiai.
- 25 Payánkjai menaintiú asuttuawármiai. Chikichki kayajai tukurarmiayi. Kanujai menaintiú ukámiajai. Chikichki nayántsanam tsawái kashi jakérmiajai.
- 26 Ti núkap weká asán, ti núkap itiúrchatan wainkiámiajai. Entsánam, kasarninksámunam, wi shuárnum aushá shuarnumsha, irutkámunam itiarkánmasha, nayántsanam áantar Jesús-shuarnumsha, itiúrchatan wainkiámiajai.
- 27 Aínsanak takátnum pimpikín, núkap kashi kánutsuk, tsukaran kitiámakun, núkap tsawant yurúmtsuk, esekmatsuk tsetséakun ti waitsámiajai.

2 Kuri.11,28.

- 28 Ti núkap itiúrchat ainiakuísha, Jesús-Irúnramu pénkerash pujúinia tusan, tuke tsawant ti enentáimsan pujajai.
- 29 Kame jainiákui, wisha jáajai. Shuáran tunamtikiainiákui, wi natsámakun wáitiajai.
- 30 Náatu ajástaj takunsha, nekás peejcháitjai.
- 31 Arútam, Úunt Jesusan Aparí, tuke túkesha náatu asa, wi wáitratsjana nuna nékawai.
- 32 Úunt Arétasan akupkámuri, winia emettuat' tusa, nankí-júun Tamáskunam apujtursámiayi.
- 33 Tmaitkuísha Jesús-shuárka úunt chankínnium enketáwar, irútkamu wenúkjai tentakmáuya nuyá itiarármatai, písármiajai.

AKANKAMU 12.

Paprun waitsámuri.

- 1 Náatkatjash ? Áantran naatkashtiniáitjai. Kame Úunt wantíntiurak, ujatkámiayi.
- 2 Yaúnchu, nawe-áintiuk uwí nankamásmatai, aents^u íimiaru Nayáimpiniam ti yakí junákmiayi. Iniáshtiuk, wakántiuk wakáashit ? Nuna wi nékatsjai. Aya Arútam nékawai.
- 3 Tura, nekás junakniua núnaka nékajai. Antsu iniáshtiuk wakántiuk wakáashit ? Nuna aya Arútmak nékawai.
- 4 Nu aéntska Arútmanam jeá, yákesh chichákchamnia chicháman antúkmiayi.
- 5 Nuka náatu awajsamuíti takunsha, wikia ti peejchachítjai tajai.
- 6 Naatkunka, wáurkachu aíntjai, kame nekás junakniuíttjai. Tumaitkuísha, áantar naatmamtikrukaráink tusan, penke chichakcháttajai.
- 7 Wi chichákchamnia chichaman antukuitkuísha, emésak wáantu ajasáink tusa íirshimpin akupturkamtai, iniáshrui itit nekápmamjai.

- 8 Nu íirshimpin yajá akupkat' tusan, Úuntrun menaintiú seámiajai.
- 9 Tura Utsumka Jesús chichártak: - Mámete. Peejchaitiátam, winia kakármarijai nupetkátame – tiniu asamtai, winín nii kakármari pujusat' tusan: - peejcháitjai - tajai.
- 10 Nuíkia, Utsumka Jesusan anéakun, tujintiámunam, katsekeámunam, utsumámunam, kajerkámunam, itiurchatnumsha katsúnteajai. Kame wi kakarmachuitiátan, Jesúsnum ti kakarmáitjai.
- 11 Wi peejchachitiátan, wáurua aínsanak chichásmiajai. Kame wikia áantar akátramu áinia nuna nankáakuísha, átumka: - Nuna nankáatsui – turutmiárme.
- 12 Atumiín pujúmiaj nuí: - Nekás akatramuíitjai – tusan, nuna iniakmásmiajai. Kame itiúrchatnum katsúntran, Arutman kakármarin iniákmasin, aents-tujíntiamun najanámiajai.
- 13 Chíkich Jesús-Irúnramun yáinkian, atumniásha warinma yainkchamiájrum ? Wi utsumámunam chikíchnaka seán, atúnniaka seachmiájrumna nuí, tunámkuíntia tsankurturtárum.
- 14 Jujáinkia atumín íistaj-san menaintiú iwiárnarjai. Tura atumiín jeáknaka: - Akirkatárum – tichattájrum. Kame atumí kuítrin wakératsjai. Antsu atumín wakerájrum. Winia uchirchakáitrum ? Uchisha níiniun aparín suiniátsui. Antsu apa níiniun súawai.
- 15 Wikia, atumín ti anéakun, takákmarijai yáinkian, iwiákmarnash mash' amastátjarme. Wi atumín ti núkap aneakuísha, átum ishíchik anéntiarmek ?
- 16 Wi atumín seachuitkiunka, atumín anankájrumek ?
- 17 Turuttia: - Ya wi akupkámua kuítian atantramkimiárum ?
- 18 Titun untsukan, chíkich yachijai atumiín akupkámiajna nu, atúnnian atantramkimkiárum ? Níisha wiya núnisank takakmáschamkia ?

- 19 Átum nuik: -Ayamrutmainiáwai- tu enentaimchamashírum ? Nucháiti. Kame átum aneamutíram pénker ajasuk tusar', Arútam íimmianum Utsumka Jesúsnum chicháaji.
- 20 Atumiín jeákun, wi wakérajna núnisnak wainkiashtat-jarmeápi. Atumsha, átum wakerármena núnisrumek winia waitkiashtátrome. Kame, kajernáiyamun, akásmatman, kajéamun, mániyamun, tsanumman, aujmatnáiyamun, katseknáiyamun, itiúrchatnash wainkiáttajai.
- 21 Wi atumiín jeán, untsurí yaúnchu tunámkariat, ataksha yajáuch' enentáimin, tsanírmaw, áakratin enentáimrachu asármatai, natsáran, úutchatjash tajai.

AKANKAMU 13.

Itiúrchat iwiáramu.

- 1 Jujáinkia menaintiú atumiín irástaj-san winiájai. Itiúrchat iwiáratin áinia nuka menáint^{iu} aéntsja*i* iwiarnártatui.
- 2 Yaúnchu atumiín jeán, tunamkarun tímiajna nuna, yamáisha yajá pujayátnak, ashí mash' tájarme: Ataksha winiáknaka wáit-anéntsuk jiáktatjai.
- 3 Utsumka Jesuska ti kakáram asa, winini chicháa nu nekáttarme.
- 4 Kame Utsumka Jesús kakármachua aínsank paúnam ajjintiámu jakaitiat, Arutman kakarmarij*ai* iwiáku pujáwai. Ílisha níiya aínsarik kakármachu asar', níij*ai* irunrar', Arutman kakarmarij*ai* kakáram ajáaji.
- 5 limiaruashítrum, ankant ankant nekamatárum. Jesús atumiín pujáwash, nekatárum. Kame tunamkárnam pujátsui.
- 6 Antsu iín pujawai tikiu tusan, wakérajai.
- 7 Tunamkáirum tusar', Arútam seáji. lín pénker enentaimrarat' tusar', tátsuji. Antsu: - Yajáuch' ainiáwai - turámrinink, átum pénker wekasatárum.

- 8 Kame nekás chícham eméstsuk, aya nuka etsérkatin akupkamuítji.
- 9 Átum kakáram ajasákrumin, íikia peejchachitiatar', waráaji. Kame aya átum pénker ajasuk tusar', Arútam seáji.
- 10 Jesús-Irúnramun emésratin Arútam akuptukcháiti. Antsu iwíaratniun akuptukuíti. Tuma asán, atumiín jeán, wáit-anéntsuk jia káijrum tusan, yajá pujayatan aatrámjarme.

Amíamu.

- 11 Ayu, yatsutíram, wará warat shíir pujustárum. Kakáram ajastárum. Chikíchik anentáik takúsrum, mai anénai ajatárum. Turakruminkia, Arútam nii anenkratmarijai tarimtanam atumiín pujústatui.
- 12 Arútmanam irunra pujustin, shíir awajnaisatárum.
- 13 Ashí mash' juyá Jesús-shuarsha atumín amikmátmarme.
- 14 Ii Úuntri Utsumka Jesús nii pénkeri amastárum. Ii Aparí Arútam tuke anentmatárum. Iwiaikratniúsha irútmartárum.



Kar.1,1.

PAPRU KARASIAN AÁTRA.

Carta a los Galatas

AKANKAMU 1.

- 1 Wikia Akátramu Papruítjai. Aents^u akupkachma, antsu Utsumka Jesus, tura Arútam Apa jakamúnmaya aneantmamtekiámia nu akupkamuítjai.
- 2 Wi, yatsurjai irunran, ashí Jesús-Irúnramu Karásianam pujúinia nu amíkmaji.
- 3 Tarímtanam pujustin, ii Aparí Arutman, tura ii üntri Utsumka Jesusan pénkeri achiktárum.
- 4 Kame Jesús ii Aparí Arutman wakerámurin amíktasa jarutrámak, ii tunarin japir, yajauchínmaya uwemtikramráitji.
- 5 Nu tuke túkesha naatmamíkkiamu atí. Nukete.

Chíkich Pénker-Chicham atsawai.

- 6 Átumka, Utsumka Jesusnúmani Arútam untukmaitiátrumsha, maj, urukámtaitsuk nii chichame wari iniáisarum, chíkich chícham ántarum ?
- 7 Kame chíkich Pénker-chicham penke atsawai. Áyatik aents^u nánkamsar etsérkar, atumín unuutámrume.
- 8 Nuíkia chíkich aents^u, Pásukesh, wi etsérmaj nuna yapajjá etserkuínia, jjíki akupkatárum.
- 9 Nuik timiájrumsa nuna awákeasnak tájarme: - Yákesch Pénker-chichaman wi etserma antukmiárumna nuna yapajjá etserkuínia, níijai irúntsuk, jjíki akupkatárum.
- 10 Ya anturkatniúitaj' ? Aéntsuk ? Arútmak ? Aents^u amireákrikia, Jesusan takárniuri achamniáitji.

Papru Arutmá chichamen étserui.

- 11 Yatsurú, nekatárum. Pénker-Chichaman ujakmiájrumsa nuka, aéntsun chichamenchuíti.
- 12 Núnaka aents^u suruschámiayi, unuitiurchámiayi. Antsu Utsumka Jesús surúsmiayi.
- 13 Atumsha páant nékarme. Wi jutíunam pujusan, Jesús-Irúnramun amúktaj-san ti kajerkámiajai.
- 14 Jutíusan Úuntri tiniu áarmia nuna, chikichniaka nankakan amírkan, ti ayamprúkmiajai.
- 15 Túrasha wi akíntsaink wakerutkámia nu, nékachma wáit anéntrur untsurkámiaayi.
- 16 Winini nii Uchirín nekawarat' tusa, jutíuchunam akuptúkmiayi. Aentska penke unuitiurchámiayi
- 17 Wikia, Jerusarénknun Akátramun íitsuk, Arápianam wena, Tamáskunam waketskímiajai.
- 18 Nuyá, menáintiu uwí nankamásmatai, Semunk Kayajai chichástaj-san Jerusarénknun wena, nawe-ewej tsawant pujúsmiajai.
- 19 Nuí, chíkich Akátramu atsuiniákui, aya Santiákun, Uunt Jesusan yachín, wainkiámiajai.
- 20 Arútmak íirui. Wi tájana nu nekasáiti. Waitcháiti.
- 21 Nuyá Siria, Sirisia nunkánmasha wémiajai.
- 22 Tuma asamtai, Jesús-Irúnramu Jutéanam pujuármia nu, winia nekarachármiaayi.
- 23 Wi yaúnchu túramun nekáwar, chicháiniak: - Nuik amúktaj-sa wakerímia nuna yamáí étserui -
- 24 tiar, winia enentáimtursar, Arutman naatmamtikiármiaayi.

AKANKAMU 2.

Papru Akatramuíti tama.

- 1 Nawe-áintiuk uwí nankamásmatai, Titu jukir', Pernapejai

Kar.2,2.

- Jerusarénknum wémiajai.
- 2 Arútam turutu asamtai, jutíuchunam chichaman etserkámiaj nuna nekawarat' tusan, wémiajai. Mash' etsérkamun áantran etserkáitajtai tusan, úusnak aya wéajaj*ai* irunrámiajai.
 - 3 Titu kriakuítat wijaj*ai* pujakuísha, tsupirnaktí tichármiaji.
 - 4 Kame Jesús-shuartí, Jesúsnum uwemra asar', Jutiu ajaschamniaitkiurnisha, áantar-Jesús-shuar: - Jutiun Úuntri amirkatniuítrume - títiaj-sar utsanawármiaji.
 - 5 Tumaitkuísha Jesusan chichamen emesraráink tusar', penke antúrtsuk, itiatmamtikkiámiaji.
 - 6 Antsu wea imiá nankámaku: - Máketé. Tuke núnismek jintikí wetá - turutiármiaji. (Kame aéntsun chichamen íitsuk, aya Arútam tana nuna iistiniáitjai).
 - 7 - Kaya Jesusan chichamen etsérkatin jutíunam akupkamua, aínsamek ámeká jutíuchunam akupkamuítme.
 - 8 Kame Arútmaka Kayan jutíunam akátramu awajsamia aínsank aminsha jutíuchunam akátramu awajtamsáiti - turutiármiaji.
 - 9 Sántiak, Kaya, Juanksha, Arútam untsurkamia nuna nekawármiaji. Ju aents^u Jesús-Irunramúnam Akátramu ti nankámaku ásar: - Íljaj*ai* chikíchik irunramuítrume - tuiniákui, ewej enkenáisar', níisha jutíunam weármatai, wikia Pernapejaj*ai* jutíuchunam, wémiaji.
 - 10 - Jerusarenknum utsumainiána au yainktárum - tuiniákui, páchitsuk amíkmiajai.

Kaya jíákma.

- 11 Nuyá*ai*, Kaya Antiukíanam ta, jutíuchun arantuiniáchkui, wi jíákmiajai.
- 12 Kame, Sántiak-shuar kaunchakuínkia, Jutíuchujaj*ai* yurúm-miaji. Tumayat, jutiu kaunkármatai: - "Jutíuchujaj*ai* yurúmeawai" turutiaráink - tusa, aya jutíujaj*ai* irunrámiajai.

Kar.2,13.

- 13 Jutiu-aents^u nuna wáinkiar, nísha Pernapéjaj_i jutíuchun áantrar ikiukiármiai.
- 14 Pénker-Chichaman amirkachármatai, páant nekán, ashí íimiam ajainiámunam, Kayan jiáakun: - Ámeke jutíuítiam, jutíuchun péneri ana nu achikiú asam, urukamtai yamáí jutíuchujaj_i pujustin yajauchiti, tu iniakmámeam ? - tímiajaj_i.
- 15 Kame, Jutíu akinia asar', jutíuchu tunartin asármatai, níijaj_i pachítkiatsji.
- 16 Tumaitkuísha, Arútam awemámujaj_i aents^u péner ajascharuítí. Antsu Utsumka Jesúsnum íimiaru ajásar, péner ajainiáwai. Nuíkiá, péner ajastin, Arútam awemamu íitsuk, Utsumka Jesúsnum íimiaru ajásmiajaj_i. Kame Arútam awemamu aéntsun péner awajtsui.
- 17 Jesusa aínsarik ajasú asar', yamáí tunánnumash pujaj' ? Atsá; kame Jesús tunánnum pujuschamniáiti.
- 18 - Yaúnchu wi turashtiniáitjaj_i - tímiaj nuna, - awáinkin turatniúitjaj_i – takunka, nekás tunámeajaj_i.
- 19 Antsu, Arútmajaj_i pujustin, awemamun iniáisan, Jesusjaj_i ajjntniáitjaj_i.
- 20 Tuma asán, wikia iwiáksujaj_i, antsu Utsumka Jesús winín iwiákeawai. Kame, íimiaru asán, mash' najaneaj nuka, Arútmán Uchirí anéntak jarutrukmiá nuí najáneajaj_i.
- 21 Arútam, Jesusan suramsa asakrin, nakitrashtiniáitjaj_i. Kame awemámujaj_i uwemráttaj_i takurninkia, Utsumka Jesúska penke áantar jakaáyaj_i.

AKANKAMU 3.

Jesúsnum iimiarar' uwémeajaj_i.

- 1 Karasiánmayaj_i aentstíram, nekachuítrome. Utsumka Jesús Paúnam ajjntiámu páant iniaktusmaitiátrumsha, urukamtai anánkamu ajasúram ?

Kar.3,2.

- 2 Awemamu amirkárum, tumátskesha Jesúsnum íimiaru ajásrumek lwiáikratin achikiuítrum ?
- 3 Nekachuítrome. Kame lwiáikratin wakéramu najánatin juarkimaitiátrum, yamáikia atumí iniashí wakéramu najánearme.
- 4 Tuma asárum, Arutman pénkeri ti núkap achikiuitiátrum, áantrarum achikiuítrume.
- 5 Kame awemámuka lwiáikratniun pénkerin, tura aents-tujíntiamu najánatniun suramsachmiárme. Antsu Arútmaka, íimiaru ajákrumin, suramsamiárme.
- 6 Apráamsha, íimiaru asamtai, Arútmaka imítmachu awajsámiayi.
- 7 Tuma asamtai, aya íimiaru Apráaman uchiri ainiáwai.
- 8 Kame Ujájmatái páant túramji: - *Jutíuchusha iimiarmarijái nekás imítmachu ajasártatui* -. Arútmaka Apráaman chicháruk: - *Amínini Arutman pénkeri ashí nunkánam jeáttui* – tímiayi.
- 9 Tuma asamtai, Apráama aínsarank íimiaru ajainiána au, Arutman pénkerin achiiniáwai.
- 10 Antsu, aents mash' awemamun amíktinian tujintia ásar, makumu áartatui. Kame: - *Tuke ashí mash' awemamu umíreatsna nu yumínkramu atí* - tu aarmáiti.
- 11 Tuma asamtai awemámujái imítmachu ajátsuk, aya íimiarmarijái imítmachu ajáawai.
- 12 Awemámuka íimiaru ajástinian ankantan sukártatsui. Kame: - *aya amirainiána au iwiáku pujusártatui* - túramji.
- 13 Utsumka Jesús, awemámu yumínkramia nuna ewemtikrátaj-sa, Paúnam ajjintiámu yumínkramu ajásmiayi. Kame Ujajmatáiniam: - *Paúnam ajjintiámuka yumínkramuítí* – tu aarmáiti.
- 14 Tuma asamtai, Jutíuchusha, Utsumka Jesúsnum íimiaru ásar, Apráaman pénkeri, lwiáikratin taman, achikiaruíti.
- 15 Yatsurú, Chicham-najánamu ajáptsuk, penke yapajish-tiniáitji.

Kar.3,16.

- 16 Apráamjaj Chícham-najanámuka ukúnam akínia nú aminkiaíiti. Ukúnam akinia nuka untsurichuíti, aya Jesuskete.
- 17 Awemámuka, áintiuk-washim-menáintiu-nawe uwí nankamásmatai tamia nu, Chícham-najánkamun ajapachminiáiti.
- 18 Kame awemamúnmani ewémratin winiakuíntia, Chícham-najanamúnmani winiátsui. Antsu Arútmaka Chícham-najanamúnmani Apráaman ewémratniun susa asamtai, awemamúnmani winiátsui.

Arútam jintiámu.

- 19 Nuíkia, awemamu aantrakáit ? Atsá; Apráamjaj Chícham-najánamu Jesusna asamtai, Pásuk, nii támam aents^u amikiarat' túsar, Muisesnúmani awemamun susármiaji.
- 20 Arútmaka chikíchik asa, Jimiará chichaman tákakeatsui.
- 21 Awemámuka, ii íimiármari ajápeawak ? Atsá; kame awemamu ii iwiákmarin amáatsji. li iwiákmarin amáakuíntia, ii íimiármarinkia aántar ainti.
- 22 Antsu, awemámuka makúawai, tu aarmáiti. Tuma asamtai, aya Utsumka Jesúsnum íimiaru áinia au Arutman pénkerin achiiniáwai.
- 23 Jesúsnum ii íimiármari tamam, aya awemamu takúsmiaji.
- 24 Awemámuka, íimiaru nuyá imítmachu ajastin, ii Unuíkiartin Utsumka Jesúsnum ejetámmiaji.
- 25 Tura yamáikia Jesúsnum íimiaru ajasú asar', awemamu utsúmatsji.
- 26 Atumsha íimiaru asárum, Utsumka Jesúsnum Arutman uchiríntrume.
- 27 Imiáimiunam Utsumka Jesúsnum susamu asárum, ashí mash' Jesusjaj iniashimkiáitrume.
- 28 Jesusjaj iniashimkia asárum, Jutiu kriákusha, ankant ankántchasha, áishmank nuásha, Jesúsnum chikich-kítrume.

29 Utsumka Jesusnaitkiúrmeka, atumsha Apraamnúmiá winiá asárum, nii pénkeri achiktátrome.

AKANKAMU 4.

- 1 Wikia tájarme: Jéentniun uchirí nii takárniurin nerentniurintiat, uchichitkiúnka akúpeatsui.
- 2 Úunt ajátsuk, nii Aparí akupkámam, tuke niin wáinia nuna amirkatniuíti.
- 3 Núnisrik íisha uchich' asarkia, aéntsun awemámuri umirniúyaji.
- 4 Aíntsank, tsawant jeámtai, Arútam nii Uchirín ju nunkánam akupkámiai. Nii Uchirí Arutmaitiat, nuánam akinia, awemamun amirkámiai.
- 5 Ashí mash' awemamun amíriármia nuna ewémtikiar, Arutman uchirí ajasarat' tusa, turámiai.
- 6 Átumka yamáikia Arutman uchiríntrume. Kame Arútam nii Uchirín Iwiaikrátniurin atumí anentaiín akupka asamtai, níinini: - Apachí – tárume.
- 7 Tuma asamtai, Arutman takarniurichuítrume. Antsu nii uchiríntrume. Nii uchirí asárum, níiniu takákearme.

Jesús-shuar jintiámu.

- 8 Yaúnchu Nekás-Arútam nékachu asárum, áantar-arútam tekemruruítrume.
- 9 Antsu yamáí Arútam nekayátrum, níisha nekamaitiátrum, ataksha áantar-chicham, áantar-arutam, kakármachu áinia nusha umirkatniukáitrum ?
- 10 Atsá: nii tsawantri, nii nayámturi, nii uwirí... penke iischatniuítrume.
- 11 Tumaitkuísha, átum antúkchatniun wikia penke áantran waitsámiajai.

- 12 Yatsurú, wi átumea aínsanak ajasú asamtai, atumsha wiya aínsarmek ajastárum.
- 13 Arutman chichamen etsérkatniun juárkun, jámiaj nuí pénker waitkiamiárme.
- 14 Winia sunkur atumiín itiúrchatan itiakuísha, átum muíjrutsuk, Arutman Pasúkriya, tura Utsumka Jesusa áinin waitkiamiarme.
- 15 Wáitratsjai. Nuik winia ayamprútkatasa jakaárme. Urukamtai yamáikia nu anentáinkia takáksuram ?
- 16 Kame yamáikia nekás chichaman takui, winia numásur ajasurme.
- 17 Chíkich yajaya táaru, atumín pénker awajtámsatin yaintmátsrume. Antsu winiya akantámkirum níinki nankámaku ajástaj-sar, turutmarme.
- 18 Wiki atumín yáitsuk, níisha nekás yáintmáktasa wininiákka, pénker ainti.
- 19 Uchirú, Utsumka Jesusa aínsarmek ajasuk tusan, nua jurértaj tana aínsanak ataksha waitiájai.
- 20 Nurantsha itiurkátjarmek ? Wiki atumiín jeán, ankant ankant kakantrashtájrumesh ?

Sara Akarjai.

- 21 Átum awemamu amirkátaj-srum wakera asárum, nu warimpiáit turuttiárum.
- 22 Apraam misátkanam, tura tarimtaríin jimiará uchín yajutmármiai.
- 23 Misatkan uchirí aénts^u wakerukmánmaya akiniámiayi. Antsu tarímtan uchirí, Arutam wakera asamtai, akiniámiayi.
- 24 Nuka jimiará irúnramun iniakmainiáwai. Misátak Akar, Sinaí nunkánam awemámujai irúnramu iniákmawai.
- 25 Akar Arapiánmaya, Sinaí náint pujana nuyá asa, nunkaya Jerusarenk nii uchirijai awemamun amirniun iniákmawai.
- 26 Antsu yakiya Jerusarenk awemamun tákakcha, ii nukurinti.

Kar.4,27.

- 27 Ujájmatai chicháak: - *Kaa-nuá, misurmaitiátam warastá. Kame ame jurechuitiátam, nua nuátkamu nankákam, untsurí uchi takústatme - tawai.*
- 28 Yatsurú, atumsha Isáaka aíntsarmek Arútam wakerúkmajai akiniáitume.
- 29 Yaúnchu Ismaer, aents^u wakéramu akinia asa, Isáakan, Arútam wakérukman kajerka asamtai, yamáisha aintsankete.
- 30 Arutman chichame warítuia ? - *Misátak nii uchirija*ja* ajapatá. Kame aya tarimtan uchirí nii aparín takákmarin achiktiniáiti - tawai.*
- 31 Yatsurú, íikia misatkan uchirinchu asar', tarimtan uchirintji.

AKANKAMU 5.

- 1 Utsumka Jesús, ankant aarat' tusa, ewentikramra asakrin, kakáram ajásrum, awemamun umírniuri ajasáirap.
- 2 Átum tsupirnakruminkia, Utsumka Jesuska penke aantráiti, tájarme.
- 3 Kame ashí tsupirnakaru, ashí awemamun umiktin ainiáwai, tájarme.
- 4 Átumka: - Awemámujjai kakáram ajáaji - tusárum, Utsumka Jesusnumia kanakú asárum, nii pénkeri achiátsrume.
- 5 Antsu íikia, ii iimiarmarijjai Arútam wakera aínsarik ajáaji, Iwiáikratin túramji.
- 6 Utsumka Jesúsnum pujuiniána au tsupirnáktinian utsumainiátsui. Kame iimiarmarijjai anénkratin ajainiáwai.
- 7 Átumka pénker pujuwitiátrum, ya: - Arutman jintí iniaisatárum - túramrum ?
- 8 Kame: - turatárum - turámrumna nuka, Arútam untsukarmia nuna chichamen ujatmakcharme.
- 9 Aneartárum, nii karinri ishichkiíat, ashí mash' yajáuch' awájeawai.

Kar.5,10.

- 10 Atumsha wi enentáimíaj aínsarmek enentáimrumna, nuna nékajai. Tumaitkuísha, yajáuchin apujea nuka, makumu atiniáiti.
- 11 Yatsurú, wikia. - tsupirnaktárum - tiniuitkiúnka, kajérka-muash aáj ? Nuna turaitkiúnka, Paún jintín ajapawájai.
- 12 Yajáuch' awajtámrumna nu, urukamtai níinkia tsupir-nainiátsu ?

Nekás ankant.

- 13 Yatsurú, nekás ankant ajástinian Jesús untsúrmaji. Iniash' wakéramu najánatniun tátsujai. Antsu pénker anenaisar' yainiáiktinian tajai.
- 14 Kame: - Átum anemámrumna aínsarmek ashí mash' anetérum - nu amiakur', ashí mash' awemamu amíaji.
- 15 Antsu kajernainiána au, ashí mash' amunaikiártatui.
- 16 Tuma asamtai tájarme: - Iniash' wakéramun najanawáij - tusárum, lwiáikratin umirkatárum.
- 17 Kame lwiáikratin wakera nuna iniash' nakítiawai. Aínsank iniash' wakera nuna lwiáikratin nakítiawai.
- 18 Tumaitkuísha lwiáikratin jintinramkurminkia, awemámuka akuptamkachminiáitrume.
- 19 li iniashiya warí wininia ? Tsanírmatin, nánkamsar enentáimsatin, natsámstusuk yajáuch' iniákmastin,
- 20 áantar-arútam tekémrurtin, wawekrétatin, kajérkatin, jiakrátkatin, inchimrustin, nakanáirtin, iishá irúnratin,
- 21 tura akasmátkatin, nampektin, yajáuch' nampérmatin, mash' yajáuch' ana nu jíiniui. Turuiniána au Nayáimpiniam jeachártatui.
- 22 Antsu lwiáikratniúnmayá warí winiá ? Anénaitin, nekás warastin, nawamnáikiatin, wáit anéntratin, tsanka ajastin, pénker awájsatin, tana nu imiatrusar' amiktin,
- 23 péejchach' ajastin, yajáuch' nupétkatin winiáawai. Awemámusha nuna makúatsui.

Kar.5,24.

- 24 Utsumka Jesusna áinia au, nii iniashí wakéramun Paúnam ajintiawaruíti.
- 25 Yamáikia Iwiaikrátniunam pujá asar', Iwiáikratin umirkatniuítti.
- 26 Tuma asamtai, inchimrutsuk, nankámantu ajátsuk, akásmattsuk pujustái.


AKANKAMU 6.

Jintiámu.

- 1 Yatsurú, chikíchkisha tunánun iniarmatáinkia, átum wáimiaku asárum, pénker jintintiatárum. Kame atumsha, íirshimp' támatai, tunamkamniáitrame.
- 2 Mai yáiniaí ajákrumka, Utsumka Jesusan awemámuri amírearme.
- 3 Penke peejchach' ainiayat: - Nankamakuítjai - túinia au, níinki anankmamainiáwai.
- 4 Atumsha ankant ankant atumí turámuri íisrum, naateakrumka, étsertsuk úukrum takustárum.
- 5 Kame ashí mash' níiniun katsuntratniuíti.
- 6 Unuiniámuka unuikiártinian warínchujai yaintkiartiniáiti.
- 7 Anankmamawáirap. Arútmaka anankachminiáitji. Kame ankant ankant ii arákmarí júuktatji. Nii iniashí wakéramun aráinia nuka, yajáuchin, játainsha juiniáwai.
- 8 Antsu Iwiáikratin wakéramun aráinia nuka, tuke iwiáku pujústinian juukártatui.
- 9 Tuma asamtai, pénker najánatin yawetrashtiniáitji. Kame pimpítsuk takakmasar', júuktin tsawant jeám tai, páchitsuk pénker júuktatji.
- 10 Nuíkia, iwiáku pujákrikia, íimiaru áinia au, ii yachí asármatai, pénker yankiar', ashí mash' aéntssha yainkiartái.

Utsumka Jesusjai ajintiámu.

- 11 Íiskua, ti úunt aárma nuka winia kuesmarmaruíti.
- 12 - Tsupirnaktiniáitrome - tu jintinia nuka, Jesús Paúnam ajintiámu, itiúrchatan itiáink túsar, nakitiainiáwai. Antsu Ju nunkánam nankámaku ajástaj-sar, wakeruiniáwai.
- 13 Tsupírnaku ainiayat, awemamun umirainiátsui. Antsu: - Pai, níisha tsupirmamtikiáji, titiái - túsar aya wakerutmarme.
- 14 Wikia, ii úuntri Utsumka Jesúsnum Paúnam ajintiámu átaj-san, wakérajai. Kame yajáuch' ana nu Paúnam ajintiámu asamtai, wisha tunámkashtin ajintiamuítjai.
- 15 Yamái yamáram Irúnramu nánkamna asamtai, tsupírnaku, tsupírnakcha chikíchik irúnramu ainiáwai.
- 16 Nu Irunramúnam pujatírminkia tarímtnam Arutman anenkrátmari atumjai pujustí. Kame yamáram Israer ajasuítrome.
- 17 Núrantka itit awajtírap. Kame wikia winia iniáshrui Jesusan ijiúmurin tákaku asán: - Mákete - tajai.
- 18 Yatsurú, ii Úuntri Utsumka Jesusan pénkeri atumjai pujustí. Nuke atí.



PAPRU EPISIUN AÁTRA.

Carta a los Efesios

AKANKAMU 1.

Paprun usukruámuri.

- 1 Papru, Arútam wakera asamtai, Utsumka Jesusan akatrámuri asa, Epísiunam wáimiaku Utsumka Jesúsnum pujuiniána áun aatráiti.
- 2 Tarímtanam li Aparí Arutman, ii Úuntri Jesúsnum pénkeri achiktárum.

Arútmaka ti pénker awajtamsáitji.

- 3 Arútmaka, ii Úuntri Utsumka Jesusan Aparí, Nayáimpinmaya Utsumka Jesúsnum ti núkap usukrutmármiajnía nu, yumínksamu atí.
- 4 Arútam nunkan najántsuk, wáimiaku tunártincha pujusarat' tusa, Utsumka Jesúsnum untsurmákmiaji.
- 5 Ti anentmakur', Utsumka Jesusnúmani nii wakera asa, akíntsarnink nii uchirí awajtamsámiaji.
- 6 Ti anéamu Jesúsnum naatmamtikrukarat' tusa, íin ti pénker awajsatin wakerúkmiayi.
- 7 Ti tsanka asa, nii numpejai ewemtikramrar', ii tunarin tsankurtamráitji.
- 8 Kame nii tsánkari iinín ti núkap ukarámiayi.
- 9 Úukma chichaman nekawarat' tusa, ii nekamuriín, ii nekatairiínsha áantar amásmiaji.
- 10 Arútmaka, nii tsawantri jeámtai, wainkiáchminian wainkiámniánsha niinín irúrtaj-sa wakerúkmiayi.

Epi.1.11.

- 11 Ashí mash' Nérentniurinkia mash' akupea asa, Utsumka Jesúsnum untsurmakar', nii shuar aarat' tusa, wakerúkmiayi.
- 12 Nu Utsumkan nákasar, Arútam naatmamtikiarat' tusa, turutmámiaji.
- 13 Atumsha nekás chicham, Pénker-Chicham ewemtikiártatna nu antúkrum, niinín íimiarum, lwiáikratin achikiúrme.
- 14 Níinini nii shuar awájtamsar', ewemtíkramrar', naatmamtikkíarat' tusa, yaúnchu timia nuna suramsámiaji.

Utsumka nankámaku.

- 15 Itiur Utsumka Jesúsnum íimiarum, tura ashí mash' atumí yachíjaj, waimiaku tamajaj, anenaiyárumna nuna nekamjai.
- 16 Tuma asákrumin, Arutman yuminksan, anéntrakun seátjarne.
- 17 Arútmaka, ii úuntri Utsumka Jesusan Aparí, Nayáimpiniam pujana nu wantintiumákrum, pénker nekámniuram tusa nii nekatáirin amastárum.
- 18 Arútam untsurma asakrin, warí nákej' nuna nekamtíkramrar', tímiania nuna ti núkap suramsar', ii anentáin jintintiatí.
- 19 Kame íimiarutinkia ti kakáram awájtamji.
- 20 Utsumka Jesusan jakamúnmayaj aneántmamtik, yakí Nayáimpiniam nii kakármarin utsúkmiá aínsank, íinsha nu ashí tujintcha kakarman súrumeaji.
- 21 Kame Utsumka Jesús ashí úuntan, akupkártinian, nupetkártinniasha, aínsank ju nunkánam yakisha ti kakáram ana nuna ti nankáawai.
- 22 Arútmaka ashí mash' nii tarimtáiri awajas, Jesús-Irúnramun Úuntri awajsáiti.
- 23 Jesús-Irúnramu nii iniashí asamtai, niinín ashí mash' nii kakármarin amáaji.

AKANKAMU 2.

Arútam ewemtikramji.

- 1 Átumka atumí tunárijai jaká pujúyarme.
- 2 Yajáuch' aents^u amirkárum, emeskan úuntri nunkánam nayáinpinmasha akupak, aéntsun anentáin eméseana nuna wakerámuri najanniúyarme.
- 3 Ílisha yajáuch' aéntsjaí irunrar', ii iniashí wakéramu najanar', níya aínsarik Makuntrátniunam jeatniúyaji.
- 4 Antsu Arútam ti wáit-anénkratin asa, ti núkap anentmámiaji.
- 5 Ii tunárijai jaká pujakrin, Utsumka Jesusjai aneantmamtikramkáitji. Ti tsanka asa, ewemtikramrámiaji.
- 6 Yakí níijai pujústinian, Utsumka Jesúsnum aneantmamtikramkáitji.
- 7 Túke túkesha ashí nii pénkerin iniákmastin, Utsumka Jesúsnum ti tsankátramji.
- 8 Átumka íimiaru asárum, nii pénkerijaink ewemráitrume. Atumek ewémtsuk, aya nii kakarmarijaink ewemráitrume.
- 9 Atumí najanamurijai ewémrachu asárum, wáantu ajaschatniuítrume.
- 10 Ii kakármari Arutmánmayá winiáwai. Nii wakéramun najánatin Utsumka Jesúsnum akiniáitji. Tuma asamtai, tuke nii wakéramu najanatniuítji.

Utsumkáiti ii nawamnaitiáiri

- 11 Nekamatárum: Israer-shuarcháuyarme. Kame tsupírnaku áarmia nu atúmniaka: - Tsupírnakcha ainiáwai - turammíarme.
- 12 Yaúnychuka Utsumka nakachúyarme. Israernumsha pachitkiachúyarme. Arútam chichaman najanamia nusha atumniachúyayi. Átumka juí nunkánam Arútam tákakcha asárum, nuka nákachúyarme.

Epi.2,13.

- 13 Átumka jeáchat pujuwitiátrum, yamáikia Utsumka Jesusan numpejai weankáitrum.
- 14 Niyáiti ii nawámnaitiari. Ii kajénaitiarin nakánaitiainiash amuk, nii iniashiín chikíchik irúnramun najatmáitji.
- 15 Yaúnchu awemamu makurmámiaj' nuna amuk, nawamtikrámkaji. Jímiar irúnramu áarmia nuna niinín irur, chikíchik yamáram irúnramu awajsámiayi.
- 16 Paúnam ajjintiámu ii kajénaitiarin amuk, nu paúnmanink chikíchik irúnramu awajtamsar', Arútmajai nawamtikrámkaji.
- 17 Ashí mash' aents^u nawamnaikiarat' tusa támiayi. Tuma asamtai átum yajá pujutíram, Jutíu tíjiuch' pujuármia nujáisha nawamnaikiárme.
18. Kame níinini Iwiáikratniun kakarmaríjaink mai irúnramu ii Apári Arútmanam jeáji.
- 19 Tuma asamtai, atumsha Wáimiaku-Irunramúnam irarcháitrum, nékashtai shuarcháitrum. Kame átumka Arutman jeén pujá asárum, nii shuaráitrum.
- 20 Nu jean makuíri wáimiaku, Akatrámusha ainiáwai. Tura nii páuri Utsumka Jesusáiti.
- 21 Niinín jea ukurma, ti pénker Arútman ayamtáiri ajáawai.
- 22 Atumsha niinín Arutman Jeé ajakí wéarme.

AKANKAMU 3.

Arútam timia nu mashiniuíti.

- 1 Átumka, jutíuchu asákrumin, wikia atumnian Utsumkan takarniurintjai.
- 2 Arútmaka atumín yáinktasa nii pénkerin surusuíti. Nu nékarmeash ?
- 3 Arútam wantíntiurak, úukma chichaman surusmia nuna ishíchik ujákjarme.

- 4 Tuma asamtai: - Nékashtai-Utsumkan ti nékawai - turutminiáitrome.
- 5 Nékashtai-chicham yaúnychuka etsernakcháiti. Antsu yamáikia Akátram, Waimiákusha, Arutman pénderin achikiármia nunini etsernakuíti.
- 6 Jutíuchusha, Utsumka Jesúsnum kanakcha ásar, Arútam Jutíun susámia nuna, níisha páchitsuk achiiniáwai.
- 7 Wi Arutman kakármarin achikiú aí, pejchachitiátan nii takárniuri ajasú asán, ju Pénder-Chichaman étserjai.
- 8 Ashí mash' iimiárujají péjchach' aínk, jutíuchunam Utsumka Jesusan pénderin etsérkatniun, Arútam winia tsankatrúkmiayi.
- 9 Chicham tuke Arútam-Najankártinnium úukma pujumia nu, itiur aminkí wea nuna, páant awájsatniun tsankatrúkmiayi.
- 10 Yamáikia Jesús-Irúnramun íisar, yakiya úunt, kakáram áinia aúsha, ashí mash' Arutman nekámurin nekawártatui.
- 11 Kame yama nankamtáikia ii Úuntri Utsumka Jesúsnum Arútam turámiai.
- 12 Yamáikia niinín íimiaru ajasú asar', Arútam ishámstusuk weántaji.
- 13 Nuíka, wikia atumín ayamrúktaj-san ti katsuntu asamtai, atumsha kúntuts enentáimstusuk, kakáram ajastárum.

Arútam ikiakátmaji.

- 14 Tájana nuna enentáimstan, ii Aparí Arutman tekémrajai.
- 15 Kame ashí mash' irúnramu nayáimpiniam nunkánmasha ana nu, niiniya winiáwai.
- 16 Nankámaku ashí tujintcha asa, nii Iwiaikratniurijají ikiakatmártasa tsankatramkatárum.
- 17 Íimiaru asárum, ti pénder irúnramu najánatin ti shíir anenaiyákrumin, Utsumka Jesús atumí anentáiín pujustí.

Epi.3,18.

- 18 Utsumka Jesusan anenkratmarinkia nunkánam yakisha enetka, tímiau, nékachmin asamtai, atumsha mash' iimiárujaj nekamatárum.
- 19 Arútmanam mash' ana nu, atumí anentáin piaktí.
- 20 Arutman kakármari iinín pujá asamtai, ii seámjinia, ii enentáimjinia nu iniankasar', kakarmáitji.
- 21 Jesús-Irunramúnam, Utsumka Jesúsnum tuke túkesha Arútam naatmamtíkkiamu atí. Nukete.

AKANKAMU 4.

Irunrar' takakmastái.

- 1 Wi, Utsumkan takárniuri asán, untsukmatíram nánkamsa pujusáirum tusan, ikiakájrume.
- 2 Wáantu ajátsuk, atsánmatsuk, pénker awajnáisarum, anenaitiárum.
- 3 Nawamnáikiarum, chikíchik enentáijjaink irunra pujustárum.
- 4 Métek untsukma asárum, nuke naka asárum, métek enentáimsarum, chikíchik iniash' ajastárum.
- 5 Atumí úuntri chikichkiti. Atumí iimiármari chikichkiti. Atumí imiáimiuri chikichkiti.
- 6 Atumí Aparı Arútam chikichkiti. Ashí nankámaku asa, ashí aéntsnum pujá, niinín takákmeawai.
- 7 Utsúmkaka ankant ankant ii takatrin amasú asakrin, ashí mash' ii takatri tákakeaji.
- 8 Kame Ujajmatáiniam aarmáiti: - *Yakí waka, nii aéntsrin yaruak, ashí aéntsun nii pénkerin susámiayi* - .
- 9 Jákaru kaya wáanam matsamiármia núí tara, yakí wakámiayi.
- 10 Taramia nuka ashí mash' enétkatasa, mash' nayáimpin nankáiki, yakí wakámiayi.

- 11 Tuit nii tsankatkamia nusha ? Chíkich Akátramu, chíkich wáimiaku, chíkich etsérkartin, chíkich páruk, chikichsha unuíkiartin ainiáwai.
- 12 Jesús-Irúnramun najanawarat' tusa, núnak iwiáarak, nii takárniurin awajsámiayi.
- 13 Ashí mash' métek íimiarar, Arutman Uchirín nekáwar, imítmachu ajásar, Utsumka Jesusa aínsarank amikiú ajasarat' tusa, turámiayi.
- 14 Uchia aínsarank ashí mash' áantar chichaman ántutsuk, ti nekau anankkártinian patatukiaráink tusa, turámiayi.
- 15 Kame nekás chicham, anenaiyámusha tákaku asar', ii Úuntri Utsumka Jesúsnum irúnratin, tuke éemka wéaji.
- 16 Jesús-Irúnramu, pénger, kakáram tsakakí wetí tusa, untsurí takárniurin ankant ankant nii péngerin súawai. Tuma asamtai, ti anénaisar, chikíchik iniash' ajainiáwai.

Yamáram aents^u ajastárum.

- 17 Jesús-shuárcha áantar chichaman patátuinia, nuna jintí atumsha achikiáirap, Uuntnúmani kakáram tájarme.
- 18 Kame, nékachu ásar, nii nekámuri kirit asamtai, nii wakaní kanaru asamtai, Arutmánmayá jeáchat wekainiáwai.
- 19 Arutman awemámurin emenkátmaku ásar, nii iniashí wakéramun najánawar, ti núkap tunámkatniun wakeruiniáwai.
- 20 Antsu átumka Utsumka Jesúsnum tu unuimiarcháitume.
- 21 Kame Jesúsnum nekás chicham aa asamtai, niinín unuiniármaka níiya aínsarank ajainiáwai.
- 22 Nuik iwia aínsarmek pujúsrum, emesmammíárumna nuka iniaisatárum.
- 23 Antsu atumí anentái iwíaratárum, turámrum.
- 24 Arútam yamáram aéntsun, imítmachun, wáimiakun najanea, aínsarmek atumsha ajastárum.

Epi.4,25.

- 25 Nuí^hia ashí mash' chikí^hchik iniash' asárum, wáit^hratsuk, nekás chicham^hjai jintint^hniaiyatárum.
- 26 Tunamkáij' tusárum, kajé kajernaiyakuárum kintiamírap.
- 27 Turachkur^hminkia, emésak nupettamkamniáit^hrumé.
- 28 Kasana nu kasám^htsuk pujús, nii takátrij^haink warirtin ajás, utsumainiána aun yainktí.
- 29 Yajáuch' chichasáirap. Antsu pénker anentái achikiarat' tusárum, pénker jintintiatárum.
- 30 Arutman l^hwiaikrátniuri waitkiasáirap. Kame nii iniákmatairi tákaku asárum, nii tsawantri jeámtai, nujai ewémratin nekamu atátrume.
- 31 Atumí kuntutsri, waurtáiri, kajernaitiáiri, jianaitiáiri, katseknaitiáiri, ashí mash' yajáuch' awajnaitiáiri ewérum, ajapatárum.
- 32 Antsu pénker ajásrum, anturnaikiárum, Utsumka Jesúsnum Arútam tsankurtámrumna aínsarmek, mai tsankúrnai ajatárum.

AKANKAMU 5.

Arutma aínsarmek ajastárum.

- 1 Arutman uchirí ti anéamu asárum, atumsha niya aínsarmek ajastin wakeruktárum.
- 2 Utsumka Jesús iin anéntmak, Arútam íikmakan yaúnchu shíir achikiármia aínsank surúmaku asamtai, atumsha surúm^hakrum, ashí aents^u anetárum.
- 3 Wáimiaku asárum, tsanírmatin, ti núkap irúm^hratin, mash' yajáuch' ana nu penke chichasáirap.
- 4 Aínsarmek ákrattin, nánkamsar pujustin, áantar chicham chichasáirap. Antsu Arútam yuminkíú pujutárum.

- 5 Ashí nekatárum: Tunártin, tsanirmau, kuítrintin, áantar-arútman tákaku ásar, Utsumka Jesús Irunramúnam, Arútam-Irunramúnmasha pujuschártatui.
- 6 Yákesh áantar chichamj*ai* anankramawáirap. Kame nuka íimiarun numasri asármatai, Arútmaka makuártatui.
- 7 Atumsha níij*ai* iruneakrumka, makunráttarme.
- 8 Nuíkkia kirít*ni*unam pujusiátrum, yamáikia Úunt*num* tsáapin ajasurme. Tuma asárum tsáap*ni*un uchiriya aínsarmek pujustárum.
- 9 Aents^u pénker, imítmachu, wáitrichu, nekás tsáap*ni*un páant*ni*uri ainiáw*ai*.
- 10 Úunt wakera nu eaktárum.
- 11 Kirít*ni*unam pujúiniaka pénkeran tákakcha asármatai, níij*ai* irúntsuk, yajáuchiri iwiainiaktárum.
- 12 Úukar najanainiána nu etsérkatin natsarminiáit*ji*.
- 13 Antsu tsáapin iwiániak, páant awájeaw*ai*. Páant awájsamu tsáapin ajástatui.
- 14 Kame: - Kanarú shintiartá. Jakamúnmay*a* nantaktiá. Utsumka Jesusan tsaap*ni*rí amin sukuít*ti*aw*ai* - taw*ai*.
- 15 I*ti*ur pujárum núkap enentáimsarum, nekamatárum. Enentáimcha aínsarmek ajátsuk, nekás enentáim*in* ajastárum.
- 16 Yamái aents^u yajáuch' pujuiniakuísha, átum shíir pujustárum.
- 17 Enentáimcha aír*ap*. Úunt warinia wakera nu nekatárum.
- 18 Nampekáir*ap*. Kame nampena au tsanirmátaj-sa wakér*aw*ai. Antsu atumí anentá*in* lwiáikratin ipiatkatárum.
- 19 Úunt ti shíir antukat' tusárum, ujaj, námpet, anentsha sunaisatárum.
- 20 Ashí mash' achikiú asárum, tuke túkesha ii Úuntri Utsumka Jesúsnum ii Aparí Arútam yuminksatárum.
- 21 Pénker umirnáikiarum, Utsumka Jesús arantuktárum.
- 22 Núasha Jesusna aínsarank nii áishrin umirkartí.

Áishmank nii tarímtarin anetí.

- 23 Utsumka Jesús Jesús-Irúnramun uuntrinti. Nii iniashí asamtai, nii ewemtikiartiniáiti. Aíntsank áishmank nii tarímtarin uuntrinti.
- 24 Jesús-Irúnramu Utsumka Jesusan umirea aíntsank, tarímtasha nii áishrin tuke umirkatniuíti.
- 25 Átum aishmanktíram, Utsumka Jesús Jesús-Irúnramun anéak, surumakmia aíntsarmek, atumí tarímtari anetárum.
- 26 Niisha Jesús-Irúnramun entsajaj nijjar, nii chichámejaj*u* iwiáarak, wáimiaku awajsámiayi.
- 27 Kame, Jesús-Irúnramu ti shíir, wapikcha, chamir, penke tunártincha, nekás wáimiaku awajsátaj-sa wakerúkmiayi.
- 28 Áishmanksha, nii anémamna aíntsank, nii tarímtarin anetniuíti. Kame tarímtarin anéa nuka, nii anémamui.
- 29 Yákesh nii iniashín kajératsui. Antsu pénger wáiniak, áyurui. Núnisank Utsumka Jesussha Jesús-Irunramúnam túrawai.
- 30 Kame íisha nii iniashintji.
- 31 - *Áishmankka nii aparín, nii nukurinsha ikiukí, nii tarímtarijajink tsanink, chikíchik iniash' ajáawai* - Ujajmatáiniam tu aarmáiti.
- 32 Tuma asamtai, áishmank nii tarímtarijajink Jesús-irúnramua iniákmamu asa, ti úunt Nantaráiti.
- 33 Nuíkia atumsha átum anemámrumna aíntsarmek, atumí tarímtari anetárum. Tarímtasha nii áishrin arantuktí.

AKANKAMU 6.

Úunt, uchi, takárniusha arantunaikiartiniáiti.

- 1 Uchitíram, atumí úuntri umirkatárum. Kame: - Apa nukusha arantuktá - tu awemamuíti.
- 2 Aya ju awemamu nunkan péngerin itiáwai.

- 3 Kame: - *Ju nunkánam warásam, núkap uwí pujústatme - tawai.*
- 4 Atumsha uchirtintíram, atumí uchirí waitkiasáirap. Antsu Arutman chichámejají pénker jintintiatárum.
- 5 Takarniutíram, atumí úuntri Utsumka Jesusa aínsarmek arántukrum, pénker takákmasrum, wáitrutsuk nekás umirkatárum.
- 6 - "Pénkeráiti" turutit' – tútsuk, úunt iirmachkurminkia, Utsumka Jesusan takárniuri asárum, Arútam wakéramun najánatin, warásrum takakmastárum.
- 7 Aéntsnan takákmaatsjai, antsu Úunt Jesusnan takákmaajai tusárum, pénker takakmastárum.
- 8 Kame Úunt Jesús, takarniun, ankant-pujuiniánsha takakmásmarin íis, akiktatui.
- 9 Atumsha úunttíram, atumí takárniuri arántukrum, kajerkáirap. Kame Nayáimpiniam chikíchik Úunt, ashí aéntsun Nérentniuri asa: - Úunt takarniurijají métek ainiáwai – títiatui.

Kakáram ajastárum.

- 10 Núnisrumek, Úunt Jesús ashí tujintcha asamtai, nii kakarmarijají kakáram ajastárum.
- 11 Íirshimp' nupétkatin, ashí mash' Arutman tsentsakri tuke takustárum.
- 12 Kame aéntsujají mániatsji. Antsu úunt emésak ti kakáram, ju nunkánam yájáuch' jintintiáinia, iin nankatamainiájnia nujají mániajji.
- 13 Mániktin tsawántnum ewemrámnium, Arutman tantarí, ashí mash' nii tsentsákrisha takustárum.
- 14 Nekás-chicham atumí emenmamtairinti. Pénker najánma atumí tantarinti.
- 15 Mash' nawamnaikiarat' tusárum, Pénker-Chícham etsérutin, nawénam-ewétai iwiaratárum.

- 16 Eméskan iwiánchri kéena nu árenktin, atumí iimiármarin tantarí takustárum.
- 17 Aíntsarmek múuknum ewémratin etsénkrutai, tura, Arutman chichame asamtai, lwiáikratniun nankirisha achiktárum.
- 18 Tuke anéntrakrum seá pujutárum. lwiáikratin turámrumna núnisrumek tuke tsawant anentruatárum. Aneárum irunra pujúsrum, atumí yachí waimiakárunu pimpítsuk seatiartárum.
- 19 Aíntsarmek winiásha seatritiárum, ishámstsuk natsámstsuk Pénker-Chicháman etserkamij.
- 20 Wi, Pénker-Chichaman étserkun epenmia asamtai, nuna pénker ayámruktin seatritiárum.
- 21 Wi itiur pujaj, warí takatan najáneaj, nuna nekataj takúrmeke, Tíkikiu ii yachí ti anéamu, Úunt Jesusan takárniuri asamtai, anintrustárum.
- 22 Kame atumín ujátmak ikiakatmartárum tusan akupeajai.
- 23 Atumí anenkrátmari, iimiármarisha ii Aparí Arutmánmaya, tura Úunt Utsumka Jesunúmiasha tarímtanam atumiín taratí.
- 24 Ashí mash' ii Úuntri Utsumka Jesusan nekás anena nuka, nii pénkerin takusartí.



PAPRU JIRIPSUN AÁTRA.

Carta a los Filipos

AKANKAMU 1.

Éemkari.

- 1 Papru Timiutéujai, Utsumka Jesusan takárniuri ásar, Jirípsunam Utsumka Jesúsnum waimiakarun, Utsúkratin, Imiákratin pujúinia nuna papín aárar, akuptuiniáwai.
- 2 li Aparí Arutman, Úunt Utsumka Jesusnasha pénkeri tarímtanam achiktárum.
- 3 Atumiín enentáimkiun, Arutman yumínkiajai.
- 4 Wará warat tuke ashí máshiniun anentrútjarne.
- 5 Kame yama juárkui, Pénker-Chichaman etsérkatin yaintkiamiárumna nuna penke kajinmáttsujai.
- 6 Atumiíni Arútam ti pénker takatan juarkí asa, atumiíni Utsumka Jesusan tsawantriín páchitsuk ejeráttawai.
- 7 Winia anentáirui pujá asákrumin, tuke enentaimtájrume. Epénmia pujáknasha, Pénker-Chichaman etsereakun, ayamrakuísha, atumsha wijai pujá asárum, Arutman penkeriín wijai métek pachíntiarme.
- 8 Utsumka Jesúsnum atumín ti anéa asán, penke kajinmattsújrumna nuna Arútam nékawai.
- 9 Atumsha páant nekárum, atumiín anénkrattai tsakarát' tusan seátjarne.
- 10 Tunámstuk, nekás imítmachu, Utsumka Jesusan tsawantriín jeátin, ashí mash' ana nujai tuke pénker takakmastárum, tájarne.
- 11 Kame Utsumka Jesusnúmani wáimiaku ajasú asárum, Arútam naatmamtíkkiarum, winiásha waramtikrusuítrume.

Jesús winia iwiakmaruíti.

- 12 Yatsurtíram, nekatárum: Wi itiúrchatnum pujáink, Pénker-Chichamka eemkí wéawai.
- 13 Wi júí epenmia pujakui, aents^u jeánam pujúinia, aach' pujuiniána nusha, Utsumka Jesusan nekawármiai.
- 14 Winia epetiármatai, untsurí ii yachí Utsumka Jesúsnum ainiána au, yamáikia kakáram ajásar, ishámstuk Arutman chichamen páant etserainiáwai.
- 15 Chíkichkia winia akasmátruiniak, nankatúktinian turuiniakuísha, chíkichkia pénker enentáimsar, Utsumka Jesusnan etserainiáwai.
- 16 Kame níinkia anénkratin ásar, Pénker-Chichaman ayámruktin epenmia pujajna nuna nekainiáwai.
- 17 Antsu akasmátruinia nuka, Utsumka Jesusnan pénker anentáijai etserainiátsui. Kame winia kajértukar: - Epenmia asa, ti núkap waitrumsatí - tuiniáwai.
- 18 Pénker anentáijai, tura yajáuch' anentáijáisha Utsumka Jesusnan etserainiakuísha, núnisnak waráajai.
- 19 Kame, átum anentrámujai, Utsumka Jesusan Iwaiokratniurijáisha ti pénker pujústatjai.
- 20 Wi iwiáku pujakun, jakámtaisha, yamáisha yaúnychua aínsank winíni Utsumka Jesús ti nankámaku ajástatui. Nekás tu enentáimjai.
- 21 Utsumka Jesús winia iwiákmar asamtai, jakamúnmasha nii pénkerin achíajai.
- 22 Wi iwiáku pujusan, winia takátur éemka wea asamtai, warinia achíktaj ?
- 23 Jimiará anentáin tákakeajai: Utsumka Jesúsnum pujustin imiá pénker asamtai, wárichik níijai pujústaj-san wakérajai.
- 24 Antsu atumiín enentáimsan, iwiáku pujumáitjai.
- 25 Wijáinkia atumí iimiármari éemka wéakui, wará pujumniúram, atumjai pujústin penkeráiti.

Jir. 1,26.

26 Wi atumiín pujakui, átumka Utsumka Jesusj*ai* pujustin imiá warastátrume.

Atumí iimiármari emenkakáirap.

27 Pénker-Chicham Utsumka Jesús etsérkamu umírkatin kakartárum. Pénker-Chichámnum íimiaru ajásrum, chikíchik anentái, chikíchik enentaimsámusha métek takustárum. Atumiín jeáknaka nuna íistaj-san wakérajai. Antsu winiachkunka nuna antúktaj-san wakérajai.

28 Atumí numasri ishamkáirap. Kame ashí mash' Arutmánmay*a* winiá asamtai, níinkia mesékmarin iniakmainiákui, átumka atumí ewemrármuri iniaktustátrume.

29 Utsumka Jesúsnum íimiaru asákrumin, níij*ai* wáitsatin Arútam tsankatrámearme.

30 Atumsha winín wainiármena, winia ántarmena núnisrumek katsúntratárum.

AKANKAMU 2.

Péejchach' ajastárum.

1 Utsumka Jesúsnum anenaitiárum, timink*ai*tjjarum ? Iwiáikratin achikiú asárum, nekás anénaisrum, wáit aneasmink*ai*áitrum ?

2 Nu tumaitkiuínkia, métek ajásrum, anénaisrum, chikíchkia aínsarmek pénker takákmasrum waramtikrustárum.

3 Wáantu ajásrum, awakmaktaj tusárum, pénke takakmasáirap. Antsu wáantu ajátsuk: - chíkich imiainkasáiti - titiárum.

4 Atumek enentaimtumasáirap. Antsu chikichan yáinktasa wakeruktárum.

- 5 Utsumka Jesús enentáimmia aínsarmek, númtak enentaimtumastárum.
- 6 Kame níisha Arutmaitiat, Arutma aínsuk, ti péejchach' ajásmiayi.
- 7 Nii takárniuri ajástasa, aéntsua anis ajásmiayi.
- 8 Aents^u asa, péejchach', ti umirín ajás, Paúnam ajjintiámu jakámiayi.
- 9 Tuma asamtai, Arútam ti nankámaku awajas, ashí mash' aéntsnum naatmamtikkiámiayi.
- 10 Nuíkia ashí Nayáimpiniam, nunkánmasha, jakamúnmasha, mash' tekemrurartí.
- 11 li Aparí Arutman naatmamtikkiarat' túsar, ashí mash' aents^u nii chichámejaj: - Utsumka Jesús ii Uuntrinti – tiartí.
- 12 Wi ti aneamutíram, wi atumjaj pujúmiaj nuí tuke umírtukrum, yamáisha yajá pujakuísha, núnisrumek ewémratin sapíjmiashim takakmastárum.
- 13 Kame Arútmaka waramtikrusarat' tusa, atumí wakerámurin, kakarmarinsha surámrume.
- 14 Penkercháiti tútsuk, penke tunáitsuk, ashí mash' shíir umiktárum.
- 15 Túrakrum, aents^u tunartin, ti yajáuch' ainiámunam, nekás tunámstuk, Arutman uchirí ti pénker atátrume. Kame átumka iwiakmámtikin chicham iniáktusrum, yaa aínsarmek nii tsaapniríntrume.
- 16 Utsumka Jesusan tsawantri jeámtai, wi jintiamiájrumsa nu aantrachuapitia tusan, ti warástajai.
- 17 Atumí iimiármari, jaterman, íikmaknash nankáa asamtai, nu takusmíntrum tusan, atumjaj warasan, winia iwiákmarun amasminiáitjiarme.
- 18 Atumsha tu enentáimsarum, wijaj warastárum.

Paprun akupkámuri.

- 19 Átum itiur pujárum nuna ujatkat' tusan, Úunt Jesús wakerakuínia, Timiutéun akuptuktátjarme.
- 20 Kame nii atumín enentaimturmármena núnin, chíkich atsawai.
- 21 Ashí mash' níiniun enentáimsar, Utsumka Jesusnan enentaimainiátsui.
- 22 Antsu, atumsha nékarme, Timiutéu, Pénker-Chichaman etsérkatin, winia uchírua aínsank wijai takakmasuíti.
- 23 Tuma asamtai, winia itiúrchatrun nekan, wárichik akuptuktátjarme.
- 24 Antsu, Úunt wakerakuínia, nékachma wisha iitiájrume.
- 25 li yachí Epajrutitiu, winia yaintkiat' tusárum akupturkamiármena nu, wijai takakmas, waitsamtai, awaketeájrume.
- 26 Átum nii jáamuri neka asákrumin, kúntuts enentáimias, atumiín ti enentáimmiai.
- 27 Nekás jaa asa, jasáttuk tepakuísha, Arútam wáit anentramrar', ii waitiámurin atantramkímiaji.
- 28 Tuma asamtai, atumsha wainkiárum warasminiáitrum tusan, wisha titiú pujústaj-san, wárichik akuptuktátjarme.
- 29 Atumiín jeámtai, ti naatmamtíkiarum, Úunt wakera aínsarmek, wará warát nampermatatárum.
- 30 Átum wijai pujachkurminsha, níinkia winia yáintiuk, ti katsúntar, Utsumka Jesusnan takáreak janinksamai.

AKANKAMU 3.

Jesús íisrum, Jutiú ajasáirap.

- 1 Yatsurtíram, Úunt Jesúsnum warastárum. Átum kakáram ajasuk tusan, ti núkap tímiaj nuna ataksha aátjarme.

- 2 Tsupirnakaru yawá aínsarank yajáuch' jintintkiartin asármatai, aneartárum.
- 3 Iyáitji nekás tsupírnaku. Kame ii anentáijai Arútam umireakur', ii wakéramu najántsuk Utsumka Jesúsnum takákmaaji.
- 4 Aents^u kakáram ainiakuísha, wisha imiá kakarmáitjai. Chíkichkia: - Tsupírnaku atiniáitrome – tuiniakuísha, wi tsupírnaku asán imiá nékajai.
- 5 Israérum, Penjamín matsatkámunam akinian, Jutíun uchirí asán, yarush' tsawant kanáran tsupírnaku asán, nekás jutiúitjai. Íi úuntri awemamun umirmakiaj ? Pariséu asán, páchitsuk umírmiajai.
- 6 Nu ashí mash' umirkatniúitji tusan, Jesús-Irúnramun kajérmiajai. Imítmachu asán, ii úuntri awemamun tuke ti pénger umíkmaiajai,
- 7 Antsu, Utsumka Jesúsnum jeán, nu aanráiti tímiaja !
- 8 Utsumka Jesusan takusan, nu ti nankámaku asamtai, ii úuntri tiniu áarmia nu, yamáí itit awájtawai. Niinín pujúsan, mash' aanráiti tusan, aya niin nawamkátaj-san wakérajai.
- 9 Yaúnchu awemamun íitsuk, Utsumka Jesúsnum íimiaru ajasan, niinín mash' iwiamia nuna umírkatasá, niin inkiúnttaj-san wakérajai.
- 10 Niin pénger nekan, nii aneántmarin nekapran, níijai wáitsan, níiya aínsanak jákatniun wakérajai.
- 11 Nuna túrakun, Arútam wakérakui, jakamúnmaya aneánttatjai.
- 12 Wi nekás imítmachu ajástinian jeáchu asán, Utsumka Jesús nupettukú asamtai, nuna jeártiaj-san tuke katsúnteajai.
- 13 Yatsurú, nekás imítmachun ajaschaapitja tusan, yaúnchu najánamun enentáimtutsuk, yamáikia aya éemkatniun enentáimjai.
- 14 Utsumka Jesús untsúrka asamtai: - Amastátjame – turútmiania nuna enentáimsan, jeártiaj-san tsekentjai.

- 15 Ashí mash' imitmachutí, juní enentaimsatniuíťji. Tu enentaimainiátsna aun Arútam sukuiniártatui.
- 16 Tuma asamtai, ii jearmiájnia nu penke emenkachatniuíťji.
- 17 Yatsurtíram, wiya aínsarank ajasárua nu íisrum, wiya aínsarmek ajastárum.
- 18 - Untsurí Utsumka Jesusan Páurin kajerainiáwai – yaúnychu tiniu asán, yamáisha úuteakun ataksha tájarme.
- 19 Kame nuka Arútmanun tákaktsuk, aya ejémarar, natsámmai ana nu penkeráiti túsar, aya ju nunkánmayá enentáimiu ásar, ewemrachártatui.
- 20 Antsu Nayáimpikia ii jéente. Kame nuyá iin ewemtíkkiartin, Úunt Utsumka Jesús ti anéa asar', nákaaji.
- 21 Nii kakarmarijajink atsamúnmayá mash' ikiánka asa, nu kakármajai nii iniashín náatu awasmia, aínsank ii iniashín yapajiáttawai.

AKANKAMU 4.

Warastárum.

- 1 Tuma asamtai, tuke nákamú, ti anéamu yatsurtíram, winia warátair, winia etsénkrutair asárum, Úunt Jesúsnum tuke kakartárum.
- 2 Ewutiá, kaímjai Síntiki Úunt Jesúsnum irúnra takakmastárum tusan, seájrumé.
- 3 Amesha, winia nekás aír Sísiiku, nu nuan yaintrukartá. Kame níisha, Krementé, chíkich nii náari Nayáimpiniam peetáinia aínsarank, wijai Pénker-Chichaman ayamrukarmia nu kajinmatkip.
- 4 Úunt Jesúsnum tuke warastárum.
- 5 Ataksha: - Warastárum - tájarme. Úunt Jesús tíjiuch' pujá asamtai, tuke ishámstuk pujúsrúm, ti tsanka anentái iniakmastárum.

Jir.4,6.

- 6 Tuke túkesha Arútam seatárum. Antsu aya seá pujútsuk, ti shíir yuminksatárum.
- 7 Arútmaka tarímtanam ti núkap súramrum, Utsumka Jesúsnum atumí anentáin, atumí enentaimsámurin ipiatamkáttarme.
- 8 Núnisrumek yatsurú, wáitrichu, pénker, imítmachu, chamir, tura mash' aents^u shíir írunea nu, ashí mash' pénker naatmamtíkmai ana nu eaktárum.
- 9 Arutman pénkeri íijai pujusat' tusárum, winiya unuimiarmiármene, achíkmiármene, antukmiármene nu amíkrum, wi itiur pujúsmiaj núnisrumek atumsha pujustárum.

Yumínksamu.

- 10 Átumka tuke winia enentaimtursayátrum, nu iniakmaschaitkiurminsha yamáí nekan, Úunt Jesúsnum ti waráajai.
- 11 - Nuna utsúmajai – tátsujai. Kame wi tákakeaj nújaink: - Mámete - tuke tau asán, utsúmatsjai.
- 12 Taramkámunam, utsumamúnmasha núnisnak shíir pujuwitjai. Ejemárnasha, tsukamáknasha; núkap takakunsha, ishíchik takakunsha, máshiniu unuimiatkáitjai.
- 13 Arútam, nii kakármarin tuke surú asamtai: - Ashí tujintcháitjai - tajai.
- 14 Tumaitkuísha itiúrchatnum wijai pujusú asákrumin: - Pénkeráiti - tajai.
- 15 Jiripsúnmaya_u aentstíram, yama nankámtaik Pénker-Chichaman etserkátaj-san Masetunian ikiukín wéakuí, ashí mash' Jesús-Irúnramu penke yaintkiacharmatáisha, aya atumek akikmatrukmiárme.
- 16 Tesarúnikianam pujúmiaj nuí, átum wi utsúmamu jimiará akikmatrukmiárme.

Jir.4,17.

- 17 Wikia atumí kuítrin penke eáatsjai. Antsu Átum Arútmanam imiá takúsminrum tusan, wakérajai.
- 18 Yamáikia utsúmaj nunash iniánkasan tákakeajai. Epaprutitiu átum susamun surúsmiania nujaj, ti núkap takákeajai. Nu susa asákrumin, Arútam kunkuínia ániun nekápeak, waráawai.
- 19 Arútmaka Utsumka Jesúsnum ashí mash' tákaku asa, ashí mash' utsumármena nú yaintmaktátrume.
- 20 li Aparí Arútam tuke túkesha náatu atí. Nukete.
- 21 Yatsur Utsumka Jesúsnum waimiakaru amikmatárum. Yatsursha wijaj pujuiniasha, amikmainiáwai.
- 22 Ashí mash' juyá yatsur, úunt Sésaran jeén takakmáinia nusha, amikmátmarne.
- 23 Úunt Utsumka Jesusan pénkeri, atumjaj pujustí.



PAPRU KURUSAN AÁTRA.

Carta a los Coloséenses

AKANKAMU 1.

Éemkari.

- 1 Papru, Arútam wakerukma Utsumka Jesusan Akatrámuri asa, nii yachí Timiutéujai,
- 2 íimiaru waimiákusha Kurúsanam pujármena nu, Utsumka Jesusnum nekás winia yatsur asárum, ii Aparí Arútman pénkeri tarímtanam achiktárum, tájarme.
- 3 Tuke túkesha atumnia anentrakur', Arútam, ii Úuntri Utsumka Jesusan Aparí, yumínkiaji.
- 4 Kame átum Utsumka Jesúsnum íimiarum, ashí wáimiaku yayármena nu nékaji.
- 5 Pénker-Chichámnum nekás chicham neka asárum, Arútam: - Nayáimpiniam iwiáramun amastátjarme - tímiania nu, nákarme.
- 6 Nuka tsakakí, ashí nunkánam nereki wéak, núnisank Arutman pénkeri, nekás nekatáiri achikmiárumna nuyank, atumiínsha túmawai.
- 7 Épapas, íijai Utsumka Jesúsnum takárniuri ti anéamu, wea asa, nekás chichámjai pénker jintinramáitrome.
- 8 Níisha, átum Iwiaikrátuniunam anentárumna nuna ujatkatása, tarutmai.
- 9 Ujatmákmiaj' nuyank, nekás Arutman wakerámuri nekak^u tusar', nii nekatáirin amasuk^u tusar', tuke anéntraji.
- 10 li Úuntri wakera aínsarmek pujúsrum, ashí mash' pénker najankí wéakrum, Arútmash nekakí wetárum.
- 11 Tuke túkesha ti kakáram ajásrum, Arútam naatmamtíkkiatin waitiámunam warákrum katsuntratárum.

Kuru.1,12.

- 12 li Aparí Arútmaka tsáapin-Irunrámunam tímiania nuna waimiakujai surámsatin asakrin, yuminksatárum.
- 13 Kame kiritniúnmaya jíirmakir', nii ti anéamu Uchiriín juramkímiaji.
- 14 Niinín tunanúmiá jíinkir', tsankuramuítji.

Jesusnumiá mash' winiáwai.

- 15 Níinki wainkiáchmin Arutman paantniurinti; ashí mash' najánkamun iwaiirinti.
- 16 Kame nayáimpiniam nunkánmasha, wainkiámnia wainkiáchminiash, Irúnramu, Akúpkartin, Úuntash nii kakarmarisha, ashí mash' niinín najánkamu ásar, níiniu ainiáwai.
- 17 Éemka níinki pujú asa, niinín mash' pujawai.
- 18 Níinki iniashín múuke asa, Jesús-Irúnramun Uuntrinti. Níinki ashí mash' nankámaku átasa, niá niá jakamúnmayá aneántmiayi.
- 19 Ashí mash' niinín pujusarat' tusa, Arútam wakerúkmiayi.
- 20 Paúnam ajjntiámu nii numpejai nayáimpiniam nunkánmasha nii pénkerin itiá, Arútmajai mash' nawamka asamtai, yuminksatniúítji.
- 21 Atumsha nuik níijai irúntsuk, yajáuch' najanámujai nii numasria aínsarmek pujusmiárme.
- 22 Tumaitkuísha, Utsumka Jesús nii jakamurijai nawamramkárum, nii iniashiín iniashimtikramkákrumin, wáimiaku, penke makúrchamu ajasurme.
- 23 Tuma asamtai, nekás íimiaru ajásrum, katsuntratárum. limiármena nu tuke nákastárum. Pénker-Chicham kajinmatkírap. Kame wi Akátramu asán, ashí nunkánam etserkamjai.
- 24 Atumnia wáitsatniun yamáí waráajai. Kame Jesús-Irúnramun pénker awájsatin, Jesusan waitsámurin táasmarin patáteajai.

Kuru.1,25.

- 25 Jesús-Irúnramun atumiín najánatin, Arútam winia akattúrmiayi.
- 26 Kame nékashtai-chicham tuke túkesha úukma pujumia nuna, yamáí wáimiakun iwiainiakuíti.
- 27 Jesús-shuárcha ashí nunkánam pujúinia nuna, ti náatu úukman nekamtikiátaj-sa, Arútam wakerúkmiayi. Átumka Utsumka Jesús tákaku asárum, níijaj ti náatu ajastin nákarne.
- 28 Ankant ankant jintintian, Utsumka Jesusan nekámurin ujáajai. Kame ashí mash' Utsumka Jesúsnum ti pénker ajasarat' tusan, wakérajai.
- 29 Juíti winia takatur. Utsumka Jesusan kakarmarijaj takákmaajai. Nujaj aents-tujíntiamun najáneajai.

AKANKAMU 2.

li nakumkámuri Jesusáiti.

- 1 Wi atumnia, Rautiséanmayá aéentsnasha, chíkich winia tuke waitkiacháru nunasha, ti katsúnteaj nu nekatárum.
- 2 Utsumka Jesús Arútmanam úukma pujana núnam anénaism, nekás ti pénker nekak^u tusan, kakartárum tájarne.
- 3 Niinín ashí mash' Arutman nekámuri, aéentsnasha nekamurisha úukma pujuiniáwai.
- 4 Yákesh shíir chicháak anankramawáirum tusan, tájarne.
- 5 Átum Utsumka Jesúsnum nekás tuke íimiaru asákrumin, wi yajá pujáknasha enentáimsan, nuna wáinkia asán, ti waráajai.
- 6 Utsumka Jesús atumí Úuntri awajsa asárum, tuke nii jintí aintratárum.
- 7 Niinín pujúsum, itiúr unuimiárumna aínsarmek nekás íimiárum, tuke yuminksatárum.

Kuru.2,8.

- 8 Aneartárum ! Yákesh aéntsun chichámejaink anankrama-wáirap. Ju nunkánmaya áantar chicham asamtai, Utsumka Jesusan chichamenchuíti.
- 9 Kame aya niinín nekás Arútam ashí tujintcha iniashímiawai.
- 10 Atumsha niinín mash' tákakearme. Kame níinki ashí mash' ju nunkánam nankámakun, wainkiáchminian úuntrinsha nankáawai.

Imiáimiunam aneántma.

- 11 Utsumka Jesúsnum tsupírnaku asárum, atumí iniashín wakéramu emenkakúrme.
- 12 Kame imiáimiunam Utsumka Jesúsnum nekás tsupirnakrum, níijai iwiarsamuitiátrum: - Arútam aya nii kakarmarijaink jakamúnmaya aneantmamtikiámiayi - tusárum, niinín aneantuítrome.
- 13 Átum tsupírnakcha pujusú asárum, atumí tunárijai jaka aínsarmek pujusmíárme. Tumaitkuísha Arútmaka Utsumka Jesúsnum iwiakmamtíkramrar', ashí mash' ii tunarin tsankurtamráitji.
- 14 li tumáshrin japir, ii makutáirinias Paúnam ajintia, amúkmiayi.
- 15 Emeskan úuntrin nupétkar, ashí nunkánam tujintia awájsar, Jesús Paúnam nuna wishíkrar, ti náatu ajásmiayi.

Áantar awemamu.

- 16 - Yuámnian yuiniátsui; umárminian umuiniátsui; ii namperin najanainiátsui, nayámtunam, sakétinsha jatenatsui - tuiniakuísha, antukáirap.
- 17 Kame aya Utsumka Jesús tana nu nekasáiti, chíkíchia aantráiti.

Kuru.2,18.

- 18 Karamámunam nii enentaimsámurin wáinkiar, íwianch' ishankar' umirkatniuíjtji túsar, kakáram aínsarank tuinia-kuísha, Utsumka Jesúsán atantramkiaráink aneartárum.
- 19 Nu aents^u Utsumka Jesusjái irunainiátsui. Aya niyáiti iniashín muuké. Kame nii anentáijái, nii yaapejái nii iniashín ikiakar, Arútam wakera núnisank tsakátmawai.
- 20 Átumka Utsumka Jesúsnum jaka asárum, ju nunkan awe-mámurin takakeátsrume. Nuíkia urukamtai ju nunkánmayá chicham ataksha achíarum ?
- 21 - Nu umaráip, nuka yuawáip, nusha kasamkáip -
- 22 aya juyá aents^u nuna tuiniáwai. Kame warinchun takakainiána nu arut ajásar, amukártatui.
- 23 - Péejchach' ajasan, nekás neka asán iniáshrun nupetkam-niáitjai - tuiniayat, nii iniashí yajáuch' wakérakui penke nupetainiátsui.

AKANKAMU 3.

Yakí pujana nu eaktárum.

- 1 Utsumka Jesusjái aneántu asárum, Utsumka Jesús nii Apáí untsuriin ekétea núí yakí eaktárum.
- 2 Ju nunkánam írú nu wakérutsuk, yakí írú nu wakeruktárum.
- 3 Kame jaka asárum, yamáí atumí iwiákmari Utsumka Jesúsjái Arútmanam úukma pujáwai
- 4 Utsumka Jesús ii iwiákmari asa, páant támatai, atumsha níijái náatu ajastátrume.
- 5 Nuíkia, áantar-arútam asármatai, ju nunkánam yajáuch' ana nu: apátkatin, tsanírmatin, áakratin, yajáuch' wakéruktin, kuítrintin ajastin ajakratárum.
- 6 Kame nuka Arutman yuminkrámurin itiaiiniáwai.
- 7 Yaúnchu atumsha nu jintia achikiú asárum, nu turamiárme.

- 8 Yamáikia nu ajapatárum. Kajektin, jiáktin, emésratin, katsékkatin, yajáuch' chichastin ajapatárum.

Yamáram entsartárum.

- 9 Waitrunaiyawáirap. Kame átum iwia aínsarmek jaka asárum, atumí yajáuchiri ajapamiárme.
- 10 Yamáram aents^u ajasú asárum, Atumí Najatma aínsarmek ajásrum, páant nekatin nakumkatárum.
- 11 Niinín kriáku jutíusha, tsupírnaku tsupirnáckhasha, apach' yajaya_a aéntssha, ankant ankántchasha atsuiniáwai. Kame Utsumka Jesús ashí mash' aéntsnum pujá asamtai, ashí métek ainiáwai.
- 12 Wáimiaku ti anéamu asárum, Arútam-shuára aínsarmek entsartárum. Kame wáit-anéntkartin, aents pénker, nekás péejchach', kajechu, katsuntin atiniáitume.
- 13 li Üntri Jesús tsankurtámra asákrumin, aínsarmek atumsha chíkich yajáuch' awajtamsaitkiurmínsha, katsúntrarum tsankurnairatárum.
- 14 Nekás Arútam-shuara aínsarmek entsárum, ti pénker ajastin anenáiyamu emenmamatárum.
- 15 Turakrumka, untsukma asárum, Utsumka Jesúsnum irúnrarum, tarímtanam waimiaktátume. Tuma asamtai, yumínksatin kajintmatkírap.
- 16 Utsumka Jesusan chichame atumiín shíir pujustí. Nekás nékau ajásrum, pénker jintintnaiyatárum. Ujájjai, anentjai, naatmamtikkiamujáisha ikiakanairtárum. Iwiaikrátuiuka atumí anentaín Arutman waratáirin apujsatí.
- 17 Arútam Apa_a yumínksatin, Utsumka Jesusnúmani tuke chichásrum, níinini mash' pénker najanatárum.

Umín atiniátji.

- 18 Nuatíram, Jesús-shuar asárum, atumí áishri umirkatárum.

Kuru.3,19.

- 19 Atumsha aishmanktíram, atumí nuwé aneásrum, kúntuts awajsáirap.
- 20 Uchitíram, atumí úuntri umirkatárum. Kame Jesús-shuar asárum, nu penkeráiti.
- 21 Atumsha uunttíram, atumí uchirí akajkáirap, antsu ikiakartárum.
- 22 Atumsha takarniutíram, atumí úuntri iirsarat' tútsuk, Úunt Jesús nuna wakérawai tusárum, ashí mash' pénker amiktárum.
- 23 Aéntsna takákmaatsji, antsu Úunt Jesusna takákmaaji tusárum, ashí mash' atumí takatri pénker najanatárum.
- 24 Atumí Úuntri Jesusáiti. Átum nii takárniuri asákrumin, akirmaktátrume. Timia nunasha suramsáttarme.
- 25 Amichu áinia au makumu áartatui. Kame Arútmaka ashí mash' níiniun susáttawai.

AKANKAMU 4.

Amúamu.

- 1 Atumsha uunttíram, atumí takárniuri utsumiaráink tusárum, pénker akiktárum. Kame atumsha Nayáimpiniam atumí Úuntri tákakearme.
- 2 Tuke anéntrakrum, kánutsuk Arútam yuminksatárum.
- 3 Arútmaka Utsumka Jesusan páant awájsatin nii chichamen surusat', winia anentrutruatárum. Kame níiniu epenniuítjai
- 4 Makumu atátjana nuí, Jesusan ayamruktin winia anentrutruatárum.
- 5 Aach' pujana nujai aneárum, tuke Jesusna etserkatárum.
- 6 Warásrum, kajétsuk pénker chichásrum, ankant ankant tana un wáitruksuk aiktárum.
- 7 Wi anéamu yatsur Tíkikiu, wi urukú pujaj nuna ujamaktátrume. Kame Úunt Jesusan takatriín winia aír asa, ti pénker yáintiui.

Kuru.4,8.

- 8 Winia etsertamkárur, ikiakatmartárum túsán, atumiín akúpeajai.
- 9 li ti anéamu yachí Unísimu, níijai akúpeajai. Atumnia asa, mash' juí ana nuna etserkátawai.
- 10 Epénmianum winia aír Aristarku, tura Markus, Pernapén kaná yachí yaúnchu chicharkamiájrumna un, amikmátmarme. Markus atumiín jeámtaikia, pénker wainkiatárum.
- 11 Jesussha, Imítmachu tama, amikmátmarme. Aya júchik jutíu ainiayat, Arútam-Irúnramu atí tusar, wijai shíir takák-mainiak, winia atsankturármiai.
- 12 Épapas atumnia asa, amikmátmarme. Ti pénker Utsumka Jesusan takárniuri asa, átum pénker ajásrum, Arútam wakéramu tuke najánánniuram tusa, tuke atumnian ti anéntrawai.
- 13 Ti núkap atumiín enentáimias, Rautiséanmaya tura Yairapurisnúmishasha aéntsnum ti enentáimiawai, nekás tájarme.
- 14 li ti anéamu tsuákratin Rukas, Temasjai amikmátmarme.
- 15 Rautiséanmaya Jesús-shuar, Rínpasha, nii jeén Jesús-Irúnramu írunea nusha kajínmatsuk amikmatárum.
- 16 Ju papí aujsárum, Rautiséanam Jesús-Irúnramu aujsat' tusárum, akupkatárum. Aíntsarmek Rautiséanam papín wi akupkámiaj un seárum, atumsha aujsatárum.
- 17 - Takátrum Utsumka Jesúsnum amásmia iniáitsuk, pénker najanató – Arkipiu titiárum.
- 18 Winia náar Papru, ju papínium winia ewéjrujaink aármajai. Jirujai epénmia pujá asamtai, kajinmatkírap. Arutmá pénkeri atumjai pujustí.

PAPRU JIRIMUNKAN AÁTRA.

Carta a Filemón

- 1 Papru, Utsumka Jesusna epénmia, ii yachí Timiutéujai, Jirimunk takátnum ii aḷ pujúmia nuna, papín aáteajai.
- 2 Ii umái Ápia, takátnum ii ti pénker aḷ Arkipiu, Jesús-Irúnramu nii jeén irúnea nusha,
- 3 ii Aparí Arutman, ii Úuntri Utsumka Jesúsnasha pénkerijai, tarímtanam pujusartí.
- 4 Jirimunká, winia anéntrujai amin enentáimtakun, tuke túkesha Arutman yumínkiajai.
- 5 Kame íimiaru asam, Úunt Jesús aneásam, Jesús-shuársha yáinia asákmin, naatmamtikramáinia nuna ántajai.
- 6 Takatrumíin íimiarum, Utsumka Jesúsnum ashí mash' pénker tákakeajnia nu iniakmastá.
- 7 Ame yáinkratin asakmin, ii yachí amiín kakáram nekapáinia taman antukan, warasan tsankúajai.
- 8 - Turatá - tusan, Utsumka Jesúsnum amin awemamniaitkiúnsha,
- 9 aneásan seájme. Kame Papru úuntach' asa, Utsumka Jesusna epenmia asa, seátmawai.
- 10 Epenmia pujakun winia uchir Unésimiun iwiákman susámiaj, nunan seátjame.
- 11 Unésimiu yaúnchu yaintmakchiat, yamá winia yaintkiámia aínsank, aminsha ti núkap yaintmáktatui.
- 12 Nuna awántajme. Winia aínsamek nu achiktá.
- 13 Pénker-Chichamna epenmia pujakun, ámea aínsank winia yaintkiat' tusan, takusájai.
- 14 Tumaitkuísha, ame turútcha asakmin, níinki turuttí tusan, amin awématniun nakitramjai.
- 15 Unésimiu ishíchik menkakamtáisha, yamá tuke túkesha takústatme.
- 16 Yamái takárniuram acháttawai. Antsu wi ti anéamu yatsur asantai, amé yatsúmsha átatui.

Jirm. 17.

- 17 Kame wi ámijai chikíchik ajasú asamtai, wiya aínsamek nu achiktá.
- 18 Warinchun atantramkí, tumashitkuísha, wi núnaka akiktátjame.
- 19 Wi Papru, winia ewéjrujai aáran, kuésmajai: nekás wi akiktátjame. Antsu, ame winia tumashitkiumnisha, winia tumashítme, tátsujai.
- 20 Kakartá, yatsurú. Tájana nu amikiái tusan, wakérajai. Utsumka Jesúsnum atsankturtá.
- 21 Tuke umikiú asakmin, aátjame. Antsu tájana nu iniánkasam najanáttamna nuna nékajai.
- 22 Aínsamek kanutáir iwiaratá. Kame átum winia anentrutra asákrumin, ankant pujústaj-san nákajai.
- 23 Épapas, Utsumka Jesúsnum wijai epénmia nu amikmátmawai.
- 24 Aínsarank winia yaintin Markus, Aristarku, Temás, Rúkasha amikmátmainiáwai.
- 25 Utsumka Jesusan pénkeri atúmjai pujustí. Nuke atí.



PAPRU TESARÚNIKIAN ÉEMKA AÁTRA.

1ª Carta a los Tesalonisenses AKANKAMU 1.

Éemkari.

- 1 Papru, Sirwánu, Timiutéusha Tesarunikiánmaya Jesús-Irúnramun, Arútam Ápanam, Úunt Utsumka Jesúsnum írunea nuna, papín aatainiáwai. Arutman pénkeri atumjai tarímtanam pujustí.
- 2 Tuke túkesha atumnia anentruar', Arútam yumínkiaji.
- 3 Atumí iimiármari neréakui, atumí anenkrátmari umúchiakui, ii Úuntri Utsumka Jesúsnum nákasma menkáachkui, ii Aparı Arútmanam tuke enentáimiaji.
- 4 Yatsurú, Arútam ti aneamuá, itiur untsurmakmiárum nu ii kajinmáttsuji.
- 5 Pénker-Chicham etserkamiájnia nu aantrachuítí. Antsu ashí tujintcha Iwiáikratniun kakarmarijai atumí anentaiín enkemámiayi. Aíntsarmek atumín yáinktasa itiúr pujúsmiaj nu kajinmatkichurme.
- 6 Kajerkamuitiátrum, Pénker-Chicham achíkrum, Iwiáikratniun warátairi nekáprarum, íiya, tura ii Úuntriya aíntsarmek ajasurme.
- 7 Túrakrum, Masetúnianmaya Akayanmayasha aéntsna Jesusan nakumkámuri ajasurme.
- 8 Kame Masitúnianam, Akayánmasha, nu arantsha, atumiya ii Úuntri Jesusan chichame jeámiayi. Arútmanam íimiaru asákrumin, ti núkap irutkámunam nuna aujmatainiáwai, nekás tájarme.

1 Tes.1,9.

- 9 Atumjai ii pénker pujusmiajn^{ia}, tura itiur áantar-arútam iniáisarum, Nekás-Arúتمانam jeamiárumna nunasha ashí mash' aujmatainiáwai. Kame Nekás-Arútam tuke iwiákun umírkatin nankamamiárme.
- 10 Aíntsarmek, nii Uchirí Jesús, Arútam jakamúnmaya aneantmamtikiámia nu, Nayímpinmaya taratin jeástatuk asa makurmaráj' tusárum, nákarme.

AKANKAMU 2.

Tesaruníki^{an}am Jesús-Irúnramu nánkama.

- 1 Wi atumiín áantran jeáchmiajna nu, atumsha yatsurtíram nékarme.
- 2 Jirípsunam awatramu, katsekkamuitiátar', Arútam iisar', itiúrchat akuísha, atumiín Arutman chichame etserkátaj-sar' ishankáchmiaji.
- 3 Yajáuch' enentáimtsuk, anankáttaji tútsuk, nekás chichamjai chicharkamiájrume.
- 4 Arútmaka iin pénker írmasar', Pénker-Chichaman akatramrámiaji. Nuíkia aents^u wakéramu chichátsuk, Arútam ii anentáin neka asamtai, nii wakéramu étserji.
- 5 Shíram chichamjai aents^u nupetkáchmiajn^{ia} nu atumsha nékarme. Aíntsarik kuít eakchámi^{aj}n^{ia} nunasha Arútam nékawai.
- 6 Aíntsarik aents^u naatmamtikramratái tusar', eakchámi^{aj}i.
- 7 Utsumka Jesusan akatrámuri asar' nankámaku ajátsuk, atumiín péechach' ajar', nuku nii uchirijai nakura aíntsarik ajásmiaji.
- 8 Atumín ti anea asar', aya Pénker-Chicham, antsu ii iwiak-marisha atumín súsatin wakerúkmi^{aj}i.

- 9 Yatsutíram, Pénker-Chicham etserkar', ii utsumámuri sukartusáirum tusar', kashi tsawáisha takakmasar', pimpik-miájnia nu kajinmatkírap.
- 10 Átum, yamáí íimiaru asárum, nékarme, Arútmasha nékawai: li wáimiakua aínsarik atumjají shíir pujúsmiaji.
- 11 Atumí Apariya aínsarik ankant ankant iismiájrume.
- 12 Arútam-Irunrámunam, naatkamúnmasha Arútam untukma asákrumin, wárichik pènker pujusmíntrum tusar', atumín ikiakarmiájrume.
- 13 Aéntsun chichámenchu, antsu Arutman chichamea aínsarmek ii unuiniárma achikiú asákrumin, Arútam tuke túkesha yumínkiaji. Kame nekás Arutman chichame asa, átum íimiaru asákrumin, atumín ikiakatmarme.
- 14 Yatsutíram, Jutéanam jutíuka Jesús-Irúnramun kajerkmia aínsarank Tesarunikiánmayá aents^u atúmniasha kajertam-kamiárme.
- 15 Kame jutíuka ii Úuntri Jesusan, yaúnchu waimiakunsha maawaru ásar, íinsha kajertamainiáji. Nu aents^u Arútam kajérkamú ásar, aéntsun numasri ainiáwai.
- 16 Jutíuchu ewemraráink túsar iín suritramkur', ti núkap tunamka ásar, yumínkramu ajástatuk ajasarai.
- 17 li atumjají irunrar' pujútsuk ti núkap tsawant nankamasú asarsha, tuke atumín enentaimtusar', wáinkiatin eákmiaji.
- 18 Atumín irástaj-sar' wakerukuitiatar', wisha ti núkap nekapsayatan, emésak arentkamtai, tujintkiámiajai.
- 19 Kame aya atumek ii nákamuri, ii waráamuri, ii etsenkrutáiri asákrumin, Utsumka Jesús támatai, ti warástatji.
- 20 Átumka ti náatu asárum, ii waramuríntrume.

AKANKAMU 3.

Paprun itiúrchatri.

- 1 Aténasnum wiki pujayátnak, átum itiúrchatnum pujá

- asákrumin, katsúnttsuk,
- 2 yatsur Timiutéun, wijai Arútmanam Utsumka Jesús Pénker-Chichaman etsérmia nuna akuptukmiájrumé. Níinki ikiakátmarum, nekás íimiaru awajtamsatniúyarme.
 - 3 Kame yamáí itiúrchat takakeármena nu katsuntratniuítrume. Íikia tuke katsuntratniuítji.
 - 4 Yaúnychusha atumjají pujúmiaj' núí: - Tuke kajerkamu asar', katsuntratniuítji - páant tímiaji. Nuka nekás turunáiti.
 - 5 Íirshimp' atumín nupettámkurmin, ii takatri áantar ajasáink tusan, atumín iimiármarin nekátaj-san, wárichik Timiutéun akuptukmiájrumé.
 - 6 Yamái, Timiutéu waketkí, chichártak: - Íimiaru ásar, pénker yainiainiáwai - turutu asantai, waráaji. - Lín enentaimtúrmasar', íiya núnisarank iirmástinian wakeruiniáwai - turútmiai.
 - 7 Nuíkia yatsurú, atumí iimiármarinkia itiúrchatnumsha ikiakátmarji.
 - 8 Úunt Jesúsnum kakáram ajákrumin, íisha ataksha iwiákji.
 - 9 Átum Arútmanam iin ti waramtikkiarta asákrumin, itiúrak Arútam yuminksamniáitij' ?
 - 10 Ataksha atumiín jeátaj-sar', atumín íimiármari eemtikkiátaj-sar', kashi tsawáisha tuke ti núkap anéntraji.
 - 11 li Aparí Arútam, ii Úuntri Utsumka Jesussha atumin irastin jíntian iwiarartí.
 - 12 li aneámuri nakumkárum, pénker anénaiyákrumin, ashí aéntsun imiá aneástinsha ii Úuntri Jesús tuke ikiakatmartárum.
 - 13 li Úuntri Jesús ashí arútam-shuárjai tamam, ii Aparí Arútam wáimiaku, imítmachu átinian, ikiakatmartárum.

AKANKAMU 4.

Anénaisrum tsanirmawáirap.

- 1 Yatsutíram, Úunt Jesúsnum seájrumé: Arútmajai itiur

1Tes,4,2.

- pujustiniáitrumna nu, ii unuiniárma nékarme. Nu amikiuitiátrum, tuke eemkí wetárum.
- 2 Úunt Jesúsnum itiur pujustin iin amasú asakrin, átum nékarme.
- 3 Wáimiaku ajásrum, tsanírmatsuk pujúsuk tusa, nuna Arútam wakérawai.
- 4 Ashí mash' ankant ankant nii tarimtárijajink pénker pujusartí.
- 5 Arutman nékachua aínsarmek, tsanírmatin enentaimsáirap.
- 6 Yákesh yajáuch' enentáimias, nii yachijaj, nii umáijaj tsanirmashtí. Turakrumninkia, yaúnchu tímiajnia aínsank Úunt Jesús makurmáttarme.
- 7 Kame Arútmaka: - Tsanirmawáirap, antsu waimiaktárum - tusa, untsurmakuítji.
- 8 Amirainiátsna au, aya aéntsun umirainiátsui. Antsu Arútmán, lwiáikratniun, surámjnia nuna umirainiátsui.
- 9 Arútmaka pénker anenáistinian unuitiámra asakrin, winia aármaru utsúmtsirme.
- 10 Ashí Masetúnianmaya Jesús-shuárjaj turakrumsha, nu arant anenaitiárum.
- 11 Tímiajrumna aínsarmek: - li itiúrchatrí iwiáratin, ii utsumámuri íistin, ii ewejejaj takákmastin, ti penkeráiti - enentaimsatárum.
- 12 Turakrumka, chíkich aéntsnum náatu ajásrum, utsumámunam pujuscháttarme.

Jákaru aneantártatui.

- 13 Yatsurtíram, jaka áinia au itiur pujúinia, nu pénker nekatárum. Nékachua aínsarmek kúntuts enentaimsáirap.
- 14 Jesuska jaká aneántmiayi, tátsurmek ? Aínsank Arútam jaka áinia aúnash Jesús jukiarat' tusa, wakérawai.
- 15 Juka ii Úuntri Jesusan chichamente: li Úuntri Utsumka Jesús támatai, iwiakutí jaká nankáatsji.

1Tes,4,16.

- 16 Kame nii tsawantri jeámtai, Pásuk Arutman pinkiuirín umpuármatai, Úunt Jesús Nayáimpinmaya tara, éemka Utsumka Jesúsnum jákarun aneantmamtikiártatui.
- 17 Nuyá iwiáku pujatisha níjjai irunrar', yuránkminiam yakí Úunt Jesusjai inkiunaisar', tuke túkesha níjjaink pujústatji.
- 18 Ju Chicham kajínmattsuk, ankant ankant atsanknairatárum.

AKANKAMU 5.

Tsáapniun uchiríntrume.

- 1 Urutái nu nankámatta ? Urukukit ? Yatsutíram nuna tichattájrume.
- 2 Kame, kashi ajámpek ii Úuntrin tsawantri kasa aínsank tátatui. Nu páant nékarme.
- 3 Aents^u tarímtanam pénker pujuiniána aí, nua nékachma jatema aínsarank nii tsawantri támatai, yákesh pisarchártatui.
- 4 Antsu átum, yatsutíram, kiritniunam pujachu asárum, nu tsawant kasa aínsank tacháttawai.
- 5 Átum tsáapniun uchirí asárum, kiritniun uchirinchuítrume.
- 6 Nuikia chíkicha aínsarmek kánutsuk, aneárum iwiá pujutárum.
- 7 Peákan wakeruiniána au, kashi kanuiniáwai. Umártaj-sar wakeruiniána au, kashi nampenáwai.
- 8 Antsu íikia tsawantan uchirí asar', iwiá pujaji. Ii iimiármari, ii anenkratmarisha ii tantarí aarat' tusar', ii ewemtáiri nákamú ii etsenkrutáiri atí.
- 9 Arútam iin makúrmatsuk, ii Úuntri Utsumka Jesúsnum ewemtíkrámratniun wakérawai.
- 10 Kame iwiakutí jakárusa níjjai tuke iwiáku pujústinian jarutramkámiaji.
- 11 Tuma asamtai, pénker pujustin yamáiya aínsarmek tuke ikiakanairtárum.

1 Tes.5,12.

- 12 Yatsutíram, atumnia takakmainiána, Úunt Jesúsnum jintinramainiána, kakantramainiána aúsha, yuminksatárum, tájarme.
- 13 Atumnia takakmaa asármatai, arántukrum, anetárum. Atumsha nawamnáikiarum, tarímtanam pujustárum.
- 14 Nánkamsar pujuiniána au chicharkatárum. Ishamín ikiakartárum. Kakármachu yainktárum. Ashí mash' aentsjaj katsuntratárum, tájarme, yatsutá.
- 15 Yajáuch' awajtamainiána au, yapajkiáirap. Antsu númtak, chíkich aentsjáisha, tuke pénker awajnalisatárum.
- 16 Tuke wará pujutárum.
- 17 Tuke túkesha anentrú pujutárum.
- 18 Jesús-shuar asákrumin, tuke yuminkrusarat' tusa, nuna Arútam wakérawai.
- 19 Iwiáikratin ikiajniakáirap.
- 20 Wáimiaku tuiniána au ajapawáirap.
- 21 Ashí mash' íisrum, aya pénker ana nu achiktárum.
- 22 Pujármena nuí, ashí mash' yajáuch' ana nu nakitratárum.
- 23 Arútam tarímtanam iwiaitmármena nu tuke iwiaitmaktárum. li Úuntri Utsumka Jesús nii tsawantri jeamam, atumí anentáin, atumí wakanín, atumí iniashinsha makútsuk, íirmastárum.
- 24 Atumín untsurmármena nu, wáitrutsuk tuke yaintmak-tátrume.
- 25 Yatsutíram, íiniu anentruatárum.
- 26 Ashí ii yachí pénker amikmatárum.
- 27 Ju papí ashí ii yachín aujsámniuram tusan, ii Úuntri Jesúsnum akupeájrum.
- 28 li Úuntri Utsumka Jesusan pénkeri atumjaj pujustí.

PAPRU TESARÚNIKIAN ATAKSHA AÁTRA.

2ª Carta a los Tesalonisenses AKANKAMU 1.

Éemkari.

1. Papru, Sirwanu, Timiutéusha, Tesarunikiánmaya Jesús-Irúnramu ii Aparí Arútmanam, ii Úuntri Utsumka Jesúsnumsha írunea nu aáteaji.
2. Ii Aparí Arútam, ii Úuntri Utsumka Jesussha nii pénkerijai tarímtanam iwiaitmaktárum.
3. Atumnia, yatsutíram, túke túkesha Arútam yuminksatniúitji. Atumí iimiármari, atumí anenaiyámuri éemka wénakui, nekás turatniúitji.
4. Kajerkamuitiátrum, itiúrchatnum pujákrumsha, atumín iimiármari páant iniákma asákrumin, ii warasar' ashí Jesús-Irunramúnam atumnia aujmateaji.
5. Arútam-Irúnramu atí tusárum, ti wáitia asárum. - Arútam nekás makúrmáshtatji – titiárum.

Makúkratniun tátinri.

- 6 Ii kajertámjinia aun Arútmaka nekás wáitkiasártatui.
- 7 Antsu, átum kajérkamu asákrumin, ii Úuntri Jesusan tsawantriín nii Pasúkrijai Nayáimpinmaya ti nankámaku jeá, íijai waramtikramsáttarme.
- 8 Nuíkia, Arútam atsawai túsar, Pénker-Chichaman ii Úuntri Jesús ujatmakmiájnia nuna amirainiátsna aun, ji ti tsuer wáitkiasártatui.
- 9 Ii Úuntri Jesusan yapín íitsuk, nii nankamákmarin achítsuk, tuke túkesha waitsártatui.

2 Tes.1,10.

- 10 Kame waimiákunam, ashí mash' iimiárunam nii pénderin iisarat' tusa, - Paprun chicháme nekasáiti - tuiniána nusha naatmamtikrukarat' tusa, nu tsawant Jesuska tátatul.
- 11 Arútam untsukma asárum, atumí iimiarmarijaj kakáram ajásrum, pénder takakmasmínrum tusar', Arútam anentruar', atumín tuke enentáimji.
- 12 turakrumninkia, atumiín ii Úuntri Jesús naatkáttawai. Atumsha Arútmanam, ii Úuntri Utsumka Jesusnumsha naatkáttarme.

AKANKAMU 2.

Ataksha Jesusan tátinri.

- 1 Yatsutíram, ataksha ii Úuntri Utsumka Jesús támatai, níjjaj irunráttajnia nu nekatái.
- 2 Iwiáikratniun wantikiámuri, áantar chicham, wíniachu papí ana nusha: - ii Úuntri Jesusan tsawantri wárichik tátatui - tuiniakuísha, ishankáirap, tájarme.
- 3 Penke anankmamawáirap. Kame éemka Jesús-Irúnramun numasri, áantar-arútam ajás, íi iimiármariin emesrátaj-sa, tatiniáiti.
- 4 Arutman umircha, yajáuch' íwianch' asa, Arutman nankákatin: - Wiyátjai nekás Arútam – tinia, ayámtainiam nii chimpirín apujsáttawai.
- 5 Atumjjaj pujusan tímiajna nu, kajinmatkimkiárum ?
- 6 Nii tsawantri jeáatsaink, aéntsun surimia nu yáit nékarme.
- 7 Yamáikia, Arútam surítiam, aents yajáuch' ajasarat' tusa, úumak takákmaawai.
- 8 Antsu, nii tsawantri jeámatai, páant ajástatui. Tumaitkuísha, ii Úuntri Jesús nankámaku ta, nii numasrin umpuí, amúktatui.

2 Tes.2,9.

- 9 Imitmau, emeskan kakarmarijají aéntsun anankátaj-sa, aénts-tujíntiamun najanáttawai.
- 10 Pénker anénaisar, nekás Ewémtikia-Chichaman umirka-charmia nuna anánkawar, ti yajáuch' awajsártatui.
- 11 Nuka anánkamu ajasarat' tusa, Arútmaka emeskan akupkártatui
- 12 Ashí mash' nekás chichaman antúrtsuk, íimiaru ajascharmia nu, yajáuchin wakera ásar, tuke yumínkramu áartatui.

Tuke iimiartárum.

- 13 Ii Úuntri Jesús aneamutíram, Arútmanu asárum, atumí iimiarmarijají ewémratin untsukma asárum, Iwiaikrátniujají wáimiaku ajasú asákrumin, ii tuke túkesha atumnia yuminksatniuítji.
- 14 Ii Úuntri Utsumka Jesusjají náatu ajasmínrum, Pénker-Chicham etserkamíájnia nujají untsukmáitrum.
- 15 Nuíkia, yatsutíram, chichamjají, papijáisha ununiarmájrumna nu, pénker umirkárum, tuke katsuntratárum.
- 16 Ii Apárí Arútam ti anentma asar', tsankatramkar', nii waratáirin suramsamiájnia nu, ii Úuntrisha Utsumka Jesús ikiakatmartárum.
- 17 Níisha nii anentáin atsánkar, nii chichámejají, nii najanamurijáish eemkarat' tusa, ashí pénkernum yaintmaktárum.

AKANKAMU 3.

Tuke anentruatárum.

- 1 Yatsutíram, Arutman chichame eemkat' tusárum, atumiín jeámia núnisank jeat' tusárum, seatkartitiárum.

2 Tes.3,2.

- 2 Ashí mash' íimiaru ainiátsui. Tuma asamtai, Arútmaka yajáuch' aentsnumiá ayamrutmaktái.
- 3 Utsumka Jesús wáitrichu asa, emeskan nupétak, atumín ikiakatmartátrume.
- 4 Yamái turámrumna aínsarmek, atumín akupkamiájnia nu tuke najanáttarme, ii Úuntri Jesúsnum enentáimiai.
- 5 Ii Úuntri Jesús Arutman anétniun, itiurchatnumsha Jesús-shuára aínsarmek katsúntratniun, atumí anentáin pénker awajsatí.

Ashí mash' takakmastárum.

- 6 Yatsutíram, atumín ununiarmiájrumna nuna umírtsuk, nánkamsar pujúinia nujai iruntráirum tusar', ii Úuntri Utsumka Jesúsnum akupeájrum.
- 7 Íiya núnisrumek pujustiniáitrum. Kame atumsha nékarme: ii atumiín nánkamsar' pujuschámiai.
- 8 Atumín ii utsumámuri aantrar' seátsuk, níiniun suramsáij' tusar', kashi tsawáisha ti kakáram takakmasar', pimpìkmiai.
- 9 - Átum yainkratkatniuítrume - timiniaitkiúrsha, atumín jintintiátin turámiai.
- 10 Ii atumjai pujákur': - Ya takakmástinian nakitia nuka, yurumashtí – páant tímiai.
- 11 Antsu yamá chíkíckhia takákmatsuk, nánkamsar pujùsar, aya itiurchatan itiaiináwai, tama ántaji.
- 12 Núnaka Utsumka Jesúsnum anentrakur', atumí takátrijai yurumámniuram tusar', titiú takakmastárum, tu akúpeaji.
- 13 Atumsha, yatsutíram, pénker ana nu tuke pimpítsuk, najanatárum.
- 14 Yákesh ju papínium aárman umíatsna nu, natsarat' tusárum, chicharkárum, níijai irunrárap.
- 15 Tumaitkuísha, atumí numasria aínsarmek iisárap. Antsu atumí yachiya aínsarmek jintintiatárum.

2 Tes.3,16.

- 16 Úunt Jesús tarímtanam pujana nu, tuke warínmankesh atumín tarímtanam iwíaitmaktárum. Tura nísha atumjaj tuke pujustí.
- 17 Wi Papru, winia ewéjrujaj, tu amikmájrum. Ashí winia papirui tu kuésmajaj. Winia kuesmákmár atsákui, nu papí winiachuíti.
- 18 li Úuntri Utsumka Jesusan pénkeri atumjaj pujustí.



PAPRU TIMIUTÉUN ÉEMKA AÁTRA.

1ª Carta a Timoteo AKANKAMU 1.

Éemkari.

- 1 Wi Papru, Arútam ii ewemtíkramea akupkamu, ii nákaamu Utsumka Jesús akatramu asán,
- 2 Timiuteuwá, iimiármanum nekás winia uchir, ii Aparí Arútam, tura ii Úntri Utsumka Jesussha nii péneri, nii wáit-anenkratmarisha tarímtanam iwiaitmakartí.

Anánkkartin unuíniamu.

- 3 Wi Masetúnianam wéakun: - Epísiunam juaktá - timiájme. Nekás chichaman yapajiawaráink,
- 4 áantar chichamjái Pasuknan ti aujmatsaráink tusan, juamtikkiamiájme. Nu chicham aya itiúrchatan itiaiiniáwai. Kame aya Arútmanu ii íimiármarin itiaiáwai.
- 5 Anenaiyarat' tusar' ii chichámejái ikiakarartiniáitji. Kame aya péner enentáimin, tunártincha, nekás íimiaru anenainiáwai.
- 6 Chíkíchia ju chichaman iniáisar, áantar chichamjái itiúrchatnum pujuiniáwai.
- 7 Unuikiartin átaj-sar wakeruiniayat, nékachua aínsarank kakáram chichainiáwai.
- 8 Arútam wakera núí jeátin, nii awemámuri umírkatin penkeráiti.
- 9 Kame imítmachu awemamun utsumainiátsui. Antsu awemamun tákakcha, umichu, imitmau, tunártiniash, tura

1 Tim.1,10.

- Arutman arántichu, Arútmanun wishikín, yajáuchin najanín, yajáuch' enentáimin, nii úuntrin maín, áantar máinia nusha,
- 10 tura tsanírmau, úuntjai uchijáisha áakratin áinia aúsha, wáitrin, anánkkartin, ashí mash' Pénker-Chichaman uminiátsna aúsha, Arutman awemámurin utsumainiáwai.
- 11 Arútam ti náatu Pénker-Chichaman surúsmiania nuna tawai.
- 12 li Úuntri Utsumka Jesús nii Akatrámuri awajtus, ikiakatra asamtai, yumínkiajai.
- 13 Wi yama nankámtaik ímiarcha asán, pénker anentáijai nii numasri, nii kajerín, nii aéntsrin jatén asamtáisha, tsankurtúrmiayi.
- 14 Wi turamtáisha, ii Úuntri Jesús nii pénkerijai ímiaru awajtus, nii anénkratairin surúsmiayi.
- 15 Kame Utsumka Jesús tunartin áinia aun, winiásha ti tunártin asamtai, ewemtikrártaj-sa, ju nunkánam tamiayi. Ashí mash' ímiaru nuna neka ásar: - Nekasáiti – tuiniáwai.
- 16 Utsumka Jesús éemka winín nii tsankarín iniakmásmiayi. Ashí mash' niinín ímiarar, Nayáimpiniam jeátin áinia aúsha, iniakmámurin takusarat' tusa, tsankurtúrmiayi.
- 17 Ashí tsawantan Úuntri, Arútmak tuke pujú, juyá iyamun nankáana nuka, nankámaku asa, tuke túkesha naatmamtíkiámu atí. Nuke atí.
- 18 Winia uchir Timiuteuwá, amín akáteakun, wáimiaku yaúnchu turammiármia nuna enentámiajai. Yamáikia amesha nu ísam, kakáram ajásam, shíir asumprutá, tájame.
- 19 Chíkichia tunánum pujúsar, nii iimiármarin emenkakármia aínsuk, tuke ímiaru átaj-sam, tunamkáip.
- 20 Kame Imenéu, Arejántrusha ímiarcha ajasármatai, nánkamsar chichasaráink tusan, emeskan susámiajai.

AKANKAMU 2.

Anentruatái.

- 1 Chikíchik iniáitsuk, máshiniu seatárum, anentruatárum, Arútam ti kakáram untsúkrum, yuminksatárum.
- 2 Arantunaikiar', pénker irunrar', tarímtanam shíir wáimiaktin, matsátkamun úuntri, ashí akupín áinia aúsha pénker akupkarat' tusárum, anentruatárum.
- 3 Nuna íin Ewemtíkkiartin wakera asamtai, penkeráiti.
- 4 Kame ashí mash' aents^u ewémrar, nekás chichaman nekawarat' tusa, wakérawai.
- 5 Arútam chikichkiti. Nuka aya chikichkínmani aéntsun yayawai.
- 6 Kame Utsumka Jesús aents^u ajás, nii tsawantri jeám tai, ashí mash' ewemtikrátaj-sa, jarutramkámiaji.
- 7 Nuna ujáktinian Arútam winia akattúrmiayi. Nekás wáitratsjai. Wikia wáitrutsuk, awájítsuk, ashí mash' aéntsun unuíniajai.
- 8 Ashí irunramúnam anentruiniána au ewején takuínar, tunáitsuk, kajérnaitasuk anentruawarat' tusan, wakérajai.
- 9 Aínsanak, nuasha ti pénker temashmártinian, kurijaj, shakapjai, shíiram taráchjiai iniakmámsatniun wakerukaráink, antsu pénker enentáimsar, Arutman pénkerin takusarat' tusan, wakérajai.
- 10 Kame nekás nua íimiaru, nii pénker najanámurin iniákmaawai.
- 11 Núaka umírín ajás, itit awájítsuk, pénker unuimiartí.
- 12 Nii áishrin chichártsuk, jintinttsuk, titiú pujusat' tusan, wakérajai.
- 13 Kame Arútmaka éemka Atankan, nuyá Ewan najanámiayi.
- 14 Atank anankamuchuíti. Antsu Éwaka anankna tunán itiámiayi.

1 Tim.2,15.

15 Núaka ewemrataj takunka, tunámstsuk, tuke íimiar, tuke aneás, tuke wáimiak, uchirtin ajastiniáiti.

AKANKAMU 3.

Utsúkratin, Imiákratniusha itiu atiniáit ?

- 1 Utsúkratin ajástaj-sar wakeruiniána au, ti pènkeran wakeruiniáwai.
- 2 Kame Utsukrátniuka imitmachuíti. Aya chikíchkiniak nuátka, tsanírmatsuk, wáurtsuk, pénker awajín, nii jeén warás aéntsun ikianín, ti penker unuikiártiniash atiniáiti.
- 3 Nampén, manin achatniuíti. Antsu tsankúkratin, nawamín, kuítjaj enentáimcha atiniáiti.
- 4 Nii shuáran pénker wáinin, nii uchirín pénker tsakátmar, umimtikkiátniuíti.
- 5 Kame nii shuáran jintintiachkunka, Jesús-Irunramúnash jintintiachminiáiti.
- 6 Yama Jesús-shuar ajasú, Utsúkratin awajsachminiáiti. Kame wáantu ajásmatai, emésak emesramniáiti.
- 7 Nánkamsar chichasaráink tusa, Jesús-shuárchanmasha ti pènker náatu ajás, íirshimp' anánkamu achatniuíti.
- 8 Imiákratniusha, arántukma, wáitrichu, nampechu, nánkamas kuítian achichu atiniáiti.
- 9 Nekás pénker anentáijaj íimiaru atiniáiti.
- 10 Éemka nekapmamtiksar', penkeraitkiuínkia Imiákratin awajsatniuítji.
- 11 Aíntsank nuásha, arántukma, aujmatkártichu, ásump', nekás anankkártichu atiniáiti.
- 12 Imiákratin aya chikíchkiniak nuátak, nii uchirín, nii shuárnasha pénker wainkiatniuíti.
- 13 Ásump' áinia au, náatu ajásar, Jesúsnum íimiaru ti kakáram ajasártatui.

- 14 Wárichik íitjiam tusan, tu jintíntiajme.
- 15 Antsu wi setúrmatai, Arutman jeén, iwiáku Arútman irúntairi, nii páuri, nii wáitrichu tarimtáiri asamtai, itiur pujustiniáitiam, nu nekamniun tusan, tájame.
- 16 Arútam nekás ti penkeráiti taji. Kame, aents^u ajás, iniakmamsáiti. Iwiakrátniunam iwiaramuíti. Pasúknum iniakmamuíti. Ashí aéntsnum iwiainiakmáiti. Ashí nunkánam íimiarar: - Aneánt, naatuíti – tuiniáwai.

AKANKAMU 4.

Anánkkartin, yajáuch' aujmatsámusha antukáip.

- 1 - Arutman tsawantri jeámatai, chíkich aents^u íirshimpin, yajáuch' chichaman umírkar, nii iimiármarin ajapawártatui – Iwiáikratin pàant túramji.
- 2 Anánkkartin, aents^u nii anentaín ti yajáuchin tákaku, táartatui.
- 3 Nuka: - Nuatkáirap; mash' yurúmak yuawàirap – tuiniakuísha, Arútmaka, aents^u yurumáwar yuminkrusarat' tusa, ashí mash' pénker najana asamtai, íimiaruka: - Nu nekasáiti – tuiniáwai.
- 4 Kame ashí mash' Arútam najánkamu penkeráiti. Tuma asamtai, Arútam yumínksatin, ashí mash' yuamniáitji.
- 5 Nu yurúmak Arutman chichámejai, anentjáisha usukramuíti.
- 6 Jesús-shuar núnismek jintintíákmeka, nekás íimiarma, nekás chicham tákaku asam, ti pénker Utsumka Jesusan takárniuri átatme.
- 7 Natsantmai aujmátsamu, yajáuch' chicham asamtai, ajapatá. Antsu anentruámunam warastá.
- 8 Kame, nakurutai núkap utsúmatsji. Antsu Arútmaka níinini ii iwiákmarin tuke túkesha surámea asakrin, ánent nekás utsúmaji.
- 9 Ju chicham nekasáiti, titiniáitme.

1Tim.4,10.

10 Ashí mash' íimiaruti Arútam tuke iwiáku, nekás ewemfíkkiartin tuke naka asar', waitiyátar' takákmaaji.

Timiutéu jintintiámu.

- 11 Timiájmena un unuíniam, ashí ikiakarartá.
- 12 Úuntchaitiátam, aujmatrukaráink, antsu íimiaru áinia au winia íirsar, pataturkarat' túsam, amé chichámrumjai, amé najanamúrmijai, amé anenkratmármijai, amé iimiarmarmijáisha, nekás imítmachu ajastá.
- 13 Wi támam, papí aújsam, Pénker-Chicham etsérkam, unuíkiartin ajastá.
- 14 Wea, wáimiakusha, ewején awántramsar, Arutman kakármarin amasármia un, kajinmatkip.
- 15 Antsu, un íisam, nekás éemkatin wi timiájmena un umiktá.
- 16 Wainmamkatá. Itiur unuíniam nu iistá. Katsúntram takakmastá. Turákmeka ewémram, amin anturtamainiána nusha ewemtikrártatme.

AKANKAMU 5.

Aents^u arantuktiniáitji.

- 1 Úuntach' kakantraíp. Antsu ame apá núnismek shíir chicharkatá. Natsa ainiána au yátsumeá núnismek shíir awajsartá.
- 2 Nua úuntach' ame nukua núnismek awájsam, nua natsa amé umáimia núnismek, yajáuch' enentáimtsuk, pénker awajsatá.
- 3 Nekás waje ainiána au yainkiartá.
- 4 Antsu nua waje uchírtin, tiránkrintin ainiakuínkia, niá niá nii uchirí, nii tiránkrisha nii únuntrin, nii shuárnasha yainkiartiniáiti. Kame Arútam nuna wakérawai.

1 Tim.5,5.

- 5 Níinki pujana un nekás wajete. Nuka Arutman naka asa, kashi tsawáisha ti núkap anéntrawai.
- 6 Antsu nánkamsar pujústaj-sar wakéruinia un, iwiáku ainiayat, jaka aínsarank ainiáwai.
- 7 Tuma asamtai, aéntska aujmatkaráink, waje pénger pujusarat' túsam ikiakarartá.
- 8 Nii shuáran, nii jeén pujúinian yáiniatsna au, nii imiármarin ajapa ásar, íimiarchan nankákar, imiá yajáuch' ainiáwai.
- 9 Ujuk-nawe uwín tákakcha, tura jimiará áishmankan iniumkármia nusha, waje-irunramúnam apujsáip.
- 10 Antsu, aya nii uchirín pénger unuiniármia, aéntsun nii jeén ikianrármia, peejcháchia aínsarank wáimiakun yainkiármia, waitiainiána aun yáinri ajasarmia, nekás tuke ti pénger pujuármia un, waje-irunramúnam apujsatá.
- 11 Waje ujuk-nawe uwín tákakcha apujsáip. Kame Utsumka Jesusan iniáisar, ataksha iniumkátaj-sar wakeruiniáwai.
- 12 Túra: - Umíktaj – tuiniayat, umichu ajasártatui.
- 13 Nuka, naki ajásar, aya irástaj-sar wakeruiniáwai. Nii takatrin najántsuk, aújmatkar, níiniuchun íisar, turáshtain nuna najanainiáwai.
- 14 Tuma asamtai, ii numasri nánkamsar chichasaráink tusan, waje úchipiat áinia nuka ataksha iniumkar, tarímiat ajásar, uchin takusartí, tajai.
- 15 Kame chíkichkia fírshimpin íisar, yajáuch' ajasarai.
- 16 Nua íimiaruka nii jeén wajen takákeakka, pénger wainkiartí. Turakuínkia, Jesús-Irunramuka nuna wáintsuk, aya nekás wajen wainkiamniáiti.

Úunt-Wea arantuktiniáitji.

- 17 Úunt-Wea Jesús-Irúnramun pénger jintintiainiána au, tuke tsawantin Arutman chichamen etsérkar, unuiniainiána aúнка, ti naatmamtikiar', akiktiniáitji.

1 Tim.5,18.

- 18 Kame: - Tanku-yawá ti mantin ana nuna yurúmkari suritkiáip
- Áintsank: - Takakmau akikma atiniáiti – Ujajmatáiniam tu aarmáiti.
- 19 - Úunt-Wea yajáuch' najáneawai – chikíchik aents^u takuísha,
- Nekasáiti – tip. Kame jímiar, menáintiukscha nuna titiniáiti.
- 20 Chíkich aents^u ishámkar turawaráink túsam, sí iimiainiái
tunartin áinia au chicharkatá.
- 21 Arútam, Utsumka Jesús, Pasuksha iimiainiámunam, ashí
mash' métek jintintiámniun tusan, ti núkap seájme.
- 22 Pénker íitsuk, Úunt-Wea atí túsam, aéntsun ewéjrum
awantsáip. Kame nii tunamkamtai, makumu átatme.
- 23 Tuke. – Waker najámawai – tiniu asam, aya yúmik umú
pujuip. Sáweshá ishíchik umartá.
- 24 Tunamkáip. Kame chíkich páant tunamainiáawai. Antsu
chikichan tunari páancha asármatai, aya eainiána au
wainiainiáawai.
- 25 Aíntsank pénker najánamu páant aminiáiti. Páantcha ana
un wainkiatniúítji.

AKANKAMU 6.

Itiúrak takakmau pujustiniáit ?

- 1 Jesús-shuar sumakma, áinia au, Arútmanun nánkamsar
chichasaráink túsar, nii neréntniurin tuke shíir arantukartí.
- 2 Nii neréntniuri Jesús-shuar ainiakuínkia: - li yachinti – túsar,
arántutsuk pujuschartiniáiti. Antsu, íimiaru asármatai, nii
yachiya aínsarank imiá pénker takakmasartiniáiti. Tu
unuíniam, jintintiatniúítme.
- 3 Yákesh nuna unuínatsna au, ii Úuntri Utsumka Jesusan
chichamen umítsuk, Arútmanash naatmamtíkiatsui.
- 4 Nuka j̄i kusurúa aínsank, penke nekachuítí. Nuka itiúrchatan
apújsatin nánkamas chicháawai. Akasmát-

1 Tim.6,4.

Katniun, kajernáikiatniun, katseknáikiatniun, isharnái-kiatniun itiáwai.

- 5 Wáurua aínsank tunáin, wáitriñ ajás, kuítrintin ajastin áantar: - limiaruítjai – tawai.
- 6 Antsu: - Tákakeaj nujaink mákete - tana nuka, íimiaru asa nekás kuitrintniuíti.
- 7 Kame akiniámunam penke tákakcha akiniáitji. Aínsarik jakámunam penke jukíshtatji.
- 8 Tuma asamtai, ii yurúmka, ii entsatáirisha takakurkia, nújaink: - Mákete – titiniáitji.
- 9 Kame kuítrintin ajástaj-sar wakeruiniána au, íirshimpin íisar, anakmamainiáwai. Wáurua aínsarank ajásar, emésmamar, menkakártatui.
- 10 Nekatá. Kuítrintin ajástaj-sar wakeruiniána au, yajáuch' ajainiáwai. Kame kuítian ti wakerukú áarmia nu, nii iimiármarin ajápawar, ti núkap itiúrchatnum pujúsar, ti waitsármiai.
- 11 Ámeka, Arútmanu asam, nu wakerukáip. Antsu íimiamam, imítmachu ajastá. limiármanum, anenkrátmanum, penkernumsha tuke pujustá.
- 12 limiármanum kakáram ajastá. Untsukma asam, núkap aents^u iimiainiái: - Nekasáiti - tiniu asam, tuke iwiáku pujustin takakmastá.
- 13 Arútam ashí nunkánam iwiákman sua nu, Utsumka Jesús Piratui páant timia nusha iirái, yamáí akúpeajme:
- 14 - Ii Úuntri Utsumka Jesús támam, wi timiájmena nu emesráip. Antsu yapájitsuk, tuke naka etserkatá -.
- 15 Kame nii tsawantri jeámtai, Úunt ashí nankámakun, úuntan Úuntrin, nérentniun Neréntniurin, Arútam akupturmáktatji.
- 16 Nuka tuke jacha asamtai, ti tsáapniunam pujá asamtai, yákesh wainkiáchma asamtai, tuke túkesha nankamakuíti tusar', naatmamtikkiatái. Nuke atí.

1 Tim.6,17.

- 17 Warásar pujusarmí tusa, Arútmaka ashí mash' súdeamea asakrin, kuitríntniuka wáantu ajátsuk: - Kuit menkakáttawai - tiarat' túsam, ikiakarartá.
- 18 Pénker pujúsar, pénker anentáijai utsumainiána aun níiniun súsar, pénker najanámujaí tsanka ajasartí.
- 19 Turuniána au, Nayáimpiniam ti núkap irúrur, tuke iwiáku pujusártatui.
- 20 Timiuteuwá, nekás chicham emenkakáip. Áantram chichasáip. Wáit chichaman unuiniáinia aújai tunaiyip.
- 21 Kame chíkich níijai irúrur, nii iimiármarin ajapawármái. Arutman pénkeri atumjaí pujustí.



ATAKSHA TIMIUTÉUN AÁTRA

2ª Carta a Timoteo

AKANKAMU 1.

Éemkari.

- 1 Arútmaka: - Utsumka Jesúsnum iwiákman amástatjai – timia nu, Paprun Utsumka Jesusan akatrámuri awajsámiayi.
- 2 Nuka, Timiuteuwá, nii ti anéamu uchirí asakmin, amin aátramui. Arútam Apán, ii Úuntri Utsumka Jesusan pénkeri, nii wait-nenkrátmarisha, amiín tarímtanam pujustí.

Ishamín achatniuítji.

- 3 Winia úuntrua aínsanak pénker anentáijai Arútman takátrin najánan, kashi tsawáisha tuke amin enentáimtusan, niin anéntrakun yumínkiajai.
- 4 Neájkirmin kajinmattsuk, amin atsankrátaj-san íitniun ti wakérajme.
- 5 Amé iimiármarmín ti enentáimtajai. Amé nukúchrom Ruíte, nukusha Eunise ti íimiaru asármatai, niiniya nu achikiúme.
- 6 Tuma asam, winia ewéjur awáasmanum Arutman pénkeri achikmiámna nu iwiaratá, tájame.
- 7 Kame Arútmaka ishamín awajtamsáchmiaji. Antsu kakáram, anénkratin, pénker enentáimin awajtamsámiaji.
- 8 Tuma asamtai, ii Úuntri Jesús jarutramka asákrinsha, wi epenmia pujakuísha, natsaráip. Antsu Pénker-Chicham, Arutman kakármarin tákaku asamtai, waitiamúnmasha etserkatá.

2 Tim. 1,9.

- 9 Kame Arútmaka ewemtikrámra asar', ii penke akikchaitkiurninsha, níinki tsanka asa, áantar tsankátramkar', wáimiaku ajasarat' tusa untsúrmakji. Ti yaúnychuya tuke Utsumka Jesúsnum untsúrmaku asar', nuna tsankatrámkaji.
- 10 Yamái ii Ewemtíkkartin Utsumka Jesús ta asa, nuna iniakturmasar', játain amuk, tuke iwiáku pujustin Pénker-Chichámnum páant awajsáíti.
- 11 Nu Chichaman etsérkatin, etserin, akátramu, unuíkartin awajtusuíti.
- 12 Nuna túratin epenmia waitiáknasha natsámatsjai. Kame ti kakáram asamtai, niinín pujusan, nii támam tuke ayamrukma átatjai.
- 13 Nekás chicham íimiármanum wi unuiniarmiájmena nu tuke etsérkam, tuke Utsumka Jesúsnum anénkratin atá.
- 14 Iwiáikratin iín pujana nu yáintma asakmin, nekás chicham achikmiámna nu emesráip.
- 15 Jijeru, Ermújenes, ashí mash' Asiánmaya aéntssha iniaitiusarmia nu nékame.
- 16 Wi epenmiaitkuísha, Unesíjuru natsámatsuk atsánkrurtin tuke jeá asamtai, ii Úuntri Jesús nii shuáran yuminksartí.
- 17 Kame, Rúmanam yama táak, eátak, waitkiámai.
- 18 Epísiunam winia itiur yaintkiámia nu amesha páant nékame. Tuma asamtai, nii tsawantri jeám tai, ii Úuntri Jesús wáit-nentratí.

AKANKAMU 2.

Kakáram ajastá.

- 1 Uchirú, Utsumka Jesusan pénkeri amiín pujana nu, amin ikiakatmartí.

2 Tim.2,2.

- 2 Ashí mash' wi unuiniarmiájmena nuna untsurí aéntssha nekasáiti tiniu asármatai, amesha nuna pàant etserkarat' túsam, aents ásump' áinia au unuiniartá.
- 3 Utsumka Jesúsnum kakáram ajásam, itiurchatnumsha katsuntratá.
- 4 Kame nekás kakáram nii úuntri tana núnak umik, chíkich wakeruiniána nuna najáneatsui.
- 5 Núnisank nakurín, nakúrutai tana nuna umireachkunka, akikchamuíti.
- 6 Nunkan takakmainiána au, aramu neréakui, éemka juukar-tiniáiti. Tájana nu nékamek ?
- 7 Utsumka Jesús nekás ashí mash' nekamtikramáttawai.
- 8 Utsumka Jesús, Tawitnumiá tamia nu, wi tájana aínsank jakamúnmayá aneántmia nu, kajinmatkip.
- 9 Yajáuchia aínsanak jirujai Jesusna epenmia pujakun, waitiakuísha, Arutman chichame epenchamuíti.
- 10 Utsumka Jesúsnum ashí mash' íimiaru ewémrar, tuke túkesha naatkarat' tusan, juna katsúnteajai.
- 11 Jesusjai jakaitkiurkia, níijai iwiáku pujústatji. Nuka nekasáiti.
- 12 Níijai katsuntrar' waitsaitkiurkia, níijai naatkáttaji. Nii nakitiá-krinkia, níisha nakitramráttaji.
- 13 li amirchaitkiurninsha, níinkia ásump' asa, tuke aminiáiti.

Áantram tunáinip.

- 14 Wi tájamna nu, amé shuaran enentaimtíksartá. Áantrar tunainiaráink tusan, Arútmanam kakáram chicharkartá. Kame nuka pénker awájtsuk, antuiniána nuna yajáuch' awajui.
- 15 Arútmaka amínini pénker takakmasat', ti pénker takárniuri atá. Nekás chicham pénker etsérkatin unuimiartá.
- 16 Áantar chichainiámunam pachinkíaip. Kame nii chichame íimiaru awájtsuk, Arútmanash nekámtiksui.

- 17 Tumaitkuísha, nu chicham wankanki wéawai. Kame Imenéun, Jirétunash enentáimjai.
- 18 Nuka nekás chichaman iniáisar, - aneántin tsawant jeáyi - tiniu asármatai, iimiárusha: - Nekasáshit ? - tuiniáwai.
- 19 Tuiniakuísha, Arutman chichame penke menkáatsui. Kame aárma chicháak: - Úunt Jesús níniurin nékawai. Nii náarin pachiiniána au yajáuch' ajainiátsui - tawai.
- 20 Warírtinian jeén aya kurijai najánamu irunainiátsui. Antsu numijai, nuwejai najánamusha irunainiáwai. Chíkich pénker wáinkiamu, chíkichkia pénker íischamu ainiáwai.
- 21 Tunártincha ana nu kurijai najánamu aniuíti. Wáimiaku asamtai, Úunt Jesús níinini pénkeran najáneawai.
- 22 Natsa nii iniashí wakéramun najanainiána anin ajasáip. Antsu imítmachu, íimiaru, anénkratin ajasam, pénker anentáijai Úunt Jesusan anentruiniána aújai irunratá.
- 23 Áantar-chicham aya máníktinian itiá asamtai, iniaisatá.
- 24 Úunt Jesusan takárniuri mánin achatniuíti. Ashí aéntsjaí kajétsuk, pénker jintíntkiartin, kajéramash katsuntin atiniáiti.
- 25 Arútam enentáimtikrar, nekás-chichaman susarat' tusa, umirainiátsna aun pénker jintintiartiniáiti.
- 26 Kame emésak jinkiámu ainiayat, ankant ajasártatui.

AKANKAMU 3.

Amúkatin tsawant.

- 1 Amúkatin tsawant jeámtai, ti itiúrchat átatui.
- 2 Kame aents^u suri, kuítrintin, wáitrin, inchimrin, auj mátkartin, nii úntrin umircha, yuminkkiártichu, Arutman wishikín, áartatui.
- 3 Anénkratcha, tsankúkratcha, tsanumín, tunamín, waitkiákratin, pénkeran kajerín, áartatui.

- 4 Anánkkartin, natsamcha, atsanín, Arutman iniáis aya nii wakéramun eáu áartatui.
- 5 Arútam wakéramun najanchiat, anentra anis pujuártatui. Tumainiákui, nu aéntsjaí pachinkíáip.
- 6 Nu aents^u, nua wáitían, ti tunamniun, mash' yajáuch' ana nuna wakérinian anankátaj-sar, nii jeén enkemainiáwai.
- 7 Kame yajáuch' aents^u tuke unuimiainiayat, nekás chichaman penke nekainiátsui.
- 8 Janés, Jampressha Muisésan umirkacharmia aínsarank, nu aents^u yajáuch' enentáimsar, penke ímiarcha ásar, nekás chichaman tuke nakitiainiáwai.
- 9 Tmaitkuísha, níiya aínsarank, nii waurtáirin ashí mash' wárichik nekawártatui.
- 10 Antsu ámeke, wi unuiniárma, wi pujusma, wi takákmasma, wi íimiarma, wi katsúntramu, wi anenkrátkamu, patatukume.
- 11 Wi kakáram asán, kajérkamu asán, waitsamiájna núnismek pataturkame. Kame Antiukíanam, Ikiúniunam, Ristránmasha turutawarmia nu, tura kajértukar waitkiarainiakuísha, Úunt Jesús tuke ewentikrúrmia nusha, amesha nékame.
- 12 Kame wiya aínsarank Utsumka Jesúsnum Arútmanun takakmástaj-sar wakeruiniána au, kajérkamu áartatui.
- 13 Tuma aínk, tunartin, anankkártiniash ti yajáuch' ajásar, anankámujai métek takakmainiáwai.
- 14 Antsu ámeke, unuimiarmiámna nu tuyá winiá neka asam: - Nekasáiti – túsam, tuke umirkatá.
- 15 Ámeke uchíchik Ujájmatái neká asam, nuí Utsumka Jesúsnum iimiáram unuimiártatme.
- 16 Kame Ujajmatáiniam aárma nu Arutmánmaya winiá asa, unuíartin, aíktin, iwiáratin, shíir jintintiátin, ti penkeráiti.
- 17 Nujai Arutman aéntsri nekás unuíkiartin ajás, pénker takakmástinian nekáttawai.

AKANKAMU 4.

Pénker-Chicham etserkatá.

- 1 Arútam, tura Utsumka Jesús, iwiákun jakánsha makú átatna nusha íirai, tájame:
- 2 Chichamtin étsereakum, pimpítsuk tuke tukesha nekámtikin atá. Áantar chicháinia: - Makumu átatrume – timi, páant jintintiwartá. Kajétsuk, Pénker-Chicham ikiuktiá.
- 3 Kame árusank aéntska Pénker-Chichaman nakítrar, nii wakéramun najánatin, aya áantar chichamjají shíir unuiniána núnak eakártatui.
- 4 Nekás chichaman ántutsuk, áantar chichaman antukártatui.
- 5 Tuma asamtai, aneáram pujustiniáitme. Itiúrchatrum katsúntram, Pénker-Chicham tuke etsérkam, takátrum pénker amiktá.
- 6 Winia iwiákmar ishíchik ajasái. Kame Nayáimpiniam wetin jeatemayi.
- 7 Ti kakáram takákmasan, winia takatrun amukjai. Arútam akatrúrmia nuna pénker wainkiáitjai.
- 8 Yamáikia Úunt Makúkratin imítmachu Jesús, wi ti pénker pujusú asamtai, naatmamtíkruk akirkáttawai. Antsu ashí mash' Jesusan naatmamtikkiármia nu, wiya aínsarank náatu ajasártatui.

Amúamu.

- 9 Winín wárichik winitiá.
- 10 Kame Temás winia ikiurkímiayi. Ju nunkánmayan wakera asa, Tesarúnikianam waketkímiayi. Kresénteka Karásianam weyi. Títiusha Tarmásianam wémiayi.
- 11 Aya Rukas wijají pujawai. Ámeka Márkujají winitiá. Kame níinkia ti pénker yaintkiáttui.
- 12 Tíkikun Epísiunam akupkamjai.

2 Tim.4,13.

- 13 Winiákum, Truátenam, Karpun jeén awankémur, tura papí aárma, imiánkaska nuap aárma nusha itiatá.
- 14 Arejantru, jirujai takakmau, winia takatrun ti núkap emesrayi. Túrutá asamtai, Úunt Jesús makúrtatui.
- 15 Amesha aneartá. Kame Pénker-Chicham etséreajnia nuna nakítiawai.
- 16 Wi éemka ayamrumákmiajnia nuí, ashí mash' ikiurkiármiaiyi. Núnaka Arútmaka tsankurartí.
- 17 Tumaitkuísha, Úunt Jesús nii chichamen ashí nunkánam jeat' tusa, winini étserak, nii kakármarin surúsmiayi. Makúkratin úunt-yawá aínsank yuruátaj-sa wakerutakuísha, Jesuska ewentikrúrmiaiyi.
- 18 Úunt Jesús tuke itiúrchatnum ewémtikrur, Arútam-Irunrámunam jurúktiatui. Tuma asa, tuke túkesha naatmamtíkkiamu atí. Nukete.
- 19 Priska, Akírasha, Unesíjuru-shuársha amikmatá.
- 20 Erástuka Kuríntiunam juákmiayi. Trújimiu jaa tepakui Mirétunam ikiukmiajai.
- 21 Micha-nantu jeátsaink, wárik winitiá. Eúwuru, Putente, Riniu, Kráutia, ashí Jesús-shuársha amikmatmainiáwai. Úunt Jesús ámijai pujustí.
- 22 Atumsha Arutman pénkeri pujustí.



PAPRU TITIUN AÁTRA.

Carta a Tito AKANKAMU 1.

Éemkari.

- 1 Wikia Papruítjai. Arútam untsukarmia nu íimiaru ajásar, nekás chicham, wáimiatain tarimtáiri asamtai, nekawarat' tusa, Utsumka Jesús nii akatrámuri awajtúsматаi, Arutman takarniurintjai.
- 2 Arútam penke wáitrichu, tuke iwiáku pujústinian timia nu, nákJai.
- 3 Iin Ewemtíkkiartin Arútam, nii tsawantri jeámтай, páant timia nuna winia akatrúrmiai.
- 4 Tituwá, iimiármanum nekás uchir ajasuá, amíkmajme. Ii Aparı Arútam, tura Utsumka Jesús nii pénkerin tarímtanam iwiaitmaktí.

Úunt-Wea.

- 5 Itiúrchat iwiárkam, Úunt-Wea ashí irutkámunam timiájmena aínsamek apujratá tusan, Krétanam ikiukmiájme.
- 6 Nu aents^u makuchmin, aya chikíchkiniak nuátak, wajémasha ataksha nuátkachu atiniáiti. Nii uchirisha iimiararu, umín, penke makuchma aartiniáiti.
- 7 Kame Utsúkratin, Jesús-Irúnramun wáinin asa, imítmachu atiniáiti. Áantar akupín, kajén, nampén, manin, kuítian irumin achatniuíti.
- 8 Antsu nii jeén iráinian ikiánin, pénkeran wakerin, shíir enentáimin, imítmachu, anentrin, penke wáurcha atiniáiti.

Ti.1,9.

- 9 Chicháakka, nekás-chicham tana nuna, chichastí. Pénker-Chichaman etsérkatniun pénker nekatniuíti. Áantar chichainiána aun jintintiatniun neka atiniáiiti.
- 10 Kame untsurí aents^u, imiánkaska jutíunmaya táarmia nu, umichu, áantar chicháu, anánkkartin ainiáwai.
- 11 Níisha, warinchun achíktaj-sar áantar chichainiákui, untsurí aéntsun anankawaráink-tusar', itiatmamtikkiartiniáítji.
- 12 Kame chikichik jutíuka: - Waimiakuíti – tuiniakuísha, chicháak: - Krétnmaya aentstíram, tuke waitriniáitrame, yajasmáitrame, nakítrame - tichamkía ?
- 13 Nuka nekasáiti. Tuma asamtai, nekás íimiaru ajasarat' túsam, kakáram chicharkatá.
- 14 Jutíu-aujmátsamun áantrar antukaráink, nekás-chichaman nakitiainiána aun patatukaráink túsam, ikiakarartá.
- 15 Pénker áinia au: - Mash' penkeráiti - tuiniáwai. Antsu yajáuch' áinia au: - Mash' yajauchiti - túsar, íimiaru ajainiátsui. Kame nii enentáimmiari, nii wakeramurisha yajáuch' ainiáwai.
- 16 - Arutman nékajai - tuiniayat, nii wakéramun najanainiátsui. Umichu ásar, Arutam nakítiam, pénkeran najánatniun tujintiainiáwai.

AKANKAMU 2.

Nekás ásump' atiniáitji.

- 1 Amé chichámrumka, nekás-chichaman kakáram awajsatniuíti.
- 2 Úuntka, nampechu, arántukma, esétar enentáimin, íimiármanum, anenkrátmamun, katsuntramúnmasha katsuáru aartiniáiiti.
- 3 Nua úuntsha wáimiakua aínsarank pujusartí. Aujmátkartin, nampén achartiniáiiti. Antsu pénker jintíntkiartin aartiniáiiti.

- 4 Túruiniak, nuatnaikiámunam áishrin, uchirínias anétniun natsachin jintintiainiáwai.
- 5 Nuka esétar enentáimin, tsanírmachu, nii uchirín pénker wáinin, nii áishrin umirín ajasármatai, yákesh íimiarun yajáuch' chicharkachminiáiti.
- 6 Aínsamek, natsa áinia au ásump' ajasarat' túsam, ikiakarartá.
- 7 Nuka amé pujámurmin, amé unuiniámurmin, amé umitmáchmarmin íisar, amin nakumtamkártatui.
- 8 Ame ti pénker jintintiáinia asakmin, Jesús-shuárchasha makúrmatsuk, natsamiártatui.
- 9 Takákmausha tuke nii úuntrin umírkar, kajértsuk, nii wakéramun najanawartí.
- 10 - Pénker ainiáwai - tiarat' túsar, nii úuntrin penke kasarchartí. Turawármatai, ashí mash': - Nii Ewemtikiártinian chichame penkeráiti - tiártatui.
- 11 Kame Arútam ii Ewemtíkkiartin, nii tsánkarin ashí aéntsun iniaktusuíti.
- 12 - Arútam atsawai, aya ii wakéramu penkeráiti - tíchatniun unuítiámji. Antsu, ju nunkánam ásump', imítmachu, Arutman takárniuri átinian unuítiámji.
- 13 Yamáikia, ii Ewemtíkkiartin Utsumka Jesús, ti pénker Arútam asa, nii nankamákmarin iniakturmasat' tusar', warasar' nákaaji.
- 14 Kame ii tunarin asakártaj-sa líkmak ajátramsar', níiniu irúnramu awajas, pénker takakmasat' tusa, iwiarámiayi.
- 15 Áme tu jintíntiakum, chichárkaram, úunta aínsamek jiakartá. Nánkamsar chichartukaráink túsam, iniaisáip.

AKANKAMU 3.

Pénker atái.

- 1 Íimiaruka nii úuntrin, ashí akúpniunash umírkar: - Páchitsuk tuke pénker turáttajai - tiarat' tusam, titiá.

Ti.3,2.

- 2 Katséksuk, nekás enentaimtunáisar, penke kajértsuk ashí aéntsun shíir awajsartí.
- 3 Kame íisha yaúnchu enentáimcha asar', nánkamsar' pujúmiaji. li wakéramu najánar', tunánun warástaj-sar' wakerúkmiaji. Yajáuch' enentaimsar', akasmatkar', arantu-náítsuk, mai kajernai ajámiaji.
- 4 Tumaitkuísha, Arútam iin Ewemtíkkiartin asa, nii pénkerin, nii anenkratáiriniash iniaktúrmasji.
- 5 Íikia pénker najánachu árinink, wáit-nentramrar', ewemtikramrámiaji. Kame Akintiai-Nantárnum ataksha akíniakrin, lwiáikratin iwiartamrámiaji.
- 6 li ewemtíkkiartin Utsumka Jesusnúmani Arútam nuna suramsámiaji.
- 7 Nii pénkerijai iwiáramu asar', yamáikia tuke iwiáku pujustin nákaji.
- 8 Arútmanam iimiaráruka nekás tuke pénkeran najanawarat' túsam, ikiakarartá. Kame nii turámuri nekás pénker asármatai, aents-irúnramun iwiarainiáwai.
- 9 Antsu áantar chicham, tuyá winiaj tama, awemámujai jianáiyamu, pénkeran itiainiáchu asamtai, iniaisatá.
- 10 Pénker-Chichaman emesainiána au, chicharkatá. Aents^u ataksha chicharkamuitiat antachkuínkia, iniaisatá.
- 11 ame nekayat tunamea asa, níinki emesmamea nu amesha nékame.
- 12 Nikiúpurisnum micha-nantu nankamástaj-san wetin asamtai, Artemas, Tíkikiusha wi akúpkam jeawármatai, wárichik winitia.
- 13 Ayámkartin Senas, Apúrusha, pénker jeawarat' túsam, utsumainiána nu susartá.
- 14 Aíntsarank ashí Jesús-shuar utsumámunam nakitiú pujútsuk, nekás yáimin ajasartí.
- 15 Ashí mash' wijai pujuiniána au amikmatmainiáwai limiármanum anéntmajnia nu amikmatá. Arutman pénkeri atumjai pujustí.

ISRAÉERAN AÁTRA.

Carta a los Hebreos AKANKAMU 1.

Jesús, Arutman Uchirí.

- 1 Arútmaka yaúnchu warínmankesh wantíniak, waimiakunmanisha ii úuntrin chicharkármiai
- 2 Yamái, amuámunam pujá asakrin, niínín mash' jeát' tusa, nii Uchirini chichártamji. Kame niniya tsawant nekapmartiniáitji.
- 3 Níinki Arutman tsaapnirinti. Níinini Arútmaka iniakmamsámiayi. Níinki nii chichámejaink mash' iwiar, aéntsun tunarin jafir, Nayáimpiniam waka, ashí tujintcha Arutman untsurini ekemsámiayi.
- 4 Níinki ti náatu ajasú asa, yamáikia pásukan ti nankáak pujawai.
- 5 Kame Arútmaka warí pásukan: - *Winia Uchiruítme, wi yamáí yajutmárjame* - timia ? Aíntsank warí pásukan: - *Wi amé Apa átatjai; ámeke winia Uchir átatme* - timia ?
- 6 Antsu nii Uchirí lwiáiri ju nunkánam akiniám tai, chicháak: - *Ashí mash' pásuk tekemrurartí* - timiayi.
- 7 Arútmaka nii pasukrin iwiánchia núnisarank, nii takárniurinjia núnisarank akúpainiáwai.
- 8 Antsu nii Uchirinkia chicháruk: - *Ame, Arútam asam, tuke túkesha chimpirmiín ekémsam, tuke naka akúpeame* - tawai.
- 9 *Ámeke Arútam asam, pénker anéakum, yajáuch' nakitia asakmin, Arútmaka nekás warasarat' tusa, aentsnumiá akantamkí umpuntramrámiayi.*
- 10 - *Ámeke, Úunt asam, yama nankám taik ame ewéjmijaink nunka, nayáimpish najanamiáme* - tu aarmáiti.

Isr.1,12.

- 11 *Nuka entsatai mamúinia aínsarank amukármataisha, ámeke tuke pujúttame.*
- 12 *Nuka awankema aínsamek yapajiákmesha, ámeke uwí nankamainiakúisha, tuke túkesha núnismek átatme.*
- 13 *- Nawemin tarimtáiri aarat' tusan, wi amé numásrumin apújmmam, ámeke winia untsuruíni pujustá - Arútmaka yákesh pásukan nuna tichámiayi.*
- 14 *Kame ashí mash' pásuk nii takárniuri ásar, ashí aents^u ewemrártatna nujaj takakmainiáwai.*

AKANKAMU 2.

Jesús iin ewemtikkiartiniáiti.

- 1 Tuniru wej' tusar', Pénker-Chicham esetrar' antuktiniáitji.
- 2 Pásuk awemamun Muisesan susarmia nuna, ashí mash' aents^u umín áarmiayi. Kame umichu kakáram asutramúyayi.
- 3 Tuma asamtai, ewémratin chicham Nayáimpiniam júan umirainiátsna au, itiúrak asutiámu acharat' ? Kame ii Úuntri Jesús nu chichaman éemka etserkamtai, nuna antukaru: - Nekasáiti - tiáirmiayi.
- 4 Arútmasha: - Nu nekasáiti - tinia, ashí mash': - Nekasáiti - tiarat' tusa, untsurí aents-tujíntiamun najana, ankant ankant nii lwiaikrátniurin pènkerin susáirmiayi..
- 5 Kame Arútmaka, yamáram nunkan najánatin, pásukan akatráchmiayi.
- 6 Yákesh chicháak: - *Ya aents^u asámtaimpia níisha enentáimtam ? aéntsun Uchirí ame enentáimtamna nusha, yáit ? – tímiayi.*
- 7 *Ámeke wárumak uwí pasukan nankákachu awájsam, nuyá nuna nankaka, ti úunt, ti nankámaku awajsáitme.*

- 8 *Ashí mash' neréntniuri awajsamiáme.* Kame yamáí nu paantchaitkuísha, nekás ashí mash' neréntniuri asamtai, yákesh umírtsuk pujuschatniuíti.
- 9 - *Wárumak uwí pásukan nankákachu awajsame - aármaka tawai.* Nuka Jesusáiti. Kame ti wáitias jarutramka asar', ti nankámaku, ti náatu ajásmiayi. Ín jarutramkat' tusa, Arútam tsankatramkámiaji.
- 10 Arútmaka, niiniya_a ashí mash' ta asamtai, níisha ashí mash' umuchia asa, nii untsurí uchirí Nayáimpiniam jeawarat' tusa, ashí Uwemtíkkiartin waitsámunam pénker ajasat' tusa wakerúkmiayi.
- 11 Tuma asamtai, lwiáikratniun suya nu, tura lwiáikratniun achiniúya nujai inishimkiámiayi. Tuma asa, natsámtsuk: - Yatsurú – túrameaji.
- 12 Kame chicháak: - *Uuntrú, winia yatsurun nekamtikiáttajme. Nujai irunran, nampersáttajme -*
- 13 Aíntsank: - *Arútmanam pujústatjai. Arútam uchin surusmia nujai nuí tuke pujúttajai - tawai.*
- 14 Nu uchi iniáshtin, numpentin asármatai, Jesussha níiya aíntsank ajasú asa, emésak jatain neréntniuri asamtáisha, jakámunam nii kakármarin atantkímiayi.
- 15 Tura, aents^u jatain ishámkar, iwiákmanum waitiú pujuármia nuna ankant awajsármiaji.
- 16 Kame Jesuska pásukan yáinktjaj-sa tacháiti. Antsu Apraáman uchirín yáinktjaj-sa tawíti.
- 17 Túratin, nii yachía aíntsank ajastiniúyayi. Nuka Arutman tuke umirín asa, Wean-Úuntri ajás, wáit anentramrar', Arutman tsankúrtairi itiártamji.
- 18 Níisha, ti wáitsa asa, waitiainiána aun tuke yainkiártaj-sa wakérawai.

AKANKAMU 3.

Jesús Muisesan nankáawai.

- 1 Wáimiaku yatsutíram, Arútam untsukma asárum, Akátramu Jesús, iimiármanum Wea-Úuntri asamtai, iistárum.
- 2 Kame Arútmaka Muisesan apujsamia aínsank, Arutman jeén takakmasat' tusa, apujsímiayi.
- 3 Antsu Jesuska Muisesan ti núkap nankáawai. Jéaka jeámniujai metekcháiti.
- 4 Kame jéaka jeámniun utsúmawai. Aya Arútmak ashí mash' jeámui.
- 5 Muiseska Arutman takárniuri asa, jeánam Arutman chichamen etserniúyayi.
- 6 Antsu Jesuska Arutman Uchirí asa, nii jeén pujawai. Ísha wará warat tuke nii naka asar', nii shuaráitji.
- 7 Iwiáikratin tana nu antuktái. Kame chicháak: - Uuntan chichame antuktárum.
- 8 Yapá tsawántnum itiárkanam íirshimpin íisar, nii anentáin kátsuram awajsarmia núnisrumek ajasáirap.
- 9 Kame atumí úuntri winia nekaprusarsha, aintiuk-nawe uwí ti untsurí aents-tujíntiamun wainkiármiayi.
- 10 Tumaitkuisha, tuke wáakar, winia jintiárun wáinkiachu asármatai, "Ajapawártatjai" tímiajai.
- 11 Kajekan: "Wijai ayámratin penké enkemachártatui" nekás tímiajai – tau tímiaja.
- 12 Atumsha yatsutíram, aneartárum. Anentái kátsuram tákaku, íimiarcha Iwiakmámikin-Arutman iniáiya atumiín atsutí.
- 13 Antsu, yákesh tuná nupetkamu, nii anentái kátsuram ajasáink tusárum, tuke tsawantin mai ikiakanái ajatárum.
- 14 Utsumka Jesusjai irunraitkiúrkia, penke iniáitsuk, yama nankamtáikia aínsarik tuke pujustiniáitji.

Isr.3,15.

- 15 Kame: - Yamái Arutman chichame antúkrum, yapá tsawanttin urukawármia aínsarmek, atumí anentái katsúram awajsáirap – Ujajmatáiniam aarmáiti.
- 16 Arutman anturkariat kajerkármia nu, ya áinia ? Muisés Ejiptúnmayá jjiarmia nu ainiáwai.
- 17 Aíntiuk-nawe uwí Arutman waitkiasarmia nu, ya áinia? Tunamkámunam jákar, nii ukunchrin itiárkanam ikiukiármia nu ainiáwai.
- 18 Arútam yana: - Winín ayamrashtátrume – tíarmia ? Nuka umichu áarmia nu ainiáwai.
- 19 Kame íimiarcha asármatai, nii jeén wayatniun suritkiármiai.

AKANKAMU 4.

Íimiaru ajastiniáitji.

- 1 Arútmam ayámsatin tsankatkamuitiátar', pachítkiachu aij' tusar', aneartiniáitji.
- 2 Kame íisha niya aínsarik Pénker-Chicham achíkmiaji. Níinkia íimiarcha ásar, nu chichaman antukármiania nujai irúnrachu asármatai, nu chicham yainkchármiayi.
- 3 Tuma asamtai, Arútmam ayámratin wakerákrikia, íimiaru ajastiniáitji. Kame Arútam chicháak: - *Wijai ayámratin enkemachártatui* - nekás kajek tímiayi. Juíinkia Arútam, nunkan najana, ayamramia nuna tawai.
- 4 *Arútmaka ashí mash' najana nuna amuk, tsenken tsawant jeámtai ayamrámiayi.* Túramtai, tsenken tsawant jeámtai, ayamratniuítti.
- 5 Antsu juíinkia: - *Wijai penke ayamrachártatui* – tawai.
- 6 Juíinkia jímiaran túramji. Chíkich enkemawártatui. Antsu, Pénker-Chichaman éemka antukarmia nu íimiarcha ásar, enkemachármiayi.

Isr.4,7.

- 7 Tuma asamtai, juí aárma núnisank, Arútmaka júkerusank Tawitniúmani chicháak: - *Atumí anentái kátsuram awájtsuk, Úunt anturkatárum* – tiniu asa, ayámratniun yamáram tsawánt apujsámiayi.
- 8 Jusué ayamrátniunam jutíun ejemia, nucháiti ayámratin tsawantka. Kame Arútmaka núkap uwí nankamásmatai, chíkich ayámratin tsawantan etserkámiayi.
- 9 Tuma asamtai, yamáisha Jesús-Irúnramu Arútmanam ayámratniun nákwai.
- 10 Nu ayamrátniunam enkemainiána au, Arútam nuik ayamramia aínsarank, ashí mash' nii takatrin iniáisar tuke ayamrártatui.
- 11 Nuíkia, nuí enkematin kakartái. Kame ímiarcha penke enkemachártatui.
- 12 Arutman chichame iwiakmamtikniuíti. Nánkia aínsank iniáshniun, wakánnium, ukúnchnium, yuminchniúmsha enkemá, pénker, tura yajáuch' ana nuna iniaktúrmaji.
- 13 Nii tsáapnirin achikchamnia, penke atsáwai. Arútam íimmianum ashí mash' misúa aínsarank páant ainiáwai.

Wea-Úuntri Jesusáiti.

- 14 Úunt-Wea ti nankámaku , Nayáimpiniam enkemamia nu, Jesús, Arutman Uchirinti. Nu iisar', nekás ímiaru ajastiniáitji.
- 15 Nu Úunt-Wea penke tunámtsuk, íiya núnisank nekápsamu asa, ii itiúrchatrin iwiáreawai.
- 16 Nuíkia, Arútam ti pénker asamtai, nii wait-nenkrátmari, tura utsumámunam nii pénkeri achiktin, ishámtsuk weantuktái.

AKANKAMU 5.

- 1 Úunt-Wea aentsnumiá untsukmáiti. Aéntska nii tunárin japírtin, nii waririn íikmáknasha níinini Arutman suiniáwai.

Isr.5,2.

- 2 Níisha, tunártin asa, mash' nékachun tunártinnish wáit anéntawai.
- 3 Tuma asa, nii tunarin japirtin, tura ashí aéntsun tunárin japírtaj-sa, íikmakan susatniuíti.
- 4 Tuma asamtai, aya Arútam untsukma, Aarúnka aínsank Úunt-Wea aminiáiti.
- 5 Utsumka Jesussha níinki Úunt-Wea ajaschámiayi. Antsu, Arútam chicháreak: - *Ame winia Uchirúítme, ju tsawant iwiákman amásjai* -.
- 6 Tura: - *Merkiseteka aínsamek take Úunt-Wea atá* - tinia, Úunt-Wea awajsámiayi.
- 7 Ju nunkánam pujús, jakáij tusa ti núkap anentruayat, umirín asa, ti wáitias jaka, líkmaka aínsank achikmáiti.
- 8 Arutman Uchirintiat, waitsámunam umírkatniun unuimiár-miayi.
- 9 Yamáikia nankámaku ajásmatai, ashí mash' umirainiána au, níinini ewemrártatui.
- 10 Arútam apújsamu asa, nekás Merketseteka aínsank Úunt-Weayáiti.

Átum unuíkiartin atiniáitrume.

- 11 Tájana juí, núkap aujmátsatin awai. Túrash átum wárichik nekáchmin asákrumin, mash' ujakchamniáitjarme..
- 12 Ti núkap unuímiaru asárum, unuíkiartin ajamáintrume. Antsu: - Ataksha awakekí, Arutman chichamen unuíturat' - tárume. Kame pasechia nuniniáitrume. Kátsuram yútsuk, aya muntsuátasa wakérame.
- 13 Muntsuiniána au, pasechia aínsarank wáimiaktin chichaman nekainiátsui.
- 14 Antsu úunt kátsurman yúinia ásar, pénkernash, tura yajáu-chiniash páant nekainiáwai.

AKANKAMU 6.

- 1 Nuikia, Utsumka Jesúsnum yama unuimiárma nankaikir', éemka wetái. Kame tunamkámunam enentáimratin, Arútmanam íimiartin, éemka unuimiárma asantai, ataksha unuimiarchatniuítji.
- 2 Aíntsarik Imiáimiunam nekatín, ewej awáastin, jakámunam aneánttin, makurtin tsawánt nákastin, nusha nekatniuítji.
- 3 Arútam wakerakuíntia, tímiajnia aíntsarik turattaji.
- 4 Kame íimiaru áarmia nu, Arutman pénkerin nekapsarmia nu, Iwiáikratniun achikiármia nu,
- 5 Pénker-Chichaman achíkiar, tátinian nekawarmia nusha, nuna iniaisaruitkiuíntia, iwiaracharminiáitji.
- 6 Nuna nekainiayat, ataksha Arutman Uchirín Paúnam ajíntiawar, wishikín ajasáru asamtai, enentaimtíkratin tujíntiaji.
- 7 Yumi yútuk, nunka arakman pénker tsapamtikkiuíntia, Arútam usukruamuíti.
- 8 Antsu aya jankin tsapamtikkiuíntia: - Ju nunka yajauchiti - túsar, yumínkrar, ekemakártatui.

Iniáitsuk nákastai.

- 9 Nu takursha, átum pénker pujá asárum, ewemráttarmena nu nékaji.
- 10 Kame Arútam imítmachu asa, nii anéakrum waimiakaru yáinkrum, yamáisha yayiá asákrumin, kajinmatrámtsurme.
- 11 Nákrmena nu ankant ankant jeátin, takákmasuk tusar', wakérají.
- 12 Pimpikírap. Antsu íimiarar, pimpítsuk tuke nákasar jeariármiania aínsarmek atárum.
- 13 Apraáma aínsarmek atárum. Kame Arútam ti nankámaku asa, chíkich imiá nankámaku atsakui, nii náarin pachís, ti nekás tájame tusa, Apraáman chicháreak:

Isr.6,14.

- 14 - Ti núkap usúkruan, ti núkap ipiampartátjame - tímiayi.
- 15 Tu tai, Apraám nekás nakas, Arútam timia nuna wainkiámiayi.
- 16 Aentstí, ii chichame nekasáiti tiarat' tusar', Arútam ti nankámaku asamtai: - Arútam íirui – taji.
- 17 Aíntsank Arútmaka nii náarin pachís tiniu asamtai, nii chichamen penke yapajíashtatui.
- 18 Arútam wáitruksuk, nekás chichaman tiniu asamtai, nekasáiti tusar', mash' iniáiyakur', timia nu náakaji.
- 19 Arútmanam achitkia asakrin, ti kakáram eméttamji. Emetamu asar', nii Ayamtairiín enkemáitji.
- 20 Kame li jintín uráitsa, Jesús tuke Merkiseteka aíntsank Úunt-Wea ajás, nuí enkemáyi.

AKANKAMU 7.

Merkisetekka Jesusan nakumkamurinti.

- 1 Merkisetek, Sareman Úuntri, ti nankámaku Arútam Wea awájsamu, Apraam úuntan awákak waketkimtai, inkiunk, usukruámiayi.
- 2 Tura Apraámsha mesétnum atantramun nakak, susámiayi. Merkísetek, “imítmachun úuntri” tamáiti. Sareman Úuntri, “tarímtanam pujúinian úuntri” tamáiti.
- 3 Nii aparí, nii nukurí, nii weátri, nii akiniámuri, nii jakamurisha atsá asamtai, Arutman Uchirí, Wea tuke pujana nuna nakumkamurinti.
- 4 li weátri Apraam mesétnum atantramun susamia nu yáit, nu nekamniáitrome.
- 5 Aya Rewí-shuar, wea ásar, nii yachí Apraám-shuáran kuítrin juu áarmiayi.
- 6 Merkisetek Rewí-shuarchaitiat, Apraáman kuítrin júuak, Arútam untsúkman usúkrawai.
- 7 Kame aya úunt nii shuáran usúkrawai.

Isr.7,8.

- 8 Rewí-shuar kuítian juuniayat jainiáwai. Antsu Merkisetek tuke iwiáku pujáwai.
- 9 Aíntsank Apraámnum Rewí-shuársha Merkisetekan akíawai.
- 10 Kame, Merkisetek jeákui, Rewí nii apáchri Apraamnúm pujúyayi.
- 11 Tuma asamtai, Israérnum Rewí-shuar wea ainiáksha, aéntsun Arútmanam ejératniun tujintiainiáwai. Nii tujintiai-niachkuínkia, Wea Aruna ániuchu, antsu Merkiseteka anin utsumaji.
- 12 Wea yapajniakuínkia, awemámusha yapajniatniuíti.
- 13 Kame Jesús Rewí-shuarcháuyayi.
- 14 Muisés: - *Aya Rewí-shuar wea atiniáiti* - takúisha, Jesús Jutá-shuaráuyayi.
- 15 Tuma asamtai: - *Wea, Merkiseteka aínsank, atiniáiti* -
- 16 nuna aents^u awemamu tatsui. Antsu tuke lwiáku pujana nu tawai.
- 17 Kame Ujajmatáiniam: - *Ámeke Merkiseteka aínsamek tuke Wea atiniáitme* - tu aarmáiti.
- 18 Jujáinkia, wea Arútmanam ejérachu asármatai, yaúnchu akupkamu yapajiamuíti.
- 19 Kame yaúnchu awemamu tuke áchamnia asamtai, yamáikia Arútmanam jeátin, imiá pénker tákakeaji.
- 20 Yaúnchu wea ajasarat' tusa, Arútmaka páant tichámiayi.
- 21 Antsu yamáí níinki chicháak: - *Ámeke tuke Úunt-Wea átatme. Wi páant takun, awainkíshtatjai* - tímiayi.
- 22 Tuma asamtai,: - Yaúnchu ámia nujai, Jesuska timiá nankamakuíti - nu nékaji.
- 23 Yaúnchu wea jau ásar, mai yapájniai ajáu áarmiayi.
- 24 Antsu Jesuska penke játsuk, tuke Wea átatui.
- 25 Tuma asa, níinini Arutman weántuinia nuna ewemtíkiui. Kame tuke iwiáku asa, niiniu seatainiáwai.
- 26 Nekás Úunt-Wéaka wáimiaku, tunártincha, tunanumia akankimiu, Nayáimpiniam jukimiu atiniúyayi.

- 27 Yaúnchu wea aínsank, nii tunarin japir, chikíchniasha japírtasa tuke tsawant íkmakan susashtiniáiti. Antsu, aéntsun tunarin japírtaj-sa, níinki aya chikíchkik íkmak ajasuíti.
- 28 Tuma asamtai, yaúnchu wea áantar ainiáwai. Antsu yamáí, yaúnchu awemamu amukamtai, Arútmaka nii ti pénger Uchirí tuke pujusat' tusa, nekás nii náarin pachís, páant tímiayi.

AKANKAMU 8.

Yamáram Irúnramu.

- 1 Úunt-Wea ti nankámaku, Arútman untsurini Nayáimpiniam ekéteana nu tákakeaji.
- 2 Níinki Ayamtai aents^u najanachma, antsu Arútam najánamun wáiniui.
- 3 Ashí úunt-wea íkmakan súsatin apújsamu ainiáwai. Tuma asamtai Jesussha íkmakan susatniuíti.
- 4 Juí nunká juaakuitkiúnka, wea acháyi. Kame íkmakan súsatin yaúnchu awemámuka chikich aéntsun apújeawai.
- 5 Yaúnchu waimiatáirinkia Nayáimpiniam pujana nuna nakumkámuri ainiáwai. Kame Arútam, Muiseska ayamtai ukuak pujurun, chicháruk: - *Náintnium iniaktusmájmena aínsamek jeamtiá* - tímiayi.
- 6 Antsu yamáí Jesuska timiá pénger Irúnramun itia asa, yaúnchu wáimiatain nankáak jatéawai.
- 7 Yaúnchu wáimiatai penkeraitkiuínkia, chíkich eakchaji.
- 8 Antsu Arútam nuna ajápeak, chicháak: - *“Tsawant jeámtai, ashí Israer-aéntsjai, Jutá-aentsjáisha yamáram Irúnramun najanáttajai”* tawai.
- 9 *“Atumí aparín Ejiptúnmaya jíktiaj-san, Irúnramun najanámiyaj aniuchuíti. Kame umichu asármatai, wisha iniaisámiajai”* Úunt tawai.

Isr.8.10.

- 10 “Nu tsawant jeámtai, wi nii anentaín awemamun apujsan, níniun Arútam ajasan, nísha winia Irúnramur áartatui. Israer aéntsaj*ai* tu Irúnramun najanataj” Úunt tawai.
- 11 “Ashí mash’, uchisha úuntash, winia nekaráinia asamtai, yákesh Arutman nekawarat’ tusa, unuiniarchatniuíti.
- 12 Wikia nii tunarin tsankúran, nuna tuke kajinmatkíttiajai” - Tu chichamía, tímiaja, Arútam.
- 13 Yamáram Irúnramun najana asamtai, yaúnchuyá ukúnam juakái. Ukúnam juákmiá nu menkakí wéawai.

AKANKAMU 9.

Jerusarenkan ayamtáiri.

- 1 Yaúnchu irúnramu juyá ayamtain, waimiatáiniash, takúyayi.
- 2 Ayamtai-tesamu, shirípik, tura yurúmak susamun patatáiri pujúmiá nuí, “Usukruámu” tamáiti.
- 3 Nuyá ejátak awíninkia chíkich tesamu, “Umpuntramú” tama, ámiayi.
- 4 Nuínkia kunkuínian íkmatáiri kuríj*ai*ink najánamu, tura chicham najánamun ikiutáiri kuríj*ai* kuérma, pujuármiayi. Nu ikiutáiniam, nátip kuríj*ai*ink najánamu, yurúmak “Maná” taman tákaku, tura Aarunkan payankri kukujrukú, tura chicham najánamu kayánam aárma enkemármiayi.
- 5 Ikiutáin yakíniam jímiar ti náatu Pásuk, nii nanapej*ai* “Tsankúrtai” taman nukuk, pujuriármiayi. Nu arantka mash’ tichamniáiti.
- 6 Núnis asamtai, tesamu-usukruámunam jatértaj-sa, wea tuke enkemin áarmiayi.
- 7 Antsu tesamu-umpuntramúnmaka, nii tunarin, tura ashí aéntsun tunarin japírtaj-sa, aya chikíchik Úunt-Wea íikmakan numpej*ai* tuke uwitin enkemniúyayi.
- 8 Tuma asamtai: - tesamu-usukruámu uráimiu asamtai, tesamu-umpuntramú epenmiáiti - Iwiáikratin tu unuítiámji.

- 9 Yamái nékaji: Íikmak, warínchusha yaúnchu Arutman susarmia nuka, aéntsun anentáin iwiarturchármiai.
- 10 Kame jatérmanum yurúmak, umutai, tura entsánam páusak japitiai, aéntsun najantáiri ásar, Jesús támam, nii kakármarin tákaku áarmiai.

Utsumka Jesús nii numpén itíamiayi.

- 11 Utsumka Jesús Úunt-Wea ajasú, yamáram Arutman pénterin itiatá-j-sa, támiayi. Ayamtai ti pénter, ti nankámaku, aents^u najánachma, tuke pujumia nú enkemayi.
- 12 Tankun numpejaj Ayámtain urátsuk, aya nii numpéjajink chikichí ii ankantri itíá, níinki uráimiayi.
- 13 Yaúnchu tankun numpejaj, íikmakan yunkunmiríjaj aéntsun tunarin japítsuk, aya nii iniashín páuskarin japirármiai.
- 14 Antsu tuke tunártincha Utsumka Jesús, íikmak ajás, Iwiaikratniúnmani nii numpé susa asa, Iwiáku Arútman takárniuri aarat' tusa, aéntsun tunarin nekás japírtatui.
- 15 Tuma asamtai, Utsumka Jesusnúmani yamáram Irúnramu awai. Yaúnchu irunramúnam tunamkármia nu, nii jakamúnmani ewemra ainiáwai. Nuyá, Arútam untsukma ainiána au, tuke iwiáku pujustin ewemainiáwai.
- 16 Úunt jakamtai, níiniu achikminiáitji.
- 17 Kame iwiáku pujakui, achikchamniáitji. Níiniun achiktin, éemka nii jakatniuíti.
- 18 Tu enentáimsar, íikmakan numpéjaj yaúnchu irúnramun nankamawármiai.
- 19 Kame Muisés awemamun étserak amuk, íikmakan numpén, entsan, ure kapákunash, sasánkajaj pachímiar, nii papirín, aéntsnasha ukáteak, chicháak:
- 20 - Ju numpajaj Arútam niinín irútmarne -
- 21 tinia, ayamtain, jatetai irúnea nunasha, ukatkámiayi.

Isr.9,22.

- 22 Aíntsank: - Páusak, tunamkámush, numpajai japirtiniáiti - awemamu tawai. Numpa atsákui, tuná japirchamniáiti.
- 23 Warinchu Nayáimpin nakumkámuri áinia nu, numpajai iwiartiniáiti. Antsu nuka numpa imiá kakarman utsumainiáwai.
- 24 Yamáikia ayamtai aents^u najánamu, Nayáimpin Ayámtairin nakumkámuri tákakeatsji. Antsu Utsumka Jesús Nayáimpiniam enkemá, iin ayamrútmaktin Arútmanam pujawai.
- 25 Yaúnchu wea tuke uwitin chikichan numpejai enkémin áarmia aínsuk, Jesuska aya chikichí íikmak ajás, nii numpéjaink enkemámiayi.
- 26 Turachuitkiúnka, nunka nankamnámia nuyá, untsurí waitsáayi. Antsu, nii tsawantri jeámtai, ii tunarin japírtaj-sa, aya chikichí íikmak ajasuíti.
- 27 Aéntska aya chikichí jákar, nuyá makúnratin winiáwai.
- 28 Aíntsank Utsumka Jesús, untsurí aéntsun tunarin japírtaj-sa, aya chikichí íikmak ajásmiayi. Atak winiákka, aéntsun tunarin japírtinian tatsuk, ashí mash' ewentikiártiniáiti túsar nákania nuna taríttiui.

AKANKAMU 10.

Yaúnchu-Irúnramu Yamáram-Irúnramun nakumkamurinti.

- 1 Yaúnchu-Irúnramu tátinia nuna nakumkámuri asa, nekás ana nuna páant iniákmatsui. Tuma asa, tuke uwitin íikmakan súana nu, aéntsun pénker awájtsui.
- 2 Nii jatérmari pénker awajeakuínkia, aéntsun tunarin japirtin ataksha íikmakan susacháinti.
- 3 Antsu tuke uwitin aéntsun tunarin enentáimtustin íikmakan súawai.
- 4 Kame tankun numpé aéntsun tunarin japíatsui.

Isr. 10,5.

- 5 Antsu Utsumka Jesús ju nunkánam ta, chicháak: - Tanku íikmak ajasaráink túsam, Ámeka winia iniashur surusmiáme.
- 6 Tanku tunán japirtin íikmak ajasarat' túsam, wakerukchamiáme.
- 7 Yamáikia papí tana aínsanak, ame wakéramun najánatniun wi juí pujajai - nuna tawai.
- 8 Yaúnchu awemamu takuísha: - Tanku aéntsun tunarin japirtin íikmak ajasarat' túsam, nakitramiáme - yamá tawai.
- 9 Kame: - Ame wakéramun najánatniun wi juí pujajai - tau asa, yaúnchu awemamun amúawai.
- 10 Utsumka Jesusan iniashí chikíchik íikmak ajásmatai, níinini ashí aents^u pénker ajasarat' tusa, Arútmaka núnak wakérawai.
- 11 Yaúnchu-wea tankun íikmak awájsar, tuke tsawantin jatenakuísha, aéntsun tunarin japiniátsui.
- 12 Antsu Utsumka-Jesús aéntsun tunarin japírtaj-sa, chikichkí íikmak ajás, Arutman untsurini eketui.
- 13 Arútmaka ashí mash' nii numasrin nupetkat' tusa, nákwai.
- 14 Chikichkí íikmak ajás, ashí aéntsun iwiáiniak, ti pénker awajainiáwai.
- 15 Iwiáikratin nuna étseruk, chicháak:
- 16 - Tsawant jeámtai, núnisnak Irúnramun najanáttajai - tawai. Tura Úunt chicháak: - Winia awemámurun nii anentaín, tura nii enentaimmariín apujsáttajai.
- 17 Nii yajáuchirin, nii tunáriniaash tuke kajinmatkíttiajai - tawai.
- 18 Aéntsun tunari tuke tsankúramu asármatai, tuná japirtin tanku íikmak awájsatin utsúmatsji.

Tuke íimiaru atái.

- 19 Yatsutíram: - Jesusan numpejai nekás Nayáimpiniam enkemáttaji - titiniáitji

- 20 Tuke iwiáku pujustin, nii iniashíni yamáram jintian uratrámiaji.
- 21 Arutman jeén Úunt-Wea ti kakáram tákaku asar',
- 22 wáitrutsuk, nekás íimiaru, nekás anentáijai tunártincha, sáar entsajai páusak japíramu weantuktái.
- 23 Jesús nekás wáitrichu asamtai, tana nu ishámstuk nákastai.
- 24 Númtak ikiakanáirar', anenáiyakur', pénker najanatái.
- 25 Chíkich iniáiniakuísha, atumí tsawantri tatin asamtai, átumka tuke Jesús-Irunramúnam pujustárum.
- 26 Nekás chichamjai iimiaruitiatar', tuná wakerakrinkia, ii tunarin japirtin íikmak atsáwai.
- 27 Turákrinkia, áyatik ti tsúumai makútai-tsawant nákasar', jinium wáitsatniun epetmáttaji.
- 28 Muisesan awemámurin umirkacharmia au , jímíar, menáint^{iu} aents^u nuna makuiniakuínkia, wáit anétnatsuk máamu áarmiayi.
- 29 Tuma asamtai, Arutman Uchirín nakitramia nu, urukátink ? Yamáram-Irúnramun numpé iwiarnámia nuna ajapa, lwiáikratniun Arútam susamia nuna katsekka, nusha, atumjáiisha itiúrak makunrat' ?
- 30 Kame nékajnia nu chicháak: - Wiyáitjai nekás makúkratniun. Ankant ankant níiniun susártatjai -. Aíntsank: - Úunt nii shuáran makurártatui - tímiayi.
- 31 Tuma asamtai, lwiáku-Arútam ti tsummáinti.
- 32 Yama íimiaru ajásrum, katsúntrarum, ti waitsamiármena nu kajinmatkírap.
- 33 Ashí íimiainiái wishíkramu, asutiámu asárum, chikichan waitiainiakuísha, katsuntrarme.
- 34 Tuke warástatji, kuit núkap achíktatji tusárum, atumnian atantramkiarmatáisha, aents^u epenmiajáiisha waitsarme.
- 35 Tuma asamtai, yamáisha ti núkap akínkiatin asárum, atumí iimiármari ajapawáirap.
- 36 Arútam timia nu achiktin, nii wakéramu iniáitsuk, tuke najanatárum.

Isr.10,37.

- 37 Tátinia nu ishíchik ajasái, wárik tátatui. Nu kajinmatkírap.
 38 - Imítmachu iimiaruitkiúnka, iwiáku pujústatui. Antsu íimiarchan aneásan iischáttajai – Arútam tawai.
 39 Íikia, iniáisar mesena nu shuarcháitji. Antsu íimiaru asar', ii wakaní ewentíkratin ti kakarmáitji.

AKANKAMU 11.

limiararu kajinmatkírap.

- 1 limiaráruka: - Nákajnia nu takústatji. Wainkiáchminia nu nekás pujawai - tuiniáwai.
- 2 li úuntri itiuur iimiarármia nu enentáimtajji.
- 3 Íimiaru asar': - Arútam aya nii chichámejaink mash' najankáiti. Mash' wáiniajnia nuna, wáinkiachmin ana nunasha najankámiayi - taji.
- 4 Aper íimiaru asa, nii yachí Kaínkian nankáak, imiá pénker íikmakan susámiayi. Arútmaka nii íikmakrin achik, imítmachu awajsamtai, jakaitiat nii iimiarmárijai tuke enentaimtíkrampi.
- 5 Eruksha íimiaru asa, iwiáku Nayáimpiniam junákmiayi. Arútam jukín asamtai, aéntsush penke wainkiachármiai. Kame Nayáimpiniam junatsáink Arútam wakeriniúyayi.
- 6 Antsu íimiarcha Arutman anéatsui. Kame: - Arútam tuke pujuwiti, éana aun akiawai - nuna nékachu ása, Arutman weantukchamniáiti..
- 7 Nué íimiaru asa, tátinia nuna nekachminiaitkuísha neka asa, mash' nii shuárjaink uwémratin, kanu ti úuntan najanámiayi. Íimiaru asa, tunártinian makur, nekás imítmachu ajásmiai.
- 8 Apraam íimiaru asamtai, Arútam untsuk - Yamáram nunkan amastátjame - takui, tuí wea nuna nekachiat, nii nunkén ikiukí, yajá wémiayi.
- 9 Íimiaru asa, nii nunkechuitkuísha Arútam timia nú pujúsmiayi. Núí áaknum pujúsматаi: - *Ju nunkan*

Isr.11,10.

- amastátjame* - Arútam tiniu asamtai, Isáaksha, Jakupsha nú tuke pujusármiai.
- 10 Kame, Arútam Irútkamu nupetkáchminian jeám^utiatna nuna, nakau áarmiai.
 - 11 Íimiaru asa, uuntchitiat, nii nuweshá kaa nuwaitkiuísha, uchin takús^umiayi. Kame Arútam: - Turunáttawai - takui: - Nekasáiti - tímiayi.
 - 12 Uchin yajutmarchamniaitiat, íimiaru asa, yáajaj, náikmijaj métek untsurí aéntsun ipiampármiai.
 - 13 Nu aents^u íimiaru ásar, nunka Arútam timia nuna jeáchat íisar, warásar: - Arútam nuna suramsáttaj - túsar, juí nunkánam irara aínsarank pujústinian nekáwar, weká wekainiákua íimiarar jakármiai.
 - 14 Tuke irara aínsarank wekainiána au, chíkich nuncan eainiáwai.
 - 15 Kame nii nunkén ikiukiármia nuna wakerukarka, ataksha waketkiaráy.
 - 16 Antsu imiá pénker nunka Nayáimpiniam pujana nuna eáinia ásar, penke waketkichármiai. Turunawármatai, Arútam niin yamáram Irútkamun najátawar, nii úuntri átinian natsámatsui.
 - 17 Arútmaka: - *Nekapsataj* - tinia: - *Chikíchik uchin amásmiaj nu, Isáak náartin, íikmak awajsatá* - takui, Apraam íimiaru asa: - Ayu - tímiayi.
 - 18 Arútam: - Isáakjaj ti pampártatme - tiniu asamtai,
 - 19 Apraam: - Arútmaka ataksha aneantmam^utikiáttui - tu enentaimsam^utai, Arútam máatniun suritkiámiayi. Nujaj Arutman Uchirí lík^umak ajástatna nuna iniaktúrmaji.
 - 20 Isáaksha íimiaru asa, Jakupan, Esaúnash usúkruawar, nii turát^uniurin nekamtikiawármiai.
 - 21 Jakup íimiaru asa, jasáttuk ajás payankun ushukruá, Jusén uchirín usukruámiayi.

- 22 Jusesha íimiaru asa, jasáttuk ajás: - Ejiptúnmaya Israer j*i*inkíttiwai - tinia: - Winia ukúnchur jukitiárum - tu akupkámiayi.
- 23 Muisesan aparí nukurisha íimiaru ásar, nii ti shíiram uchirín maawaráink túsar, Ejiptun úuntrin ishámstuk, menáint nantu uukámiayi.
- 24 Muisessa íimiaru asa, úunt ajás: - Ejiptun Úuntrin nawantrin uchirinchúitjai - tímiayi.
- 25 Antsu tunánum warástinian nakítar, Arutman aéntsrijai kajérkamu átaj-sa wakerúkmiayi.
- 26 Kame: - Arútam ankant ankant níiniun súawai - tinia: - Utsumka Jesúsjai katsúnteamu ashí mash' Ejiptu tákakea nuna nankáawai – tu enentaimsámiayi.
- 27 Íimiaru asa, Wáinkiachmin Úuntan ishámak, Ejiptun úuntrin ishámstuk ikiúkmiayi.
- 28 Íimiaru asa, Pásuk nii shuáran iwiáirin maawaráink tusa, tankun íikmak awájsar, nii numpejai wáitin kuerarat' tusa, akupkámiayi.
- 29 Israer aents^u íimiaru ásar, Kapantin entsa nakakamtai, kukárnum katinkíarmiayi. Antsu Ejiptúnmaya aents^u, katínkiaj tukamá, jakekármiayi.
- 30 Íimiaru ásar, tsenken tsawant Jerikiún tentatkármatai, wénuk saanákmiayi.
- 31 Nua Raap náartin tsanírmaitiat, íimiaru asa, isaéran aéntsri mamíkmak wekáinian yáinkiar, íimiarcha aínsank jakáchmiayi.
- 32 Nu arantsha waríniak títiaj ? Jeteúnkan, Parakan, Sansunkan, Jeptén, Tawitian, tura Samuéran, ashí mash' waimiákunash iimiármarin etsérkatniun jeátsjai.
- 33 Nusha íimiaru ásar, ti núkap aéntsun nupetkar, imítmachu awájsármiayi. Arútam timia nu amínkiamun wainkiármiai. Úunt-yawánash nupetkármiayi.

Isr.11,34.

- 34 Ji keán ikiajniakármiai. Mesétnum uwemrármiai. Sunkúrukar tsuamarármiai. Mesétnum kakáram ajásar, nii numasrin awakkármiai.
- 35 Nuásha nii shuar jákaru aneántun wainkiármiai. Antsu chíkich: - Aneánttajai - tinia, ti wáitias jákatniun ishamkachármiai.
- 36 Chíkichkia jirujai jinkiar, epenmia waitsármiai.
- 37 Chíkichkia kayajai tukurma, awátram, tsupikma, nankijai ijiúmu, irara aínsarank nuapén entsaru, péнке tákakcha, kajérkamu, wáitkiasma yujármiai.
- 38 Ashí aents^u nakítiamu ásar, nunca itiárkanam, náintnium, kaya wáanam, ewemtáinmasha matsamin áarmiai.
- 39 Arútam timia nuna achikcha ainiakuísha, nii iimiármari enentáimtaji.
- 40 Kame Arútam yajá íya asa, iin enentáimturmakur', nu aents^u éemka jeátsuk, íijai métek tsanínkiar jeawarat' tusa wakerúkmiayi.

AKANKAMU 12.

Úunt Jesús umirkatárum.

- 1 Untsurí íimiaru yurankmia aínsarank penutmainiáji. Tuma asamtai, áantar ana nu íitsuk, ii tunári ikiukir', ii tsawantri jeamam itiúrchat nákarmajnia nu katsuntratái.
- 2 Iimiármanum Jesús jintinramrar' ejetámraji tusar', nii iistái. Kame níinkia warástinian iniáis, Paun achíkmiayi. Wishikiámunam katsunrármiai. Tuma asa, yamá Arutman untsurini eketui.
- 3 Jesús, aents^u yajáuch' kajerkamuitiat, ti wáitsa asamtai, atumsha kakáram ajastin, níin enentaimsatárum.
- 4 Atumsha, yajáuch' kajérkamu katsuntrakrumninsha, atumí numpé puarcháiti.

Isr.12,5.

- 5 Chichamtin, nii uchirinia aínsank timia nu, kajinmatki-chúrmeash ? Nii chicháak: - Uchirú, Úunt chichártamkui, kúntuts enentaimráip. Jiatmakuísha katsuntratá.
- 6 Kame Úunt nii aneámurin chicháreawai. Tura nii uchirí awájsamun asútiawai - tímiayi.
- 7 Átum waitiárumna nu pénker awajtámrume. Ya apa nii uchirín chicháreatsu ? Aínsank Arútmaka, nii uchirí asákrumin, kakantrámrume
- 8 Chicharkámunam pénker ajaschaitkiúrmeka, nii uchirí acháintrume. Antsu nii uchirinchu aíntrume.
- 9 li aparí ju nunkánam takákeajnia nu, chichartamkurinsha, arántaji. Aínsarik iwiáku pujustin, ashí iwiánchin Aparí arantukchatniukáitij' ?
- 10 li aparí ju nunkánam shíir pujústin chichártamji. Antsu niínin jeátin ii Aparí Arútam chichártamji.
- 11 Chichartámkurin warátsuk wáitijai. Tumaitkuísha umireá-krikia, wáimiaku ajasar', tarímtanam pujústatji.
- 12 Tuma asamtai, kakartárum. Atumí ewejé takúrum, kakáram tariartárum.
- 13 Shutuap menkaráink, antsu pénker wekasarat' tusárum, jintia iwiartuktárum.

Ti pénker ajastárum.

- 14 Ashí shuárjai nawamnáikiarum, atumí Úuntri wáinkiatin wáimiaku ajastárum.
- 15 Aneartárum. Kame chíkich Arutman pénkerin emenkáakka, yajáuch' ajás, chikichan tunamtkiawai.
- 16 Esaú iwiairintiat, ishíchik yurúmkajai nii pataichirijai yapajmiá aínsarmek surumakáirap.
- 17 Atumsha nékarme: Esaú enentáimiar, uutiat, ataksha usukruámun achíktinian tujinkiámiayi.
- 18 Átum Jesús-shuar ajámunam, yaúnychua aínsank ji, nase, ti tsúumai yuránkmisha atsúmiayi.

Isr. 12, 19.

- 19 Kame kachu ti kakáram umpuámu, chichamsha ti ishámkamnia áakui, Israéran uchirinkia: - Mámete. Nu arantka chicharkartukáip - tiármiai.
- 20 Tuma asármatai: - Weantukáirap. Náintian taritia nuka, yajasmaitkuísha, kayajai tukurma atiniáiti - Arútam tímiyai.
- 21 Kame wainkiármia nu ti ishámai asamtai, Muisessa sapíjmiak kuráimiayi.
- 22 Antsu átumka Siunk náintnium, lwiáku-Arutman irutkámunam, Nayáimpinmayá Jerusarénknum ti untsurí Pásuk irúnainia nuí weankarme.
- 23 Nampérnum éemka Nayáimpiniam irunrarmia nuí, tura Arútam ashí makúkratin untsurí imítmachun wakaní tentakma nuí weankarme.
- 24 Jesús, yamáram Irúnramun nii numpejaink iwiáarak, Aperan nankáak Arutman séaana nuí weankarme.
- 25 Aneartárum. chichartámrumna Nujai empekáirap. Kame yaúnchu ju nunkánmayá wáimiakun anturkacharmia nu ewemracharmatáinkia, íisha Nayáimpinmayá chicham antureachkurkia, ewemráshtatji.
- 26 Yaúnchu aya nii chichámejaink nunkan uurmamtikkiámiayi. Antsu yamáí chicháak: - *Amuámunam aya nunkánkechun, antsu nayáimpiniash uurmamtikkiáttajai* - tawai.
- 27 Ju chicham: - Mash' iniáshtin yapajniártatui. Antsu iniáshtichu tuke núnisarank pujusártatui - nuna túramji.
- 28 Nuíkie Iniáshtichu-Irunramúnam enkemá asar', tuke nuí pujusar', anénkratin, imítmachu ajasar', Arútam wakéramu tuke najanatái.
- 29 Kame Arútmaka jiya aínsank mash' yajáuchin aéseawai.

AKANKAMU 13.

Chichárkamu.

- 1 Yamáiya aínsarmek tuke mai anénai ajatárum.

- 2 Írar tuke ikianratárum. Kame chíkich nekainiachiat Pásukan ikianrármiai.
- 3 Epenmia núnisrumek epenmia áinia au kajínmattsuk, iniáshtin asárum, najaimiainiána nusha kajinmatkírap.
- 4 Ashí mash' nuátkaru arántukrum, tsanirmawáirap. Kame Arútmaka tsanirmaun, nánkamsar pujuiniána aúnash, makúawai.
- 5 Ti kuítrintin ajástin wakerukáirap. Antsu takákrumna nujai: - Mámete - titiárum. Kame Arútam chicháak: - *Tuke ámi^jai pujústatjai. Penke ikiukchátjame* - tímiayi.
- 6 Tiniu asamtai, íisha: - Arútam tuke yáintiu asamtai, ishámatsjai. Kame aéntsush warí itiurtúkartink ? - titiniáitji.
- 7 Wea Arutman chichámejaink jintinramármena nu kajinmatkírap. Ju nunkánam itiur pujusarmia nu íisrum, níiya aínsarmek íimiaru ajastárum.
- 8 Kame Utsumka Jesús yaúnchua aínsank, yamáisha, tuke túkesha pujústatui.
- 9 Nekás íimiaru asárum: - Nu nekascháiti - túsar, chíkich chichaman etserainiakuísha, anankmamawáirap. Arutman pénkeri pénker anentáin takústinian yáintmaji. Tuma asamtai, yáintmaktin chíkich eakáirap.
- 10 Íikia íikmatai umpuntramú takakeaji. Yaúnchu-íikmatáiniam takakmáinia nu nuí jaterchamniáiti.
- 11 Kame Úunt-Wea tunán japírtaj-sa íikmakan numpén ayámtainiam jukimtai, íikmakan iniashí aách' ekemákma ainiáwai.
- 12 Turin asármatai, Jesussha nii numpéjaink aéntsun tunarin japírtaj-sa, Jerusarenknúmi^a j̄inkí, líkma^k ajásmiayi.
- 13 Íisha nii inkiúntaj-sar', yaúnchu jatétainmaya j̄inkir', níiya aínsarik péechach' ajastái.
- 14 Kame juínkia ii nunké takáktsuji. Antsu ukúnam takustátjinia nu eáji.
- 15 Nuíkia tuke tsawant Arútam yumínksatin, Jesusan náari pachisar', níinini íikmak susatái.

Isr.13,16.

- 16 Antsu pénker yáiniaiktin, pénker awajnáisatin, kajinmat-kírap. Kame Arútmaka nu jatétain wakérawai.
- 17 Aíntsarmek wea umirkárum, tuke arantuktárum. Kame Arutman súsatín atumí wakanín shíir wainiainiáwai. Tuma asármatai, pimpítsuk wará warat shíir takakmasarat' tusárum, yainktárum. Nu turachkurmínkia, itiúrak yaintmaktátrum ?
- 18 Íniu anentruatárum. Kame íkia nekás pénker anentáijai takákmaaji.
- 19 Aíntsarmek wisha atumiín wárichik jeátin ti núkap anentruatárum.
- 20 Arútam, ii Úuntri Jesusan jakamúnmayá iniantkimia nu, tarímtanam iwiaitmaktárum. Kame Jesuska nii numpejaink tuke Yamáram-Irúnramun najana asamtai, tankun Pamukri awajsámiayi.
- 21 Nii wakéramun najánatin, imítmachu awajtamsatárum. Kame Utsumka Jesusnúmani ii anentáin pénker ana nuna apujea asamtai, níinini tuke túkesha naatmamtkikiatái. Nuke atí.
- 22 Yatsutíram, wárichik aaruitkuísha, ju chicham umiktárum.
- 23 Nekatárum: li yachí Timiutéu ankant ajás pujáwai. Wárik winiakuínkia, wisha níijai iitiájrome.
- 24 Ashí mash' wea, ii yachi waimiakárusa, amikmatárum. Itariánmayá Jesús-shuársha amikmátmarme.
- 25 Arutman pénkeri atumjai pujustí.



SÁNTIAK AÁRMA.

Carta de Santiago



AKANKAMU 1.

Éemkari.

- 1 Sántiak, Arutman, tura Úunt Utsumka Jesusan takárniuri asa, nawe-jímiar Jakupan uchiri irúnramu ashí nunkánam matsatáinia nuna amíkmawai.

Itiúrchatnum katsuntratniúitji.

- 2 Yatsutíram, ashí itiúrchat wainkiármesha, tuke warastárum.
- 3 Kame imiármanum katsúntainia au imiá kakáram ajainiáwai.
- 4 Katsuntainiána au ti pénker ajásar: - mash' tákakeajai, penke utsúmatsjai - tuiniáwai.
- 5 Átum nekatin tujintiakrumka, Arútam áantrank sukarta asamtai, seatárum.
- 6 Túrasha, íimiaru ajásrum, nekás surámeaji tusárum, seatárum. Kame: - Suramsátjiash ? - tana nu, nase entsan umuchia aintsankete.
- 7 Nu aents^u Arutman kakármarin achikchamniáiti.
- 8 Kanaku ása, tuke jimiará anentáin tákakeawai.
- 9 Warírtincha ainiána au, warirtin ajástin ásar warasartiniáiti.
- 10 Antsu kuítrintin kukujja aínsank nii kuítri menkakamtai, wáitsattui.
- 11 Kame etsa ti núkap etsantramtai, nupa, mash' kúkuj' káarmatai, nii shíirmari menkáawai. Aínsank kuit menkakáttui.
- 12 Itiúrchatnum katsúntea nu warastí. Kame: - Winia anenta núnaka wi naatmamtikkiáttajai - Úunt tiniu asamtai, nekás naatmamtikkiáttawai.
- 13 Itiúrchatnum yákesh: - Arútam amútkatsa wakerútawai - tichamniáiti. Kame Arútmaka amunákchamnia asa, yánkesh amúktinian nakítiawai.

San.1,14.

- 14 Antsu, ankant ankant írshimpin iiniána nuka yajáuchin wakeruiniáwai.
- 15 Yajáuchin wakera ásar, tunamainiáwai. Ti tunartin ajásar, jainiáwai.

Umín ajastin.

- 16 Ti anéamu yatsutíram, unuukáirap.
- 17 li Aparí Arútam tsáapin asamtai, aya pénker ana nu yakiya winiáwai. Niinín kiritin jeátsui.
- 18 Nekás-chichámjaink nii uchirín ankant awajtamsar', ashí najánkamu nankákatin nii iwiákmarin súrameaji.
- 19 Ti anéamu yatsutíram, wárichik antúkrum, chichastin, kajektin éemka enentaimsatárum.
- 20 Kame aents^u kajéak, Arutman wakéramun najáneatsui.
- 21 Tuma asamtai, mash' yajáuch' ana nu ajapárum, ewémratin pénker chicham atumiín pujana nu umirkatárum.
- 22 Chichamtin tana nu amiktárum. Kame aya antuiniána au anankmamainiáwai.
- 23 Ya Arutman chichamen antuk amiátsu nuka, iimiátainiam íimiammia aniuíti.
- 24 Kame iimiasiat, nii urukuit nuna wárichik kajínmatui.
- 25 Antsu penke kajínmattsuk nekás-chicham ankant awajea nuna amirea, nekás warástatui.
- 26 Nánkamsar chichainiána au: - limiarúítjai - tuiniayat, anánknamu asármatai, íimiármari aantráiti.
- 27 li Aparí Arútmanam nekás íimiaru ainiána au, mitiáikian, wajénash yáinkiar, tunamainiátsui.

AKANKAMU 2.

Aentstí meteketji.

- 1 Yatsurtíram, nekás ti náatu ii Úuntri Utsumka Jesúsnum iimiaruitkiúrmeka, ashí aéntsjaí métek pénker awajnisatniuítrume.
- 2 Ayamtai-tuámunam aents^u ti pénker entsaru, kuriijaí iwiármamra, tura kuítrintcha wapíkian entsaru enkemamtai,
- 3 átumka kuítrintin shíir chichásrum, ti pénker pujutai apújtusrum, kuítrintcha nánkamsa chichárkuram, pujutai apújtutsuk: - Nuí nunká pujú atá – takúrmeka,
- 4 métek awájtsuk, yajáuch' anentáijai anentaimtuscháintrumeash?
- 5 Yatsutíram, nekatárum. Arútmaka iimiármanum kuítrintin ajasarat' tusa, kuítrintchan achikchamkía ? Anena nuna: - Arútam-Irúnramu amastátjarme - tichamkía ?
- 6 Antsu átumka kuítrincha nakítiarne. Tuma asákrumin kuítrintin áinia au makukrátniunam juramkírum, amútmarme.
- 7 Níisha, atumí Úuntri, ti náatu Utsumka Jesusan katsekainiátsuk ?
- 8 Arútam-Irúnramu awemamu Ujajmatáiniam aárma: - Átumea aínsarmek aénts^u aneastárum - tana nuna umíniakka, pénker pujuiniáwai.
- 9 Antsu ashí aéntsun métek anenachkunka, nu awemamu makumu ásar, tunamainiáwai.
- 10 Kame ashí awemamun umiayat, aya chikíchkiniak umiachkunka, mash' umirtsui.
- 11 - Tsanirmawáip - timia nuka: - Mankartuawáip - nunash tímiayi. Tuma asamtai ámeke tsanirmachiátam, mankartákmeka awemamu umikchame.
- 12 Awemamu ankánt awajea nu makúrmartin asárum, atumí chichamjaí najanamurijáisha take umirkatárum.

San.2,13.

13 Wáit anentkártichu áinia au, wáit anénttsuk makumu áartatui. Antsu wáit anéntkartin áinia au, makúnratniun ishamainiátsui.

Pénker najánmajai ii iimiármari iniákmaji.

14 Yatsutíram, nánkamsar pujuiniána au: - limiaruítjai – tuiniayat, ewemrachártatui. Kame áantar tuiniáwai.

15 Yatsum, umáim entsártinian, yurumátniun tákakcha,
16 yáintsuk chichárkúram: - Pénker wetá, entsartá, yurumatá - takúrmeka, penkerkáit ?

17 Pénker najaneachkurminkia, atumí iimiármari jakáttawai.

18 - Ámeka iimiaruítme, antsu wi yainkratniuíjtjai. Ámeka yáintsuk iimiármaram iniakturkuminkia, wikia yainkratmanúmani winia iimiármarun iniaktustátjame - titiniáiti.

19 Ímiaru asam: - Arútam chikichkiti - támek ? Eméskasha nu nekasáiti túsar sapijmiainiáwai.

20 Nekachkumka nekatá: Ímiarma pénker najánman tákakchakka, aantráiti.

21 Ii aparí Apraam nii uchirí Isakan íikmatáiniam apujsamtai: - limiaruítme - Arútam tichamkía ?

22 Kame nii iimiármarin najánmajai iniakmasú asamtai, nii iimiármarin kakáram awajsámiayi.

23 - Apraám Arútmanam íimiaru asa, imítmachu ajás, arútamshuar ajasuíti - Ujajmatáiniam aarmáiti.

24 Nekatárum: aéntska aya nii iimiarmarijaink imítmachu ajainiátsui. Antsu nii pénker najanmarijai imítmachu ajainiáwai.

25 Kame Rajap tsanirmawitiat, jutíu mamíkmak wekáinian ikiántrar, chíkich jíntianam akupra asa, imitmáchunam pachinkiámiayi.

26 Kame inias' wakántichu jakáiti. Aíntsank íimiarma pénker najanman tákakcha jakáiti.

AKANKAMU 3.

li iniáijai tunámeamu.

- 1 Yatsutíram, ashí mash' unuúkiartin ajasáirap. Kame unuúkiartin imiánkaska makumu áartatui.
- 2 Ashí mash' tunámeaji. Nii iniáijai tunámeatsna au, mash' nii iniashín nupétea asa, imitmachuíti.
- 3 Kawái, jirúch' wenúnam apujtusar', nupéteatsjik ?
- 4 Aíntsarik ti úunt kanu kanáit^u ishitiúpchijaink, wiáneatsjik?
- 5 Iniáisha ishitiupchitiat, ji kampúntniun aésea aintsankete.
- 6 Kame yajáuch' iniái iin emestamar', Tunkurúan jiin tákaku asa, ii yajáuchirin ikiapawai.
- 7 Aéntska ashí yajasman, chinkin, napin, namáknasha nupèteawai.
- 8 Antsu yákesh iniáin nupetkachminiáiti. Mash' awateakuísha, emetachminiáitji. Tseása aintsank aéntsun ajákeawai.
- 9 Iniáijai ii Úuntri Jesús, tura ii Aparí Arútam yuminksar', aents^u Arutman nakumkámuri ainiakuísha, yuminkrar', eméseaji.
- 10 li weneyá yumínksatin, yuminkrátniusha jjiiniui.
- 11 Yatsurtíram, turashtiniáiti. Kame chikíchik yumirmatáinmayá entsa yumín, yapasha, jjiintsui.
- 12 Yáas^u shuínian neréatsui. Shuíniasha yáasun neréatsui. Wéenmayá entsa yumín jjiintsui.

Nekás nekatai.

- 13 Nekás nekaukáitiam ? Nekás nekatai takakeakminkia, amé najanamurmiín wainkiáttaji.
- 14 Antsu yajáuch' awajín, akásmou, manin ajasuitkiúmka, nékachu asam, waitriniáitme.
- 15 Kame nu nekatai yakiyá winiátsui. Antsu nunkayá, amiíyá, emeskánmayá, winiáwai.

- 16 Akasmatainiána au, nankámantu ajástaj-sar wakeruiniána au, pénkeran iniáisar, yajáuchin najanainiáwai.
- 17 Antsu nekatain yakiya achiniána au, imítmachu, kajechu, enentáimin, chikíchan anturín, tsankúkратin, pénker najanin ainiáwai.
- 18 Anankkártichu, ashí aéntsun métek awájkartin ásar, ashí mash' tarímtanam pujusarat' túsar, pénker takákmasar, pénkeran itianiáwai.

AKANKAMU 4.

Nankámaku ajástaj tírap.

- 1 Mánikma, jianáikmasha númtakti ana nu tuyá wininia ? Nunkánmaya wininiáwai. Kame: - Nankámaku ajastaj - tárumna nu, atumí anentaiín mániawai
- 2 - Núkap takústaj - tayátrum, takáktsurme. Tuma asárum mankártarme, akasmátrume. Núkap takustin jianáikrum mániarme. Aíntsarmek anéntrachu asárum takáktsurme.
- 3 Anentrakrumsha, yajáuch' seá asárum achiátsrume. Nii pénkerijai nánkamsa warastin enentáimiu asárum, achiátsrume.
- 4 Tsanirmautíram, yajáuchijai pachiniána au Arutman numasri ajainiáwai, nekátsrumek ?
- 5 - Emésak iinín pujana nuka, imiá yajáuch' awajtámsatniun wakérawai - Ujájmatat tawai.
- 6 Antsu Arútmaka imiá pénker awajtámeaji. Kame: - Arútmaka wáantun iyatsui. Antsu péejchachin yayawai - Ujajmatáiniam aarmáiti.
- 7 Tuma asamtai, Arútmajai irunrárú umireakrumninkia, emésak yajá wétatui.
- 8 Arútam weantakrumninkia, Arútmasha atumín weanturmak-tátrume. Tunartintíram, atumí páuskari japírum, atumí anentái tujintiakuísha, waimiaktárum.

San.4,9,

- 9 - Tunartiniáitjai - tusárum, kúntuts enentáimrarum, uuttiárum. Kame tunamkámunam wishítsuk, uuttiniáitrum. Warátsuk, kúntuts enentaimratniuítrume.
- 10 - Peejcháitjai - takurminkia, Arútam naatmamtikram-káttarme.
- 11 Yatsutíram, númtak aujmatnaikiáirap. Kame nii yachín yajáuch' chicharea nuka makúkratin ajás, awemamun eméseawai. Antsu ámeke awemamu eméstsuk umirkatniuítme.
- 12 Kame chikíchik Makúkratin awai. Aya níinki awemamun najana asa, ewemtikramramniáitji, túrutskesh makur-mamniáitji. Amesha yáitiam, aents makúrtinsha ?
- 13 Chikíchik chicháiniak: - Yamái, kashínkish irutkámunam werir', chikíchik uwí pujusar', kuítrintin ajástatji - tuiniáwai.
- 14 Antsu átumka kashín átatna nu nekátsrume. Iwiáku pujúttarmeash ? Kame mukuíntiua aínsarmek ishíchik pujúsrum, menkakáttarme.
- 15 Tuma asamtai: - Arútam wakerakuínkia kashín turáttajai - titiniáitrum.
- 16 Kame átatna nu nékachu asárum, nánkamsarum chichaschatniuítrume.
- 17 Shuar pénker túratniun nekayat, turachkunka tunámeawai.

AKANKAMU 5.

Kuítrintin jintintiámu.

- 1 Atumsha kuítrintniutíram, emesáinia nu ta asármatai, kúntuts enentáimrarum, uuttiárum.
- 2 Yajásam atumí takatrin amukármatai, mamuksha atumí entsatáirin emesainiáwai.
- 3 Atumí kuítri chuaprúinia nu jiya aínsarank atumí anentaín chicháiniak: - Urúkamtai amuámunam pujayátrumsha, irumrárum ? - tuiniáwai.

San.5.4.

- 4 Atumí takárniuri pénker akikcha asákrumin, charátum ajainiáwai. Pasukan Úuntri anturkámiayi,
- 5 Ju nunkánam warirtin ajásrum, utsúmtsuk ti warasuitkiúrme-sha, chíkich utsumámunam ajakrárme.
- 6 Imítmachu ayamrumákchamnia asármatai, makúrum ajakrárme.

Úuntan tátinri nákastarum.

- 7 Yatsutíram, ii Úuntri támam nákastarum. Arákmausha, yumi yutuk nii arákrin tsapamtikiámtai, nerén júuktin nákawai.
- 8 Atúmsha, atumí Úuntri tasáttuk ajasú asamtai, katsuntrárum, nákastarum.
- 9 Yatsutíram, Makúkratin tasáttuk ajasú asamtai, makurmaráij' tusárum, númtak manikiáirap.
- 10 Atumsha yatsutíram, Wáimiaku, ii Úuntrin chichamen etserkátaj-sar ti wáitsa asármatai, níiya aínsarmek katsuntratárum.
- 11 Kame Katsuntrármia nu yamáí warainiáwai. Jup katsuntra asamtai, ii Úuntri wáit anéntkartin, ti tsanka asa, yáinkmiayi, atumsha antukurme.
- 12 Aínsarmek yatsutíram, “nekasáiti” titiaj tusárum, nayáimp', nunka, warínchusha páchítsuk, aya nekás chícham titiárum. Kame waitruiniána au tunamainiáwai.

Jáamunam.

- 13 Atumiín kúntuts pujana nu anentruatí. Waráana nuka Arútman nampersatí.
- 14 Aents^u jaakuínkia, Jesus-Irunramúnam Úunt-Wea untsukartí. Nuka anéntruawar, Jesusan pachísar, kuntutjaj jáan kuerartí.

San.5,15.

- 15 Nekás iimiaruka nii anéntrijai jáana nuna ewemtikráttawai. Kame Arútmaka nii tunarin tsankur, tsuártatui.
- 16 - Tunartiniáitjai - númtak tunáisarum, tsuámartin anentru-naiyatárum. Kame imítmachu pimpítsuk anentrakuínkia, nii anentri nekás ti kakáram ainiáwai.
- 17 Eriásha, iya núnisank jakaitiátsha, matsatkámunam yutukáink tusa ti anentruámtai, menáint^{iu} uwí penke yutukchámiayi.
- 18 Ataksha anentruá, yutumtikkiámtai, nunka tsapákmiayi.
- 19 Yatsutíram, chikíchik nekás chichaman iniaisamtáinkia, waketkit' tusa chíkich yaintí.
- 20 Kame tunártinian pénker awajainiána au, nii tunarin japírar, nekás ewemrártatui.



ÉEMKA KAYA AÁRMA.

1ª Carta de Pedro



AKANKAMU 1.

Éemkari,

- 1 Kaya, Utsumka Jesusan Akatrámuri, jutíu nii nunkén ikiúkiar, Púntunam, Karásianam, Kapatúsianam, Ásianam, Pitiniánmasha pujúinia,
- 2 íimiaru ajásar, Utsumka Jesusan numpejai nii tunarin japirat' tusa, ii Aparí Arútam akíntsaik tuke untsúkar, Iwiaikrátniujai iwiáiniakármia nuna aáteajai. Tarímtanam Arutman pénkeri atumiín pujustí.

Uwemráitrume.

- 3 Arútam, ii Úuntri Utsumka Jesusan Apari, wáit anénkartin asamtai, yumínksamu atí. Jakamúnmaya Utsumka Jesusan aneántmamtik, yamáram iwiákman, tura yamáram nákamun amásmiaji.
- 4 Nayáimpiniam nii ti pénker wariri mesérchamnia, tuke amukáchminia ana nuna, atumnian ikiúsmiayi.
- 5 Ukúnam nii tsawantri jeámtai, ewemtikrámratin ii iimiarmarini ayamrútmaji.
- 6 Tuma asamtai, itiúrchatnum waitiakrumsha, warastárum.
- 7 Kuri júsatin jinium epeatniúítji. Aíntsarik ii iimiármari kakáram ajasat' tusar', waitsatniúítji. Utsumka Jesús ta, nekás waitiainiána aun naatmamtikkiáttawai.
- 8 Átumka nii wainkiachiátrum anéarme. yamáisha iyachiátrum íimiaru asákrumin, ti núkap waráawai.
- 9 Iimiármanum wainkiármena nu, yamáisha tákaku asárum, ewemráitrume.
- 10 Yaúnchu wáimiaku átum achíktinian etsérkar, nuna imiá nekátaj-sar ti wakerukármiai.

Ka.1,11.

- 11 Utsumka Jesusan Iwiaikrátñiuri niinín pujumia nu, Utsumka Jesusan waitsátñiuri, nii naatmamtikkiatñiurisha iwiái-niakam: - Nusha yáit ? Urutái turunať ? - tíarmiayi.
- 12 Pásuk nekacharmia nuna ishíchik etserkármiayi. Antsu yamáikia Akátramu, tura Iwiaíkratin Nayámpinmayaa taramia nu páant ujatmakúrme. Yaúnchu iwiainiákmaka niiniuchuít*i*, antsu atumniáit*i*.

Wáimiaku atárum.

- 13 Nuíkia atumí wakaní iwiárarum, aneára pujustárum. Utsumka Jesús ti náatu tatin asamtai, nákastarum.
- 14 Nekás iimiaruitkiúrmeke, yaúnchua aínsarmek íirshimp' iisáirap.
- 15 Atumín untsurmakmiármena nu wáimiaku asamtai, atumsha wáimiaku atiniáitrum*e*.
- 16 Kame Ujájmatai chicháak: - Wi wáimiaku asamtai, atumsha wáimiaku atáitrum*e* - tawai.
- 17 Arútam Apa, átum anentrárm*e*na nu, aéntsun métek iyatsui. Antsu nii takatrin íiras, ankant ankant makúawai. Tuma asamtai, ju nunkánam pujárm*e*na nu, Nayáimpiniam jeátin, tuke pénker pujustárum.
- 18 Arútam ewentikrámr*a* asákrumin, kajinmatkírap. Atumí úuntri nánkamsar pujuárm*a* aínsarmek pujuírap. Kame Kurij*a*i, kuítj*a*i ewentikrachmáitrum*e*.
- 19 Antsu Utsumka Jesusan numpej*a*i, Ííkmak tunártinchaj*a*i ewentikramuítrum*e*.
- 20 Arútmaka nunkan najántsuk niinín enentaimsayat, aya amuámunam atumín iwiaitmakurme.
- 21 Níi nákasuk, níinini íimiaru ajásuk tusa, jakamúnmaya aneántmamtik, naatmamtikkiámiayi.
- 22 Nekás-chicham achikiú asárum, atumí páuskari japírum, nekás anénkratin ajasurme. Tuma asárum númtak mai anenai ajatárum.

Ka.1,23.

- 23 Kame iníashniúmia akíntsuk, Arútam tuke iwiáku pujana nuna chichámejai akiniáitrume.
- 24 li iníashí nupa aintsankete. Nii náatmari kukujia aniuíti. Kame nupa wárik káawai. Kukujsha wárik iníáawai.
- 25 Antsu Arutman chichame tuke túkesha juáktatui. Nu chicham Pénker-Chicham atumín etsernákmia nuíti.

AKANKAMU 2.

Jean Páuri.

- 1 Ashí mash' yajáuch' ana nu, ananktai, wáitrutai, akásmattai, tsanumtáisha iniaisatárum.
- 2 Pasech' muntsu pénkeran wakera aínsarmek, atumsha Pénker-Chicham eaktárum. Nujáinkia pénker tsakárum, kakáram ajastátrume.
- 3 Utsumka Jesús ti penkeráiti, nu nekátsrumek ?
- 4 Pau-iwiáku aents^u nakitramu, ti pénker asamtai, Arútam achíkmia nuí weankárme.
- 5 Atumsha nii iwiáku-makuíya aínsarmek Arutman jeé ajastárum. Wea ajásrum, Jesús-Irunramúnam Utsumka Jesusnúmani Arútam yumínksatin jatertárum
- 6 Kame Ujájmatai chicháak: - Siúnknum Pau ti pénkeran apujsáttajai. Ya niinín achimia nuka ti kakáram ajástatui - tawai.
- 7 Atumsha íimiaru asárum, naatkáttarme. Antsu, numi ajá-pamu Pau ajasú asa, íimiarchan
- 8 tukúmtik, ajuáwai. Kame nekás chichaman ajapainiána au, tukúmkar, kakáram ajainiátsui.
- 9 Antsu átumka Arútam untsumka asárum, wea irúnramu, matsátkamu umpunramu, Arútam-Irunramuítrome. Kame winia naatmamtikrukarat' tusa, kiritniúnmaya tsáapniunam Arútmaka jjirmákmiaji.

10 Yaúnychuka átumka niinín irunrachúyarme. Antsu yamáikia Arútam-Irunramuítrume. Yaúnychu wáit-anentmainchúyarme. Antsu yamáí wáit-anentmain ajasurme..

Pénker pujustárum.

11 Anéamu yatsutíram, juí nunkánam íirar asárum, atumí iniashí wakéramu atumí wakanín kajera asamtai, nupetkatárum, tájarme.

12 Arutman nekainiáchmanum pujá asárum, pénker pujustárum. Turakruminkia, kajértamainiána au atumí pénkerin wáinkiar, Arútam támatai, naatmamtkikiártatui.

13 li Úuntri Jesúsnum enentáimsarum, úunt anáikiamu áinia au tuke umirkatárum. Ashí akupín ana nu umirkatárum.

14 Tura chíkich uunt yajáuchin makutin, pénkeran ikiákartin apújsamu asármatai, umirkatárum

15 Kame pénker pujúsrum, nékachu nupetkámniuram tusa, Arútam wakérawai.

16 Ankant ajásrum, yajáuch' nájantsuk pénker pujustárum. Ankant asárum, Arutman takárniuri ajastárum.

17 Ashí mash' arántukrum, jesús-shuar aneásrum, Arútam ishankárum, akúpniusha arantuktárum.

18 Takárniusha, nii úuntri kajén ainiakuísha, arántukar umirkartí.

19 Kame áantar waitkiarmainiána nuí, Arútam íirui tusárum, pénker takakmasuitkiurminkia, pénkeráiti.

20 Yajáuchiniam asuttiámrakrum katsunteakrumninkia, nusha warink ati ? Antsu áantar asuttiámrakrum, katsunteakrumnínkia, Arútam: - Penkeráiti - turámrum.

21 Katsúntratin untsukmáitrume. Kame Utsumka Jesús atumnia wáitsa asamtai, atumsha níiya aínsarmek waitsatniuítrume.

22 Níinkia penke tunamkáchmiayi, penke waitruáchmiayi.

Ka,2,23.

- 23 Katsékkamsha, katsekmakchámiayi. Awateámsha yapájamiatsuk: - Arútam nekás makúkratin asamtai, nii iistí - tímiayi.
- 24 Níinki ii tunarin japírtaj-sa, Paúnam ajjintiámu jaka asamtai, ii tunari ajakrar', wámiaku ajastiniáitji. Kame nii waitsamu-ríjaink ewemráitji.
- 25 Tanku menkaka aínsarmek pujuwitiátrum, yamáikia atumí pamukri weankarme.

AKANKAMU 3.

Nuatkámunam itiur pujustiniáit ?

- 1 Atumsha nuatíram, atumí áishri umirkatárum. Antsu, atumí áishri Arutman chichamen nakitiakuínkia, chichátsuk, átum pénker najánmajai jintintiatárum.
- 2 Kame atumí najánmarin íis, makuchmaitkuísha, enentáimiawai.
- 3 lirsarat' tusárum, pénker temáshmartin, sháuk nunkurtin, pénker entsartin, wakerukáirap.
- 4 Antsu nekás shíirmach' ajastaj takúrmeka, atumí anentaiín: - Yúpichuch', kajechu atajai - tu enentaimsatárum. Nuka sakárchamnia asamtai, Arútam: - Nu ti penkeráiti – tawai.
- 5 Yaúnchu nua waimiakaru, Arutman nákasar, nii áishrin umiriármia nuka turawármiai.
- 6 Sáarasha Apraaman: - Uuntrú – tusa, umirkámiayi. Atumsha ishámstusuk penker pujakrumka, Sáaran nawantri atátrume.
- 7 Atumsha aishmanktíram, atumín tarimtárijaink irunra pujúsrum, anturkatárum. Atumí tarímtari kakármachu asármatai, penke kajerkáirap. Kame iwiákman súsatín, mai Arutman pénkeri achikiúrme. Turawákrumka, Arútam seármena nuna amastátrume.

Ka.3,8.

- 8 Ashí mash' chikíchik anentái takúsrum, anenáisrum, chikichan itiúrchatrí yáinkrum, péejchach' ajásrum, wait anéntkartin atárum.
- 9 Yajáuch' awajtamkurminkia yajáuch' awajsáirap. Katsekramkurminkia katsekkáirap. Arútam atumín tuke yuminkia asa, tuke yumínksatin atumín untsurmakmiárme.
- 10 Ju nunkánam warásrum shíir pujústín, wáitruksuk, yajáuch' chichasáirap.
- 11 Yajáuch' iniáisarum, pénger najanatárum. Tarímtanam pujústín eaktárum.
- 12 Kame Arútmaka imítmachun iyawai, nii anentrín ántawai. Antsu tunártinian kajérawai.

Kajertámkurmin ishamkáirap.

- 13 Pénger pujakrumninkia, yaki yajáuch' awajtamstatárum ?
- 14 Pénger pujústín waitiákrumsha, warastárum. Ishámksuk pénger pujustárum.
- 15 Antsu atumí anentaín ii Úuntri Utsumka Jesús yumink-satárum. Nákarmenta nuna nekátaj-sar wakeruiniakuíntia tuke páant etsekatárum.
- 16 Pénger anentái tákaku asárum, péejchachia aínsarmek turatárum. Turakrumninkia, jesús-shuaran tsanumainiána au natsártatui.

Jesusa aínsarik waitsatniuítji.

- 17 Yajáuch' najánatin waitsashtiniáitji. Antsu pénger najánatin, Arútam wakérakui waitsatniuítji.
- 18 Kame Utsumka Jesús ii tunarin japir, Arútmanam jurámkitsa jakámiayi. Imítmachu iniashtin asa, imítmaun jaruk, lwiáikratniun kakarmarijají aneántmiayi.
- 19 Tura jákaru matsátmanum nuna etserkátaj-sa wémiayi.

1 Ka.3,20.

- 20 Arútmaka aéntsun makústatuk ajásmatai, Nué úunt-kanún awáai aents^u íimiaru ajástaj-sar nakitiainiakuí, aya yarush' kanúnam enkemáwar ewemrarmia nuna tajai.
- 21 Nuka imiáimiunam ewemráitrumna nuna nakumkamurinti. Kame núí aya atumí iniashín páuskari japírtaj-srum nákachmiarme, antsu Utsumka Jesusan aneantmárini atumí wakaní iwiáratin Arútam seamiárme.
- 22 Nuínkia Nayáimpiniam we, Arutman untsurini pujús, ashí mash' Pásukan, Akupniun, nankámaku áinia núnasha Úuntri ajásmiayi.

AKANKAMU 4.

Ashí amúkatin jeatemayi.

- 1 Utsumka Jesús nii iniashiín wáitsa asamtai, atumsha: - Waitsamia nuka tunán japírmiai - tusárum, kakáram ajastárum.
- 2 Nuíkia atumí iniashí wakéramu najántsuk, iwiáku pujúmam Arútam wakéramu najanatárum.
- 3 Jesús-shuárcha aínsarik, íisha yaúnchu ijiármatsuk, ii iniashí wakéramu, nampekma, yajáuch' nampérmamu, áantar-arútam tekémramu, ti núkap eákmiaji.
- 4 Yamáikia, niya aínsarmek yajáuchiniam wéachu asákrumin, wishikrámrarum, yajáuch' íirmarme.
- 5 Tumaitkuísha, iwiáku jakárunash makuártatna Nu, níinsha makuártatui.
- 6 Kame Pénker-Chichaman antukaru jakármia nu, iniáshtin ásar jakaruitiat, lwiáikratniúnmani Arútmanam iwiáku pujuiniáwai.
- 7 Ashí amúkatin jeatemayi. Tuma asamtai, pénker enentáimsarum, káshisha anentrú pujutárum.
- 8 Nekás mai anénai ajatárum. Kame anenaiyámujai untsurí tunasha tsankúramu ainiáwai.

- 9 Ílirar kajértsuk, atumí jeén ikiantratárum.
10 Ashí mash' ankant ankant níniujají yainktí. Turakrumka Arútam suramsamiárména nujají pénger najánearme.
11 Chicháa nuka Arútman chichámejajink chichastí. Takákmaa nuka, Arutman kakarmaríjajink takakmastí. Kame Arútmaka ashí tujintcha asa, Utsumka Jesusnúmani tuke túkesha náatu atiniáiti. Nuke atí.

Kajérkamu atsankramuíti.

- 12 Anéamu yatsutíram, itiúrchat atumín nekaprámsatsa, jiya anin kééana nu, ishamkáirap. Kame nuka tuke awai.
13 Antsu Utsumka Jesusjají wáitsatin warastárum. Kame nii náatmari jeám tai, atumsha naatkáttarme.
14 Utsumka Jesusna asárum katsekkamuitkiúrmeka, warastárum. Kame Arutman náatmari, nii Iwiaikratniurisha atumiín pujáwai.
15 Mankartin, kasa, yajáuch' najanín, tsanúmniusha ajástin waitiainiána au, áantar waitiainiáwai.
16 Antsu Jesús-shuar ajastin waitiainiána au, Arutman yumínksar, natsámstuk Jesús-shuar ajasartiniáiti.
17 Yamáikia makuámunam pujají. Nuka Jesús-Irunramúnam íijají nankámnawai. Pénger-Chichaman antuktin nakitiáinia nuna itiúrkatin ?
18 Imítmachu ewémratin itiurchataitkuínia, tunartin urukawartin ?
19 Tuma asam tai, Arútam wakéramun najánatin waitiainiána au, nii wakanín Arutman súsar, tuke pénger najanawartí.

AKANKAMU 5.

Chichárkamu.

- 1 Wi Úunt-Wea, Utsumka Jesusan waitsámurin wáinkian, nii náatmari tátinia nuna pachíntiuktin naka asán, Úunt-Wean tajai.
- 2 Atumí nunkeén Jesús-Irúnramu pénker wainkiatárum. Nakíttuk, warásrum Arutma aínsarmek wainkiatárum. Kuit enentáimtutsuk, tsáanka ajásrum, áantrarmek takakmastárum.
- 3 Nii únuntriya aínsarmek takákmatuk, átumea aínsarank ajasarat', pénker pujúsrum, takakmastárum.
- 4 Turakrumka, Jesús Wean Úuntri ta, naatmamtikramkátarme.
- 5 Atumsha natsatírmesha, Úunt-Wea umirkatárum. Níya aínsarmek ajastin wáantu ajátsuk, nekás péejchach' ajastárum. Kame Arútmaka wáantun nakítiak, peejcháchin nii pénkerin súawai.
- 6 Arútam nankámaku asamtai, nii ewejeén takurit' tusárum, péejchach' ajásrum, nii wakéramu najanatárum.
- 7 Arútam atumín wáitma asákrumin, yaintkiat' tusárum, atumí itiúrchatri susatárum.
- 8 Ijírmasrum, aneartárum. Kame atumí numásri emésak, úunt-yawá ti kajéa aínsank, atumín yurámatniun wakérawai.
- 9 Nekás íimiaru ajásrum, nupetkatárum. Kame ii yachí ju nunkánam kajérkamu ásar, katsuntainiáwai.
- 10 Arútam ashí mash' nii pénkerin surámeajnia nu, Utsumka Jesúsnum tuke túkesha náatkatin untsúrmakrum, ti pénker, ti kakáram ajasarat' tusa, yamáí waitkiarmarme.
- 11 Tuke túkesha naatmamtíkiamu atí. Nuke atí.

Ka. 5,12.

- 12 li yachí Sirwanu wáitrichu asamtai, juna aakmamtikramjai. Juka Arutman pénkeri asamtai, ikiakártaj-san wakerukmájrume. Tuma asamtai nekás kakáram ajastárum.
- 13 Papiruniánmaya Jesús-Irúnramu amikmátmarme. Aínsank winia uchir Márkussa amikmátmarme.
- 14 Pénker miniaknáikiarum, amikmanaiyatárum. Utsumka Jesúsnum pujármena nu, tarímtanam waimiaktárum.



ATAKSHA KAYA AÁRMA.

2ª Carta de Pedro

AKANKAMU 1.

Éemkari.

- 1 Utsumka Jesusan takárniuri, Akátramu Simeunk Kaya aáwai. Ashí mash' iya nunísarank ti pénger iimiármari achíkiar, Arútam ii Ewemtíkkiartin Jesúsnum iwiarnármia nuna aáteawai.
- 2 Tarímtanam Arutman péngeri tuke kawénktin, Arútman, tura ii Úuntri Utsumka Jesusan nekakí weartí.

Arútmanam pachínma.

- 3 Arútam ashí tujintcha asa, iwiáku pujustin kakáram awajtamsar', nii naatmamtíkkiatin untsurmakar', mash' utsúmajnia nuna suramsámiaji.
- 4 Nújaink ti kakáram, ti pénger achíkchamnia nuna suramsámiaji. Kame átumka yajáuch' ajápatin wakéra asárum, Arútmanam pachíniarme.
- 5 Nuíkiá katsuntrámujai, atumí iimiármari ikiakartárum.
- 6 Nekámujai atumí katsuntrámuri ikiakartárum. Iniashín yajáuchiri nupetkámujai, atumí nekámuri ikiakartárum. Tuke maníámujai iniash' nupétkatin wakéramu ikiakartárum. Ánentjai tuke mániamu ikiakartárum.
- 7 Anenaiyámujai atumí anentri ikiakartárum. Arútam aneámujai, atumí anenaiyámuri ikiakartárum.
- 8 Ti núkap nu turakrumka, nakiarchamniáitrum. Antsu ii Úuntri Utsumka Jesús páant nekamniáitrum.
- 9 Kame nuna turuiniátsna nuka, kusurúa anin ajásar, tsankurnaru asarsha, kajinmatainiáwai.

- 10 Tuma asamtai, yatsutíram, Arútam untsukma asárum, kakartárum. Turakrumka tunamkashtátrume.
- 11 Antsu ii Úuntri Utsumka Jesús, ii Uwemtikkiartin asa, yúpichuch`Arútam-Irunramúnam enketmáttarme.
- 12 Ju chicham neka asakruminsha, kajínmattsuk, tuke: - Nekasáiti - tikiu tusan, ataksha enentaimtikiájrume.
- 13 Ju nunka pujúmam, kajinmatkírum tusan, ataksha titin penkeráiti.
- 14 li Úuntri Utsumka Jesús túrutmia nuí, jasáttuk ajástaj nuna nékajai.
- 15 Tuma asamtai, wi jakamtai, tuke nuna kajinmatkírum tusan, tuke ti núkap étsereajai.

Íimiarman tarimtáiri.

- 16 li Úuntri Utsumka Jesús ti nankámaku tátinian unuiniájrumna nuka, áantar chichamcháiti. Kame ii jíijai nii nankamákumari wainkiámiaji.
- 17 Nii Aparí Arútam, ashí tujintcha asa, nii náatmamtik, chicháak: - Juka wi ti anéamu Uchiruíti. Wi akupkátaj-san wakerúkmiáj nuíti - tímiayi.
- 18 li náint umpuntrámunam níijai pujusar', Nayáimpinmaya chicham timia nu antúkmiaji.
- 19 Tuma asamtai, yaúnchu wáimiaku tiniu áarmia nujai apatka íisrum, nekasáiti titiárum. Nuka kirítiniunam tsáapin awajea asamtai, yankuámia aínsank tsawant támam, atumí anentaín tuke takustárum.
- 20 Nekatárum. Ashí mash' Ujajmatáiniam aárma nu, ankant ankant: - Páant nékajai – tichatniúitji.
- 21 Kame Ujajmatáiniam aárma nu aéntsun enentaimmiariya tacháiti. Antsu Iwiáikratin wáimiakúnmani chichásmiayi.

AKANKAMU 2.

Unuíkiartin anánkkartin.

- 1 Israérnum áantar wáimiaku irunrármia aínsank, atumiínsha áantar unuíkiartin irunrártatui. Nuka Nekás-Unuíkiártinian anturkacharu ásar, yajáuch' chichaman itiáiniáksha, wárichik amukártatui.
- 2 Untsurí aents^u nii yajáuchirin nakumkármatai, naka jintian emesrártatui.
- 3 Kame kuírintin ajástaj-sar, atumín anakramáttarme. Tumaitkuísha, makumu ásar, wárichik amukártatui.
- 4 Arútmaka Pásuk tunamkarmia nuna penke tsankúrtsuk, makúntratin tsawant jeámam, Tunkuruánam, kaya waa tsúumainnium utsáa epenmiáyi.
- 5 Aínsank yaúnchu yajáuch' pujuármia nuna tsankúrtsuk, entsan amármamtik, mash' amuk, aya Nué yarush' aéntsjaínk pénker pujuármia nuna ewemtikrármiai.
- 6 Aínsank, yajáuch' aents^u enentaimrarat' tusa, irútkamu Sutúman, Kumúrunash ekémak, aya yunkunin awajsármiai.
- 7 Antsu áishmank, Rut náartin, pénker asa, aents^u yajáuch' pujuiniámunam ti wáitsa asamtai, ewemtikrármiai.
- 8 Juka, yajáuch`aéntsnum pujús, tuke tsawant nii yajáuchirin íis, wáitia ajá pujúmiayi.
- 9 Kame Arútmaka nii tsawantri jeámtai, nii takárniurín ewémtikiar, yajáuchin makuártatui.
- 10 Yamáisha aents^u yajáuch' Úunt ti Nankámakun wishikiainiá-wai. Wáantu ásar, Pásukan ishámtsuk katsekainiáwai.
- 11 Antsu Pásuk ti nankámaku, ti kakáram ainiayat, Úunt iyam katsekainiátsui.
- 12 Ju aéntska, enentáimcha yajasma aínsarank ainiáwai. Eámkam, jákatin akiniainiáwai. Yakí pujana nuna nékachu ásar, aántrar katsékkar, yajasma anin jakártatui.

2 Ka.2,13.

- 13 Ju aents^u yajáuch' ásar, makumu áartatui. Kame nii iniashí wakéramun najánatin warainiáwai. Natsánmai, tunártin ásar, anankrámearme. Irunramúnam kuchákasa yurumáwar, yurumkan amuiniáwai.
- 14 Nuan íisar, yajáuch' enentaimainiáwai. Pimpítsuk tunámkar, kakármachun tunamtikiainiáwai. Yumínkramu ásar, yajáuch' anentáin takakainiáwai.
- 15 Naka jintian iniáisar, Paraank Pusuran uchirí yajáuchijai kuítian achikmia nuna jintín achikiármiai.
- 16 Paraank yajáuch' asamtai, ya chicharkamia nu nékarme. Kame wáuru asamtai, nii kawáiri aéntsua áintsank chicharkámiayi.
- 17 Yajáuch' aéntska yumírmatai kuniuá, yuránkim nase jukímiua aintsarank tee ajásu ainiáwai.
- 18 Áantar chichamjai ti kakáram chicháasar, tunamtikiainiáwai. Kame yama pénker ajasarun, ataksha yajáuch' awajainiáwai.
- 19 Nii yajáuchirin nupéttuk, ankant ainiachiat: - Ankant awajsatájrume - tuiniáwai.
- 20 Ii Uuntri Uwemtíkkartin Jesúsnum nekás nii iniashín wakerámurin nupétkar, ankant ajasarmia nuka, nuna antúkar, ataksha nii yajáuchirin nupéttuk, ankantcha ajáasar, nu arant ajainiáwai.
- 21 Arutman chichámejaink pénker jintian achíkiar, ataksha ajapainiána au, nekacharuitkiúnka mak aráyi.
- 22 Kame aya yawá imiak, ataksha yuáwai. Kúuksha imiainiuitiat, ataksha tsakúsnum majkímiawai.

AKANKAMU 3.

Utsumka Jesusan tátintri arúawai.

- 1 Aneamutíram, nekás chicham kajinmatkírum tusan, ataksha aatramájrume.

- 2 Yaúnychu wáimiaku, nuyá Akatrámusha chichaman tíarmia nu, ii Úuntri Ewemtikkiártinian chichame asamtai, kajinmatkírap.
- 3 Éemka nekatárum: Iniash' wakéramun najanainiána au, amúamu tsawantnum wishíkrar, chicháiniak:
- 4 - "Tátatjai" tana nu, urukaya ? li úuntri nuí imiararu jakarmatáisha, yaúnychua aínsarik ju nunkánam pujaji - tiártatui.
- 5 Túrasha, yama nankamtáikia Arutman chichamen kakarmaríjaink, nayáimp' nunkasha entsánmaya j̄inkimia nu nanamsamia, nuna nekatniun nakitiainiáwai.
- 6 Arutman chichamen kakarmaríjaink entsa amarak, nuncan amuámiayi.
- 7 Yamáisha Arutman chichamen kakarmaríjaink, nayáimp' nunkasha pujuiniáwai. Tumaitkuísha amúamu tsawantt̄in ji kéek, yajáuch' áinia aun amukártatui.
- 8 Kame Arútmanam chikíchik tsawant, nupanti uwiya aintsankete. Aínsank nupanti uwí, chikíchik tsawanta aintsankete.
- 9 Tuma asamtai, Arútam tana nuna áantar tatsui. Antsu wáit anénkratin asa, ashí mash' ewemrarat' tusa, nákwai.
- 10 li Úuntrin tsawantri kasa aínsank nekás tátatui. Nu tsawantt̄in nayáimp' ipiám̄ta nunis patítt̄iui. Mash' írunea nusha miniártatui. Nunkasha amukattui.
- 11 Ashí mash' amúkat̄in asamtai, atumsha itiurá pujustiniáit̄rum ? Wáimiaku ajásrum, ti pénker pujustiniáit̄rume.
- 12 Jij̄ai nayáimp' menkámam, mash' ana nu miniámam, Arutman tátinri shíir nákastarum.
- 13 Antsu, Arútam tiniu asamtai, yamáram nayáimp', yamáram nunkasha aya imítmachu takusártatna nu íikia nákwai.
- 14 Anéamu yatsutíram, Arútam pénker waitmakmij' tusárum, tunártincha, penke makuchma ajásrum, nákastarum.
- 15 - Nekás ii ewémratin ii Úuntri wárichik táatsui - Papru, ii yachi ti nekau aármia aínsarmek titiárum.

2 Ka.3,16.

- 16 Nuka nii papiriín tuke tawai. Nii aármari itiúrchat asamtai, nánkamsar pujústin, iimiarcharu nékachu aínsarank emesainiáwai. Nusha mash' Ujájmatain emesainiáwai.
- 17 Tuma asamtai, ti aneamutíram, ujakma asárum, aents^u yajáuch' anankátaj-sar wakerutmainiakuísha, awajimtik-ramráij' tusárum, aneárum wekasatárum.
- 18 li Úuntri Ewemtíkkiartin Utsumka Jesús tuke nekaki wéakrum, nii pénkeri achiktárum. Yamáisha, tuke túkesha naatmamtíkiamu atí. Nuke atí.



JUTAS AÁRMA.

Carta de Judas



AKANKAMU 1

- 1 Jutas, Santiákun yachi, Utsumka Jesusan takárniuri asa, íimiaru ajastin untsukman, Arútam Apa anéamun, Utsumka Jesúsnum pujúinia nuna aáteawai.
- 2 Pénker anénaisrum, tarímtanam pujúsrum, Arutman wait anenkrátmari tuke atumjai pujustí.
- 3 Aneamutíram, íikia mai métek ewémratin asar', aátratniun ti wakerúkmiajai. Wáimiaku asárum, Arútam atumí íimiármarin tuke amasú asákrumin, ikiakártaj-san aátjarme.
- 4 Kame aents^u makumu, tunartin, nánkamsar pujustin: - Waimiakúítjai - tuínia, ii Úuntri Utsumka Jesusan nakitiáinia nu atumiín pujuiniáwai.
- 5 Nekármena nuna enentaimtíkjiarme: Arútmaka Ejiptúnmayá Israéran jíkí, íimiarcha áarmia nuna makuártaj-sa, ataksha támiayi.
- 6 Núnisank Pásuk Arutman nakítrar, ikiukiármia nuna, Arútmaka makúntratin tsawant jeámam, kaya wáanam utsáa, tuke téenam epénmiayi.
- 7 Núnisank aákratkar, nii iniashí wakéramun najanainiákui, Arútmaka Sútuman, Kumuran, irútkamu yantámach' pujuármia nunasha makúar, jinium tuke epeámun nakumkámuri aarat' tusa, ekemakármiai.
- 8 Yamáisha yajáuch' aents^u wáurua aínsarank pujúsar, nii iniashín emésrar, Nayáimpiniam Úunt áinia nunash wishikiainiáwai.
- 9 Pásuk Miker Muisesan iniashín jukítiaj-sa, emeskan nupétak, wishíksuk: - Arútam iirmastí - tímiayi.
- 10 Antsu nu ti yajáuch' aents^u, nékachu ásar, iniáshtichu áinia nuna wishíkrar, iniáshtin áinia nujai yajásma aínsarank tunamainiáwai.
- 11 Wáit anéntmai ajainiáwai. Kame Kaínkian nakúmkar, kuítrintin ajástaj-sar Paraánkan patátukar, Kuréa aínsarank úuntan kajerainiáwai.

- 12 Átum irunra yurúmrumna nuna emesainiáwai. Kame ajamkártutsuk níinki kuchaká yuiniáwai. Yuránkim nase jukim penke yútatsna anin ainiáwai. Numi uwitin néreatsna, iwiáku wajayat kankapenka kaurarua áinin ainiáwai.
- 13 Nii yajáuchiri entsan saúria anin ainiáwai. Paniará aínsarank kirítniunam tuke pujustin jeainiáwai.
- 14 Ii weátri, Atanknumiá tsenken jeámia nu, Eruk náartin, chicháak: - Arútam untsurí Pasukjaj ashí mash' makúrtaj-sa winiáwai.
- 15 Pénkeran wishikrármia nuna makuártatui. Tunartin, Arutman numasri tuke Arutman katsekkarmia nunasha makuártatui - tímiayi.
- 16 Nu yajáuch' aents^u nupétkamu ásar, aya nii iniashí wakéramun eákar warainiátsui. Aentssha nii wakéramun najanawarat' túsar, ti kakáram chicharainiáwai.
- 17 Antsu átum aneamutíram, Utsumka Jesusan Akatrámuri ujamakmiármena nu kajinmatkírap.
- 18 Kame níinkia chicharáiniak: - Aents^u yajáuch' mash' wishikiáinia, Arúتمانam enentáimtsuk, aya nii iniashí wakéramun najanainiána nu, amúamu tsawántnum táartatui - tíarmiayi.
- 19 Nuka yamáí Jesús-Irúnramun akánainiak, Iwiáikratniun takútsuk, aya ju nunkánmayan enentaimainiáwai.
- 20 Antsu átum ti anéamu yatsutíram, Iwiáikratin anentruárum, iimiármanum atumí iwiákmari ikiakartárum.
- 21 Arúتمانam anenaiyákrumin, ii Úuntri Utsumka Jesús wáit anénkratin asa, tuke iwiáku pujustin juramkíttiarne.
- 22 - Nekasáshit ? - túinia nu enentaimtikratárum.
- 23 Turakrumka, Tunkuruánam wena nu uwentikráttarne. Antsu chíkichkia ti yajáuch' asármatai, anearum, utsúrmakaj' tusárum, ikiuktiárum.
- 24 Arútam chikichkiti. Níinki tunártincha awajtámsarum, nii naatkamuriín waramtikramsáttarne..

Jut.1.25.

25 li Úuntri Utsumka Jesusnúmani ewentikramra asar', ti náatu, ti nankámaku, ashí tujintcha asa, yaúnchua aínsank, yamáisha, tuke túkesha naatmamtíkiamu atí. Nuke atí.



JUANK ÉEMKA AÁRMA.

1ª Carta de Juan



AKANKAMU 1.

Eémkari.

- 1 Yama nankámtaik pujumia nuka, iwiakmámtikin Chichamtiniáiti. Nu ii anturkáitji. li jji wainkiáitji. li ewejejai antinkiuítji.
- 2 Iwiakmámtikin iniakmamsámiayi. Tuke iwiákman amajnia nu wainkiáitji. Iwiákma Ápanam tuke pujumia nu iniakmamsa asamtai, chichasar' étsereaji.
- 3 Íikia Arútam Apajai, nii Uchirí Utsumka Jesusjáisha írunea asar', atumsha íijai irúnratin, wainkiájnia nu, tura anturkamiájnia nusha, étserji.
- 4 Ti shíir warástaj-sar', ju aáji.

Tsáapninium wekásatin.

- 5 Arútam tsaapniuíti. Niinín kiritin penke atsáwai. Nuna Arútmaka túramin asakrin, íisha atumín étsereaji.
- 6 Kirítiniunam weyatar': - Niinín pujaji - takurkia, waitriniáitji. Kame nekás chicham takáksuji.
- 7 Antsu níiya aínsarik tsáapniunam weákrikia, númtak irúneakrin, Jesús Arutman Uchirí nii numpejai ashí ii tunarin japíawai.
- 8 - Tunartincháitjai - takurkia, anánkmamar', nekás chicham takáksuji.
- 9 Antsu ii tunari etsereákrikia, Jesuska imítmachu asa, timia nuna amik, ii tunarin tsankurtamrar', ii yajáuchirin asakáawai.
- 10 - Tunartincháitjai - takurkia: - Jesús waitriniáiti - taji. Kame :
- Ashí tunartiniáitrume - tiniu asamtai, nii chichame iinín pujátsui.

AKANKAMU 2.

Anenaiyartiniáitji.

- 1 Winia uchichirtíram, tunamkáirum tusan, juna aatrámjarme. Antsu tunameakrumninkia, Imítmachu Utsumka Jesús nii Apariín pujá asa, ayamrutmáktatji.
- 2 Kame níinki ii tunarin, tura ashí aéntsun tunáriniaash japírtasa, líkmak ajasuíti.
- 3 Nekatárum. Nii awemámurin umirainiána au, nekás niin nekainiáwai.
- 4 Kame, yákesh: - Wi niin nékajai - tayat, nii awemámurin umiátsna nuka, waitriniáiti. Nekás chichaman tákaksui.
- 5 Antsu nii chichamen umía nuka, nekás Arutman anéas, niinín pujana nuna nekámawai.
- 6 Kame yákesh: - Niinín pujájai - takunka, nii itiúra pujúsmia aínsank pujustiniáiti.
- 7 Anéamu uchitíram, yamáram awemamun aattsújrume. Antsu yaúnchu awemamu yama nankámtaik átum takumiármena nuna aátjarme. Kame Chichamtin yaúnchu antukmiármena nuna awemamurinti.
- 8 Tumaitkuísha, nu awemamu yamarmáiti. Kame Jesúsnum pujumia aínsank atumiín yamá pujá asa, kiritniun amuk, nekás tsáapin awájeawai.
- 9 - Tsáapniunam pujajai - takusha, nii yachín kajera nuka, kirítniunam pujáwai.
- 10 Nii yachín anéa nuka tsáapniunam pujús, páant wáinma asa, penke tukumtsui.
- 11 Antsu nii yachín kajerea nuka, kirítniunam pujús, kusurúa aínsank, tuí wea nuna nekámatsui.
- 12 Uchitíram, atumí tunari tsankurnaru asamtai, juna aátjarme.
- 13 Uunttíram, yama nankámtaik tuke pujumia Nu neka asákrumin, aátjarme. Natsatíram, átum emésak nupétka asákrumin, juna aátjarme.

1Jn.2,14.

- 14 Uchitíram, Arútam Apa neka asákrumin; uunttíram yama nankámtaik pujumia nu neka asákrumin; natsatíram, kakáram asárum, Chichamtin atumiín pujakui emésak nupetka asákrumin júnak aátjarme.
- 15 Ju nunkánam ana nu aneasáirap. Ju nunkánmayan anéa nuka, nii Aparí Arutman anéatsui.
- 16 Kame, ii iniashí wakéramu, inchímrusma, kuítrintin nankámakma ii Aparí Arutmánmaya wininiátsui. Antsu ju nunkánmaya wininiáwai.
- 17 Ju nunka, mash' nii wakeramurijai amúawai. Antsu Arútam wakéramun najanainiána au, tuke juakártatui.

Áantar-utsumka.

- 18 Uchichirtíram, amúkatin-tsawántnum áantar-utsumka tátatui, tama antukurme. Antsu untsurí áantar-utsumka ta asármatai, amúkatin-tsawántnum pujajnia nu nékaji.
- 19 Nu aents^u íijai pujúsariat, yamáikia íijai pujútsuk, áantar-utsumka ajasármiai. Tuma asamtaí, yamáí páant nékaji: ashí mash' íijai pujuiniána au, nekás Jesús-shuar ainiátsui,.
- 20 Antsu atumsha, lwiáikratin achikiú asárum, páant nékarme.
- 21 Atum nekás-Chicham pénker neka asákrumin, wáit-chicham atumia penke j*j*inkichmin asamtaí, aátjarme.
- 22 Jesús: - Utsumkachuíti - tuínia nu, wáitrin ainiáwak ? Ee, wáitrin ainiáwai. Nuka - Arútam Apa, nii Uchirisha atsawai - tuiniáwai.
- 23 Kame Uchín ajapainiána au, nii Aparíniash ajapainiáwai. Aíntsank Uchín achíniana au, Apanash achiniáwai.
- 24 Yama nankámtaik chicham antukmiármena nu atumiín pujustí. Yama nankámtaik chicham antukmiármena nu atumiín pujakuínia, atumsha Uchíniam, Apanash pujustátrume.

1Jn.2,25.

- 25 Kame nu chicham: - Niinín tuke iwiáku pujustátrume - timiayi.
- 26 Anankmamawáirum tusan, júnaka aátjarme.
- 27 Kame átumka Utsumka Jesusan kakármari achikiú asárum, chikichnúmia_a unuímartin utsumátsrume. Jesuska nii Iwiaikrátniurin suramsa asákrumin, nu Iwiaikrátniuka ashí mash' unuitiámrum. Níinki wáitrutsuk chicháa asamtai, nii chichame tuke takustárum.
- 28 Yamáikia uchichirtíram, niinín pujustárum. Kame níinkia nankámaku ajás, makuártaj-sa tarutrámiakrin, penke natsámtsuk ti warástatji.
- 29 Nii imitmachuítí. Nu neka asárum: - Ashí mash' imítmachu Arútmanam akiniáiti - titiárum.

AKANKAMU 3.

Arutman uchirintji.

- 1 li Aparí Arútam ti anéntmajnia nu nekatárum. Kame aya Arutman uchiri tamáitji. Antsu nekás Arutman uchirintji. Tuma asakrin, nunkánmaya_a aents^u Arutman nekainiáchu ásar, íiniash nekarmainiátsji.
- 2 Aneamutíram, Arutman uchirintiátar', najanartátjinia nu jeátsji. Tumaitkuísha, nii ti Nankámaku támatai, níiya aínsarik ajasar', páant wainkiáttajnia nu nékaji.
- 3 Nu nákakrikia, wáimiaku niya aínsarik ajástaj-sar', wakérají.
- 4 Tunamainiána au, umichu ainiáwai. Kame tunaka umikchamuítí.
- 5 Jesuska penke tunártincha asa, ii tunarin japírtaj-sa támiayi.
- 6 Niinín pujuiniána au penke tunamainiátsui. Tunamainiána au, niin wáintsuk nekainiátsui.
- 7 Winia uchichirtíram, anankmamawáirap. Aya pénger najanainiána au, niya aínsarank imítmachu ainiáwai.

- 8 Antsu, tunamainiána au, eméskanu ainiáwai. Kame emésak yama nankámtaik tunamkámiayi. Tuma asamtai, emeskan turámurin amúktaj-sa, Arutman Uchirí támiayi.
- 9 Arútmanam akinia nuka tunámeatsui. Kame niinín Arutman chichame pujáwai. Nuka Arútmanam akinia asa, penke tunamkachminiáiti.
- 10 Pénker najanainiátsna au, tura nii yachín anéatsna nusha, Arútmanu ainiátsui. Antsu eméskanu ainiáwai. Nu íisar', ya Arutman uchirí áinia, nu páant nékaji.
- 11 Shíir mai anenái ajatniúítji. Kame yama nankámtaik nu chicham antukuítrome.
- 12 Kaínk eméskanu asa, nii yachín máamia aínsarik ajaschatái. Urukamtai máamia ? Yajáuch' asa, nii yachí pénker asamtai, máamiayi.
- 13 Tuma asamtai, yatsutíram, yamáisha pénker áinia au kajérkamu ainiáwai.
- 14 Ii yachí anéajnia nuka, jakamúnmayá iwiákmanum enkémeaji, nu iniákmaji.
- 15 Kame anenkráteatsna nuka, jakámunam pujawai. Nii yachín kajera nuka, mankartiniáiti. Nuka tuke iwiáku pujuscháttana nu nékaji.
- 16 Utsumka Jesús ti anentma asar', nii iwiákmarin amásmiaji. Tuma asamtai, íisha ii iwiákmari ii yachín susatniúítji.
- 17 Ju nunkánam warirtin áinia au, nii yachí utsumámunam pujakui yáiniatsna nu, Arútam aneamukáit ?
- 18 Uchichirtíram, aya chichámjaink anenaishtiniáitji. Antsu ii najanamurijai nekás anetniúítji.
- 19 Nujai, Arútam íimiai pénker anentái takusar', nekás waitrichuítji.
- 20 Kame ii anentái makurmakrinkia, - Arútam nankámaku asamtai, ashí mash' nékawai - titiniáitji.
- 21 Aneamutíram, ii anentái makurmachkurnínkia: - Arútam anéntmaji - titiniáitji.

1Jn.3,22.

- 22 Nii awemámuri umirkar', nii wakéramu najana asakrin, ashí mash' seájnia nuna amástatji.
- 23 Nii awemamu tuit ? Nii Uchirí Utsumka Jesúsnum ímiaru ajarar', tura nii tíniua aínsarik mai anénai ajátniua nuíti.
- 24 Nii awemamun umiarainiána au Arútmanam pujuiniákui, Arútmaka niínin pujáwai. linín nekás pujáwai. Kame lwiáikratniun suramsámiajnia núnini nékaji.

AKANKAMU 4.

li anentái tana nu penkeráshit ?

- 1 Wi aneamutíram, aneartárum. li anentái tana nu: - Mash' penkeráiti - tichatniuítrume. Kame ti núkap áantar-wáimiaku ju nunkánam wekaa asármatai, mash' íwianch' Arutmánmaya wininiátsui.
- 2 Íwianch' Arutmánmaya tana nu nekátaj-sa wakéarmek ? Ashí mash' íwianch': - Jesús Utsumkáiti aents^u ajasú - tuiniána au Arutmánmaya wininiáwai.
- 3 Antsu, íwianch': - Jesús Arutmachuíti - atumí anentáiín tana nu, áantar-utsumkan iwiánchri asa, Arutmánmaya winiátsui. Kame áantar-utsumka tátinia nu, yamáí ju nunkánam pujáwai.
- 4 Átumka uchichirtíram, Arútmanu asárum, áantar-utsumka nankakáitume. Kame atumiín pujana nu, ashí tujintcha asa, nunkánmaya-utsumkan nankáawai.
- 5 Áantar-utsumka ju nunkánmaya ásar, nunkánmaya chichaman chichainiákui, nunkánmaya aents^u anturainiáwai.
- 6 Antsu íikia Arutmanuítji. Tuma asakrin, Arutman nekainiána nu anturtamainiáji. Antsu Arutman nekainiátsna nuka anturtamainiátsji. Núnini pénker-íwianch' nekás-chichaman tana nu, tura yajáuch'-íwianch' wáit-chichaman tana nusha, nékaji.

Arútam nii anenkrattáirin amáaji.

- 7 Wi aneamurtíram, mai anenai ajatái. Kame íí anénkrattairi Arutmánmaya_u winiáwai. Ashí anénkrata nuka Arútmanam akinia asamtai, Arútman nékawai.
- 8 Anenkratainiátsna au, Arutman nekainiátsui. Kame Arútmaka anenkratniúfti.
- 9 Arútmaka ti anentma asar', níinini iwiáku pujusarat' tusa, nii Uchirín ju nunkánam akuptúrmakji.
- 10 Arútmaka íikia aneátsrinink, éemka anéntmajji. Kame ii tunarin japirat' tusa, nii Uchirín akupturmakar', líkmak awajsámiayi.
- 11 Aneamutíram, Arútam juní ti anentma asakrin, íisha mai anenai ajastiniátji.
- 12 Yákesh Arútmanka wainkiachuíti.. Antsu mai anenai ajákríkia, Arútam iinín pujús, ti pénker awájtamji.
- 13 Arútam iinín pujana nu, íisha niinín pujajnia nusha, ititurá nékaj' ? Nii lwiakraániurín suramsa asakrin, nékaji.
- 14 Arútam Ap_a aéntsun ewemtikrátaj-sa, nii Uchirín ju nunkánam akupkamia nu wáinkia asar', nekasáiti taji.
- 15 Tuma asamtai: - Jesús nekás Arutman Uchirinti - tana nu, Arútam niinín pujakui, níisha Arútmanam pujáwai.
- 16 Íisha Arútam anéntmajnia nu neka asar', niinín iimiarúftji. Arútam Anénkratin asamtai, anénkratin áinia au Arútmanam pujuiniáwai. Arútmasha niinín pujáwai.
- 17 Ti anénkratin ajasar', makurtin tsawant ishámatsji. Kame ju nunkánam níiya aínsarik ajasji.
- 18 Nekás anenaiyámunam sápij atsawai. Kame anenáiyamu sapijian ajápeawai. Aya makuámunam sápij awai. Tuma asamtai, ya sapijmia nuka, nekás anenáiyamun tákaksui.
- 19 Nuíkia, nii éemka anentma asakrin, íisha anenaitái.
- 20 Yákesh: - Arutman anéajai - tayat, nii yachín kajérakka, waitriniáiti. Kame yatsum wainiyátam aneachkumka, Arútam wáincha asam aneaschamniáitme.

1Jn.4,21.

21 - Arutman anéa nuka, nii yachíniash anetí - Arútam tu awetúrmaji.

AKANKAMU 5.

li iimiármari Arutmánmaja winiáwai.

- 1 Íimiaru ajás: - Jesús Utsumkáiti - tana nu, Arútmanam akiniáiti. Iwiákman amáajnia nu aneákrikia, niinín akiniawármia nusha anéaji.
- 2 Kame Arútam aneakur', nii awemamu umiriákrikia, Arutman uchiríniash anéajnia nu nékaji.
- 3 Arútam awemamun umía nuka, nekás Arutman anéawai. Kame nii awemámuri itiurchatcháiti.
- 4 Ashí mash' Arútmanam akiniawármia nu, nunkan yajáuchirin nupetainiáwai. Kame íí iimiarmarijají yajáuch' ana nu nupetkáiitji.
- 5 - Jesús Arutman Uchirinti - tuiniána au, ju nunkan yajáuchirin nupetkaruítí.
- 6 Utsumka Jesús entsánmani, tura numpanmanisha winiáwai. Aya entsánmani winiátsui. Antsu entsánmani, numpanmanisha winiáwai. Iwiaikrátniusha, wáitrichu asa, túramji.
- 7 Tuma asantai, menáint^{iu} tuiniáwai:
- 8 Iwiáikratin, entsa, numpasha, nu menáint^{iu} métek tuiniáwai.
- 9 Aents^u tuiniákui: - Nekasáiti - takurkia, Arútam takui imiánkas: - Nekasáiti - titiniáitji. Kame Arútmaka: - Jesús winia Uchiruítí - páant túramji.
- 10 Nuíkia: - Jesús Arutman Uchirinti - tuiniána au, Arútam tana nu: - Nekasáiti - tuiniáwai. Antsu: - Jesús Arutman Uchirínchuítí - tuiniána au: - Arútam wáitrawai - tuiniáwai.
- 11 Kame - Arútmaka tuke iwiáku pujústinian suramsámiaji. Nu iwiákma nii Uchiriín pujawai - Arútam túramji.
- 12 Nuíkia, nii Uchirín takakainiána au, iwiákman takakainiáwai. Antsu nii Uchirín takakainiátsna au, iwiákman takakainiátsui.

Áantar-arútam tekemrurárap.

- 13 Átum Arutman Uchiriín íimiaru asárum, tuke iwiáku pujustin takákrumna nu nékak^u tusan, aátjarme.
- 14 Níijai irunrar' pujú asar', mash' nii wakera nu seákrikia, páchitsuk suramsáttaji, taji.
- 15 Ashí mash' seájnia nuna anturtameakrínkia, mash' seájnia nu: - Nekás tákakeaji - titiniáitji.
- 16 Yákesh, nii yachí tunánum pujakuísha, nii tunari jachataitkuínkia, Arútmaka iwiákman susat' tusa, anentruati. Antsu jatai-tunaitkiuínkia: - anentruawárap - tájarme.
- 17 Kame ashí mash' yajáuch' ana nu tunáiti. Tumaitkuísha ashí mash' jatai-tuná ainiátsui.
- 18 Arútmamam akiniámia nuka tunámeatsui. Kame Arutmán-maya tamia Nu niinín pujá asa ayámrakui, emésak enkemachminiáiti. Nu nékaji.
- 19 Íikia Arutmanuítji. Antsu ashí mash' nunkánam ana nu emeskanuítí. Nusha nékaji.
- 20 Arutman Uchirí ta asa, nekás wáitrichu yáit nuna unuitiamrámiaji. Íikia Utsumka Jesúsnum, Wáitrichu Arutman Uchiriín pujá asar', Nekás-Arútam tuke Iwiakmám-tikin tákakeaji. Nusha páant nékaji.
- 21 Uchichirtíram, áantar-arútam jukírap.



JUANKATAKSHA AÁRMA.

2ª Carta de Juan

- 1 Wi Juank, Úuntach' asán, Jesús-Irúnramu, Jesusan tarímtari asamtai, tura nii uchiríniash aátejaj. Wi, tura ashí mash' nekás-chichaman nekawarmia nujai, ti aneájrume.
- 2 Nekás-chicham íniyu asamtai, tuke iinín pujusat' tusan, aátjarme.
- 3 Ii Aparí Arútam, tura nii Uchirí Utsumka Jesús nekás-chichámjaj, anenkratmajáisha nii pénkerin, nii wáit-anenkratmaríniash tarímtanam amastárum.
- 4 Amé uchíram, ii Aparí akupturmákmiáj' aínsarank nekás-chichámnum pujúinian wáinkia asán, ti waráajaj.
- 5 Yamáikia, Jesusan tarimtayá, yamáram awemamu aátsuk, yama nankámtaik takúmiáj' nu umikiái tusan, aátejme. Mai anenái ajátniua nuíti.
- 6 Arutman awemámurin uminiána au, nekás anénkratin ainiáwai. Yama nankámtaik ju awemamu antukú asárum, nu umirkatniuítrume.
- 7 - Jesús, Utsukratniuíti iniáshtin ajasú - tútsuk, ju nunkánam untsurí anánkkartin táarmiayi. Nuka áantar-utsumka nékachu ásar, nekás tunámítkkiartin ainiáwai.
- 8 Átumka, atumí takatri menkakáink, antsu akikma atí tusárum, aneárum takakmastárum.
- 9 Kame Utsumka Jesusan chichamen ántutsuk, chíkich chichaman anta nuka, Arutman tákakeatsui. Antsu Arutman chichamen anta nuka, Apan, nii Uchiríniash tákakeawai.
- 10 Yákesh Arutman chichamen itiátsna nu atumí jeén jeám tai, amíkmatsuk, kiishmaktárum.
- 11 Kame amikma nuka, nii yajáuchirin achíawai.
- 12 Ti núkap aátratniun takurkájrome. Tumaitkuísha aya papínium nuna aártinian nakitiájaj. Antsu warasmínrum tusan, wikia jeán, atumjaj chichastaj-san wakérajaj.
- 13 Amé kaímin uchirí amikmatmainiáwai.

JUANK NUYÁ AÁRMA.

3ª Carta de Juan

- 1 Wi Juank, Úuntach' asán, ti nekás anéamu Kayun aáteajai.
- 2 Ti anéamu yatsurú, pénker jintia achikiú asam, játsuk pujusái, tura takátrum pénker awajtamsái tusan, wakérajai.
- 3 Nekás-chichámnum pujusú asam, ii yachí amiín jeawarmia nu, nekás-chichamjai jintiá asakmin, ti waráajai.
- 4 Kame winia uchir nekás-chichámnum pujuiniákui, wi ti waráajai.
- 5 Yatsurú, ii yachí pénker wáiniu asam, yajaya tainiakuish pénker wáinmena nu penkeráiti.
- 6 Jesús-Irunramúnam: - Yáintmakji - tiniu asármatai, pénker wearat' tusam, Arútam wakera aínsamek, mash' nii utsumámuri susaru asam, ti pénker najanáitme.
- 7 Kame, Jesusna weká asármatai, Jesús-shuárchaka penke yainkchármiayi.
- 8 Nekás-chichamjai takakmástaj-sar' wakerákrikia, nu aents^u pénker iistiniáitji.
- 9 Jesús-Irúnramun aatrataj takunsha, Tiútrejes aya níinki akupkátaj-sa wakera asa, winia antúrtatsui.
- 10 Yajáuch' takakma asamtai, winiáknaka jíáktatjai. Kame iin aujmatrámeaji. Nu aránt ii yachí iraran ikiántsuk, ikiainiána aun Jesús-Irunramúnmayá jíiawai.
- 11 Ti anéamu yatsurú, yajáuch' nakúmmsuk, aya pénker nakumkatá. Kame pénker nájanea nu Arutmanuítí. Antsu yajáuch' najanea nu Arutman wainkiachuítí.
- 12 Temetriu nekás pénker asamtai, ashí mash' pénker aujmatainiáwai. Ílisha núnisrik: - Penkeráiti - tákurin, nu nekasáiti nékame.
- 13 Wi ti núkap tífinian wakérajme. Túrasha ju papínium mash' aatrashtátjame.

3Jn.14.

- 14 Wárichik íistinian wakera asán, núí jeámtai, páant chichasmij'.
- 15 Tarímtanam pujustá. Amé yatsum amikmatmainiáwai. Ii yachí ankant ankant amikmatruawartá.



IWIÁINIAKMA.

Apocalípsis



AKANKAMU 1.

Juárma.

- 1 Juka Utsumka Jesús iwiainiakmáiti. Arútmaka, wárichik túrunatta nuna nii aéntsrin ujakat` tusa, Juánkan tsankatkámiayi. Nii Pasukri mesékranma aínsank ujakat` tusa, akuptúkmiayi.
- 2 Juánksha wainkiámia nuna étserak: - Juka Arutman chichamente, Utsumka Jesusan etsermarinti - tawai.
- 3 Aents^u matsátmanum ju chichaman etserainiána au warasartí. Aínsank antúkar, amirainiána aúsha warasartí. Kame nu amínkiatin ishíchik taásai.

I - ASIÁNMAYA JESÚS-IRÚNRAMU AÁTRAMU.

Wantínkiamu.

- 4 Wi, Juank, Asiánmaya tsenken Jesús-Irúnramu-iniakmamu-tíram aátjarme. Arútam, yamá*i*, yaúnchusha, tuke túkesha pujúttana nu, tura tsenken Pásuk nii chimpiriín naka pujuiniána nusha, nuyá Utsumka Jesussha, nii pénkerin amásrum, tarímtanam iwíaitmaktárum.
- 5 Utsumka Jesús, Etserin Wáitrichu, jakamúnmaya niá niá akíniamiánia nu, ashí úuntan Úuntri ti anéntmajnia nu,
- 6 íikmak ajás, nii numpéjaink ii tunarin japirtamrar`, nii Apariniu wea-irúnramu awajtamsámiajnia nu, tuke túkesha nankámaku asa, naatmamtíkiamu atí.
- 7 listárum, yuránkminiam pachíniak winiáwai. Ashí mash` wainkiármatai, kajérkar maawarmia nusha wainkiártatui. Núnisarank mash` nunkánam nii jakámurin uutiártatui. Ee, nekás turunáttawai

- 8 Úunt Jesús Arútam asa, chicháak: - Wiyáitjai tuke Pujú, penke Amukáchmínian. Wiyáitjai Arútam, yamáí, yaúnchu, túke túkesha pujúttajna núnaka. Ashí Tujíntcha Arumáitjai - tawai.
- 9 Wi, atumí yachi Juank, atumjai métek Arútam-Irunramúnam pachínkian, itiurchatnumsha Jesusan patátajna nu, Arutman chichamen étserkun, Jesúsasha naatmámtikkiun, Pátmus nunkánam pujúmiajai.
- 10 Nuí Ayámtai tsawánttin Iwiáikratin enkemturamtai, tuntúpruini chícham káchua tímianu chichártak :
- 11 - Wáiniamna nu papínium aáram, tsenken Jesús-Irúnramu-Iniákmamu: Épisiu, Ismirna, Pírkamu, Tiatira, Sartes, Jiraterjia, Rautiséasha akupturkartá - turútmiayi.
- 12 Túrutkui: - Yaki túruta ? - tusan, apajasan íikmán, tsenken shirípi kuríniam apujsámunam
- 13 ajapén Arútam-aénts-ajasú, pushí nuntuárun entsaru, kurin eménmama waján wainkiámjai.
- 14 Nii intiashisha puju uruchia tímianu, nii jjísha keá tímianuyi.
- 15 Nawesha jiru nimpíainia tímianu, nii chichámesha tuna úu ajana ímianuyi.
- 16 Untsur ewéjnum tsenken yaan tákaku, weneyá kuchí mai métek atsákkamu achíaku, yapisha etsa kakántar etsánteá tímianuyi.
- 17 Nuna wáinkian, mayain ashínkian, nii wajámunam iniántmajai. Turunamtai, untsur ewejejai antíntiak, chichártak: - Ishamrukáip: Wítjai tuke pujú, penke Amukáchmínian.
- 18 Wítjai Iwiakmámtikniun. Jakayatan tuke túkesha iwiáku pujuwitjai. Aéntsun iwiákmarin susan, atantkimniáitjai. Kame jatain nerentniurintjai.
- 19 Yamái, tura ukúnmasha túrunatin wainkiámna nu aartá.
- 20 Tsenken yaa wainkiámna nuka, tsénken Jesús-Irúnramu-Iniákmamun Pasukri ainiáwai. Aíntsank tsenken shirípi kuríniam apújsamu wainkiámna nusha, tsenken Jesús-Irúnramu-Iniákmamu ainiáwai - turútmai.

AKANKAMU 2.

Épisiu aátram.

- 1 Tura chichártuk: - Épisiun Pasukri aartá: "Untsurnúmani tsenken yaan tákaku, tsenken shirípik kuríniám apujásamunam wekana nu túramui:
- 2 Amé takátrumín, ame ti wáitiamna, katsúnteamna nunasha nékajai. Yajáuch` ainiána au nakítiamé. Akatramuíjtai túsar, takakmáarmia nusha nekápsam, anánkkartin asármatai, nekamiáme.
- 3 Tuke katsúntram, winia ayámrutkum waitsamiáme.
- 4 Tumaitkuísha, yama nankámtaik anentamiámna aínsamek anéntatsme.
- 5 Nuíka tunárum wáinkiam, nekás enentáimram, yaúnchu pujúyamna aínsamek ajastá. Nu antachkuminkia, shirípkín atuní apujásáttajai.
- 6 Antsu Nikiurás-shuar najanáinia wiya aínsamek nakitiákmin, penkeráiti.
- 7 Ya antuktaj ta, nu antuktí. Iwiáikratin Jesús-Irúnramun chicharániak: "Yajáuchin nupetea núnak Arútmanam iwiákma pujana nuna susáttajai" tawai.

Ismírna aátram.

- 8 - Jusha Ismírnan Pasukrin aatratá: "Tuke pujú, penke amúkachmin jakamúnmayá aneántmiania nu júnak túramui:
- 9 Wáitiamna nunasha nékajai. Warirtichuítme. Antsu nekás íismaka ti warirtináitme. Aínsanak, jutíusáitjai túsar, tsanumrútmiania nunasha nékajai. Kame nekás íismaka nekás jutíu ainiátsui, antsu emésak ainiáwai.
- 10 Waitsáttamna nusha ishankáip. Kame emésak atumín nekapsáttájrume tusa, wáitiai-jeánam enketmáttarme. Nuka nawe tsawant nekaprámssáttarme. Jatai jeámam

lw.2,11.

katsunteakrumínia, tuke iwiáku pujusmíntrum tusan, iwiákman amastátjarne.

- 11 Ya antuktaj ta, nu antuktí. Iwiáikratin Jesús-Irúnramun chicharáiniak: "Yajáuchin nupetka nuka, ataksha jákatniun ishankashtiniáiti" tawai.

Pírkamu aátram.

- 12 - Jusha Pírkamun Pasukrin aatratá. Kuchí mai atsákkamu wenúnmayá jjiána Nu júnaka túramui:
- 13 Tuí pujamna nuna nékajai. Emésak chimpínium eketea nú pujame. Tumaitiátam, eméskan nunkeén Antipas winia ayamrúteak jakámtaisha, íimiarúftme.
- 14 Tumasha ishíchik kajérajme. Kame Paráank isaéran anánkawar, áantar-íikmakan ayúrawar, tsanírmaw awaj-sarat' tusa, Parakan jintintiámia nuna chichamen yamá yajáuch' aents^u etserainiakúisha kajéreatsme.
- 15 Aínsamek amiín Nikiurásan chichamen jintínia nusha katsúnteame.
- 16 Tuma asamtai enentaimratá. Turachkuminkia, wárichik tana, kuchí weneruíyá jjiánia nujai nuna mash` amúktatjai.
- 17 Ya antuktaj ta, nu antuktí. Iwiáikratin Jesús-Irúnramun chicharáiniak: "Awákmakun Nayáimpinmayá yurumkan susáttajai. Aínsanak aya achána nuna nekat' tusan, kaya pújunam yamáram náari aárman susáttajai" tawai.

Tiatíra aátram.

- 18 - Aínsamek Tiatíran Pasukrin aatratá: Arutman Uchirí jji keá, nawesha jiru nimpíáinia ániua Nu júnaka túramui:
- 19 Amé turámurmin nékajai. Ame anentkráteamna, iimiármena, yainkráteamna, táamtsuk yaúnchu takámasma nankáamna nunash nékajai.

Iw.2,20.

- 20 Túmasha Jesaper takakmaakuísha surítiachu asakmin, kajérajme. Kame nu núaka, waimiakuítjai tusa, winia aéntsrun anánkawar, áantar-íikmakan ayúrawar, tsanir-mamtikiainiáwai.
- 21 Enentaimrat` tusan, núkap tsawantan susamjai. Tumaitkuísha enentáimratniun nakítiak, tuke tsanírmawai.
- 22 Nuíkia yamáikia wáitiai-peáknun utsankan, níijai tsanirmáinia nusha enentaimiainiachkuíntia, itiúrchatan apujsártatjai.
- 23 Wi nii uchirínias ajakran, ashí aéntsun anentáin neka asán, nii takatrin íirsan imiátrusnak akíniaj nunasha, ashí mash` Jesús-Irúnramu nekawártatui.
- 24 Antsu, Tiatíranmayatíram, anturtuktárum: Eméskajai íruntsuk, nii chichámenash anturkacháru ana nuka, penkesha makuchma áartatui.
- 25 Átumka pénker takakeármena nu, wi táamam takustárum.
- 26 Ya nupétmak, tuke winia amirta núnaka, nunkan úuntri awajsáttajai.
- 27 Winia Aparún kakármarin achíkmiaj, núnisank níisha esétar jintíntiáwar, nii yajáuchirin yumpuar, utsánktatui.
- 28 Aínsanak tsawái yáan susáttajai.
- 29 Iwiáikratin Jesús-Irúnramun chichárea nuna ya antúktaj ta, antuktí.

AKANKAMU 3.

Sartes aátramu.

- 1 Ataksha chichártak: - Sártesan Pasukrin aatratá. Tsenken Pásukan, tura tsenken yáanash tákakea Nu júnaka túramui: Túramurmin nékajai. Iwiakuítme, turamainia-kuísha, tinkás jakáitme.
- 2 Shintiáram, jasátuk ajasaru ikiakarartá. Kame Arútmaka: - amé takakmásmarmin imiancháiti - tawai.

- 3 Jintintiámjamna nu kajínmattsuk umírkam, enentaimratá. Aneára pujáchkumínkia, kasa aínsanak aya aneáchma taríttiajme.
- 4 Túmasha Sártesnum tunamkacharu ishíchik pujuiniána nuka, pushí pujun entsárar, winia nemartusártatui.
- 5 Awakmákuka pujun entsártatui. Nii náariniash iwiakma papíniúmiá japírcháttajai. Antsu winia Apar, nii Pasúkrisha íimiainiai naatmamtikkiártatjai.
- 6 Ya antuktaj tana nuka, Iwiáikratin Jesús-Irúnramun chicharea nuna antuktí.

Jiratérjia aátramu.

- 7 Aínsamek jusha Jiratérjian Pasukrin aatratá. Imítmachu, Wáitrichu, Tawítian asáktairin tákaku, uráimtainkia yákesh epencháttawai. Epenmiatáinkia yákesh uráishtatui tana Nu, júnaka túramui:
- 8 Urukuítiam, nékajme. Wáitin uratmiájmena nuna, peejchachítiuminsha, yákesh epentrámchattui. Kame winia chichámur umírtukam, penke nakitrurcháitme.
- 9 Jutiuwáitji tuiniáksha, emeskan ayamtairiin pujúinia asa, jutíu ainiátsui. Antsu aya anánkkartin ainiáwai. Amin anéajmena nuna nekáwar, tekemrutmararat` tusan, ikiankártatjai.
- 10 Táamtsuk winia chichámur umírtuku asakmin, aéntsun nekápsatin ashí nunkánam itiúrchat átatna nú ayamruktátjame.
- 11 Wi wárichik tatin asamtai, chíkich amé pénkermin atantramkiaráink túsam, itiurchatnumsha amiktá.
- 12 Arutman jeén makuíya aínsank wi apújsamtai, awákmaku tuke nú pujústatui. Niinín Arutman náarin, yamáram Jerusarénk Arútam najánamu nayáimpinmaya winiana nuna náarin, tura winia yamaram náarnasha aatráttajai.

13 Ya antuktaj ta, nuka lwiáikratin Jesús-Irúnramun tana nuna antuktí.

Rautiséa aátram.

14 Aíntsamek jusha Rautiséan pasukrin aatratá. "Nuke atí" tana Nu, nekás Wáitrichu, yama nankámtaik mash` atsamúnmayá ltiáu, júnaka túramui:

15 Urúkuítiam nékajme: Míchash míchachuítme; tsuérash tsuercháitme. Míchakesh, túrutskesh tsueraitkiúmka, mak aintme.

16 Antsu ámeke míchachu, tsuérra asakmin, iyaktátjame.

17 Ámeke kuitrintniúitjai; mash` tákakeajai; penké utsúmatsjai takumsha, nekás waráatsme; utsumame; kusuruítme; misumarúitme; wáit anentmáintme.

18 Wi tájamna ju antuktá: Kuítrintin ajásminiam winia kurír sumaktá. Misúmaram natsaráij túsam, winíyá pushí puju sumarmaktá. Aíntsamek pénker wainmákmíniam, jínia tsuákri seattíá.

19 Wi aneámunka chichárkan, pénker awájeajai. Tuma asamtai, ámeke kakáram ajásam, enentaimratá.

20 Enentáimsatá. Wikia wáitíniam wajasan, untsúajai. Ya antuk uratra nuínkia, nii jeén wayán, níijai yurumkui, níisha wijai yurumáttawai.

21 Wi awákmakan, Aparún chimpírín eketsa asamtai, aínsank awakmakú winia chimpirun eketsáttawai.

22 Ya antuktaj ta, nuka lwiáikratin Jesús-Irúnramun tana nuna antuktí.

II - JESÚS-IRÚNRAMUN TURUNÁTNIURI.

1) Israérnum túramu.

AKANKAMU 4.

Nayáimpinmaya chimpí.

- 1 Nuna t́nia amíkматаi, íimsataj tukamán, nayáimpiniam wáiti urámiunam, chicham éemka káchua tímianun antúkmiajna nu chichártak: - Juí wakatá; wárichik turunátniua nuna iniaktustátjame - turútmiayi.
- 2 Nu chichámaik lwiáikratin nayáimpiniam enkemturamtai, yákesh chimpínium eketun wainkiámjai.
- 3 Chimpínium kaya sáar kínkiaya tímianu ekémai. Chimpín yantámrinkia tuntiak téentuk, kíniar awájmiai.
- 4 Jimiará-nawe-aíntiuk wea pujun entsaráinia, kurín etsénkruinia chimpín téentatkar, kutánknum ekétar ajáarmai.
- 5 Chimpíniúmiá péem', ipiámat, chichámsha jiniáрмаi. Aíntsank chimpín nakariín shiripkia aínsarank tsénken Pásuk keeáрмаi.
- 6 Chimpín nákariín sáar entsa amai. Chimpín eemkaríni, ukurínisha, tura mai yantámensha, aintiuk iwiáku wajáarmai.
- 7 Chikíchik japá-yawá aniúyi; chíkich tanku kachúrtinia aniúyi; chíkich aéntsua aniúyi; tura chíkichkia churúwia aniúyi.
- 8 Nuka, ujuk nanápnun j́ amúamun tákakainia, kashi tsawáisha anéntruiniak: "Uunt ashí tujíntcha, Arútam tuke pujú winiána nu, pénker, tuke ti pénker, nekás ti penkeráiti" tuiniáwai.
- 9 Aíntiuk iwiákuka, tuke túkesha chimpínium eketea nuna naatmámtikkar yuminkiaiiniákui,

Iw.4,10.

- 10 jimiará-nawe-aíntiuk wéasha chimpínium eketea nuna tikíshmatrar, tuke túkesha iwiáku pujana nuna tekémrurar, etsenkrámarin chimpiniúmani nankíawar, chicharáiniak:
- 11 "Arutmá, ii Úuntri ashí tujíntchá, ti pénker tu ajámaintme. Ámeka aya chichámrumjaink atsamúnmayá ashí mash` itiaú asam, naatmamtíkiamu atiniáitme" tuiniáwai.

AKANKAMU 5.

Íikmakan tamari.

- 1 Nuíkia chimpínium eketean untsur-ewejeén papí penuárma mai yantame aárma, tsenken asáktaijái asákamun wainkiámjai.
- 2 Tura, nu chichámaik ti kakáram Pásukan wainkiámjai. Nuka chará charátum chicháak: "Wats, yaki asáktain atia, papín urakminiáit ?" tákui,
- 3 yákesh nayáimpiniam, nunkásha, tunkuruánmasha nu papín urak, aújsamnia penke wáinkiachmai.
- 4 Yákesh urái aújsamnian wainkiachármatai,wi úutu pujumjai.
- 5 Nuíkia wea tárutí, chichártak: "Áantram uutip. Nekatá: Juta-matsatkamúnmayá japa-yawá, Tawítnumia jiiinkín, awákmaku asa, asaktain atia, papín uráittiwai" turútmiayi.
- 6 Aíntiuk iwiáku, tura jimiará-nawe-aíntiuk wea chimpín téentak pujuiniámunam, ajapén líkmak maamuitiat waján wainkiámjai. Tsenken Pásuk , ashí nunkánam akupkamu áinia nu, kachua aínsarank, jiya aínsarank niinín pujuármai.
- 7 Íikmakka chimpínium ekétun weántuk, papí untsur-ewejeén takúsman tap` achirkamai.
- 8 Nuka túramtai, aíntiuk Iwiáku Íikmakan tekemrurarmai. Núnisarank jimiará-nawe-aíntiuk wéasha, kaeran, tura wáimiaku aéntsun anentrin kuríniam tákakainiak, tekemrurármai.

lw.5,9.

- 9 Nuka yamáram anentan anéntruiniak: "Ámeka papí achíkiám, asaktáiri uramáintme. Kame ámeka máamu asam, amé numpémjaink ashí aents^u, ashí nunkánam pujuiniána au, ashí chichaman chichainiána aúsha, sumákam, Arútmanu awajсарuítme.
- 10 Arútmanu Wea-Irúnramu najana asakmin, ashí nunkánam akupkátawai" tu anentriáрмаi.
- 11 Wíkiá ii wajasan, aintiuk lwiáku, ashí mash` wéasha chimpín teentatkármatai, ti untsurí Pásukan wainkiámjai. Nuka penké amúchat chará charátum anéntruiniak:
- 12 "Íikmak máamu asa, nankámaku, mash` nérentin, mash` nékau, ashí tujintcha ajasú asamtai, tuke túkesha naatmamtikkiatniúítji" tu tiniu áarmiayi.
- 13 Nuyanka, ashí najánkamun, nayáimpin, nuncan, nayantsan, jakárunash chichamen antúkmajai. Nuka ashí mash` anéntruiniak: "Chimpínium pujana nu, íikmaksha nankámaku ashí tujintcha asármatai, tuke túkesha naatmamtikiar`, yuminksatniúítji" tíarmai.
- 14 Aínsarank wéaka tekemruiniái, aintiuk lwiákuka: "Nuke atí" tiniu áarmiayi.

AKANKAMU 6.

Tsenken asaktai.

- 1 Íikmakka chikíchik asaktain uráakui, chikíchik lwiáku ipiámta núnisank chará ajakí: "Winitia" táun wainkiámjai.
- 2 Takui, kawái pujun eketka, tishimkiun tákaku ta, awákmaku asa etsenkrúmtikiam, ataksha nupetkátaj-sa wemai.
- 3 Tura íikmak jímiar asaktain uráakui, chíkich lwiáku kakántar: "Winitia" takui,
- 4 chíkich kawái, jíya ániu kapaku, tamai. Númtak aents^u kajérnaikiar, mai mánai ajasarat` túsa, nuí ekemia nuna ésaram kuchín atákas, akupkamai.

- 5 Tura menáint asaktain uráakui, chíkich Iwiáku kakántar: "Winitíá" takui, kawái mukúsnum eketka, nekápmatain tákaku tamai.
- 6 Nuíxia aíntiuk Iwiáku ajapenia chíchamtin chicháak: "Chikíchik nuse aímkiamu, chikíchik kuitiáiti; tura menáint míik aímkiamu, chikíchik kuitiáiti. Túrasha kúntut, nuyá sáwesh amukáip" tímiai.
- 7 Tura aíntiuk asaktain uráakui, chíkich Iwiáku kakántar: "Winitíá" takui,
- 8 kawái samenkma tamai. "Jatai" tama, tura nuna ukuriín "Tunkurúa" tama nuí ekemia. Ashí aéntsun aíntiuk akának, chikíchik akankamun kuchijai, tsukajai, sunkurjai, napíjáiisha amukat` tusa tsankatnakmai.
- 9 Ewej asaktain uráimtai, líkmatain tekenasan íisan, aents^u pénker pujúsar, Arutman chichamen etserainiákui maawarmia nuna wakanín wainkiámjai.
- 10 Nuka ti kakántar chicháiniak: "Wáimiaku, Imítmachu asam, urutáinia ii numpé ukármanum aents^u makútskesha iniaisatniúítiam ?"
- 11 Tuiniákui, ankant ankant pushí pujun súiniak, chicharáiniak: "Atumí yachí atumjai takakmáarmia nu maawarma támam, ishíchik nakamsatárum" tíarmai.
- 12 Wíxia ii wajátaink, líkmakujuk asaktain uráimtai, ti kakántar úurkamai. Étsaka mukusa te ajásmatai, nántuka numpa anin ajásmai.
- 13 Yáasha, achu nase umpuín akákeana aínsank, akakekamai.
- 14 Nayáimpisha napichna penuntramtai, náintsha, nunkásha utsankamai.
- 15 Nu túmaakui, ashí nunkánmaya úunt, kuítrintin kuítrintcha, nérentin takákmausha, ankanttin ankantcha áarmia nu, ishámkar, kaya wáanam uumrataj túsar, ashíniiniak, chicháiniak:

Iw.6,16.

- 16 "Nainttíram, atumsha kayatíram, Úunt chimpínium eketna nu, tura líkmaksha kajertámstsarnink yutukratatárum.
- 17 Kame nii kajektin tsawant jeá asantai, yaki ewemramniáit?" tíarmai.

AKANKAMU 7.

Aents^u usuawarma.

- 1 Nuyanka nunkan nankatkamuriín aintiuk Pasuk wajáinian wainkiámjai. Nase nunkan, nayántsánash, numíniash tukumráink túsar, shitiákar wajáarmai.
- 2 Nuíkiá chíkich Pásuk Iwiáku-Arútam usuámu, nantu tana aíya ta, aintiuk Pásuk nunkan, nayántsánash emesraráink tusa, kakántar chicháruk:
- 3 "Arutman aéntsri nijáinium usuamam, nunka, nayants, numisha emesráirap - tu chicháarmiai.
- 4 Nuíkiá Israéran uchirí, washím-aíntiuk-náwe-aíntiuk-nupanti usuámu áinian nekámjai.
- 5 Jutánmaya aents^u nawe-jímiar-nupanti usuámu ainiáwai. Rupennumiá aents^u, nawe-jímiar-nupanti usuámu ainiáwai. Kaatnumiá aents^u, nawe-jímiar-nupanti usuámu ainiáwai.
- 6 Asernumiá aents^u, nawe-jímiar-nupanti usuámu ainiáwai. Neptarínmaya aents^u, nawe-jímiar-nupanti usuámu ainiáwai. Manasesnumiá, nawe-jímiar-nupanti usuámu áarmai.
- 7 Simiunknumiá aents^u, nawe-jímiar-nupanti usuámu ainiáwai. Rewínmaya aents^u, nawe-jímiar-nupanti usuámu ainiáwai. Isakarnumiá aents^u, nawe-jímiar-nupanti usuámu ainiáwai.
- 8 Sapurunknumiá, nawe-jímiar-nupanti usuámu ainiáwai. Jusénmaya aents^u, nawe-jímiar-nupanti usuámu ainiáwai. Pinjaminknumiá, nawe-jímiar-nupanti usuámu ainiáwai.
- 9 Nuyasha ashí nunkánmaya aents^u, ashí chichaman chichainiána nu, nekápmarish amúkchamnian wainkiámjai.

Iw.7,10.

- Nuka líkmak pujámunam pushí puju entsarma, páikian tákaku chimpín nakariín ti kakántar chicháiniak:
- 10 "Yaki Ewém tikniuit ? Aya chimpínium eketna nu, líkmaksha Ewém tikin áiniáwai" tíarmai.
 - 11 Ashí mash` Pásuk chimpín, wean, iwiákunash tentatkarmia nu, Arútam chimpínium eketna nuna tekémrurar,
 - 12 chicharáiniak: "Arútam ashí nékau, ashí tujintcha, ashí nankámaku tuke túkesha naatmamtikiar`, nampersar`, yumínkiaji. Nuke atí - tíarmai.
 - 13 Nu chichámtaik chíkich wea táruti, chichártak: "Pushí puju entsaráinia nusha, ya áinia ? Tuyá wininia ?"
 - 14 Túrutkui, chicharkun: "Uuntá, ame neka asam, turuttiá".Tu tai: "Juka kajerkamu, máamu líkmakan numpejái nii pushirín nijíawar, ti puju awajsarmai.
 - 15 Tuma ásar, kashi tsawáisha ayámtainiam, Arútam pujámunam takakmainiáwai. Chimpínium eketna nu nii shuar awájsar, tuke ayamrukártatui.
 - 16 Yamáikia penke kitiám tsuk, tsukám tsuk pujuiniákui, étsasha, násesha penke waitkiaschártatui.
 - 17 Kame líkmak chimpín aniámach' pujana nu, nii Pamukri ajás, iwiakmámtikin entsan umararat` tusa, yumirmatáiniam yaruakármatai, Arútmaka waramtikársártatui" nuna wea turútmiai.

AKANKAMU 8.

- 1 líkmakka tsenken asaktain uráimtai, Nayáimpiniam núkap mitia ajasmai.
- 2 Nuíkia tsenken Pásuk Arutman nakariín pujuármia nuna, tsenken kachun suíniákui, wainkiámjai.
- 3 Nuyá chíkich Pásuk, shirípik kuríniam chumpiámun tákaku, íkmatáiniam ta, wajasmai. Chimpín nakariín, íkmatai kuríjái najánamu pujana nuí, ti núkap wáimiakun anentrin achik, shirípkia aínsarank ekemaktin wajásmiai.

lw.8,4.

- 4 Pásuk shirípkín ekemákmatai, wáimiakun anéntri iniákmamu asa, mukuínt^{iu} Arútmanam wakamai.
- 5 Nuyá Pásuk íikmatáiniam kái-kapáan achik, kuríniam chumpiá, nunká utsánkmatai, núí ti núkap ipiámat, cháarip, úusha ámiayi.

Tsenken kachu.

- 6 Tsenken Pásuk, tsenken kachun umpuártái túsar, iwiarnararmai.
- 7 Chikíchik éemka umpuármatai, micha, ji numpajai pachímramu utsankma, nuncan akakekamai. Turunamtai, menáint nuncan tesámuriíya, chikíchik numírtiuk, nupártiuk esamai.
- 8 Nuyá chíkích Pásuk kachun umpuármatai, náint kapáa nayántsanam utsantkamtai, menáint^{iu} nayantsan tesámuriíya, chikíchik numpa ajás,
- 9 namákrintiuk, kanúrtiuk amukmai.
- 10 Aítkiasank chíkích Pásuk kachun umpuármatai, úunt yaa kéeku, menáint entsan tesámuriíya chikíchkiniam iniank, yumírmatáinmash iniánkmai.
- 11 Yáaka yapá náartin, entsan yapamtikmatai, aents^u nuna umárar, kajjinkiármái.
- 12 Chíkích Pásuk kachun umpuármatai, etsa, nantu, yaa, tsawant, káshisha, nii tsáapninrin ti emenkakarmai.
- 13 Nuyá churuwia ti yakí wekás, kakántar chicháak: "Uuttiárum. Kame menáint Pásuk kachun umpuártin taámainia nu umpuiniakuínkia, nunkánmaya aentstírmeka itíurchatnum pujustátrume" táun wainkiámjai.

AKANKAMU 9.

- 1 Nuyá chíkich Pásuk kachún umpuármatai, yaa nayáimpinmaya nunká iniaarúya nuna wainkiámjai. Núnaka tunkuruá uratain susarmai.
- 2 Tunkurúan uráimtai, ti núkap mukuínt^u j̄jinkí, mayáin, étsanash mukusamtikiámai.
- 3 Mukuintiúnmaya titikriáts ijiúkratin titínkia ánin j̄jinkiar, nunká kaunkarmai.
- 4 Nuna chicharáiniak: "Sáak`, nupa, numisha, penke eméstsuk, aya aents^u nijáinium Arútam usuáchma áinia, nuke yajáuch` awajsatárum" túnarmai.
- 5 Nu titikriátska aéntsnaaka máatsuk, ewej nántuchik waitkiásartin áarmai. Nii ijiukratmiarínkia titink ijiúmua tímianu najámritin áarmai.
- 6 Nu tsawántinkia aents^u jakataj tuiniáksha, jakachártatui.
- 7 Nu titíkriats íismaka, kawái mesétnum wena ánin ainiáwai. Kurin etsénkruinia, yapinkia aéntsua anin ainiáwai.
- 8 Nuan intiashiya ániun takakáinia, náinkia yawá-náiya anin takakainiáwai.
- 9 Netsepenka jírua tímiaun takakáinia, nanapé wéerer ajainiamurisha, untsurí nankirtin kawáijai mesétnum tsekenana tímiainiáwai.
- 10 Ewej nantu aéntsun wáitkiastin, ujuké titinkia aniu untsurí jankin takakainiáwai.
- 11 Nuna úuntrinkia, tunkurúan uuntrinti. Jutíu-chámjainkia Apatún, kriakujáinkia Apuriún, (shuár-chamjáinkia Emésak) tamáiti.
- 12 Éemka itiúrchatka nankamasú asamtai, jímiar itiúrchat taásarai.
- 13 Chikich Pásuk umpuármatai, íikmatai kurijai najánamu Arutman nakarín pujana nuyá, chícham jíiniun antúk:majai.
- 14 Nuka Pásukan chicháruk: "Aíntiuk íwianch' Eúpratis entsánam jinkíamu pujúinia nu atíawartá" tímiai.

Iw.9,15.

- 15 Nu aíntiuk íwianch', menáint aentsun tesámuriíya chikíichkin amúktaj-sar, uwí, nantu, tsawántash jeat` túsar, naka pujuármia nuna atíá, akuprarmai.
- 16 Jimiará-washím-amúchat nakírtin kawáin eke|áinian wainkiámjai.
| |
- 17 Nuka netsépnum jiru kéekua aniun apuja áarmai. Kawáin muuksha úunt-yawá múukea aniun tákaku áarmai. Tura nii wenéeya ji, mukuínt^{iu}, yunkúnmisha páchitra j*ji*niárm*ai*.
- 18 Kawái wenéeya ji, mukuínt^{iu}, yunkúnmisha j*ji*niákui, menáint^{iu} aentsun tesámuriíya chikíich kajinkmai.
- 19 Kawáin kakármari wenéeya, ujukeéyasha j*ji*árm*ai*. Kame nii ujuké nápia aínsarank ásar, esakratiárm*ai*.
- 20 Tumaitkuísha, aents^u ewemráru asarsha, áantar-arútman tekemrúrtinian iniaisacharm*ai*. Kame kurijai, numijai, kayajáisha najánamúnmani, penke íimcha, ántachu, wekáachu asarmatáish, eméskan tekemrurárm*ai*yi.
- 21 Aínsarank, mankartutáirin, wawekratáirin, tsanirmatáirin, kasamtáiriniash penke iniaisacharm*ai*.

AKANKAMU 10.

Yaúnchu tama amínkia.

- 1 Nuya chíkich Pásuk ti kakáram, nayáimpinmaya yuránkminiam páchitkia tárun wainkiámjai. Tuntiak nii muukén tentakuyi; yapisha étsaya aniúyi; nii kankajísha jiya aniúyi.
- 2 Papich` urakman takakúyi. Untsúr nawejai nayántsanam tarímia, menarijai nunká tarímiaúyi.
- 3 Nuka úunt-yawaya tímianu kakántar chicháakui, nu chichámaik tsenken ipiámat patíárm*ai*.
- 4 Nuna antukan, aartaj tusan wajái, nayáimpinmaya chichártak: "Tsénken ipiámat túinia nu aátsuk, úukam takustá" turútmai.

lw.10,5.

- 5 Nuíkia, Pásuk entsá nunkasha tarimia wajáan wainkiámiaj nu, untsur ewején takuí:
- 6 "Arútam tuke túkesha pujana nu, nayáimpin, nunkánash, tura ashí mash´ najanka nu íirui" tíaia, chicháak: "Yamáikia sétutsuk,
- 7 Pásuk amúamu kachun umpuármatai, yaúnchu wemiakúnmani Arútam tímia nu aminkíáttui" tímiai.
- 8 Chícham nayáimpinmaya chichartukmia nu, ataksha chichártak: "Pásuk entsán nunkánash taritia wajana nu weámtukam, papichin urak tákakna nu achiktá" túrutmai.
- 9 Túrutkui, Pásukan weántukan, papichin seámjai. Seam, chichártak: "Pai, ju yuatá. Wenumiín yuminiaitkiuísha, wakemiínkia ti yapá ajatrámsattui" turutmai.
- 10 Takui, papichin achikian, yuámjai. Weneruínkia chini yumiría aínsank ti yumíniaiat, wakeruínkia ti yapá ajatrusmai.
- 11 Nuíkia chichártuiniak: "Ataksha Arutman chichame, ashí matsatkámunam, irutkamúnmasha, aénts aushá chichaman chichainiána nu, úunt áiniána aúsha ujákam kakantratá" turutiármái.

AKANKAMU 11.

Jímiar akatramu.

- 1 Nuyá pítia aniu nekápmatain surúsar, chichártuiniak: "Arutman jee, íikmatáisha nekápmaram, tura núí ashí mash` tekémruinia nusha nekapmartá.
- 2 Áachikia nekapmaráip. Kame nu Jesús-shuárchan susamu asamtai, aintiuk-nawe-jímiar nántunam núí pujúsar, Pénker-Irútkamun emesrártatui.
- 3 Tuma pujúniai, chikíchik-nupanti-jimiará-washim-ujuk-nawe tsawanttin winia chichámrún etserkarat` tusan, jímiar akátramur pushí mukusan entsarun akupkártatjai.

lw.11,4.

- 4 Juka Ashí-Nérentniun nakariín jímiar kunchái, jímiar shirikíp pujana nu ainiáwai.
- 5 Yákesh kajeráinia núnaka, nii wenéeya jinia jíikiar, amukártatui. Ee nekás turawártatui.
- 6 Nuka wakériniakka chicham etsérmanum yumi yutukáink túsar, nayámpin emetártatui. Núnisarank entsánash numpámtikiar, nunkánmasha ti núkap waitkiasártatui.
- 7 Winia akátramur chichámrún etserkármatai, tunkuruán-maya emésak nankin jurúkiar, awákkar, maawártatui.
- 8 Yamáikia nii iniashinkia Únt-Irútkamu, iimiáruka Sutuma, túrútskesh Ejíptu tuiniána nuí, juainiáwai. Kame nuink nii Úuntriniash ajintiawamai.
- 9 Nii iniashín iwiársatniun suritiainiákui, menáint^{iu} tsawanttin ashí nunkánmaya aents^u wainiainiáwai.
- 10 Nunkánmaya aéntska nuna wáinkiar: "Nu jímiar akátramu ti itit awajtámsaji" túsar, warásar, númtak warinchun sunainiáwai.
- 11 Tumaitkuísha, menáint^{iu} tsawant nankamásmatai, Arutman iwiákmarí niín enkémtuam, aneantarmái. Ii pujuriármia nuka nuna wáinkiar, ti sapijmiakarmái.
- 12 Nuyanka nayámpinmaya chicham kakántar chicharáiniak: "Wakatárum" tímiayi. Takui, nii numásrisha íimianai, nayámpiniam yuránkminiam páchitkia wakarmái.
- 13 Nu chichámtaik kakántar uurkamtai, nawe irútkamun tesamuriya chikíchkin yumpunramtai, tsenken-nupanti aents^u kajjinkiármái. Antsu iwiáku juaráruka sapíjmiakar, Arútman naatmamtikiármái.

Amúamu kachu umpuárma.

- 14 Jímiar itiúrchat nankamasú asármatai, amúamu itiúrchat wárik winíttiawai.
- 15 Pásuk amúamu kachun umpunramtai, nayámpiniam charátum ajásar, chicháiniak: "Yamáikia Arútam-Irúnramu

Iw.11,16.

- jeáyi. Utsumka tuke túkesha ashí nunkánam Úunt átatui" tíarmiayi.
- 16 Jimiará-nawe-aíntiuk wea kutánknum pujuármia nu, Arutman tekémrurar, chicharáiniak:
- 17 "Uuntá, Arútam ashí tujintcha asakmin, yumínksamu atá. Kame ame yaúnchu, yamáish, tuke túkesha pujú asam, aya amé kakarmármijáink Arútam-Irúnramun Úuntri ajasume.
- 18 Ashí nunkánam aents^u kajertamainiakuísha, jákarun makurtin amé tsawántrum jeáyi. Wáimiakun, imítmachun, úunt, uchisha amin amirtamkarmia aúnash akiktin, tura nuncan emesrarmia nunasha amuktin jeáyi" tíarmai.
- 19 Nu chichámtaik nayáimpiniam Arutman ayamtáiri uránkmiatai, chícham-najánamun ikiúsmari wantinkiám tai, ipiám tarkui chaarpirkamai, nunka uurkamai, michasha iniármiai.

AKANKAMU 12.

Nua Napijjái.

- 1 Nuíkia, nua étsajai penuárma, nántunam wajáa, nawe-jímiar yaan entsénkraku, nayáimpiniam ti wincha ajás, wantínkiámai.
- 2 Nuka ajamtin asa, jatémaak, ti kakántar úuteawai.
- 3 Núnisank ti úunt napi kapaku wantínkiámai. Nuka tsenken mukén, nawe káchunash tákakeawai.
- 4 Tura nii tsenken muukén etsenkrukú, nii ujukejái yáan awatí, nunká utsáawai. Nu ti kajén nápihia nua jatémamunam tarí, uchín jurérmataik, yurumátaj-sa wajatsamai.
- 5 Tumaitkuísha, ashí aéntsun Úuntri ti kakáram atí tusa, núaka Áishmankan jurermai. Nu Úchikia Arútam chimpínium pujana nuí junákmiai.

- 6 Núaka nunka itiárkanam, Arútam iwiáramu uwémtainiam pisarmai. Nuí chikíchik-nupánti-jimiará-washím-ujuk-nawe tsawant ayúramu átatui.
- 7 Nuyanka meset nayáimpiniam nankamnamai. Pásuk Miker nii Tsentsákrijai ti úunt nápijai manikiármai. Nu napisha nii emeskárijai ayamrumarmai.
- 8 Túrasha, awákkamu asar, nayáimpiniam pujustin ankant atsumai.
- 9 Nuíka úunt napi, tuke ashí aéntsun anankkártinri, nii wawékrijai emésak taman, nunkánam utsankarmai.
- 10 Turunamtai, nayáimpiniam ti kakántar chicháiniak:"Arútam ashí tujíntcha Utsúmkejaink ewentikramra asar', ii Uuntri ainiáwai. Kame kashi tsawái ii yachin Arútmanam tuke makuármia nuna ajapawarmai.
- 11 li yachisha jákatniun ishámstusuk, líkmakan numpejai, nii chichamejai, nii turamurijáisha ti kakáram ajásar, nuna nupetkáraí.
- 12 Nayáimpiniam pujatíram, warastárum. Antsu nunkanmaya-tíram, entsanmayatírimesha, emésak atumiín kajek tara, núkap tsawantan tákakcha asa, ti waitkiarmastátrume" tu tíarmai.
- 13 Nu úunt-nápihia nunká ajapamu asa, nua Uchín juremia nuna apapekmai.
- 14 Tumaitkuísha, núaka itiárkanam pisarat` túsar, jímiar churuwian nanapén susarmai. Nuí napínmaya ewémtikram, núkap tsawant, újumek tsawántash, tura wárumchik tsawántchik ayúramu átatui.
- 15 Nuyá nápihia nuan ejekrat` tusa, éntsa úuntan iyakmai.
- 16 Tumaitkuísha, núnkaka nuan ayamrúktaj-sa, napi entsan iyakmia nuna wáantuk, kujarmai.
- 17 Nuíka nápihia kajek, nuan uchirí Arutman awemámurin tura Jesusan chichamen umiiniána aun nankin jurúkiar,
- 18 nayantsan kaanmatkariín juákmai.

AKANKAMU 13.

Úunt-napi yajásmajai.

- 1 Yajásam tsenken múukan, nawe káchunash tákaku, nayántsánmayá jínian wainkiámjai. Nawe kachu etsénkrukman, tura múukanam Arutman katsékmarí aárman takakúyi.
- 2 Yajasman wainkiámaj nuka shiáshia aniuítat, chain nawén tákaku, wenenka japa-yawá aniúyi. Úunt-napi nii kakármarin susa, ashí úuntri atí tusa, nii chimpirín susamai.
- 3 Nu yajásam chikíchik muuké nanki ijiúmu penke tsuamárchamnian takakuítat, játsuk wárichik tsuármatai, ashí mash` nunkánmayá aents^u: "Juka ashí tujíntcháiti" túsar, patatukarmai.
- 4 Úunt-napi nii kakármarin susa asamtai, tekémrurar, yajásmanash: "Yaki tímiaunash awakkamniáit ?" túsar, nunasha tekemrurarmai.
- 5 Aíntiuk-nawe-jímiar nántutin Arutman kajérak, nii wakéramun najánatin tsankatnakmai.
- 6 Túram, Arutman katsékeak, ashí mash` arútam-shuár nayáimpin ayamtairiín matsatáinia nunasha katsekkarmai.
- 7 Aíntsank ashí mash` wáimiakun mesetan jurukí, awakkatin tsankatnakmai. Núnisank irútkamun, matsátkamun, tura ashí mash` aents^u aushá chichaman chicháinia nunasha úuntri atín tsankatnakmai.
- 8 Tuma asamtai, ashí aents^u líkmakan papiriín nii náari yama nankamtaik aárman takakainiátsna au tekemrurártatui.
- 9 Ya antúktaj ta, nu antuktí.
- 10 Ya epenmia átatna nuka, epenmia átatui. Ya nankijai mantamnáttana nuka, nankijai mantámnnattui. Kame íimiaru, waimiákusha kajerkamuitiátar, katsuntrartiniáíti.

Iw.13,11.

- 11 Nuyá chíkich yajásam, japa aniun jímiar kachurín tákaku, nunkánmayá j̄inian wainkiámjai. Túmasha napia aínsank chichamai.
- 12 Yajásam tsuamarman kakármarin tákaku asa, nuna ashí aents^u tekemrurarat` tusa, yáiniawai.
- 13 Nuka aents-tujíntiamun nájaneak, ashí íimiainiai nayáim-pinmayá j̄inia itiáwai.
- 14 Aents-tujíntiamun nájaneak: "Aentstíram, yajásam nanki ijiúmu tsuamarun nakumkámuri najanatárum" tusa, ashí aéntsun anánkawar, útsuiniáwai.
- 15 Tura yajasman nakumkámurin iwiáku awájas, chicham-tiksatin tsankatnákmai. Tekemruiniátsna nuna amuktin tsankatnakmai.
- 16 Ashí mash`, uchíchiniash úuntnash, kuítrintniun kuítrintchanash, ankántinian ankántchanash, untsur ewéjnum, túrutskesh nijáiniumkesh, usumtíkiawai.
- 17 Ya yajasman náarij̄ai, túmatskesh nii náarin nekapmar-marij̄ai usuachmáit, nuka sumátnash, tura surútnash surúkchatin áartatui.
- 18 Nekás nekau yajasman náarin nekatniuíti. Kame nii náari aéntsun nekapmármari ujuk-washím-ujuk-nawe-ujukete.

AKANKAMU 14.

Íikmakan nemariáru.

- 1 Nuyá íikmak Siúnk náintniun waján wainkiámjai. Aents^u washím-aíntiuk-nawe-aíntiuk-nupanti nijáinium íikmakan náari, tura nii Aparín náarisha usuámu tentatarmai.
- 2 Nayáimpiniam ipiámta núnisarank kaéran tuntuíniak namperin áarmiayi.
- 3 Nuka chimpín nakariín, aíntiuk iwiákusha, tura wéasha pujuiniámunam yamáram nampetan nampeármái. Nu nampetan yákesh nekachminiáuyi. Aya washím-aíntiuk-

nawe-aíntiuk-nupanti aents^u nunkánmaya ewemtíkramu nekarmai.

- 4 Nuka tsanírmachu, antínkchamu ásar, líkmakan tuke nemarainiáwai. Arútmanu, líkmáknasha aarat` tusa, niía niía júukma ásar,
- 5 nekás waítrichu, imítmachu ainiáwai.

Pásuk étserma.

- 6 Nuyanka, ashí nunkánmaya aents^u, aushá chichaman chichainiána nuna ujáktaj-sa, chíkich Pásuk Pénker-Chichaman tákakun ti yakí wainkiámjai.
- 7 Kakántar chicháak: "Arútam anturkárúm, naatmamtikkiatárum; kame nii makúkrattain tsawantri jeáyi. Ashí mash` nayáimpin, nuncan, nayantsan, yumirmatáiniash najanka asamtai, tekemrurtárum" tímiai.
- 8 Aíntsank chíkich Pásuk chicháak: "Úunt Matsátkamu Papirunia, nii ananktáirijai ashí aéntsun tsanirmamtikniúya nu, amukayi, amukayi" ajáan antúkmajai.
- 9 Aíntsank chíkich Pásuk ti kakántar chicháak: "Yákesh yajasman nakumkámurin tekémrur, nii ewejeén, túrutskesh nii nijaiín usuma nuka,
- 10 Arútam kajérkam, nekamrumrártatui. Nuka ashí mash` Pásuk, líkmaksha iimiainiái jinium epeámu áartatui.
- 11 Nuna esainiamurinkia tuke túkeshá mukuínt^{iu} ajá pujuártatui. Kame yajásman nakumkámurin tekémrurar, nii náarin usumawarmia nuka, kashi tsawáisha penke ayamrachártatui" tímiai.
- 12 Nu tsawanttin Arutman awemámurin amirainiána, Jesúsnum íimiaru ainiána nusha, katsuntrartiniáiti.
- 13 Ataksha nayáimpinmaya chichártak: "Jusha aartá: Jesúsnum jakarmia nu yamáik warasartí. Kame Iwiaikrátniuka chicháak: Ée, pénker najanawaru ásar, waitsamuriya ayamrartí, tawai" turútmiai.

Arak júukma.

- 14 Tura íimkiamán, Arútam-aents-ajasú kurin etsénkraku, wai atsákamun tákaku yuránkim pújunam eketun wainkiámjai.
- 15 Nuyanka ayámtainmaya Pásuk j̄inkí, yuránkminiam eketun ti kakántar chicháruk: "Arakman júuktin tsawant jeá asamtai, wáirmijai yukuím juuktá; kame turunkái" tímiai.
- 16 Takui, yuránkminiam ekétuka wairijai nunkan yukuí, júukmai.
- 17 Nuyá chíkich Pásuksha nayáimpin ayamtairiíya tsénkenan tákaku j̄inkimiai.
- 18 Nu chichámtaik íikmatáinmaya chíkich Pásuk, jinia wáinin j̄inkí, Pásuk tsénkenan tákakun kakántar chicháruk: "Nunkánam uwí tsamá íruna nu tsenkénrumjai achiartá".
- 19 Takui, Pásukka uwí tsamá írurun tsenkénrijai awántur, achíar, Arútam kajek pujuma nuí irumramai.
- 20 Túramtai yajáuch' uwí aa ukánar, téeka nekenramtai, níniya numpa etsekear, ti yajá tsakinmakmai.

AKANKAMU 15.

Íikmakan anentri.

- 1 Ataksha nayáimpiniam ti pénker wantínkiamun wainkiámjai. Tsenken Pásuk, Arutman kajétairi amukat` túsar, amuámunam tsenzen itiúrchatan itiáрмаi.
- 2 Aíntsank nayants wincharpátniunam aents^u yajasman awákkaru, nii nakúmkámunash tekémrurcháru, tura usúma-chármia nusha kaérjai tarimias wajáarmai.
- 3 Arutman takárniuri Muisesan, tura íikmakan anentrin nuka anéntruiniak:
"Uuntá, Arútam ashí tujintchá,
amé najanámuram ti penkeráiti.
Ashí aéntsun Uuntriyá,

- 4 amé jintímkia nekás waitrichuíti.
Wátsek, Uuntá, yaki amin
natmamtikramkachminiáit ?
Aya amek imítmachu asakmin,
ashí nunkánmaya_a aents^u táar,
pénker najánamun wáinkia ásar,
tekemrutmarártatui" tíarmai.

Tsenken umámuk.

- 5 Arum nayáimpin ayámtairi uránmiatai,
6 tsénken Pásuk, tsenken itiúrchatan tákaku, wincharpátniun
entsaru, netsépnun kurín asantímra, jjiinkíáarmai.
7 Nuyá_a aintiuk Iwiakúnmaya_a chikíchik, Arútam tuke túkesha
pujana nuna kajétairi tsenken umámkunam enkékman,
tsenken Pásukan susamai.
8 Túramtai, Arutman kakármari, nii naatkamurisha
mukuíntiua aínsank ayámtain ipiákmatai, nu tsenken
itiúrchat umámkunam pujuármia nu amúmam, yákesha
enkemachminiáuyi.

AKANKAMU 16.

- 1 Nuyá_a úunt-ayámtainmaya_a chícham ti kakántar tsenken
Pásukan chicharáiniak: "Ashí nunkánam tsenken
umámkunam Arutman kajékmaria ana nu ukara ikiuktiárum"
táun antúkmajai.
2 Éemka chikíchik Pásuk jjiinkí, nunká ukármatai, ashí mash`
usuámu, yajasmaan nakumkámurin tekemrurármia
nuka, ti najamín kuimiarkarmai.
3 Chíkíchkia nayántsanaan ukármatai, entsa numpa kaúrua
anin ajásmatai, ashí mash` iwiáku pujuármia nuka
kajjinkiáarmai.

- 4 Chíkichkia entsánam, yumirmatáinmasha ukármatai, entsa numpa ajasmai.
- 5 Tumámtai, entsaya Pásuk chicháak: "Ámeke imítmachu, yaúnchu yamáisha tuke pujú, jútikia makukratniuíme.
- 6 Kame wáimiakun, imítmachun numpén ukararu asármatai, Ámeke numpa aararume".
- 7 Takui, iikmatáinmaya chicháak: "Ee, Uuntá, Arútam ashí tujintchá, Ámeke nekás wáitrutsuk makukratniuíme" tímiai.
- 8 Chíkich Pásukka étsanam ukármatai, aéntsun aesawármái.
- 9 Aéntska esainiáksha, Arutman naatmámtiktsuk, aya katsékkar, enentaimracharmái.
- 10 Chíkichkia yajasman chimpiriín ukármatai, nii pujútairi te ajátsam, ashí aents^u najáimiakar, iniáin taket esái ajáarmái.
- 11 Tumaitkuísha, enentáimtsuk, kuímiarin najáimiainiak, Arútam ashí tujintchan katsekiármái.
- 12 Chíkich Pásuk Éujrates entsánam ukármatai, Úunt etsa jjiinána aíya tatin, éntsaka kukakmai.
- 13 Tura napín weneya, yajasman weneya, anankkártinian weneya, menáint` ti yajáuch` emésak, mukunta ánin jjiiniainian wainkiámjai.
- 14 Nu emésak aénts-tujintiamun najánawar, Uunt ashí tujintchan tsawantri jeámtai nankín jurukiarat` túsar, ashí nunkánmaya úuntan ipiáu áiniáwai.
- 15 (Aneartárum, kasa aínsanak winíttiajai. Ya kánutsuk, áimiatsuk, anear pujá nuka, misú tsekénkchatin asa, warastí.)
- 16 Kame Uuntan awákkachmin ásar, Armáketunk náintnium ipiawarmái.
- 17 Amuámunam chíkich Pásuk máyainiam ukármatai, ayámtainmaya chícham ti kakántar chicháak: "Pai, mash` aminkiáyi" tímiai.
- 18 Takui, yama nankamtaiknúmia turunchatáinsha iniánkas, cháarpirak, ipiámtarak, ti kakántar uurkamái.

Iw. 16, 19.

- 19 Úunt-matsatkámuka menáint puj nakaramtai, ashí irutkámusha yumpunrarmai. Kame Arútmaka Papirúnian enentáimtur, suíram kae ajatkí, amukmai.
- 20 Túramtai, nunca tsurakúka pisakármatai, náintsha menkararmai.
- 21 Nayáimpinmaya kaya úunt yutuk, núkap emesmákmatai, aéntska kajékar, Arútman katsekkarmai.

2) Papirúnia amúkma.

AKANKAMU 17.

Nua tsanírmäu.

- 1 Nuyanka tsenken Pásuk umamkun takakúnmayá chikíchik táruti, chichártak: "Nua tsanírmäu nayántsanam eketun waitkiasártatna nuna iniaktústajam, winitíá.
- 2 Níijai úunt ainiána au tsanírmawármatai, ashí mash` aéntsush níijai nampekarmai" turutmiai.
- 3 Tinia iniáis, winia wakánrun nunca itiárkanam jurutkimiai. Nuí nua yajasam kapàkunam ekétkan, wainkiámjai. Yajásmaka untsurí Arutman katsékmari nii iniashiín aárman tákaku, tsenken múuken, nawe kachuríniash takumai.
- 4 Núaka kapakun entsaru, kurín, sháuknash patakemra, wínchar ajámai. Umámuk kurijai najanámunam nii yajáu-chirin, nii tsanírmatáiriniash takakuyi.
- 5 Nijáinium nékachmin aárma chicháak: "Úunt-Papirúnia tsanírmäu nukurinti, ashí mash` yajáuuch' áantar-arutman uuntrinti" tu aarmaúyi.
- 6 Nu núaka wáimiakun, tura Jesusan ayámrin numpéjaj nampékun wáinmiajai. Nuna wáinkian, aya enentáimsan juákmatai,

- 7 Pásuk chichártak: "Urukamtai aíniam ? Nu nua, tura yajasam tsenken múukjai, nawe káchujai júana nu nekámniun tusan, jintintiátjame.
- 8 Yajásam wainkiámna nu pujúmiayi; antsu yamáí pujatsui. Tunkuruánmaya_u jiniáksha, menkakátniunam wéawai. Ashí nunkánmaya_u aénts^u yama nankamtaiknumiá_u iwiákman papíriín aarchámuka, yajasma ámia nu, yamáí menkáak, amúkatin asamtai, aya enentaimsártatui.
- 9 Tsenken múuk^a warímpiáit ? Nu nekatin enentaimsatniúftji. Tsénken náint tuí nua ekétea nu ainiáwai.
- 10 Aíntsank tsenken aéntsun-úuntri ainiáwai. Ewej amukaruíti. Chikíchik yamáí pujawai. Chíkich tasátuk ajasái. Túmasha ishíchik tsawant pujústatui.
- 11 Yajásmaka amia nu, yamáí atsaksha, nujai yarush` ajainiáwai. Túmasha tsenkénnum pachitkiáksha, amukát-niunam wéawai.
- 12 Nawe kachu wainkiámna nuka, nawe úunt naamkacharuitkiúsha, ukúnam yajásmajai chikíchik tsawant pujusártatna nu ainiáwai.
- 13 Nuka ashí mash` nii kakármarin yajasman susátaj-sar wakeruiniáwai.
- 14 Nuka líkmakan nankín jurukiártatui. Tumaitkuísha, líkmakka ashí úuntan úuntri asa, níi untsukma umirín ánia nujai awakkártatui" turutmiai, Pásuk.
- 15 Nuyasha chichártak: "Nayantsa tuí nua-tsanírmau eketea wainkiámna nu, Irútkamu, matsátkamu, irúnramu aushá chichaman chicháinia nuíti.
- 16 Nawe kachu, yajásmasha nua-tsanírmaun kajérkar, misú aúkiar, iniashín yuruáwar, jinium ekémakar, ikiukiártatui.
- 17 Kame Arútmaka nii wakéramun támam, yajásmajai takakmasarat' tusa, nii kakármarin amáawai.
- 18 Nua-tsanirmau wainkiámna nuka, Úunt-Matsátkamu nunkan úuntrin akupea nuíti.

AKANKAMU 18.

Pásuk étserma.

- 1 Nuyá chíkich Pásuk ti kakáram, ashí nuncan sukukí, nayáimpinmaya_a taan wáinkiámjai.
- 2 Nuka ti kakántar chicháak: "Papirunia uuntaitiat amukayi, amukayi. Yamáikia emeskan pujútairi, yajáuch` iwiánchin matsámtairi, muíjmiái jéenchman pujámuri ajasái.
- 3 Kame nunkánmaya_a aents^u nii yajáuchirin umárar, úuntash níijai tsanírmawar, sukartin áinia aúsha inchimrústaj-sar ti warirtin ajararai" turutmiai.

Jesús-shuar pisarma.

- 4 Nuyanka nayáimpinmaya_a Chichamtin chicháak: "Wi shuartírmeka, níiya aínsarmek yajáuch` ajasáirum tusan, pisartárum, tájarne. Níiya aínsarmek yajáuch` ajásrumka, wáitkiasma átatrume.
- 5 Kame ti núkap tunamka asamtai, Arútam kajérak, chicháak:
- 6 Chikíchan aitkiawarmia aínsarmek níisha aitkiatárum. Ti yajáuch` asamtai, ti núkap waitkiastárum. Chikichan áartasa iwiararmia nu ti núkap aartárum.
- 7 Ti núkap irumra, inchimrústaj-sa wakerukú asa: Wíkiea úunt asán, wajeman penke uutcháttajai tau asamtai, ti núkap wáitkiasrum, awantiárum.
- 8 chikíchik tsawántinink jakátniuri, úuttinri, tsukámtinri táarmatai, ekemakma átatui. Kame Arútmaka makúkratin ashí tujintcháiti.

Papirúnia éaarma.

- 9 Nunkánmaya_a úuntka níijai tsanírmawar, inchimrusarmia nuka, mash` kéek amukamtai, éaarártatui.

Iw. 18, 10.

- 10 Kéek amúwakui, arant wajásar: Úunt-Papirunia, amukatniu-
itiatmeápi, ani pujúmamea túsar, wa wa tíartatui.
- 11 Aíntsank sukartin áinia aúsha, nii warínchurin sumárcha
asármatai, utiártatui.
- 12 Kame kuri,sháuk, tarach`, itip`, muíts, ichínkian, umámuk,
pinink, mash` nuwe najánamu, tura chimpí. kutánkash
sétrujaj pénker najánamu,
- 13 aínsank yamakái, sekut, kunkuín áinia au, tura
nijiamánch`, punu, sawe, mama, inchi, sha, nuse, míik,
shiámp, yawá, kúuk, mash` tanku áinia nusha,
- 14 uwí, yáas^u, kunchái, wapái, shuínia, wampa áinia aúsha,
ashí mash` amukamtai,
- 15 sukartin áinia au nuna surúkar, kuítrintin ajasarmia nuka,
keákui, arant wajásar, úutchim chicháiniak:
- 16 Tsej, ma aúsha úunt-matsatkamuá, kuríjaj, sháukjaj iwiar-
mamniuketiatmeápi,
- 17 imiá wárik amukamea ! tíartatui. Ashí mash` kanun
ewekamin, tura nii úntrisha kéek amúwam wáinkiar, yajá
wajásar, chicháiniak:
- 18 Tu matsátkamuk tímiajusha aminiáit ? tíarmai.
- 19 Múuknum yunkúmin yukúmakar, chichás chichás úutainiak:
Tsej, ma úunt-matsátkamuá, Shiirmármijaj kanun
ewekamin kuítrintin awájmiam, ameápi imiá wari
amukamea ! tíarmai.
- 20 Antsu átum nayaimpinmayatíram, atumsha imitmachutíram,
akatramutíram, waimiakutírmesha, nuna Arútam makú,
atúmniaaka ayamrútmaku asákrumin, warastárum"
Chichamtin tímiai.
- 21 Nu chichámtaik Pásuk ti kakáram, kaya úuntan takuí,
nayántsanam nankímiuk chicháak: "Úunt-matsatkamuá,
Papiruniá, jútiksank ajápamu, tuke menkakáttame.
- 22 Yamáikia amiín kaérjaj, pinkiuíjaj, kantashjaj nampéamush
penke antunákchattui. Amiín takakmau nakúmainsash
wainniákchattui. Aínsank amiín takákmamush atsuttui.

- 23 Amiín shiríkip keámush atsúttui. Anájmarun, tura anájmarman chichámesh antunákchattui. Kame sukartin ti náatu awájsam, amé wawékrumjai aents^u anánkam,
- 24 ashí wáimiaku, imítmachu máam, nii numpé ukáru asám, yuminkramuítme" tímiai.

AKANKAMU 19.

Nayáimpin namperi.

- 1 Nuyá nayáimpiniam ti untsurí aents^u nampénan antúkmajai. Warásar chicháiniak: "Aya Arútmak Ewémtikin ashí tujintcha asamtai, naatmamtikiar`, yuminksatái.
- 2 Kame Imítmachu asa, wáitrutsuk Makukratniuíti. Tuma asa, nua-tsanirmau ashí aéntsun yajáuch` awajsa nuna makú, nii shuaran numpé ukármanum yapajmiakuíti" tíarmai.
- 3 Ataksha chicháiniak: "Tsanirmaun esámuri tuke túkesha mukuínt^{iu} ajá pujá asamtai, Arútam yuminksatái" tíarmai.
- 4 Nuyanka jimiará-nawe-aíntiuk Wea, aíntiuk Iwiákusha Arútam chimpínium ekétna nuna tekémrurar, naatmám-tikiar, chicháiniak: " Arútam yuminksatái. Nuke atí" tíarmai.
- 5 Nu chichámaik chimpíníumiã Chichamtin chicháak: "Atumsha uunttíram, uchitíram, ashí mash` arántukrum umirniutírmesha, Arútam naatmamtikkíatárum" tímai.
- 6 Tura entsa saa ajána aínsank, ipiamta aínsank ti untsurí aents^u charátum ajáinian antúkmajai. Nuka chicháiniak: "Yamáikia Arútam ashí tujintcha ashí máshiniu Úuntri ajasú asamtai, yuminksatái.
- 7 Íikmakan nuatkámuri jeá asamtai, wará warat naatmamtikiar`, yuminksatái. Kame tarímtari wincharpatniun entsar, pujawai.
- 8 Nii ti shííram entsatáiri ashí mash` wáimiakun pénkerin nakúmeawai" tíarmai.

- 9 Nuyá Pásuk chichártak: "Ju aartá: Ílkman nuatkamuriín ipiámu áinia au warasartí" tinia: "Juka nekás Arutman chichamente" turútmiai.
- 10 Túrutkui: "Tekémruran naatmamtikiataj" tu tai, chichártak: "Atsá; wisha ámea aínsanak, yátsumeá aínsanak Jesusan ayamrin asamtai, tekemruiráip. Antsu aya Arútam tekemrurtá. Kame waimiákuka aya Jesusan chichamen takúsar, núnak etserainiáwai" túrutmiai.

3) Jesús-shuarcha amukma.

Ílkmak awákmaku.

- 11 Nuyanka nayáimp` uránmianum Imítmachu, Anankkártichu tama kawái pújunam eketun wainkiámjai. Nuka nekás ayámkartuk, wáitrichu makukratniuíti.
- 12 Nii j̄i jiya aniuíti. Múuknum untsurí tawáspan entsenkrakuíti. Náari nekachminiáiti; aya níinki nékawai.
- 13 Awankem numparpátniun entsaru, Arútmán Chichamtinrinti.
- 14 Nayáimpinmayá untsurí aents^u ti puju entsaru, kawái pújunam ekema nuna patatuiniáwai.
- 15 Nuka , Jesús-shuárgan amúktaj-sa, nii weneyá tséntsak atsákamun j̄iki, ti kakáram akúpkartin átatui. Kame níinkia ashí tujíntcha Arútmán kajeriármia nuna najauwáiti.
- 16 Awankemriín, tura makúnmasha: "Úuntan Úuntri; nérentniun Nérentniuri" tu aarmáiti.
- 17 Nuyá Pásuk étsanam waján wainkiámjai. Nuka churuwia yakí nanamáinia nuna kakántar chicharáiniak: "Arutman namperiín winitiarum.
- 18 Úuntan, akupkartinian, kakármanash iniashí yuitiarum. Tura Kakáram nii kawáisha yuitiarum. Aínsarmek ashí aents^u ankantin ankántchan, úuntan péejchachin iniashisha yuitiarum" tímiai.

lw. 19, 19.

- 19 Nuyanka yajásam, tura nunkánmayaa úunt nii nankirtínrijai irúnrar, kawái pújunam eketkan nii aéntsri niash nankín jurukiáрмаi.
- 20 Tumaitkuísha yajasman, tura anankkartínniasha achíkiar epeniáрмаi. Nu anankkártinkia yajasman takárniuri asa, aents-tujintiámujai aentsun anánkawar, yajasman tekemrúm-tikiar, nii náarijai usumtikiármia nuíti. Mai iwiákun jinium epeármiai.
- 21 Kawáinium eketna nuna weneya tséntsak jíinia nujai, nii nankirtínri niash maawármatai, churuwia nii iniashín yuáwar, ejemakarmai.

AKANKAMU 20.

Nupanti uwí.

- 1 Nuyanka nayáimpinmayaa Pásuk tunkurúan urátain, jiru-jinkiátainiash tákaku tarun wainkiámjai.
- 2 Yaúnchu napi pujumia nuna, emésak anánkcartin asamtai, achik, nupanti uwí jinkiá apujsamai.
- 3 Aéntsun anankawáink tusa, tunkuruánam ajuá, nupantí uwí jeámam epenin, wáitin asaktuámai. Nuya ishíchik tsawant ankant akupkamu átatui.
- 4 Nuyanka makúkratin chimpíinium eketáinian wainkiámjai. Nuya aents^u Jesusan chichamen etserainiákui muukén tsupirkarmia nuna wainkiámjai. Aínsanak yajasman tekémrutsuk, nijáinium ewejnumsha nii náarin usumacharmia nunasha wainkiámjai. Nusha aneántar, nupantí uwí jeámam, Utsúmkajai irunrarmai.
- 5 Juka éemka aneantármatai, chíkichkia aneánttsuk, nupantí uwí jeámam aneantártatui.
- 6 Éemka aneantáruka wáimiaku ásar, warasartí. Kame ataksha játsuk, Utsumka Jesusjai nupantí uwí irúnrar, wea áartatui.

Ataksha mánikma.

- 7 Nupantí uwí nankamásmatai, emésak ataksha ankant akupkamu átatui.
- 8 Nuka ashí nunkánmaya aéntsun anánkawar, Kuk, tura Makuk matsátkamun irur, mesetan jukítiaj-sa, untsurí náikmijai métek irúrtatui.
- 9 Anéamu Matsatkámunam, wáimiaku pujúinia nuí jeáwar, téntatkar, jatekarmai. Tumaitkuísha, núchamtaik ji nayáimpinmaya tara, amukarmai.
- 10 Emésak, íirshimp` asa, antumiankan jiriín yajásam, anankkártinash epeárma nuí, níisha kashi tsawái, tuke túkesha esatin, jinium epénamai.

Aénts^u makurma.

- 11 Nuyá úunt chimpí wincharpátniunam eketna nunasha wainkiámjai. Nayáimp`,núnkasha nuna wáinkiar,pisararmai.
- 12 Aíntsanak, úunt uchísha jákaru, chimpí pujámunam naka wajáinian wainkiámjai. Papí uranrármatai, iwiákman papirisha uranmiai. Nuí nii najanámmuri aárma íirnas, ankant ankant makunrarmai.
- 13 Ashí mash` jákaru entsánam nunkánmasha ikiúsma áinia aúsha irunrármatai, nii túramuri íirnas, ankant ankant makunrarmai.
- 14 Jatai, tunkurúasha antumiankan jiriín epenarmai. Nuíti ataksha jatain jakámuri.
- 15 Ashí mash` iwiákman papiriín anújkachma áarmia nusha, antumiankan jiriín ajapnawármái.

4) Yamáram Jerusarenk.

AKANKAMU 21.

Nayáimpinmaya Jerusarenk.

- 1 Nuyá yamáram nayáimpin, yamáram nunkánash wainkiámjai. Kame yamáí nunca nayáimpisha ana juka menkakármatai, nayántsasha atsumai.
- 2 Aínsanak ti pénger matsátkamu, yamáram Jerusarenk, nii áishrin inkiúntaj-sa, anájmarma aínsank ti shíir iwiármamra, Arútmajai tsaniás nayáimpinmaya táan wainkiámjai.
- 3 Chimpiniúmiá Chichamtin chicháak: "Juíti Arútam aéntsnum pujámu. Yamáikia aéntsnum pujús, nii Úuntri ajás, aéntsush níi shuar ajasártatui.
- 4 Nii neájkirin ujújtúrmatai, jakátniusha, úutniusha, waitsát-niusha, najaimiátniusha amukaru asa, penke achártatui" taman antúkmajai.
- 5 Nuíkie chimpínium ekétea nu chicháak: "Yamáikia ashí mash' yamáram najáneajai" tinia: "Tájana ju nekasáiti: aartá" turutmai.
- 6 Tura ataksha chichártak: "Tájana nuka amínkiái. Wiyáitjai yama nankámtaik amuamúnmash tuke pujú. Ya kitiáma núnaka áantranak iwiakmámtikin entsan áartatjai.
- 7 Nupétea nuka akikma átatui: Wíkie nii Apurí átatjai, níisha wínia uchir átatui.
- 8 Antsu kakármachuka, íimiarchaka, tunártinkia, mankártinkia, tsanírmauka, wawekrátniuka, áantar-arutman tekemrurka, tura ashí mash` anánkkartin áinia aúsha, antumiankan jiriín ataksha jákar pujuártatui.

Yamáram Jerusarenk.

- 9 Nuyá tsenken Pásuk, tsenken umámkunam itiúrchatan tákakáinia, níniyá chikíchik táruti chichártak: "Winitía, Íikmakan anajmármari nii nuwé ajasún iniaktustátjame" turutmiai.
- 10 Nuyá mesékranma aínsank, náint ti tsakárunam jurukí, ti pénker Jerusarenk Arútmajai tsaniás nayáimpinmaya tarun iniaktursamai.
- 11 Náatu Arutma aínsank, ti shíiram, wínchar ajakí winímiai.
- 12 Wenuímiunam nawe-jímiar wáitin takakuyi. Nu wáitinmaka nawe-jímiar Pásuk, nawe-jímiar Israer-irúnramun náarin tákaku, wajátar ajáarmai.
- 13 Arákani menáint wáiti, nunkáni menáint wáiti, untsurnúmani menáint wáiti, tura menanmanisha menáint wáitin takakuyi.
- 14 Wenuímiuka nawe-jímiar káyanam ekemiáuyi. Nuka Íikmakan Akatrámuri áarmai.
- 15 Pásuk wijai chichana nuka, matsátkamun, nii wáitirin, nii wenukénash nekápmartin, pintiu kuríjajai najánamun takakuyi.
- 16 Mátsatkamu pintiújajai nekápmarma nawe-jímiar-nupantiyi. Esármari wankáarmaria metekeyi
- 17 Wénukan yakirí nekapmármaka washim-aíntiuk-nawe-aíntiuk takumai. Kame Pásukka íi nekapmatáirin takakuyi.
- 18 Wénukka kaya-sáara tímianu, tura matsatkámuka kuri wíncharpátniua ímianúyi.
- 19 Nawe-jímiar kaya wíncharpátniunam wénuk tarimtikiámuyi, Chikíchik numpantiniúyi; chíkich kínkiaúyi; chíkich saaraúyi; chíkichkia samenmaúyi.
- 20 Chikíchsha yankuatakúyi; chíkich kapakúyi; chíkich samenmatakúyi; chíkich pushuyi; chíkich mukusaúyi; chíkich pújuyi; chíkich kapajíyi; chíkichkia mukusatkáuyi.
- 21 Nawe-jímiar wáitikia úunt sháuka ánin áarmai. Matsátkamun jintinkia kuri-sáarjajai ukatkamuyi.

lw.21,22.

- 22 Ayámtain wainkiáchmajai. Kame ashí tujíntcha Arútmaka, líkmakjají Ayamtáiti.
- 23 Matsatkámuka etsan nántunash utsúmatsui. Kame Arútam sukúakui, líkmakka nii tsaapnirinti.
- 24 Ashí nunkánmayá aents^u nu tsáapniunam wenakui, nii úuntrisha nii kuítrin susártatui.
- 25 Káshisha atsá asamtai, nii wáitiri tuke uráimiu áartatui.
- 26 Nuí ashí mash` aents^u nii takákmarin, ni péinkeriniash ikiankártatui.
- 27 Tunartin, wáitrin, ashí mash` yajáuch` áinia au enkemachártatui. Kame aya iwiákman papiriín líkmak tákakeana nuí péekma enkemawártatui.

AKANKAMU 22.

- 1 Nuyá nu Pásukka, Arutman chimpiriyá, líkmaknúmiqasha ti sáar iwiakmámikin-entsa jíinia nuna iniaktursamai.
- 2 Matsátkamun ajapentriín, entsan yantamriín iwiakmámikin-numi wajátar ajáarmai. Nuka tuke nántutin nerénawai. Nii nukeshá ashí aénts^u tsuákri ainiáawai.
- 3 Matsatkámunam Arutman chimpirin, líkmaknash ashí mash` aénts^u tekemra ásar, penke yuminkrachma áartatui.
- 4 Nii yapíniash wáinkiar, nijáinium nuna náarijají usuámu áartatui.
- 5 Káshish atsákui, etsan, shirípkiniash utsumchártatui. Kame Arútam tuke túkesha nii tsáapniri átatui.
- 6 Pásuk chichártak: "Ju tájana júka nekasáiti. Arútam, wáimiakun, nii iwianchríniash Úuntri asa, wárichik turúnatta nuna nii takárniurin ujakat' tusa, nii Pasukrin akupkayí.
- 7 Nekatá: wárichik tátatjai. Ya ju papín chichamen amía nuka warastí" turutmai.
- 8 Wikia Juank júna wáinkian, anturkáitjai. Nuna wáinkian, Pásuk mash' iniaktúrsa asamtai, tekémruran nunká iniáarmajai.

- 9 Túram chichártak: "Turawáip. Aya Arútam tekemrurtá. Kame wisha amea aínsanak, wáimiaku aínsanak takarniurintjai. Ashí mash' ju papín chichamen amirainiána aintsanketjai. t
- 10 Ju chicham uukáip, kame ni tsawántri wárichik tátatui.
- 11 Imítmauka imítmau atí. Tunámniuka tunamki wetí. Antsu imitmáchuka imitmatsuk wetí. Waimiákuka wáimiaki wetí" turutmai.
- 12 Nekatá: Takatrin írsan, ankant ankant akíktinian wárichik tátatjai.
- 13 Wiyáitjai juárman penke amukáchminiash ! Wiyáitjai éemkarin ukunmariniash.
- 14 Nin entsatáirin nijaiinána au, Matsatkámunam wayáwar, iwiakmámtikin yurumken yuátin ásar, warasartí.
- 15 Antsu yawá nuke kajén, wawékratin, tsanirmau, mamlartin, áantar-arutman tekemrin, ashí mash' anánkkartin ainiána aúsha aá juakartí.

Ukún mari.

- 16 Wikia, Jesuska, Jesús-Irunramúnam turúnatta nuna etserkat' tusan, Pasukrun akupkáitjai. Wiyáitjai Tawitian jéermarin, yaa káshik páant tana nuna !
- 17 Iwiáikratin, tarimtasha: "Winitía" turutainiáwai. Antúrtana nusha: "Winitía" turuttí. Aents^u kitiámana nuka weanturkatí. Kame iwiakmámtikin-entsan áantranak susáttajai.
- 18 Ju papín chichamen ántarmena nuna tájarme: "Yákesh chíkích chichaman yapajea núnaka, ju papínium mash' itiúrchat aárma nujai Arútam waitkiástatui.
- 19 Aínsank yákesh juí aárman atantea núnaka, Arútmaka Matsatkámunam iwiakmámtikin-yuránknash suritkiáttawai.
- 20 "Jui aárma nekasáiti" tana nuka: "Ee wárichik winíttijai" tawai. Nuke atí. Úunt Jesúsá, wárichik winitía.
- 21 Úunt Jesusan pénkeri máshinium pujustí. Nuke atí.

CHICHAM.

UJÁJMATAI	(Biblia).
Yauchu	Antiguo
YAÚNCHU CHICHAM	(Antiguo Testamento).
Jrm.	Juárma (Génesis).
Jjnk.	Jjinkimiu (Éxodo).
Jat.	Jatetai (Levítico).
Ir.	Irúntai (Números).
Aw.	Awematai (Deuteronomio)
Jus.	Jusué (Josué).
Maku.	Makúkratin (Jueces)
1-2 Sam.	Samuer (1-2 Samuel)
1-2 Ak.	I,2 Akupín (1-2 Reyes).
1-2 Ait.	Aitkiámuri(1-2 Crónicas).
Est.	Estras (Esdras).
Nem.	Neemías (Nehemías).
1-2 Maka.	1-2 Makapéu (1-2 Macabeos).
Is.	Isaías (Isaías).
Jer	Jeremías (Jeremías).
Esek.	Esekier (Ezequiel).
Us.	Uséas (Oseas).
Ju.	Juer (Joel).
Am.	Amús (Amós).
Ap.	Aptías(Abdías).
Jun.	Junás (Jonás).
Mik.	Mikías (Miqueas).
Na.	Naum (Nahum).
Apak.	Apakuk (Habacuc).
Suj.	Sujunías (Sofonías).
Aj.	Ajéu (Ageo).
Sak.	Sakarías (Zacarías).
Mar.	Marakías(Malaquías).
Tan.	Tanier(Daniel).
Jup.	Jup(Job).

En.	Enentáimtai (Proverbios).
Jint.	Jintiámu (Eclesiastés; Qohelet).
Nam.	Nampet (Cantar).
Rut	Rut (Rut).
Ut.	Úuttai (Lamentaciones).
Es.	Ester (Ester).
Tup.	Tupías (Tobías).
Jut.	Jutit (Judit).
Par.	Paruk (Baruc).
Nek.	Nekatai (Sabiduría).
Sir.	Sirak (Sirácides; Eclesiástico).
Uj.	Ujaj (Salmos).

YAMÁRAM-CHICHAM *(Nuevo Testamento).*

Pénker-Chicham *(Evangelio)*

Mt.	Mateu (Mateo).
Mk.	Markus (Marcos).
Rk.	Rukas (Lucas).
Jn.	Juank (Juan).
Tur.	Turámuri (Hechos de los Apóstoles).
Rum.	Ruman aátra (Carta a los Romanos).
1 Kuri.	Éemka Kuríntiun aátra (1 ^a carta a los corintios).
2 Kuri	Ataksha Kurintiun aátra (2 ^a carta a los Corintios).
Kar.	Karasian aátra (Carta a los Gálatas)
Epi	Epísiun aátra (Carta a los Efesios).
Jir.	Jirípsun aátra (Carta a los Filipenses).
Kuru.	Kurusan aátra (Carta a los Colosenses).
1 Tes.	Éemka Tesarúnikian aátra (1 ^a Tesalonicenses).
2 Tes.	Atak Tesarúnikian aátra (2 ^a Tesalonicenses).
1 Tim.	Éemka Timiuteun aátra (1 ^a Carta a Timoteo).
2 Tim.	Atak Timiuteun aátra (2 ^a Carta a Timoteo).
Ti.	Titiun aátra (Carta a Tito).
Jirm.	Jirimunkan aátra (Carta a Felemón).
Isr.	Israéran aátra (Carta a los Hebreos).
San.	Sántiak aárma (Carta de Santiago).
1 Ka.	Éemka Kaya aárma (1 ^a Carta de Pedro).

2 Ka.	Atak Kaya aárma (2 ^a Carta de Pedro).
1 Jn.	Éemka Juank aárma (1 ^a Carta de Juan).
2 Jn.	Atak Juank aárma (2 ^a Carta de Juan).
3 Jn.	Nuyá Juank aárma (3 ^a Carta de Juan).
Jut.	Jutas aárma (Carta de Judas).
Iw.	Iwiáiniakma (Apocalipsis).

Aents-tujíntiamu =	milagro
Akintiai-Nántar =	Bautismo.
Arútam =	Dios.
Arútam-aents-ajasu =	Hijo del hombre.
Arútam-Irúnramu =	Reino de Dios.
Arútam-shuar =	Santo del Cielo, Familiar de Dios.
Emésak =	Diablo, demonio.
Emettai =	ancla.
Epentai; wáit-jea =	Cárcel, prisión, calabozo.
Íikmak =	víctima expiatoria, sacrificado.
Íikmatai =	altar
Íimiarma =	Fe.
Íimiaru =	creyente.
Íimiatai =	espejo.
Íirshimp' =	tentador, tentación.
Imiákratin =	Diácono.
Nunka-Itiáarak =	desierto
Iwiáikratin, Arútmari =	Espíritu Santo.
Iwiákma =	vida.
Iwiáku =	viviente.
Íwianch' =	Espíritu.
Jatetai =	celebración, rito
Jesús-ajíntiámu-nakumkámuri =	el signo de la cruz.
Jesús-ajíntiámu =	Crucifijo.
Jesús-Irúnramu =	Iglesia, Comunidad cristiana.
Jesús-shuar =	Cristiano, familiar de Jesús.
Jutíun-makutáiri =	Sanedrín, tribunal judío.
Kuésmajai =	firmino.


Kuíship =	cédula
Kanutai-jea =	albergue
Makúkratin =	juez.
Nankin-ju =	Soldado, guerrero.
Pámuk =	pastor, instructor y guía.
Pau =	el poste ritual de la casa, la cruz.
Pásuk =	Angel.
Páusak =	contaminación, impureza.
Pénkeri =	su gracia, sus bondades.
Sakin-yuu =	ganado bovino.
Tuná =	pecado.
Tarímiat =	esposa.
Apátkamu, akíntrukma, misátak =	esposa agregada.
Tarímtanam =	en lo básico, en lo fundamental, en la paz.
Utsumka =	Cristo (que ha recibido un poder).
Utsumka-ashí- tujintcha =	Mesías todopoderoso.
Utsúkratin =	que pasa el poder a otro; Obispo.
Uwishín =	Exorcista.
Wáimiaku =	Santo, profeta, poseído por Dios.
Waweamu =	endemoniado, brujeado.
Wáwek =	diablo, demonio.
Wawékratin =	brujo, ministro del diablo.
Wea =	presbítero, sacerdote.

Paletina



- | | |
|----------------|----------------|
| 1. Judea | 5. Perea |
| 2. Galilea | 6. Decápolis |
| 3. Samaria | 7. Traconítide |
| 4. Sirofenicia | 8. Idumea |

Viajes de San Pablo



Primer viaje:



Segundo viaje:



Tercer viaje:



Viaje de Cautiverio:

